



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.


About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>











HIERONYMI OSORII
DE
REGIS INSTITVTIONE
ET DISCIPLINA
LIBRI VIII.



HIERONYMI OSORII

LVSITANI

EPISCOPI SILVENSIS

DE

REGIS INSTITVTIONE

ET DISCIPLINA

LIBRI VIII.

AD

SERENISSIM. ET INVICTISSIM. PORTVGAL. REG.

SEBASTIANVM

E. N. I.

QVIBVS ACCESSIT EIVSDEM AVCTORIS EPISTOLA

AD ELISABETHAM

ANGLIAE REGINAM.

TOMVS I.



CONIMBRICÆ,

TYPIS ACADEMICIS. A. D. M. DCC. LXXXIII.

*Cum facultate Regiæ Curiae Commissionis Generalis
pro Examine & Censura Librorum.*

Taxatum hujus Voluminis pretium est 480. r.

299. g. 23.





HIERONYMI OSORII

LVSITANI

EPISCOPI SILVENSIS

AD SERENISSIMVM ET INVICTISSIMVM

PORTVGALIAE REGEM SEBASTIANVM

E. N. I.

DE REGIS INSTITVTIONE

ET DISCIPLINA ,

LIBER PRIMVS.

✠✠✠ VAM multa mala in res humanas
✠✠✠ Q inuexerit regnandi libido, Princeps
✠✠✠ inuictissime, rerumpbliearum con-
uerfiones, Imperiorumque maximorum rui-
næ, & fumorum Regum clades functiffi-
mæ declarant. Quæ enim gens, rerum gesta-
rum gloria præstans, non hoc morbo con-
cidit? Quod regnum tantis opibus floruit,

Tom. I.

A

vt

2 DE REG. INSTITVT. ET DISCIPL.

vt non hac tandem cupiditate funditus euersum & extinctum sit? Plenæ historiæ sunt; ne scenæ quidem de hoc tanto malo silent; vita etiam communis huius tam diræ pestis exempla prope quotidiana suppeditat; &, quod est magis admirandum, cum omnibus proposita sit vita secunda atque tranquilla; & omnes videant, quam multa pericula illis intenduntur, qui multis imperant, & quantis curis impliciti sint omnes, qui in regia sede locati sunt; ita tamen quidam per omnes flammæ regnandi cupiditate incensi rapiuntur, vt nullus metus, nulla verecundia, nulla religio eos impediât, quo minus omnia tetra facinora machinentur. Primum enim leges, in quibus salus patriæ sita est, odio nimis acerbo persequuntur; omnes magistratus extinctos, atque deletos cupiunt; principibus insidias parant; rempublicam temeritate, & amentia perturbant, vt sic tandem, omnibus præsidii publicæ libertatis per summum scelus ereptis, ipsi soli in republica dominantur. Quin etiam multi usque eo progressi sunt, vt non solum ciues, socios, cognatos, fratres, amicos, sed etiam liberos, atque parentes immanissime trau-

trucidarent , & in res etiam sacrosanctas ,
omnique religione munitas , inuecti, sanctis-
simum Dei numen præ sua effrenata cupi-
ditate contemnerent.. Vnde colligitur , nihil
esse tam sancto jure vallatum , aut tanta reli-
gione septum , quod non perrumpat , atque
disturbet ambitio.

Accedit , quò magis id dolendum sit, quod
ii plerumque , hoc oppressi morbo , in patri-
am teterrimi sunt, qui maxime benefici atque
salutares esse potuissent. Fit enim plerumque;
vt illi potissimum ambitione præcipientes ad
omne facinus stimulentur , qui animo maxi-
mo sunt , & ea de causa potuissent multo fa-
cilius patriæ salutem tueri , atque conserua-
re. Magnus enim animus, si modo, atque ra-
tione vacat , ita turbatur , & ruit , vt , quo-
cumque impetum dat , horrendas strages ef-
ficiat. Adjuuat autem eorum , qui ad sum-
mos honores aspirant , insaniam multitudinis
error , atque dementia , quæ sæpenumero
nullum scelus detestabile iudicat , quod re-
gnandi causa susceptum sit. Illa igitur Eteo-
clis sententia , quæ est apud Euripidem, qua
scelus suum minime purgat , sed ex scelere
laudem quærit , eo quod per illud sibi ad

4 DE REG. INSTITVT. ET DISCIPL.

regnum viam munierit , in multorum sermone atque prædicatione versatur. Quamuis igitur is , qui ad regnum iter affectat , parentibus , aut fratribus vitam eripiat , & in suorum sanguine atque cæde bacchetur , vt ea ratione facilius imperio potiatur ; tamen vt vir animi maximi , imperioque dignissimi , a multis laudari solet. His autem sermonibus inflati quidam , nullam sibi iniquitatem & injuriam dedecori fore suspicantur , ex qua possint ad aliquem gradum imperii & amplissimi honoris ascendere. Unde concludi potest , nihil esse animo maximo , si non fuerit ratione temperatus , rebus humanis infestius.

Vt autem illis , qui ita sunt affecti , omnia procedant , vt volunt , & imperia , quæ nimis sitienter appetunt , facile consequantur , quos tandem fructus ex imperio suo percipient ? Curas , sollicitudines , angores , vitam molestissimis negotiis implicatam , iniquissima postulata , districtum animum , & inter offensionis metum , & rei familiaris atque publicæ diligentiam , miserabiliter hæsitantem. Si omnia latronibus suis largiuntur , opes suas profundi sentiunt ; si eis aliquid

quid denegant , hostes in se concitant illos ipsos , quorum se fide communierant ; si regni administrationem familiaribus suis permittunt , omnia regni præsidia dilabuntur ; si per se omnia curare volunt , inanem curam , & sine vlllo fructu percipiunt , horamque nullam habent metu & solitudine liberam. Sic autem fit , vt multi , qui Principes haberi volunt , nulla in re , neque dormi , neque foris conquiescant ; nullam vitæ suauitatem gustent ; nulla voluptate animo libero atque soluto perfruantur.

Adde nunc inuidiæ fraudes inexpiabiles ; adde sceleratorum hominum proditiones ; adde formidines , horrores , atque pericula , quibus amplissimus ille locus obsessus est ; adde postremo diros casus , quibus magnorum Principum vita sæpe concluditur. Quid nam igitur causæ esse putem , cur , cum omnes videant , nihil esse magis expetendum , quam placidæ , quietæ , & tranquillæ vitæ constantiam , sint tamen ita multi , qui nullo modo quietem pati possint , eamque vitam modis omnibus expetant , quæ est pacis & tranquillitatis experta , & periculosis admodum tempestatibus in diuersas partes iactata !

6 DE REG. INSTITVT. ET DISCIP.

ta? Num eam pestem a natura datam hominibus, ut, hac cupiditate cæci, deficiant a mente, & sponte atque voluntate sua præcipientes in miseriam sempiternam irruant? Nullo modo; nec enim est illius summiconditoris & Domini, qui naturam vniuersam finxit, pestem hominibus machinari; hominum tamen inconsiderata temeritate fit, ut naturæ principia, quæ ad salutem & honestatem data sunt, ad perniciem & ignominiam conferantur. Nec enim impetus animi regnum appetentis vituperandus est, sed mentis cæcitas, quæ illo impetu uti nescit; &, dum regnum sibi parare nititur, seruitutis miserrimæ vinculis alligatur. Est namque in animis nostris insitum quiddam generosum, excelsum atque magnificum; dignitatis appetens, imperandi studio incensum, nullos labores, dummodo gloriosi sint, nulla vitæ pericula honestatis gratia recusans. Non enim ad otium, & ignauiam, nec ad futes & inanes voluptates; sed ad officium, & industriam, & animi contentionem; sed ad decus & honestatem, quæ labore & studio comparatur, nati, suscepti, ab ipsaque natura imbuti & instituti sumus. Quo fit,
vt

vt cum nemo, bene a natura informatus, otium & securitatem honestis laboribus anteponat; tum illi, qui maiore animo sunt, otium mortis instar esse putent; eaque ratione imperare cupiant, vt virtutis & industriæ suæ fructum percipiant, & ita gloria immortalis circumfluant. Sed multi non intelligunt, quid sit illud, ad quod eos natura vocet, dum regni cupiditatem inferit. Rex enim ille demum habendus est, qui longe, multumque reliquis hominibus honestatis opibus, & ornamentis antecellit. Nam tunc omnis splendor honestatis elucet in nobis, cum mens, quæ est potissima pars animi nostri, principatum obtinet, & regnum sibi a natura datum sapienter administrat; quod facit, cum pro jure suo temeritatem coercet, & libidinem vinculis astringit, & omnes affectiones temperat, & moderatur, sibi que obediens esse compellit. Itaque, qui honestatem expetit, regnum expetit, duceque natura in studium regis majestatis & amplitudinis incitatur. Regia namque majestas ab honestate sejungi non potest; idcirco bruta animantia eo, quod decus & honestatem intueri nequeant, hominibus naturali jure sub-

8 DE REG. INSTITVT. ET DISCIP.

subiecta sunt ; & inter homines is est natura ad reliquos imperio continendos aptissimus ; qui multum virtutis opibus excellit. Ergo , qui regnare pulcherrimum arbitratur , tacite iudicat , nihil esse cum virtutis & honestatis excellentia comparandum.

Postremo , cum homines ad diuinam naturam expressi & apti sint , & idcirco status diuini cupiditate flagrent ; status autem diuini præstantia in imperio , quo naturam vniuersam continet , maxime cernatur ; mirum non est , esse quosdam homines , qui ad imperii cupiditatem , morte etiam propòsita , rapiantur. Ergo , cum natura laudis & dignitatis appetentes sumus ; & cum dignitatis excellentiam omnibus rebus expetendis anteponendam esse iudicemus ; & cum natura , studio , & cupiditate diuinitatis incendamur ; & omnis laus , & diuinæ naturæ præcellentia , in legitimo imperio constituta videatur ; mirandum non est , fuisse multos mortales tanto regnandi studio concitados , vt multis se periculis exponerent , nullumque supplicium formidarent , dum id , quod maxime clarum & expetendum iudicabant , assequerentur. Cum vero non ratione & disciplina , sed im-

pe-

petu cæco naturæ , in regni studium incumberent ; eueniebat necessario , vt rursus errore decepti nunquam ad eum portum , quem petebant , appellerent ; sed , multis tempestatibus agitati , pro dignitate ignominiam subirent , & perniciem non sibi tantum , sed omnibus vectoribus , eorum gubernationi commissis , stultitia sua molirentur.

Vnde perspicitur , nihil esse Principe furioso & amente funestius. Homines quidam , qui principem locum obtinere contendunt , præclara quidem cupiunt ; sed errore mentis ab eo fine , quo intendunt , auersi , patrias suas euertunt , omniumque malorum auctores & architecti sunt. Non enim vident regnandi scientiam , non tantum in imperando , sed etiam in obediendo consistere. Est enim obedientia , qua rationi & imperio legitimo obtemperatur , moderationis , & ordinis , & obsequantiæ disciplina ; quam qui non tenet , regnum rationis amittit , & fit libidinis effrenatæ mancipium. Vbi vero animus fuerit oppressus libidinis impurissimæ dominatu , luce continuo priuatur , & tetra caligine circumfunditur. Qui autem modum non seruat , qua tandem ratione rempublicam vni-

ver-

10 DE REG. INSTITVT. ET DISCIP.

versam moderabitur ? Et , qui est libidinum feruus , quomodo suorum libertatem tueri poterit ? Et , qui mentis cæcitate laborat , quomodo mala reipublicæ impenduntia præcauebit ? Reliquum igitur est , vt quo maior illius potentia fuerit , eo maiores ruinas edat. Vnde concluditur , cum omnibus sapientia necessaria sit , tum vel maxime Reges illius moderatione contineri. Rex enim temerarius & infanus , non Rex , sed Tyrannus existimandus est ; & idcirco nulla ratione potest a republica pestem depellere ; cum sit ipse dira quædam pestis , patriam lue atque tabe conficiens.

Quantum vero inter Regem atque Tyrannum intersit , satis exploratum est. Rex enim diuinæ menti paret , rectam rationem sequitur , juris æquabilitatem colit , fraudem & malitiam coercet , modum & ordinem in omni officio conseruat , rempublicam vniuersam excellentibus meritis obstringit , nullum periculum adire pro salute patriæ recusat , ad gloriæ sempiternæ decus aspirat , & mortem denique contemnit , vt immortalitatem consequatur. Contra vero , Tyrannus Dei numen spernit , rationis imperium repu-

pudiat , libidini & impuritati seruit , jura diuina & humana violat , dolis & fraudibus innititur , veram dignitatem abjicit , & falsam imaginem decoris & dignitatis amplexatur ; & tunc se viri fortis officio egregie functum putat , cum populum sibi commissum formidine perterret , & illius bonis prædatur , vt per vim & fraudem fortunas suas amplificet. Ergo , cum Rex diuino præsidio cinctus sit , & verissimæ honestatis laudibus abundet , & hominum ad se voluntates vehementer alliciat ; consequens est , vt sit in administrando regno sapiens , in repellendis hostibus acer , in constituenda republica moderatus , in iuris æquabilitate tuenda constans , in rerum successibus & euentis felix ; nec ipse solum beatus sit , sed patriam vniuersam felicem reddat , omnibusque bonis affluentem. Tyrannus autem contra , cum sit ope diuina orbatus , & turpitudinum maculis inustus , & hominibus propter malitiam & fraudem inuisus , & omnium mortalium fide & beneuolentia destitutus ; & ea de causa omnia , quæ gerit , partim rabide atque furenter , partim timide atque diffidenter administret ; eueniat necesse est , vt non solum

12 DE REG. INSTITVT. ET DISCIP.

lum ipse corruat , sed etiam omnes , qui sese ad illius ductum & imperium adiungunt , in calamitatem conjiciat. Vnde perspicitur , illa mala omnia , quæ sumus oratione persecuti , non in illum cadere , qui vere Rex est , sed in eum , qui falso Regis nomen vsurpat ; & ita se in omni officio gerit , vt magis immanis Tyranni speciem referat , quam legitimi Regis naturam atque mores imitetur.

Hæc cum mecum sæpe recogito , Lusitaniam beatam existimo , cum Reges eos habuerit , quos nempe dubitare potest extitisse hoc nomine tam sancto & augusto dignissimos. Nec enim vel in religionis sanctimonia , vel in iustitiæ cultu , vel in decoris honestate , vel in virtutis robore , vel in mansuetudinis lenitate , quidquam fuit ab illis prætermissum , quod ad optimi atque fortissimi Regis officium pertineret. Itaque vero factum est , vt eorum nomen memoriæ sempiternæ consecratum sit ; & ipsi in cælo illis opibus , quæ sunt iis Principibus , qui omnia vitæ consilia ad patriæ salutem contulere , Dei beneficio constitutæ potiantur.

De te autem quid homines augurentur , libet dicere. Fore namque suspicantur , vt
illos

illos sanctissimos Principes , quorum stirpe procreatus es , multum virtute superes. Vident enim multa signa , quibus admoniti credunt , te diuino consilio susceptum fuisse , vt omnes terras , quæ tua ditione & imperio continentur , magnis iustitiæ opibus , & inuictæ virtutis ornamentis afficias. Cernunt præterea in te multos industriæ stimulos , qui animum tuum torpere otio & ignavia non sinant : cum vero singularis ingenii magnitudo , & animi excellentis altitudo , & regis virtutis indoles , & reliqua munera tibi diuinitus attributa , te de officio tuo commoneant ; tum maiorum tuorum exempla ejusmodi sunt , quæ te facile possint studio immortalitatis inflammare. Accedit , vt magis id liceat nobis de tua præstanti natura & bonitate polliceri , quod omnes vno ore consentiunt , ortum tuum ad præcipuum atque singulare Dei beneficium referendum esse. Eo namque tempore natus es , in quo propter Regis aui tui sanctissimi Principis orbitatem timebatur , ne regni patrimonium ad externum aliquem Principem cum totius Lusitaniz quærimonia perueniret.

Tu igitur ortu tuo patriæ propter obitum

14. DE REG. INSTITVT. ET DISCIP.

itum patris tui , Principis omnibus carissimī ,
mœrore perditæ & afflictæ magnum solatium præbuiti. Tu tenebras , quibus omnes erant oppleti , diei tui natalis splendore dissipulisti. Tu spem salutis , libertatis , & dignitatis omnibus tuis attulisti. Cum verò matris tuæ , Principis clarissimæ , partus appropinquaret , nescio quo diuinæ mentis appulsu commoti sunt homines , vt ante ad omnes ædes excurrerent , vt Deo de te in lucem edito gratias agerent , quam tu natus esses. Cum autem hominibus adhuc in rebus diuinis rite peragendis intentis repente verus nuncius allatus esset , matrem tuam filium marem peperisse , tanta lætitia consecuta est , vt multi præ gaudio vim lacrimarum profundèrent , & incredibiliter exultarent , teque , non vt infantem feliciter exortum , faustis ominibus , sed vt Regem jam spectatum , lætis acclamationibus prosequerentur. Itaque omnes tunc diuinum beneficium agnouerunt , & spem magnam conceperunt , fore , vt , cum ad maturam ætatem peruenires , maiorum tuorum virtutes , & egregia facta , ingenio , industria , pietate , & animi magnitudine , & contentione superares. Quæ opinio quotidie magis
con-

LIBER PRIMVS. 13

confirmatur ab iis , qui signa pudoris & honestatis tuæ cum altæ mentis significatione conjuncta perspiciunt. Accedit etiam regie disciplina , & magistri probitas , & pædagogi sapientia , & reliquorum hominum nobilium , quibus vteris , virtus , & integritas ; quorum monitis & exemplis credo te mirandum in modum studio immortalis nominis incitari. His argumentis inductus quilibet homo , qui non fuerit mentis expertus , poterit conjicere futurum , vt non sis illis Regibus annumerandus , quorum exitiales exitus extitere ; sed illis potius , qui diuina virtute nixi ad summam felicitatem peruenerunt.

Hac equidem spe impulsus sum , vt opus magnum susciperem , quod tibi minime injucundum fore arbitror. Cum enim tibi jam in ista ætate propositum esse videam , vt in omni genere regie atque propemodum diuinæ virtutis excellas ; & omnia consilia , studia , curæ & cogitationes tuæ ad sempiternam gloriam conferendæ sint ; quid tibi gratius esse poterit eorum studio & voluntate , qui tibi in re tanta operam & studium nauare cupiunt ? Venit igitur in mentem

16 DE REG. INSTITVT. ET DISCIP.

tem mihi mandare literis ea , quæ non multis ab hinc annis cum hominibus amicissimis de Regis institutione , officio , & dignitate disputata sunt. Nam cum me in Bethlehemiticum templum , Regis Emanuelis , omnis memoriæ facile Principis , proani tui , sumptibus ædificatum , rei diuinæ gratiæ contulissem , in hortos ejusdem templi discessi , vt illorum amœnitate animum a negotiorum contentione relaxarem. Erat enim id anni tempus , quo propter odorum , qui e floribus afflabantur , suauitatem , & propter auium concentus , & aquarum deriuationes , nihil amœnius esse poterat. Ibi vero incidi in Laurentium Petreium Tauoram , qui non ita pridem Roma venerat , & in Franciscum Salam Menesium , homines artibus , illa nobilitate dignis , in primis eruditos ; qui quidem me satis amanter amplexi sunt , & ego item illos , vt mos est amicorum , salutauim. Postquam vero assedimus , Franciscus Portugalsis interuenit, homo, qui claritatem generis multis artium maximarum disciplinis ornauit ; quem post mutuam salutationem in medium recepimus. Is igitur eo quod multos jam dies in villa , sacris illis ædibus con-

jun-

juncta commoratus esset , & in regiam se minime contulisset , Menesium de tua valetudine , de lucibus , de studiis percunctatus est. Ibi cum Menesius ad omnia respondisset , quædam a te acutissime dicta narravit , quæ nobis non modo risum , sed etiam admirationem commouere. In eum deinde sermonem venimus, vt nihil ex illis signis, quæ paulo ante a me commemorata sunt , omis- sum fuerit ; quæ tantam tui expectationem concitarunt , vt videatur illi respondere difficillimum. Tunc ego ejusmodi sermonem institui , qui materiam longioris sermonis dedit , quam fore ab initio suspicabar ; quem velim, Princeps amplissime, pro tua singulari humanitate attente audias. Multa enim cognosces de rerumpublicarum vulneribus, de remediis, quibus vulnera curanda sunt, de malis, quæ prauam & corruptam Principum educationem consequuntur, de felicitate, quæ recta Principum disciplina & institutione comparatur, de imperii prudenter, & fortiter, & feliciter administrandi ratione, de regno ornando & amplificando, de gloria, & nominis immortalitate paranda, & de præsidiiis, & ornamentis, quibus summus ille Im-

18 DE REG. INSTITVT. ET DISCIPL:

perator & Dominus , qui naturam vniuersam regit , eos Reges afficit , qui sese totos ad illius studium & imitationem contulere. Sic igitur sum exorsus.

Sunt quidem ista ; ea namque signa antegressa & consecuta sunt Sebastiani Regis ortum , vt omnes existimarent , illum esse nobis diuinitus oblatum , atque donatum , qui rem Lusitanam non conseruaret tantum , sed etiam auget , imperiumque latissime propagaret. Auget autem hanc spem nostram & illius species , & animi alacritas , & acumen ingenii , & virtutis indoles ; quæ , si fuerit exulta disciplinis , dubium non est , quin sit ad summam laudem & gloriam peruentura ; in qua tamen re non mediocris diligentia adhibenda est. Si enim illius instituendi & monendi studium fuerit aliqua ex parte remissum , isque minime ingenium ad artes præclaras adjunxerit , auresque dare cœperit perditis & profligatis adolescentibus , & hominibus omni flagitio & scelere contaminatis ; quo est clarius illius indoles , eo maioribus vitiis inquinari poterit ; & ita (quod Christus prohibeat) grauiora detrimenta rebus communibus importabit. Vt enim ager neglectus &

incultus , quo fertilior est , eo magis spinis , & vepribus , & agrestium plantarum asperitate vastatur ; ita cum animus minime colitur liberali disciplina , quo clarior est illius indoles , eo pluribus & tetrioribus vitiis obruitur. Quo enim vis. animi præstantior est , eo in quamcumque partem impelitur , se gerit vehementius. Sic autem fit, vt quemadmodum cum virtutem colit , inter omnes , qui non tantum ingenio & industria valent , excellit ; ita , cum se ad nequitiam applicat , omnes improbos flagitio & improbitate superat. In reliquis quidem hominibus non ita multum interest , qualibus quisque disciplinis imbutus sit ; sibi enim tantum & paucis præterea nocebit , qui male fuerit institutus. At Rex , quem omnes intuentur , ad cuius exemplum se fingunt , cuius imperium sequuntur , si fuerit nequam & improbus , totum regnum exemplo nequitiae corrumpet , omnesque opes reipublicæ iniquitate & intemperantia sua dissipabit. Nihil igitur tanto studio providendum est , quam vt Regis animus ita adstrictus disciplina teneatur , vt nunquam ad flagitium & dedecus labi possit. Ergo, dum animus illius tener est,

25 DE REG. INSTITVT. ET DISCIPL:

dum regi potest, dum se docilem præbet, cavendum est, ne quidquam audiat, quod sit officio illius contrarium; operaque danda, vt ludi etiam, quibus ætas illius ducitur, ad regiam disciplinam conferantur. Sapienter enim faciunt ii, qui cupiunt filios suos aliquo artificio præcellere, cum eos ita a primis annis erudiunt, vt id ludibundi contentur imitari quod artis illius perfectione continetur. Sic autem iis, qui pictores egregii futuri sunt, ludus in prima ætate laudabilis est volucrem aut quadrupedem pingere; similiter & fictorum filii per ludum aliquid e cera fingunt, quod parentes laudant; & eadem ratione in reliquis artibus eo ludo oblectandus est puer, qui non multum ab eo artificio, cui pater illum præficere valde cupit, abhorreat. Facile namque cuius est artis illius perfectionem assequi, quam puer per ludum assidue est imitari conatus. Nam cum multum in quolibet artificio valeat ingenium, tum assiduus vsus atque disciplina tantam vim habet, vt nihil omnino sit tantis difficultatibus obstrusum, quod non is, qui ad eam artem natus & aptus est, facillime studio atque meditatione consequatur.

tur. Si igitur in artibus, Principe parum dignis, tantum momentum habet illa puerilis institutio atque meditatio, vt absque ea sit viris difficillimum in aliqua commode versari; quid tandem est de illa omnium maxima atque præstantissima iudicandum? Quid enim maius est, quam continere imperio populos, deuincire multitudinem disciplina, coercere flagitiorum licentiam, excitare virtutis studia, & cum denique statum reipublicæ collocare, qui præfidiis firmus sit, & opibus multis abundet? Omnibus igitur, quibus est hoc onus impositum, vt Regum filios erudiant, in eo vigilandum & laborandum est, vt illi, non modo cum magistris operam dant, sed etiam cum ludunt, de officio suo commonefiant, iisque laudis maxime teneantur, qui eos paulatim studio laudis atque regis dignitatis incendunt. Vt enim ædes amplæ non possunt esse firmæ, nisi fundamenta earum alta atque firma jaciantur; ita neque Rex magnus esse poterit, qui non fuerit admodum diligenter regia disciplina ab incunabulis institutus.

Verum id quidem est, inquit Portugalsis. Sed velim scire, quænam disciplina
Regi

22 DE REG. INSTITVT. ET DISCIP.

Regi futuro conueniat, aut quibus artibus animum Sebastiani colendum existimes. Id quidem, inquam, intelligi poterit, si viderimus, quid sit omnibus Regibus, qui sunt hoc nomine digni, propositum, & quibus in rebus eorum officium versetur. Hoc enim constituto, haud difficile erit animaduvertere, quomodo Rex alendus & nutriendus sit, & quo disciplinæ genere ad regis dignitatis, & decoris amplitudinem perducendus.

Vt autem id breuissime dicam, Rex est perpetuus reipublicæ rector atque moderator, vniuersum populum juris æquabilitate deuinciens, virtutisque præsidio conseruans. Regere autem est in rectum finem dirigere, Rector igitur & moderator populi id agit atque molitur, vt populum in finem, in quem omnes intueri debent, modo, & ordine, atque disciplina perducatur. Est autem finis, florens & beatus reipublicæ status. Beatus vero reipublicæ status malorum omnium depulsione, & bonorum complexione perficitur. Mala autem non ea solum numeranda sunt, quæ homines vulgo pertimescunt, penes morbus, inopia, seruitus, dolor, calamitas, ignominia, & reliqua generis ejusdem,

dem ; sed multo etiam magis flagitium , scelus , ignauia , effrenatæ libidines , & reliquæ animorum labeſ , quæ vitam miſeram & ærumnoſam efficiunt. Similiter etiam bona , non tam in abundantia pecuniæ , aut in valetudinis firmitate & integritate , & in rebus ejusmodi , quæ vel in corpore ſitæ ſunt , vel ad corporis cultum & oblectationem conferuntur , quam in animi decore atque dignitate , & in virtutis conſtantia , & gravitate conſiſtunt. Regis igitur officium eſt , non ſolum commodis patriæ atque ſaluti conſulere , & hoſtium impetum a finibus regni magna belli contentione reprimere ; ſed multo etiam magis reſecare libidines , coercere petulantiam , iniquitatis & injuriæ fibras euellere ; vniuerſamque rempublicam honeſtatis ornamentis afficere , virtutumque omnium præſidiis firmare. Aliter enim neque reſpublica beata eſſe , neque Rex officio ſuo ſatisfacere vilo modo poterit. Hoc fundamento poſito , non erit difficile conſiderare , quam multis difficultatibus implicatum ſit Regis officium & munus. Si enim cuilibet homini , bene a natura informato , & ingenuis diſciplinis erudito , non facile ne-

24 DE REG. INSTITVT. ET DISCIP.

gotium est cupiditatem ratione comprimere, virtutisque præsidia & ornamenta comparare; quantum tandem munus erit illius, cui hoc commissum est, vt non se tantum ab omni cupiditate flagitiosa contineat, & virtutis amplitudine inter omnes excellat; sed vt omnem rempublicam ab omni turpitudinis contagione tutam & incolumem præstet, & omnibus virtutibus honestam efficiat? Summa igitur sapientia, summa prudentia, summa totius animi alacritate, & vigilantia, invictoque virtutis & constantia robore opus est, ad tantum munus feliciter obeundum. Sic igitur de pueri Regis institutione cogitate, quasi de illo, in cuius consilio, virtute, diligentia, probitate, postquam is ad maturam ætatem peruenerit, omnis reipublicæ vita, salus, & dignitas, omnisque beati status ratio collocanda sit; vt intelligatis, qualibus opinionibus sit jam a primis annis imbuendus, & qualibus deinde moribus atque disciplinis instituendus, vt possit tantum onus subire atque sustinere.

Neque solum animi, sed corporis etiam, ratio habenda est. Corpus enim imbecillum animi virtutem plerumque debilitat, & a rebus

bus acriter & animosę gerendis abducit. Vtrumque igitur curandum est , vt & corpus sit valetudine firmum , & animus recte moribus & vita constitutus. Sanitatem atque vires efficit in corpore victus moderatio , & exercitatio ; virtutes autem excitat in animo Philosophiæ studium ; quo nihil vtilius ad Reges erudiendos & cohonestandos cogitari facile potest. Est igitur cursu , palestra , telorum jaculatione , & ludicra inter æquales armorum contentione diligenter exercendus ; vt non modo corpus illius robustum fiat ; verum etiam animus alacrior , & ad res strenue gerendas promptior euadat. Vt enim corpus infirmum animi industriam frangit ; ita bene valens atque robustum animum reddit alacrem , & omni rerum discrimine confidentem. Ingenium vero est literis admodum diligenter excolendum , artiumque maximarum disciplinis acuendum , vt sapientiam regio muneris maxime necessariam eo studio consequatur. Hæc enim studia pudorem , & modestiam ingenerant , animum cupiditatem dignitatis incendunt , & ad rempublicam salutaribus institutis temperandam erudiunt.

Illud tamen in primis summo studio providen-

26 DE REG. INSTITVT. ET DISCIP.

videndum est omnibus, qui Regis instituendi curam suscipiunt, vt animum illius a primis statim annis summo studio religionis imbuant; sine qua nullum studium veræ dignitatis extare potest. Omnes enim virtutes a Deo manant, illiusque beneficio & numine continentur. Numen autem illius est pietas atque religione placandum. Itaque tribus his studiis, quantum puerilis ætas ferre potest, Regem Sebastianum institui cupio, nempe palæstra, & literis, & religione. Si enim corpus exercitatione firmauerit, & animum artibus præclaris excoluerit, omniaque vitæ consilia ad religionem direxerit; augurari poterimus, fore tandem, vt hostes illius congressum in armis exhorrent; ciues autem illum miro amore diligant; Deus vero (quod omnium bonorum caput est) eum præsidio suo fulciat, atque præsentis numine tueatur.

Hæc quidem ego non eo animo perstrinxi, vt longioris sermonis materiam præberem: imo si suspicatus fuisset id fore, quod euenit, fortasse tacuisset; neque tanto cum periculo sapientiæ famam mihi colligendam existimasset. Nam primum quidem Tauora ridens me amice monuit, vt inuidiam

diam vitarem. Se namque vereri, si sermo hic meus in vulgus emanaret, ne in me impetus omnium fieret. Philosophiam namque ab omnibus existimari nobilitate prorsus indignam; &, ne illius contagio Regibus aliqua ex parte noceret, in ultimas terras ablegandam. De corporis quidem exercitatione, atque de religionis studio, se mihi libenter assentiri, Regem sine illis non posse in officio suo satis commode versari. Nec enim, inquit, animus acer atque vehemens esse potest corpori molli & effeminato deinctus; neque sine ope diuina quisquam tantum pondus vlla ratione sustinebit. Quod vero ad Philosophiam attinet, valde metuo, ne in te multi satis petulanter inuehantur; quod velis hoc studio Principis animum a virtute & industria ad languorem atque desidiam auocare. Exponam igitur tibi, non meam quidem sententiam, ea namque fortasse a tua non valde discrepat; sed multorum opinionem, qui non Philosophiam modo, sed ita omnes litetas oderunt, ut eas ab omni republica, præcipue vero ab aula regia, ut malum auspiciū detestentur. Non mediocrem enim ab illis pestem atque perniciem Regibus

28 DE REG. INSTITVT. ET DISCIP.

bus comparari censent. Dicam igitur quæ multi dicant, & quæ contra Philosophiam ab acutioribus etiam disputari possunt, ut cum ea infirmaueris atque sustuleris, armis tandem instructus tuis queam illis resistere, qui magno quodam odio & impetu in Philosophiam, & in omnes præclaras artes inuadunt.

Primum quidem igitur hoc negare non possumus, eos homines, qui sapientiæ student, lucem fugere, celebritatem vitare, otium modis omnibus amplexari; & sic tandem torpore desidique languescere, ut neque prompti, nec experientes esse queant; sed sint semper ad omnia negotia, siue publica, siue domestica, prorsus inutiles. Otium enim illos corrumpit. Vt enim ferrum usu & exercitatione splendet; diuturno autem situ squallet, & rubigine paulatim exeditur atque conficitur: similiter humana mens officii viro dignis acuitur; otio autem isto, quod homines Philosophiæ studiosi conseruantur, hebescit, & quasi squalore obducto corrumpitur. Pugnant enim hæc inter se, nec in vno homine simul habitare possunt, otium videlicet, atque negotium. Et otium
quidem

quidem animis, neque maximis, neque maximarum rerum cupidis, videtur accommodatum; negotium vero animum acrem & vigilantem, & studio dignitatis incensum requirit. Otium deinde homines etiam natura industrios & vehementes indies mollit, & inertes atque desidiosos efficit; negotium vero hominem natura desidiosum de somno suscitatur, & ad res strenue gerendas impellit. Cum Rex igitur ad tanta negotia, singulis diebus transigenda, & ad tam multa pericula, quæ semper impendent, propulsanda natus sit; quid minus conuenit, quam pati mentem illius otio eneruari? At Philosophia sine summo otio constare non potest? Reliquum igitur est, ut ea a Regibus attingi non debeat. An non satis nos admonet quorundam Philosophorum stupor & ignauia, quanta vitæ pestis futura sit, si studium hoc animum Regis occupauerit? Quoties enim domo pedem efferunt, ita propter insolentiam hominum atque lucis ingrediuntur, ut ne vestigium quidem firme ponere, aut, quo tendunt, satis explorare queant. Cum autem in multitudinem incidunt, adeo titubant, & hæsitant, & notos perinde atque ignotos prætereunt, ut
fatis

38. DE REG. INSTITVT. ET DISCIPL.

latis appareat, eos neque mores hominum, neque vitæ consuetudinem, neque vrbis, in qua sunt nati & educati, regiones, neque postremo viam., quæ fert in forum, nosse. Neque facile est aliam causam hujus stuporis assignare, nisi literas, in quas se penitus abdiderunt; quo enim magis sese ad illas applicant, eo magis ab omni humanitatis sensu deferuntur. Thales, aut quis alius, (non enim recte memini, neque sane multum refert scire, quod illi nomen fuerit) is igitur, cum inambulans cælum suspiceret, in puteum incidit; tum seruula ridens, ait: egregium hominis sapientis acumen, dum cæli plagas intueri conatur, puteum ob oculos positum non videt? Lepide atque festiue dictum, & quod in omnes homines istis artibus deditos egregie quadrat. Dum enim summo studio res ab humana cognitione remotissimas peruestigant, nec ea quidem, quæ versantur in communi vita, cernunt, neque pericula, quæ sunt intenta rebus suis, aspiciunt.

Quid igitur absurdius, quam, cum nobis opus sit Rege acutissimo, acerrimisque sensibus instructissimo, Regem artibus illis institui, quæ sensus omnes eripiunt? Cujus quidem

quidem rei nullum testimonium grauius esse potest eo , quod a Philosophis ipsis perhibetur. Exponam enim vobis quod ab omnibus Philosophiæ deditis accepi. Dicunt igitur hominis Philosophi vitam esse vitæ communi valde contrariam. Nec enim (vt aiunt) voluptates exquirunt ; neque dolores extimescit ; nec honores ambit ; neque gloriam desiderat ; nec odio , aut amore , aut alio denique ejusmodi sensu commouetur. In eo enim statuunt esse positum hominis sapientis officium , vt animum, quoad fieri poterit , a corporis conjunctione diuellat , humanosque sensus repudiet ; vt ita tandem libere & solute res cælestes atque diuinas inspiciat. Quamdiu enim animus est nimis alligatus corpori, negant fas esse verum cernere ; sed rerum tantum umbras , & inanes imagines consuetari. Cum igitur sensus aspernentur , & eos, qui sensus consulunt , arbitrentur in summa veritatis ignorance versari, omnis eorum sententia illi iudicio, quod oritur a sensibus, aduersatur. Inde fit , vt quemadmodum nec opes, nec honores , neque vitæ cultum , neque bonam valetudinem , nec vllam denique voluptatem in veris bonis numerant ; ita neque

32 DE REG. INSTITVT. ET DISCIPL.

que inopiam , nec obscuritatem , nec aduersam valetudinem , neque dolorem in malis. Hoc igitur ex eorum decretis efficitur , opus esse illi , qui sapientiæ studet , ut omnibus sensibus orbetur ; vt sic tandem ad sapientiam sine cunctatione perueniat : sic autem fiet , vt qui valde sensu communi caret , valde sapiens sit ; & cuius vita proxime ad conditionem mortis accedit , is demum beatæ vitæ compos existat.

Sit igitur ita fane ; demus hoc illis esse stupore isto ad sapientiam præclare munitam viam , & eum , qui nullam dulcedinem vitæ sit expertus , vita beata frui ; qualis tandem erit ista sapientia ? Aut quod adiumentum rebus communibus importabit ? Num inscelus seuerè vindicabit , qui nescit irasci ? Num hominis afflictæ miseriam subleuabit , qui misericordia flecti nequit ? Num hostis ferociam armis atque virtute comprimet , qui belli pericula pro nihilo habenda putat ? Quid enim illum excitabit , vt bellum animo acri & vehementi suscipiat ? Num laudis atque dignitatis studium ? At in eo valde se jactat , quod popularem famam , & nominis celebritatem despiciat ? An , ne opibus spoliatur

tur, acerrime decertabit? At omnes opes in animi grauitate & constantia fitas esse decernit; & eandem constantiam tum vel maxime se retenturum confidit, cum fuerit omnibus fortunis exspoliatus. Non, inquires, sua causa laborabit, sed vt ab illis, qui in illius tutela sunt, pestem auertat. Quam pestem harras? Eam ne, quam ille ne tantulum quidem curandam arbitratur; nempe inopiam, dedecus, & seruitutem, & patriæ totius interitum? Restat igitur, vt sapiens ille, quamuis omnes cæli regiones mente definiat, & siderum omnium cursus cognitione comprehendat, omnesque naturæ obscuritates perscrutetur & inspiciat; nulla tamen ratione possit lucem aliquam ciuibus suis afferre. Tantum vero abest, vt Philosophia Regibus vtilitatem afferat; vt potius videatur omnes regni opes euersura, si Reges sese ad studium illius adiunxerint. Nec enim solum inutilis est, sed nescio quomodo illius studiosos irretitos detinet, ne queant vlla ratione rei suæ familiari consulere. Vt enim quisquam maxime proficit in literis, & in Philosophiæ disciplinis; ita difficillime ab earum studio, & commentatione diuellitur. Sic igitur euenire

34 DE REG. INSTITVT. ET DISCIPLINÆ

neceſſe eſt, ſi reipublicæ Princeps ſe literis, & iſti eruditioni dediderit; vt vel exiguum fructum ex illis ferat, vel magnum detrimentum ciuibus ſuis inferat. Si enim parum temporis in illis poſuerit, non magnum ſane fructum ex illis colliget: ſi vero multum temporis in eo ſtudio conſumpſerit, rempublicam curare non poterit. Sic enim erit affixus libris, vt nec hominum querimonias quotidianas exaudiat; neque potentium iniuriis obſiſtat; neque ſupplicibus opem ferat vllam; neque legum ſanctiões obſeruare cogat; neque iuuentutem in armis contineat; neque hoſtium ferocitatem acri belli contentione retundet; neque denique munus vllum boni Regis & Principis adminiſtret. Nam cum omnes mortales officia vitæ magna ex parte voluptate metiantur, & in ea quiſque ſtudia maxime propenſus fit, ex quibus maximam voluptatem capit; tum id in Regibus multo magis apparet. Nec enim quidquam mediocriter appetunt, &, quidquid volunt, valde volunt. Si igitur literis oblectari cœperint, quis eos ab illarum ſtudiis abducat? Quocirca ſtatim a principio cauendum eſt, ne capiantur ea voluptate, quæ illos abſtra-

hat

hat a cupiditate alterius voluptatis , quæ maxime Regem decet. Quænam tandem ea est , inquis ? Ea videlicet , quæ ex laude , & celebritate , & fama percipitur. Quod si ex literis etiam dignitatem petendam existima-uerint , periculum est , ne in illis ita defigant animum , vt alio traduci non possint. Fieri enim nequit , vt mens humana multis simul muneribus intenta sit. Cum enim vis illius sit exiguis terminis definita , fieri necesse est , vt quo se vehementius ad studium vnus applicat , eo magis de studio alterius remittat. Si igitur Rex animum ad studia literarum libenter & studiose contulerit ; valde metuendum est , ne segnis ad imperandum sit , & rempublicam valde negligenter administret. Hoc quidem in primis optandum est , ne Rex alia voluptate teneatur , nisi ea tantum , quæ tota est in fructu nominis immortalis , & verissimæ gloriæ constituta. Quod si aliquando (vt est hominum natura ad remissionem animi , & corporis suauitatem procliuis) aliis sese voluptatibus dederit , videte quantum periculum ex literarum studio Regibus impendere putent homines. Tolerabilius arbitrantur multi , vt in adole-

36 DE REG. INSTITUTE. ET DISCIPLINÆ

scientia Rex eas voluptates appetat, quæ facietate abjiciuntur, & rationis iudicio contemnuntur, & gloriæ studio repelluntur; quam eas, a quibus propter, nescio quem, splendorem, & honestum oblectamentum, sit abduci & auerti difficillimum.

Itaque facilius ferendum existimant, Principem in ea ætate, quæ est naturæ blandimentis obnoxia, libidinis vtitata labe contaminari, quam literis diligenter incumbere: illud enim flagitiosæ voluptatis dedecus, & admixtæ turpitudinis offensio, facile potest claram indolem ad odium turpitudinis ipsius adducere, & ad honestatem & officium reuocare: at voluptas, quæ percipitur ex disciplinis, neque fastidio affinis est, nec ætate contemnitur, neque gloriæ studio repudiatur; imò specie quadam gloriæ, quam ostentat, homines magno ingenio præditos sempiternis sibi vinculis astringit. Euenit igitur, vt, qui his studiis oblectatur, nihil aliud agat, nihil velit, nihil amet, nihil cupiat; eoque tantum cogitationes suas conferat, vt summum gradum eruditionis obtineat. Homines igitur fugiet, domi se quàm carcere & tenebris inclusum continebit, omnem ætatem in otio consumet,

& languore desidiaque paulatim intabescet. Si igitur Rex in studia istarum disciplinarum incubuerit, habebit tunc misera respublica Principem philosophum, hoc est, hominem torpore languidum, otio fractum & debilitatum, fori atque lucis insolentem, & quasi quodam veterno vehementer oppressum. Vt autem in patrisfamilias negligentis atque dissoluti domo cernimus alios seruos ludere, alios ebrios jacere, alios tumultum commouere, & inter se rixari, & interim omnem rem familiarem dissipari & auerti, & in nequitia consumi; sic in toto Regno, simul atque Rex otium fuerit amplexus, necesse continuo erit alios in omni libidine impune volutari, alios turbas atque dissidia concitare, innocentium fortunas diripi, opes regias paulatim consumi atque funditus exhauriri. Otii enim comites sunt languor, inertia, lentitudo, timiditas, ignauia; quæ vitia si in animo Regis infederint, nihil aliud restat, quam vt occupet animos omnium summa rerum desperatio, & appropinquet communis salutis exitium.

Cernitis jam animo, quantum malum, & quam dira calamitas vniuersæ reipublicæ

ex

38 DE REG. INSTITVT. ET DISCIP.

ex nimio otio rectoris impendeat? At istius sapientiæ studium sine summo otio constare non potest. Accedet etiam ille stupor, aut immanitas, cujus fecimus ante mentionem. Studia enim ista plerumque sensibus hominem spoliant, & cogitationem a magnitudine cladis abducunt. Memorix proditum est, cum M. Marcellus caperet Syracusas, vnum fuisse ciuem, Archimedem nomine, summum Mathematicum, quem nec horrifonus armorum strepitus, nec acrium militum furor, neque foeda suorum ciuium cædes, neque mulierum plangor & ejulatus, nec omnium clamores in cælum sublati potuerint ad aliquem sensum publicæ calamitatis & exitii perducere. Adeo namque erat formis, quas forte tunc radio in terra describebat, intentus, vt, priusquam ciuitatem captam esse sentiret, fuerit a milite, qui in illum inciderat, interfectus. Hinc satis apparet, quantam vim habeant istæ disciplinæ ad sensus opprimendos, & mentem stupore defigendam. Fin- gamus igitur animo Regem, qui non solum Mathematicus sit, vt Archimedes, verum etiam Physicus, & si placet etiam Theologus. Si aliquis ergo Rex esset his omnibus stu-

Studiis addictus, quis non videt, quanta ex ea tam multiplici doctrina reipublicæ calamitas immineret? Quamuis enim respublica rueret, id certe neque sentiret, neque animaduerteret; nec ad se pertinere putaret; nec enim esset quidquam, quod illum a tantarum rerum suauissima consideratione remouere posset. Si igitur, vt salui simus, opus est nobis summa Regis industria, celeritate, vigilantia, sensibus acutissimis, & in omnes regni partes intentis; quomodo non erit indignum, & absurdum Regem illis artibus infici, quæ desidia ingenerant, & sensibus omnino priuant? Deinde, non venit vobis in mentem, quanta futura sit, si hoc vsu aliquando venerit, vitæ communis offensio? Sunt enim omnes, qui reliquos homines antecedunt sapientia, vulgo suspecti & inuisi; existimant enim plerique, sese ab iis, qui sapientiæ opinione præcellunt, irrideri; simplicitatemque suam illorum cauillationibus nimis objectam esse molestissime ferunt; neque audent cum illis contrahere, nempe a quibus infidias sibi fieri suspicantur. Regis autem statum esse oportet suorum fide, & beneuolentia, non absurdæ & inuisæ eruditionis
offen-

40 DE REG. INSTITVT. ET DISCIP.

ostentatione munitum. Vt enim linguæ communio, vitæ cōsensus, morum similitudo coniungit animos; ita sermonis ignoti sonus, dispar vitæ cultus, moresque dissimiles omnem conjunctionem animorum dirimunt, Quare fieri non potest, vt sit eis, qui sibi sapientiam arrogant, aliqua cum reliquis hominibus fidelis atque firma conuentio. Illi namque sapientes genere orationis vtuntur, acuto illo quidem, nobis tamen incognito; ad animosque nostros minime permanente; nos vero vulgare & vsitatum genus orationis sequimur, & receptis opinionibus accommodatum, Deinde illorum sententia a communi hominum more & consuetudine vehementer abhorret; nos contra ab illis vt stulti & insani contemnimur, & perpetuo disputationum conuictio laceramur. Illi vt plurimum vitam horridam & incultam agunt, & cum illorum supercilio mirifice congruentem; nos autem splendidæ vitæ cultu & elegantia delectamur. Cum igitur communis hominum vita cum illorum vita pugnet, & lingua linguæ dissimilis sit, & opiniones opinionibus aduersentur; efficitur plāne, nullam posse nos cum illis firmam societatem

tatem inire, & stabilem amoris consensu-
nem conseruare. Nos enim (vt nihil aliud
dicam) homines sumus ; illi jam pridem
homines esse desierunt. Idcirco fit , vt nec il-
los aliquis nostrorum malorum sensus attin-
gat ; neque nos valde illorum sapientiam
amemus. Cum igitur ista sapientia magis
multitudinem offendant , quam voluntates al-
liciat , omnemque Regis studium in suorum
beneuolentia concilianda ponendum sit ; quid
minus conuenit , quam Reges illius sapien-
tiæ disciplinis institui , quibus a se suorum
voluntates abalienent , & suspiciosas atque
parum fideles efficiant ? Quid enim , quæso,
populos in imperio alienigenæ Regis offendit ?
Quoties enim accidit , vt in aliqua regione
vel hæreditariò jure , vel matrimonio , vel
quauius alià ratione , Princeps aliquis ex ex-
teris gentibus ad regnandum vocètur ; id po-
puli sibi perniciosum fore suspicantur. Quid
igitur eos in eam opinionem adducit , vt ex-
istiment secum pessime agi , (quamuis id non
semper eueniat) cum externi Principis im-
perium subire compelluntur ? Dissimilis cul-
tus , dissona vox , inusitatæ orationis stridor
horrorem quemdam imperitis incutiens. Sic
enim

42 DE REG. INSTITVT. ET DISCIP.

enim natura fert, vt quilibet non modo vſitato patriæ cultu & veſtitu, ſed etiam natiuo ſermone, aut ſaltem ſibi comperto & cognito delectetur; externo autem & aduentitio non mediocriter offendatur. Neſcio enim quomodo ſonus ille ſermonis nobis ignoti injucundus ad aures noſtras accedit, & vocis illius genus vaſtum, (vt videtur) & abſonum, denſi cujuſdam ſpiritus abſurditate, ſenſum audiendi vulnerat. Inde adeo fit, vt vix ſit vlla natio, quantumuis agreſtis & barbara, quæ non ſibi tam in veſtitu, quam in oratione valde placeat, & reliquas nationes vt barbaras & incultas aſpernetur. Quamuis igitur externus ille Princeps ſit in omni genere virtutis excellens, non facile poterit ſubditorum voluntates allicere, niſi corporis cultum & ornamentum mutet; & orationem etiam gentis illius, in quam eſt imperium aſſecutus, aſſueſcat imitari, ne ſemper alienus exiſtimetur. Si igitur tantum valet ad animos conjungendos idem cultus, & eadem loquendi conſuetudo; quid tandem ſimiles mores & inſtituta perficient? Et ſi tantum momenti eſt in leuiſſimarum rerum diſſimilitudine ad animos alienandos, quid erit de rerum

rerum earum , quæ vitam omnem continet , varietate & dissimilitudine judicandum ? At Philosophi non modo lingua loquuntur aliena ; nemo enim eos intelligit , nisi qui est eadem disciplina penitus imbutus ; neque solum alieno & obsoleto cultu vestiuntur , sed etiam sensu , sententia , moribus , institutis , totiusque disciplinæ decretis vitæ communi repugnant ; & longe aliter de jure & injuria , de rebus honestis & turpibus , de bonis denique & malis existimant , quam reliqui homines opinantur. Nihilque verius esse statuunt , quam id , quod est longissime a communi sensu disjunctum ,

Ergo si nihil est magis optandum Principi , quam esse carum atque jucundum suis , & benevolentia vitæ similitudine continetur , & dispari vivendi ratione dissolvitur ; & si constat nihil esse magis a populi totius moribus alienum , quam Philosophorum vultum , incessum , non modo disciplinam ; nihil certe absurdius esse videtur , quam tradi Regem Philosophis erudiendum. Deinde quem fructum ex illis feret , quo tantum damnum compensare queat ? Aut enim nimiam (ut diximus) operam in Philosophia ponet , aut
eam

44 DE REG. INSTITVT. ET DISCIP.

eam leuiter attinget. Si nimiam operam in ea consumpserit, quando rempublicam administrabit? Quomodo enim poterit in illo exiguo tempore, quod ei a studio vacauerit, tantum munus mente, consilio, virtute, industria sustinere? Fieri profecto non potest, vt simul & studio sapientiæ vigilanter incubat, & muneri, quod illi assignatum est, pro dignitate satisfaciatur. Quod si tanto Philosophiæ studio tenetur, vt in illo sibi ætatem conterendam statuatur, negligat opes regni, rejiciat honestatem, discedat a dignitate, fateaturque se non tantum animi atque mentis habere, vt intelligat omnem iucunditatem, & artium liberalium cognitionem, esse præ Regi decoris amplitudine contemnendam. Si vero Philosophiam leuiter attingere vult, minimum certe ex illa fructum percipiet. Nec enim fuit vnquam, qui mediocrem gradum eruditionis esset sine multo labore consecutus. Quid ergo amentius, quam Regem artibus illis imbui, quarum si valde studiosus fuerit, sit ei Regis officium deferendum; si vero negligenter eas coluerit, minimam ex illis vtilitatem percepturus sit?

Sed dices, det operam his studiis saltem

in

in adolescentia: postquam vero ad rempublicam tractandam accesserit, ea, si placet, omit-
tat: stultum & miserum, adolescentiæ flo-
rem in illis artibus conteri, quæ sunt statim
obliuione prorsus obliterandæ; omnes enim
istæ disciplinæ, si non sunt assidue cultæ, in-
defesso que studio retentæ, aut saltem ex in-
teruallo reuocatæ, elabuntur & excidunt.
Non ita est, inquires; nec enim vnquam sic
elabuntur, vt non aliquæ reliquiæ, ad vitam
recte constituendam valde salutare, animis
infixæ remaneant. Id quidem credibile non
est, vt tenues istius eruditionis reliquiæ non
tenuem, sed magnam vtilitatem constituent.
Illud igitur doceri sane velim, quæ tanta ex
artibus illis vtilitas comparari potest, vt illa-
rum paruæ reliquiæ rempublicam conseruent?
Nam si disciplinarum istarum leuiter im-
pressum vestigium tantam vim habet ad to-
tius Regni statum salutare atque firmo præsi-
dio muniendum; necesse profecto est, vt ea-
rum Principes sint opibus diuinis egregie
culti, summisque virtutibus ornatissimi. Illo-
rum igitur opera facillime poterunt omnes
respublicæ, in quibus illi floruerint, rectis-
sime constitui, & omnibus præfidiis & orna-
mentis

28 DE REG. INSTITVT. ET DISCIPL.

gis odiosum & inuisum, aut magis reipublicæ perniciosum, quam virtutis species assimulata. Cum vero constet, sapientes istos maxima ex parte virtutem ementiri, & ambitione interim, & avaritia, & aliis ejusmodi sceleribus implicari; quamuis aliqui vere & ex animo virtuti studeant, & sint in omni vita moderati; non tanta tamen utilitas, ex bonorum exemplo percipitur, quantum ex improborum flagitio & improbitate detrimentum. Nam cum maiorem plerumque vim habeat improbitas ad perniciem, quam bonitas ad salutem; tum illi, qui vitia virtutis simulatione contegunt, sunt innumerabiles; qui autem vere virtutem colunt, si cum eorum, qui simulant, multitudine conferantur, sunt paucissimi. Accedit quod cum eruditi hominis occultum & intestinum scelus, sub virtutis ficta specie latens, manifesto deprehenditur; similiter vocantur in suspensionem assimulatæ virtutis reliqui sapientes, qui virtutis studio flagrant. Sic autem fit, vt ex bonorum exemplo tenues admodum fructus excipiantur; ex malorum autem improbitate damna quamplurima rebus communibus afferantur. Sed non laboro quam vere, aut
fictè

Atque sese in studio virtutis exerceant. Sint omnes per me honestatis & continentiae laude præstantes, dummodo id, quod nobis vtile futurum est, nempe virtutis exemplum, publice constituent; quod vero nocere potest, aut saltem non est multum utilitatis allaturum, illam videlicet admirandam naturæ peruestigationem, homines a rebus gerendis auocantem, ab hominum coetu remoueant. Non dico multis in locis religionem esse disputationibus eorum violatam, generosæ mentis indolem repressam, virtutis nervos incisos; id tamen dico, ut nullum sceleris aut libidinis vestigium in illorum scriptis appareat, & multa. eaque præclara de virtutis amplitudine & gravitate disputent; non tamen tantum utilitatis importabunt, virtutem summis laudibus exaggerando, quantum rebus publicis nocebunt, Principes ab administratione reipublicæ ea disciplinæ suauitate deducendo. Præterea, quod ad virtutem adinet, ea quæ docere possunt in promptu sunt omnibus; & quamvis non tam subtiliter & acute, non minus tamen commode a parentibus, & pædagogis, & a viris prudentibus, qui cum Regibus assidui sunt,

facillime tradi possunt. Nec enim indigemus Rege, qui virtutem acute definiat; sed qui virtutis officio strenue fungator. Reliqua autem, quæ docti homines inculcant, multum quidem obscuritatis & admirationis habent, vtilitatis autem parum. Vt enim nihil sit in omni rerum natura tantis inuolutum difficultatibus, quod non penitus videant; quid poterit ex illa naturæ cognitione ad vsum reipublicæ transferri? Num Princeps quidquam ex eorum disciplina percipiet, quo vel rempublicam commodius gubernet, vel hostibus acrius in bello resistat? Non profecto. Parum ne, inquis, hæc studia pulchra sunt? Sint sane, si velis, etiam pulcherrima & iucundissima, dummodo constet ea nullum adiumentum communibus rebus allatura: imo quo magis iucunda sunt, eo magis metuendum est, ne Princeps, illorum iucunditate perfusus, sibi permitti muneris obliuiscatur.

Quod si hæc vera sunt, quæ contra Philosophos disseruntur, eos, censeo, procul amandemus, ne sese in gratiam nostri Regis insinuent. Alibi igitur ludum aperiant; alibi ingenii sui acumen ostendent; alibi doceant; & non vbi tantum periculum eorum opera con-

flari

uari perspicimus. Quod quidem illi, si non mentiuntur, non admodum indigne patientur. Id enim præ se ferunt, & in eo maxime glorientur, quod cum omnia humana despiciant, tum gratias Regum, atque Principum pro nihilo habendas arbitrentur. Si igitur ita est, libenter ex aulicorum hominum turba & colluione semigrabunt, & Regis familiaritatem deserent; ne quidquam sit illis impedimento, quo minus omnia cæli spatia mente peragrent. Si vero mentiuntur, & simulant se illas opes contemnere, quarum insatiabili cupiditate incensi sunt, non modo ne doctrina sua noceant, sed etiam ut impudentissimi mendacii poenam luan, in oras longinquas exilii causa compellendi sunt. Quoquo igitur modo, siue velint, siue nolint, a Regis familiaritate discedant. Quod si fecerint, & ab hominum nobilium turba segregati vitam omnem in sapientiæ studio consumpserint, inopia & egestate conflictabuntur. Nam cum is, qui ut sapientiæ vacare possit, omnia contemnat, nec agrum colat; neque mercaturam faciat; neque negotium gerat vllum; neque artem teneat vllam, qua sibi victum comparet; & id tantum

tum vnum curet, vt simpliciter & candido philosophetur; quid aliud ei restat, quam vt extrema quadam inopia & egestate prematur? Quid igitur ineptius, quam, cum Regis officium sit opibus suis multorum inopiam subleuare, & ea de causa sit ei summa diligentia laborandum, vt opes ingentes habeat, eas illi artes tradere, quarum doctores inopes & egentes sunt? An non tandem id eueniet, vt omnes opes suas imminui & dissipari sinat, & summa interdum inopia distringatur.

Ex his, quæ dicta sunt, colligi certe potest, omnes, qui Philosophiæ operam dant, aut inutiles esse, aut valde perniciosos. Si enim sine furore atque fallaciis genus illud vitæ colunt, & Philosophiæ penitus addicti sunt; quomodo laborabunt in rebus illis aut parandis, aut augendis atque tuendis, quas minimi faciunt? Si vero simulant se eas despiciere, cum tamen earum infinita cupiditate teneantur, quid poterit illis perniciosius excogitari? Cum enim ad summam improbitatem ingenii acumen, & disciplina non vulgaris adiungitur; tanta vis mali est, vt sustineri non possit. Quid enim excogitari potest malitiæ
præ-

præclaris artibus instructa & armata valentius ad rempublicam euertendam? Homo enim nequam & improbus, si fuerit disertus & eruditus, rempublicam dicendo conturbat; & ad quoduis flagitium impellit; & majore quodam artificio scelus occultat; & ita vulnus multo grauius imponit, manifestum enim scelus facile aditu prohibetur; at quod in probitatis fœda specie latet, priusquam animaduerti possit, incautos interimit. Sic igitur fit, vt Philosophi simplices & aperti nemini prosint, & sibi noceant; malitiosi vero atque fraudulentæ reipublicæ plurimum noceant, vt sibi tantum prosint. Qualis est igitur hæc sapientia, aut ad quem vsum comparanda, quæ quidem est vel in bonitate inutilis, vel in improbitate pestifera? Si enim totius antiquitatis memoriam replicare voluerimus, reperiemus ea mala, quibus maxima Imperia corruerunt, fuisse magna ex parte per homines eruditos importata. Pericles enim, qui fuit auctor belli illius, quod Atheniensium Imperium afflixit, Anaxagoræ fuit auditor. Alcibiades patriæ pestis extitit. Critias ciues suos tyrannide vehementer oppressit, & vterque eorum operam dedit Socrati.

De-

Demostenem similiter accusabant inimici, quod causam funesti belli ciuibus suis attulisset, qui quidem Platonis (vt aiunt) discipulus fuit. Magnum argumentum est, non esse reipublicæ salutare Principes eruditos habere; quod videmus quantam multis in locis cladem ciuibus suis attulerint Principes eruditi. Cum enim homo omni doctrina perpolitus ad summos honores obrepit, alterutrum frequenter accidit; vt vel quæstus & compendii gratia rempublicam in fraudem conjiciat; aut sapientiæ opinione subnixus temere de communibus rebus statuatur; & ita patriæ firmamenta conuellat. Nihil enim est magis summæ temeritati finitimum illa confidentia, quæ fere semper est cum summa eruditione conjuncta.

Quid cum accedit eloquentia? Quis tunc poterit magnitudinem tantæ calamitatis arce-re, quanta rebuspublicis impendetur? Facillime namque eloquentes homines, in quamcumque partem volunt, multitudinem imperitam vi, & impetu orationis impellunt, & in exitium, quoties illis lubet, furibunde præcipitant. Quid illud? Num leue argumentum est existimandum ad eruditionem hanc a re-

pu-

publica repellendam , quod omnes ferme ciuitates , quæ rerum potitæ sunt , eo tempore conciderint , quo liberalis eruditio , & Philosophia , & eloquentia , & omnium artium ejusmodi disciplinæ , a paruis initiis excitatæ ad summum peruenerant? Reputate, quo tempore Atheniensium ciuitas imperii naufragium fecit: quo Thebæ, Argi, Carthago, Rhodus, aliique quamplurimi imperiosi populi funditus euerfi sunt: quo Roma libertatem amisit: eo certe, quo Philosophia maxime florebat, & summa eloquentia dominatum sibi in republica comparabat. Non igitur immerito cum Carneades, Critolaus, & Diogenes, summi Philosophi, & eloquentiæ laude præstantes, legati ab Atheniensibus Romanam missi fuissent, Cato eos statim dimittos & ablegandos censuit; ne nouo illo & insolito doctrinæ politioris genere, & orationis vbertate & elegantia, indolem Romanæ virtutis infringerent. Metuebat enim vir prudentissimus, ne iuuentus omnem impetum animi ab armis ad eruditionem traderet; & quanto vehementius sese ad eloquentiæ studium adjungeret, tantumdem bellicæ gloriæ studio, & triumphorum cupiditate

tate detraheret. Quod si accidisset, non dubitabat fore, vt Imperium Romanum interiret. Sapienter enim iudicabat, id, quod armis, non literis quæsitum fuerat, armis, non literis esse retinendum. Vt autem externa linquamus, nostrorum annalium memoriam repetamus, vt videamus quibus artibus olim Regnum Lusitanix creuerit, Num literis? Num Philosophiæ decretis? Num eloquentia? Non certe. Omnes enim tunc erant istarum artium rudes & ignari. Quin etiam multi viri nobiles ne legere quidem sciebant. Attamen illa rudis & inculta iuuentus duces non eruditos, sed magnanimos, animo forti & confidenti secuta, in omnibus bellorum tempestatibus inuicta permansit; victricia signa in Mauritaniam intulit; multas Solis orientis regiones armis peragravit, immortaliaque multis in locis virtutis monimenta constituit. At his temporibus, quibus multi Lusitani sunt ita culti disciplinis, vt ad eorum laudem, qui magnum ex illis nomen & gloriam consecuti sunt, aspirare non dubitent, vix ea, quæ sunt maiorum virtute parta, retinemus. Vnde plane liquet, agrestem vitæ cultum, & infantiam, esse

esse virtutis militaris affinem ; & munditiam, & elaborati sermonis elegantiam, esse eum ignauia & timiditate conjunctam. Ergo quemadmodum duris, incultis, horridis moribus Imperia comparantur ; ita vitæ molli cultu, & immodico literarum studio, Imperii virtute parti opes euertuntur. Quare nescio, quomodo possim eorum sententiæ repugnare, qui censent Principes literis excolendos non esse ; sed antiquitatis rudis & impolitæ moribus imbuendos. Aliter enim minime dubitant, quin omnia ruitura sint. Est enim nobis opus impigro & audaci Principe, laboris patientissimo, ad pericula belli fortissimo, qui possit intestinum scelus ferro seueritatis excindere ; & hostium immanitatem armis & virtute profligare. At literarum studiis aiunt animos desides & ignauos effici, multumque de vitæ periculo cogitantes.

Vt autem orationi nostræ jam finem imponam, dicam breui, quid mihi in Principe desiderandum esse videatur. Primum quidem opus est, ut sit acer, vehemens, & incitatus ; ita ut otium ferre non queat, tantoque studio laudis incensus, ut mortem verissimæ gloriæ causa vltro appetendam arbitretur.

Deinde

38 DE REG. INSTITVT. ET DISCIP.

Deinde illum clementia & bonitate præditum esse conuenit ; vt suorum sibi benevolentiam conciliet , statumque suum amore multorum atque fidelitate communiat. Deinde is homo sit , qui odio , & amore acriter incitetur ; vt & scelus vlciscatur , & virtutem pro dignitate remunerat. Illum denique (ne latius, quam par est, vagetur oratio) Regem volumus, quem, cum opus ita fuerit, ira commoueat ; cura sollicitet ; misericordia flectat ; & a nimia interdum seueritate ad lenitatem traducat ; qui gazam minime compressam domi contineat , sed eam instrumentum benignitatis existimet ; nec ad coaceruandam pecuniam hominum operis abutatur, sed, vt hominum saluti prospicere possit , pecuniam sibi quærendam putet. Qui denique non sibi se, sed patriæ natum, censeat ; omneque imperii decus & ornamentum in virtutis amplitudine collocandum statuatur. Hæ virtutes omnes, si literis atque Philosophia comparantur , aut saltem adiuuantur , & augentur ; nihil prius faciendum puto , quam vt Regem Philosophis erudiendum tradamus , atque committamus ; illosque, e quorum videlicet disciplina tota salus reipublicæ pendet , patriæ

triæ parentes appellemus. Si vero (vt multi dicunt) Philosophiæ studium animos otio corrumpit ; si humanitatis sensu spoliât ; si virtutem etiam debilitat , si vel ex arrogantia inuidiam colligit , vel ex immanitate in se odium concitat ; si postremo , cum vere & ingenue colitur , inutilis est , cum autem ostentationis & quæstus gratia suscipitur , pernitiosa ; ita vt merito vel contemptui sit , vel summi sceleris flagret infamia , nihil certò videtur esse Regis institutione magis detestandum. Vt igitur omnis legum atque morum nouitas merito semper inuisa fuit , vix enim vnquam sine perniciæ reipublicæ totius inducitur ; ita hæc noua ratio Principis instituendi respuatur. Aliis igitur doctoribus illum Principem erudiendum tradamus , quem magnum , regiòque nomine satis dignum videre cupimus ; qui illum non argumentis obtundant , sed clarorum hominum exemplis incendunt , & ad fidem , ad iustitiam , ad libertatem , ad omnes lenitatis & clementiæ laudes erudiant ; in eoque nervos omnes intendunt , vt Regem non modo fortem & strenuum , sed in omni genere religionis atque pietatis excellentem nobis efficiant. Hæc autem

60 DE REG. INSTITVT. ET DISCIP.

tem doctrina magis ex Lusitaniæ monimentis , quam ex Philosophorum scriptis & institutis , petenda esse videtur. Nec enim Lusitani Reges literis , quibus se nunquam dediderunt , sed armis atque virtute , quam summo studio coluerunt , victorias innumera- biles adepti sunt ; nec Philosophorum argutiis , sed optimis legibus & institutis rem- publicam temperarunt ; nec eloquentiæ or- namentis , sed factis egregiis , illustrati sunt.

Si igitur volumus , vt Sebastianus noster maiorum suorum similis euadat , opera dan- da est , vt a primis annis equitare , venari , jaculari condiscat , & assidue se in armis exerceat ; vt sit valetudine firmus , & exerci- tatione robustus , & ad res animose gerendas alacer ; ne vnquam laborem vllum honestum fugiat , aut vitæ discrimen adire dignitatis gratia reformidet. Perficiendum enim est , vt dedecus magis , quam mortem & cruciatum exhorreat. Quod vero ad literas attinet , le- gere & scribere sciat , & aliqua ex parte la- tinos Poetas , & Romanam historiam at- tingat ; ne omnino rerum earum , quæ sunt omnibus peruulgatæ , rudis existimetur. Il- lam vero disciplinam summo studio colat ,
quæ

iustitiam continet, qua vna salus pa-
 nitur. Teneat igitur patriæ leges, & in-
 ta ciuilia, eaque sibi perpetuo confer-
 la putet; nullamque rempublicam con-
 re posse vilo modo statuat, in qua a le-
 diuinarum, & humanarum æquitate
 editur. Auaritiam odio persequatur; sit
 vindex scelerum; turpitudinem igno-
 ia plectat; dignitatem & honestatem de-
 ornamentis afficiat. Illa tamen ei præ-
 a cura sit, vt Deum timeat, & tota
 te in studium pietatis & religionis inci-
 r. Sit præterea maximus veritatis cultor,
 atque fraudis inimicus, & omnibus, qui
 adaciis innituntur, infensus. Hæ sunt ar-
 quibus Dei numen placatur; & homi-
 beneuolentia conciliatur; hostes metu
 ciuntur; vniversaque respublica firmis-
 o præsidio munitur; & florentem atque
 tum statum consequitur. Hæc igitur om-
 qui præstiterit, minime doctorum ho-
 rum scriptis indigebit. Hæc quidem mi-
 in præsentia occurrunt, quæ disputari a
 ltis possunt, qui censent Philosophiæ stu-
 m non solum Principibus parum prodes-
 sed multum etiam obesse. Si hæc igitur

64 DE REG. INSTITVT. ET DISCIP.

vt omnes amicos meos participes huius meæ laudis efficiam. Sed exspecto quid ad hæc responsurus sis.

Hic, ego cum me ad respondendum pararem, Menesius anteuertit, inquiens.

Non patiar vlllo modo, Tauora, te solum eloquentiæ laudem aucupari. Certum est igitur mihi experiri, quid efficere dicendo possim; maxime vero, cum multa, quæ a te dicta sunt, minime mihi probaueris. Primum quidem in eo tibi minime assentior, quod vniuersam Philosophiam vituperas; multa enim (vt te credo nosse) genera Philosophorum sunt. Antiquissimi enim toti erant in naturæ peruestigatione, & in inquirendis rerum principiis occupati; quibus successit Socrates, qui primus (vt aiunt) Philosophiam e cælo auocauit, & ad considerationem rationis atque mentis humanæ traduxit. Hic igitur de recta morum & vitæ constitutione, de familiæ disciplina, de iustitiæ sanctitate, de reipublicæ moderatione recte atque sapienter administranda quæsiuit. Omnis igitur illius doctrina minime ad ostentationem ingenii, sed ad beatæ vitæ rationem pertinebat. Ab illo autem fluxerunt multæ Phi-
lo-

loſophorum ſectæ , inter ſe plurimum & ver-
bis & ſententia diſſidentes ; quæ tamen ,
quod attinent ad vitæ diſciplinam , biſariam
diſtingui atque diſtribui poſſunt. Alteri nam-
que ſenſus eripiebant , & humanitatem ho-
minibus detrahebant , qui non immerito a
multis expoſi & ejeſti ſunt. Alteri vero ad
rectum uſum ipſarum affectionum , quæ ſunt
nobis a natura tributæ , diſcipulos ſuos inſtrue-
bant : & illi quidem , ut opinor , Stoici ; hi
vero partim Academici , partim Peripatetici
erant appellati. Erat autem hæc Academicorum ,
& Peripateticorum diſciplina ſapiens
& verecunda , & multis ingenii opibus in-
ſtructa , & ſatis ad humanam vitam accom-
modata. Non enim erant ii Philoſophi , qui
orbarent hominem ſenſibus ; ſed , quemadmo-
cum ſenſibus uti conueniret , ſapienter &
commode diſſerent. Non extrahebant radi-
citus opiniones natura inſitas ; ſed , in quem
finem eſſent omnes affectiones animi referen-
dæ , diſputabant. Nec erant auctores ſtuporis ,
& immanitatis ; ſed clementiæ , & lenitatis ,
& moderationis , in qua vna omnem vitæ
dignitatem & conſtantiam ſitam eſſe ſtatu-
ebant. Nec aliena (ut inquis) lingua ute-

bantur ; sed vulgari & vsitata. Nec neglecto
& obsoleto cultu vestiebantur ; sed eo , quo
ciues suos ornatos esse videbant. Cumque ingenio
& disciplina præcellerent , se tamen in
oratione & vestitu sui temporis moribus accommodabant ; & ita se in eorum sensus insinuabant , vt facile homines ad se amandos allicerent. Non pauci igitur ab ea disciplina Principes extiterunt , qui & bellicis artibus ,
& pacis ornamentis summam laudem & gloriam consecuti sunt. Vt igitur fateor eam Philosophiam , quæ hominem humanitate spoliât , esse Principibus indignam ; ita censeo illam , quæ est magistra pudoris , & honestatis , & ciuilis societatis , & bellicæ etiam virtutis , esse Principibus instituendis aptissimam. Non enim lucem & celebritatem fugit , non famam negligit , non solitudinem & tenebras sequitur ; sed totam se dat ad erudiendos homines ; & omnes ciues inter se legibus , & institutis , & foedere societatis astringit. Illum tamen Neoptolemi valde probô : Philosophari placet , sed paucis ; nihil est enim in omni Principum vita moderatione præstantius.

Te igitur , cum eas artes enumerares ,
qui-

quibus Reges a pueritia sunt instituendi, valde admiratus sum, quod id omiseris, in quo tota boni Regis laus collocanda est. Quid illud est? Inquies. Modus, & temperatio quædam, quæ si non fuerit adhibita, nullum studium, quamuis honestum & laudabile natura sit, laudari jure poterit; omne id namque, quod modum transit, est in vitio ponendum. Recte quidem tu, atque sapienter metuebas, ne Rex, nimis studio literarum deditus, ita earum voluptate teneretur, ut a libris auelli non posset. Quid si aliquo alio studio nimis etiam teneatur? Non idem omnino incommodum eueniet? Imo multo grauius, quo magis multa ex illis studiis, quæ recensuisti, sunt ab humanitate disjuncta: hoc enim negare non possumus, studia literarum homines etiam natura feros & truces ab agresti quadam immanitate traducere: vnde id euenire cernimus, ut quo quisque magis se ad bonas literas applicat, eo magis clemens atque benignus euadat. Si igitur studium illud, quod ad omnem humanitatem excolit, cum immoderate suscipitur, vituperandum est; quid erit de illo existimandum, quod non ad humanitatem erudit;

sed potius natura sua in animis feritatem quamdam ingenerat.

De palæstra quidem fileamus ; nam tam indigna regia maiestatem est , vt verbis explicari non possit. Omne autem , quod maiestatis & dignitatis non est , nullo modo censeo in Regum educatione permittendum : nisi tu fortasse pulchrum censes , Regem suorum manibus vexari , & corporis etiam totius nixu premi , & impelli , & contorqueri , atque postremo in terram projici. Quod quidem non solum indignum est ; sed etiam asuescit quemuis hominem nobilem Regem contemnere , quem prostrauit , vel saltem cum quo sine verecundia luctatus est.

Vis præterea vt Rex equitare , venari , jaculari condiscat , & se frequenter in armis exerceat. Quod corpus Regis his studiis exercendum putas , laudo : quod nullum illis modum præfinis , vitupero. Si enim Rex , vt primum de venatione loquar , siluas atque nemora assidue peragrauerit , vt bestias vestigiis omnibus persequatur , summamque laudem in illarum strage constituerit ; eueniet tandem , vt Regem ferum & agrestem habeamus , ad omnemque regiam disciplinam
pror-

prorsus indocilem. Tales enim plerumque euadimus, quales sunt ii, cum quibus viuimus; vsque adeo, vt, si feras etiam multum sectati fuerimus, sit etiam necesse mores nostros paulatim efferari. Si Rex igitur assiduus in venatione fuerit, & multum de nemoribus, & lustris, & de ferarum latibulis, & de canibus atque venabulis cogitauerit, humanitatem tandem exuet, & pro clementi atque benigno Principe ferum & inhumanum se præbebit. Deinde, qui venationibus assuescunt, difficillime ab ea voluptate retrahuntur: cum vero Reges vt plurimum sint magis voluptatibus suis obsequentes, quam reliqui homines; eueniet, si fuerint nimis dediti venationibus, vt nemo possit illos a siluis abstrahere, vt negotia transigant, & regium munus administrent. Adde postremo falsam illam virtutis opinionem, qua sibi Principes assentantur, cum fugientem bestiam persequuntur, eamque venabulo coniecto transuerberant: nihil enim existimant esse sibi reliquum ad summam laudem, eamque virtutis indolem, quæ erat studiis militaribus incitanda, in ingentis apri cæde, aut in magni cerui lethali vulnere consumunt, &, quasi

70 DE REG. INSTITVT. ET DISCIP.

si sit jam ab illis egregiæ virtutis signum datum , neque hostes , neque bella cogitant , nec vllum sibi trophæum proponunt , nec ad vllam laudem Imperatoriæ laudis aspirant.

Quod etiam de ludicra armorum exercitatione dicendum est. Princeps enim , qui nimis diu in eo ludo versatur , præter modum durus & agrestis efficitur ; & præterea , laude gladiatoria contentus , optimi Regis laudem minime quærendam existimat. Id igitur in primis Regi præscribendum est , ne nimis se vel in venatione , vel in armis exerceat ; in omnibusque rebus modum illum seruet , in quo tota virtutis atque laudis præstantia consistit. Literarum vero studium ita cum corporis exercitatione conjunctum esse cupio , vt neque nimium studium literarum sine corporis exercitatione corpus ipsum frangat , atque debilitet ; neque corporis exercitatio sine literis animum omni humanitate spoliet.

In eo vero quod dixisti , omnem curam eorum , qui Reges instituunt , in eo collocandam esse ; vt eos summo studio religionis imbuant , te reprehendere non possum ; constat enim omnes virtutes religionis gremio ,

at-

atque sinu contineri. Sed vide, quid illis respondendum existimes, qui statuunt esse quendam religionis etiam modum, sicut rerum aliarum, quem qui transgreditur, periculum est (vt aiunt) ne omnia officia conturbet.

Vtar autem illorum rationibus. Qui enim nimiam operam in religione procuranda consumunt, & sic numen exhorrent, vt nihil agere, nihil moliri, nihil decernere audeant, quomodo poterunt rempublicam administrare? Partim enim, quia nullum eis tempus a religionis cultu vacat; partim, quia dies atque noctes attoniti Dei metu distinentur, nullum neque publicum, neque domesticum munus obire possunt; nec vllam vitæ tranquillæ partem suscipere; nec enim acer in bello; nec in insidiis explorandis industrius; nec in augenda re familiari diligens; nec in gerendo negotio callidus is esse potest, qui nimis est vinculis religionis impeditus; semper enim horret, & tremit, & si pedem extra numerum mouerit, ne in grauem Dei offensionem incidat, extimescit. Quare nimiam istam religionem illis relinquendam esse dicunt, qui se totos ab hominum turba, & a negotiorum molestia remouerunt; vt
om-

72 DE REG. INSTITVT. ET DISCIP.

omni cura soluti liberius possent Deum pro omnium salute venerari. Quorum quidem ego pietatem admiror, non tamen ita, vt ea Reges nostros implicari pulchrum arbitrer. Non enim omnes omnia decent. Quod enim vni generi hominum decus & dignitatem adiungit, alteri insignem labem dedecoris aspergit. Si enim cantor publice clarissima atque suauissima voce cecinerit; aut si gladiator in publico spectaculo strenue decertauerit; aut pictor penicillo, quam volet, formam expresse-rit; laudem certe quilibet eorum arti suæ consentaneam assequitur: at Rex, si simile quidquam designare voluerit, non mediocri ignominia deformabitur; nec enim fieri potest, vbi muneris alieni dignitatem consequi studet, vt suam retineat: ad hunc autem modum necesse est, vt, quod certum genus hominum religionis sanctissimæ sacris alligatum exornat, multum de Regis honestate diminuat. Videte autem quo nomine laudamus eos, qui religionis gratia cœtus hominum reliquerunt: quod omnes opes, & voluptates aspernati sint; quod omnia humana contempserint; quod ad rerum cælestium cupiditatem exarserint; quod in vitâ manentes

ex

ex hac tamen vita quodammodo exceſſerint ,
 vt tota mente in cælo verſarentur. Quid igitur ?
 Feretis ne vos Regem , qui lucem hominum atque
 celebritatem vitet ? Qui opes omnes aſpernetur ?
 Qui ſenſus humanos repudiet ? Qui neque negotium
 vllum ita gerat , vt appareat eum animo præſentem eſſe ,
 neque caſus humanos ad ſe pertinere arbitretur ?
 Nullo modo. Qui enim cunctas opes humanas
 deſpiciunt , quo tandem modo atque ratione res
 humanas moderabuntur ? Et qui homines fugiunt ,
 quo pacto hominibus imperabunt ? Quapropter non
 modo erit hæc nimia religio parum decora Regibus ,
 ſed etiam periculofa & infeſta. Quoties enim ei
 religio oblata fuerit , quod sæpenumero illis euenire
 neceſſe eſt , qui valde ſuperſtitioſi ſunt , hærebit ,
 & titubabit , & implicabitur , nullumque exitum
 inueniet. Si vero belli motus increpuerit , quo
 animo ſe ad bellum comparabit is , qui omnia ,
 propter quæ homines inter ſe bella gerunt ,
 deſpicit atque contemnit ? Nec enim vt gloriam
 quærat , quam valde negligit ; nec vt veltigalia
 tueatur , quæ minimi pendit ; nec vt injuriam
 perſequatur , in cujus obliuione pietatis ſumus

summam ponit , bellum animose suscipiet : neque is erit postremo , qui , cum omnia agi , atque ferri viderit , id admodum moleste patiat , cum nulla grauis cura animum illius perturbet , qui supera tantum atque diuina spectat , neque est magnopere de commodis hujus vitæ sollicitus. In omni igitur negotio , siue ad juris administrationem , siue ad belli gerendi rationem pertineat , ita superstitione conflictatus hærebit , vt nihil expedire possit ; sic autem dum injectis animo scrupulis nihil explicat , & recens aliquod negotium negotiis vetustis adjungitur ; & aliæ res expediendæ , aliis vel neglectis , vel impeditis , accumulatur ; tanta multitudine negotiorum obruitur , vt omnem curam reipublicæ constituendæ desperatione fractus abjiciat. Et reuera quidquid pigritiam Regibus affert , in summis est malis numerandum. Id enim est , quod vires animi frangit ; corporis valetudinem atque robur debilitat ; maiestatem Regis imminuit ; veterem disciplinam corrumpit ; iuuentutem luxuria atque deliciis effeminat ; hostes feroces & infestos efficit ; omniaque tandem firmamenta reipublicæ labefactat. Cum vero nimia religio causam hu-

hujus inertię atque pigritię afferre videatur, minime mirandum est, si homines, cum Principes suos nimia religione teneri & impediri perspiciunt, id molestissime ferunt, & de illorum superstitione assidue conqueruntur.

Quid igitur? Inquires: Tu regium esse putas religionem negligere? Minime vero. Christianus enim sum, nullum que tam immane facinus esse puto, quod sit aliqua ex parte cum religionis negligentia comparandum. Illud tamen dico, quemadmodum rerum aliarum, ita & religionis esse modum, quem qui transgreditur, similiter est in vitio, atque si nimis timeret, vel nimis auderet, vel nimis amaret, vel odio nimis duceretur, vel ad rem nimis attentus esset, vel nimis in re familiari dissolutus, vel denique (ne omnia persequar) in aliqua re alia medium illud minime teneret, in quo est tota virtutis ratio constituta, Placet enim in primis Horatianum illud:

*Est modus in rebus, sunt certi denique fines;
Quos ultra citraque nequit consistere rectum.*

Vt igitur facinus est infandum, religionem spernere; ita non leue flagitium Principis esse multi judicant, immodica religione distineri,

III

Illi quidem, quibus hoc vnum munus assignatum est, qui, ne quid aliud facerent, sese ab hominum multitudine segregarunt, eo conatus omnes comparent, vt summo studio res diuinas peragant, totoque animo in religionem incumbant; ita tamen vt modum etiam, quem debent in genere suo conseruare, prudenter adhibeant. At Rex, cui tantum munus impositum est, vt infinita prope negotia in regni procuratione sustineat, cum diei principium fuerit a modicis precibus auspiciatus, re diuina per sacerdotem rite peracta, statim se ad res strenue gerendas accingat; intelligatque vitium minime ferendum Principis esse, a negotiis publicis obtentu religionis auocari. Caueat deinde, ne, dum alienum officium exequitur, & suum negligit, vtrumque peruertat. Omnis enim reipublicæ interitus in munerum perturbatione consistit. Dum enim quilibet suum negotium non facit, sed alienum officium atque munus vsurpat, nihil recte, nihil ordinate fieri potest; sed omnia perturbari & commisceri necesse est; & ita tandem rempublicam fractam atque dilaceratam discordiis extinguui. Vt enim tutor artem suam tueri minime poterit, si

simul tonfor esse velit ; neque rursus tonfor in arte sua commode versari , si simul calceos facere discat ; & similiter in reliquis ejusmodi artificiis , qui neglecto suo alienis operam dat , omnes , quantum in se est , illas artes , in quibus sibi elaborandum esse putat , evertit ; ita in publicis muneribus , qui plus vno fungi cupit , & plura onera subire non dubitat , oneribus ipsis cum magna reipublicæ perniciæ succumbit. Itaque pessime agitur cum republica , in qua miles officium mercatoris vsurpat ; & imperator cum publicanis societatem coit ; & scribe exercitum instruit ; & denique , ne plura recenseam , tanta temeritas & insolentia in republica dominatur , vt quilibet eorum , qui certo muneri præest , officio suo minime contentus , reliquos magistratibus suis pellere nititur , vt ipse solus omnes administret. Multa enim tunc incommoda reipublicæ subeunda sunt. Primum enim natura humana non patitur , vt vnus homo ad multa simul natus & aptus sit. Deinde in eo tantum munere versari possumus , in quo multum operæ & studii consumpsimus. Deinde vt simus ad omnia nati , & in multis artibus diu atque vehementer

78 DE REG. INSTITVT. ET DISCIP.

exerciti, quod fieri non potest; vt id tamen fieri possit, negotiorum multitudine distentus animus nullum poterit feliciter expedire, cum in nullo queat tota mente versari. Multa igitur male gerat opus est, qui multa simul gerenda suscipit. Ergo cum aliquis multa simul onera sustinere vult, suum officium non facit, & aliena conturbat, officiorumque omnium rationem & ordinem peruertit. Graues deinde offensiones excitantur, cum honoribus digni quorundam impudentia, qui sibi omnia sumunt, ab omni reipublicæ administratione repelluntur. Tum, quod est necessario consequens, ciuiles discordiæ atque pestiferæ dissensiones oriuntur. Postremo chaos illud antiquum a viris olim eruditis excogitatum existet, cum omnia, quæ erant distincta locis, designata ratione, & modo atque ordine distributa, quorundam hominum auaritia, temeritate, & ambitione inuersa, perturbata, & confusa fuerint. Ergo, cum tantum malum officiorum confusio communibus rebus importet, quid fieri poterit amentius, quam Regem, quasi minimum sibi negotium datum sit, alienis negotiis atque muneribus implicari. Quod si ne-

go-

gotium aliquod est nimis ab officio Regis alienum , id videtur multis esse , quod ad religionum curam atque moderationem pertinet. Si igitur Rex nimio studio religionis negotia tractare cœperit , rempublicam prodignitate tractare non poterit : religionis igitur negotia religiosi hominibus administranda relinquat; ipseque munus sibi commissum vigilanter administret ; intelligatque Regis religionem præcipue in hominibus benigne audiendis , in negotiis strenue conficiendis , in bellis fortiter administrandis , in beneficiis large atque munifice (si constiterint merita) conferendis , collocanda esse. Illa namque sanctissima religio habenda est , quæ in proprii cujuslibet muneris & officii perfunitione consistit. Rex igitur , qui officio suo egregie functus fuerit , non multum certe hominibus religioni consecratis de sanctitate concedet. Secus autem si se nimium eorum rebus immiscuerit , & ad eorum instituta penitus cognoscenda mentem & intelligentiam conuerterit , propriam Regis sanctitatem conseruare non poterit.

Hæc quidem sunt , quæ a multis hominibus prudentia & auctoritate præstantibus disputari solent , qui de immodica Principum
no-

nostrorum religione assidue conqueruntur. In eo vero quod dixisti , ad Regis officium pertinere leges & instituta ciuilia nosse, velim intelligere, quæ sit tibi mens & sententia. Num putas reipublicæ Principem esse disciplina Iuris Ciuilis imbuendum , vt quasi quidam leguleus veterator & calidus formulas actionum componat , & cum iis , qui juris prudentes haberi volunt , acute disceptet ? Quid est autem , quæso, quod magis dignitatem illius diminuere , aut benignitatem deprauare possit illa scientia ? Quam qui profitentur, in rerum minimarum studio versantur ; & lites acri contentione persequuntur ; & summam disciplinæ suæ laudem in malitia & fraude constituunt. Is enim summus Iurisconsultus habetur , qui facillime potest acumine suo leges ad libidinem suam interpretari. Cum igitur abeant studia in mores , (vt inquit ille) si Rex fuerit eorum disciplinis eruditus , necesse erit , vt illorum argutiis & subtilitate delectetur ; vt studia belli , & ornamenta pacis omittat ; vt quo iure , quauē injuria lites subditis suis intendant ; vt ita in iudiciis prauissima ratione dominetur. Regem igitur habebimus animo minuto & angu-

gusto ; rem suam litibus atque calumniis augentem ; omnem mentem suam in iudiciorum fraudes & insidias conferentem ; neque quomodo de hostibus victoriam consequatur , sed qua ratione ciues bonis euertat , calide & argute cogitantem. Nihil igitur minus conuenit , quam Regem istis artibus infici , quæ vel regium illius animum ab amplissimarum rerum cogitatione ad minimarum studium traducant , vel naturam illius simplicem atque benignam , malitiosam , & sordibus auaritiæ contaminatam reddant. Quare , si fieri potest , istis Iureconsultis aditum ad Regem præcludamus , ne illius bonitatem aliqua contagione insitæ prauitatis inficiant. Nec enim pertinet ad Regis officium jus dicere , sed eos iudices dare , qui vere & incorrupte iudicent ; nec ingenii acumen in explicatione dubii & controuersi juris ostentare , sed in eos , qui leges a verò sensu detorquent , animaduertere : quod quidem non tam juris disciplina , quam recto mentis iudicio , & diligenti rerum examine confici potest. Quidquid enim simplex & rectum est , & diuino & humano jure sancitum , facile in mente cuiusuis hominis be-

82 DE REG. INSTITVT. ET DISCIP.

nigni atque prudentis insidet ; quod autem est callidum & fraudulentum natura respuitur , neque potest vilo modo stabilem sedem in sensu bonæ mentis habere. Quod si tamen existimatis non ita commode posse Regem in improbos vindicare , nisi fuerit aliquo modo & ratione disciplina juris ciuili institutus , non valde repugnabo ; dummodo illa moderatio conseruetur , quam in omnibus studiis Regibus maxime retinendam censeo ; in hac arte præsertim , in qua plerumque cernimus , nimium illius studium esse pestiferum. Qui enim mediocriter eruditi sunt , non tantum habent artificii , vt legum simplicitatem varie flectant , & huc & illuc ad libidinem suam contorqueant. At qui magnos in hac disciplina progressus habent , hoc sunt artificio summo consecuti , vt , quidquid velint , legibus omnibus decretum esse disputent ; & , in quamcumque partem se conferunt , pro se jura omnia facere defendant.

Vnde colligitur nimium juris ciuili studium esse fallax , & litigiosum , & infectum , & ipsius juris & æquabilitatis inimicum. Et reuera juris & æquitatis ratio sic est com-

mu-

munibus sensibus infixæ , vt nemo sit , (dummodo aliquid valeat ingenio , & mentem cupiditate cæcatam non habeat) qui non mediocri disciplina adutus facillime possit , quid iustum & æquum sit ; mente & cogitatione percipere. Qui igitur totam ætatem in juris studio conterunt , non tantam operam in eo posuissent , si bonum & æquum tantum in juris ciuilibus explicatione spectarent , quod quidem in prothptu est ; & facile cognitione comprehenditur ; sed id agunt & moliuntur , vt rebus clarissimis tenebras offundant , vt ipsi in maiore honore sint , si visi fuerint in arte difficillima versari : & facilius possint ostentatione disciplinæ subnixi hominibus imperitis illudere , & ad emolumentum & quæstum omnia iura reuocare. Itaque ea , quæ posita , & firme constituta erant , cum lubet , reuellunt ; quæ vero erant sublata , reponunt ; quæ contexuerant , retexunt ; & vim rebus optime cogitatis & sancitis intendunt , inuertunt , & immutant , fraudes & insidias concinnant , atque nimia plerumque subtilitate perficiunt , vt quod iustum & pium est , iniustum & nefarium esse videatur ; & , quod nefarium & impium est , debitum & pium of-

84 DE REG. INSTITVT. ET DISCIP.

ficiū existimetur. Vnde concludi potest, quidquid est in studio juris ciuili acutum, & subtile nimis, variisque difficultatibus implicitum, esse fraudulentum, & perniciosum, & ad hominum vitam peruertendam improborum acumine comparatum: & ea de causa a Regum disciplina & institutione maxime detestandum. Illa autem mediocris juris cognitio, quæ Regibus utilis est, facile ex negotiorum incidentium multitudine, & ex doctorum hominum vsu atque sermocinatione comparatur. Non est igitur opus, vt Rex disciplinam istam ex libris hauriat, sed eorum mentem, qui in illa sunt cum laude versati, diligenter inquirat; eamque sententiam magis comprobet, quæ non tam subtilis est, quam æquitate nixa, & legi sempiternæ, quam animis incisam gerimus, accommodata; nec enim Regis officium est, iudiciis præesse, sed iudicibus, qui leges venales habent, pœnas, quas merentur, imponere: quod quidem non magnam juris cognitionem, sed magnum animum, & vigilantem, & studio publicæ utilitatis incensum requirit.

Nec illud quidem prætereundum esse videtur, quod dixisti, Regem esse debere ve-

si-

ritatis obseruantiffimum. Fateor equidem facinus esse plerumque mentiri, fidem datam fallere, & in conditione atque pacto non manere. Sed incidunt sæpe tempora, in quibus non possis stare promissis sine magno reipublicæ detrimento. Tunc igitur Rex aut reipublicæ curam abjiciat opus est; aut multa subdole atque versute moliatur. Scitum est enim illud Lyfandri dictum, cum illi quidam exprobaret nimiam in gerenda reipublica calliditatem, diceretque minime conuenire illis, qui essent Herculis fatu procreati, mentiri: imo sane, inquit ille ridens; nam Hercules ipse hoc primus excogitauit, vt, quoniam leonis pelle totum corpus tegere non poterat, vulpis pellem assueret. Hoc autem ille non modo dixit, sed etiam præ se tulit; neque quidquam genere suo indignum existimauit, quod ad augendam rempublicam pertineret. Et profecto tanta est caritas patriæ vt omnis etiam interdum turpitudine gratia illius subeunda videatur. Quamquam multi Reges id non tam patriæ amore, quam suæ dominationis augendæ causa faciunt: & tamen mentiendo, non solum nullam infamiam suscipiunt; verum etiam simul cum virtutis

tutis & industriæ fama ingenii atque prudentiæ laudem consequuntur. Illi vero qui, ne fidem fallant, imperium augere noluunt, vt stulti & nimis simplices irridentur. Infinitum esset si vellem recensere Principes, hominum eruditorum monumentis celebratos, qui multo plures nationes dolis & fraudibus, quam aperto Marte sub imperium subjunxerunt. Vt enim quisque eorum maxime ingenium ad malitiam acuebat, & sine vlllo respectu ad fidem, id tantum, quod sibi utile futurum esset, acutissime providebat; ita maximas opes sibi cum amplitudine nominis & gloriæ comparabat, Sed quid est opus nimis antiqua referre? Repetat animo, qui volet, quot bella nostra memoria inter Christianos Principes mota sint, quoties induciæ factæ, aut pacis fœdera sancita, At quandiu fœdera valuerunt? Tantisper certe, dum fœderis religionem vtilitatis ratio confirmauit. At vbi primum aliqua ratio vtilitatis, cui pax impedimento fuisset, obuersabatur, omnem repente conjunctionem species vtilitatis oblata dirimebat. Non loquor de fide Punica, non de Turcarum perfidia, non de Tyrannorum immanitate; quorum imperium est fundatum

tūm scelere, nixum mendacio, fraude atque perjurio stabilitum. De Principibus Christianis loquor, & de iis Principibus, quorum nomen haud est aliqua impietatis infamia maculatum. Si enim videritis quo jure multi ex illis in alienas vrbes inuaserint; quā mente foedera violauerint; quo impetu contra interpositam fidem armis in alienas opes inuecti sint; intelligetis plane Regem omnem fidei religionem vna vtilitate metiri. Et tamen in ore hominum sunt, & eorum nomen per omnes regiones cum omnium admiratione peruagatur. Quod tamen minime probo, neque mens mea cum multitudinis amentis opinione consentit. Illud tamen dico, eos Principes, qui, cum reipublicæ salus postulauerit, fidem datam neglexerint, summis esse laudibus efferendos. Si enim propriæ vtilitatis ratio facit, vt fides sine dedecore a Regibus violetur; quid eueniet, cum patriæ salus atque dignitas eos ad fidem frangendam impulerit? Quamquam ii, qui ea gratia fidem non seruant, vt patriæ suæ consulant, non fidem produnt, sed inuiolatam conseruant; magis enim fidem patriæ obligatam habent, quam illis ipsis, cum quibus
foedo-

88 DE REG. INSTITVT. ET DISCIP.

foedera percusserunt. Is igitur, qui cum patriæ peste, atque perniciæ fidem seruandam putat, multo maius in se perfidiæ crimen admittit, quam si fidem omnibus foederibus obligatam violaret. Perfidus namque is maxime putandus est, qui reipublicæ sibi commissæ salutem negligit; negligit porro salutem reipublicæ, qui fidem tuetur, cum illam fidei constantiam patriæ perniciosam fore videt. Vt igitur medici, quibus nihil est aliud propositum, quam ægroti salus, sæpe mentiuntur, vt leuent ægritudine eos, quos sanare cupiunt; sic etiâ Principes, quibus patriæ salus incumbit, mentiri interdum debent, vt patriæ saluti prospiciant. Quemadmodum igitur de religione diximus, ita censeo de veritatis atque fidei studio dicendum, esse modum illum Principibus in studio veritatis adhibendum, ne, dum fidei gloriam quærunt, nomen prudentiæ atque sanitatis amittant. Illud igitur *nihil nimis*, quod vitam omnem continet, est etiam in fidei conseruatione retinendum; ne videlicet, dum fidem alienis seruamus, fidem datam iis, qui in nostra tutela atque præsidio latent, nefarie violemus.

Vt autem omnia breui comprehendam,


ita

Ita Regem venationibus oblectari volo , vt non ferus & agrestis euadat ; ita armorum studio teneri , vt non proxime ad naturam gladiatoris accedat ; ita literis operam dare , vt non otio atque desidia languescat ; ita religionem colere , vt superstitione minime confluetur ; ita juris ciuilis cognitionem capere , vt a Iurisconsultorum fraudibus vehementer abhorreat ; ita fidem conseruare , vt , cum id communis vtilitas flagitauerit , fidem violare non dubitet ; & in omni denique vitæ officio illam mediocritatem tenere , in qua quidem omnem regni sapienter administrandi rationem collocandam arbitror. Itaque is meo quidem iudicio erit Princeps omni laude cumulatus , qui in omnibus studiis , & cogitationibus suis , & in omnibus officiis , in omnibus denique reipublicæ partibus administrandis , modum & ordinem tuetur , nec vnquam a rationis moderatione recedit. Cum igitur multa Tauora noster de Regis institutione præclara dixerit ; id sane sum admiratus illum omisisse , quo omnis regia disciplina continetur.

Hæc cum Menesius perorasset , sum sane conturbatus , quod erat mihi simul &

Tauo-

Tauora refellendus, & Menesii etiam tam diligens & tam accurata oratio disputatione refutanda. Sed cum solis ardor nos jam, vt inde abiremus, admoneret, & Georgius Bethlehemicus vir, & literis, & religione insigni præditus, & mecum amore non mediocri conjunctus, ad prandium vocaret; factum est, vt Tauora atque Menesius in villam Emmanuelis Portugalenſis cum Francisco Portugalenſi discederent; ego vero in Religioſorum triclinium cum Georgio me conferrem. Ab illis tamen postulauī, vt post meridiem in eundem locum conueniremus, vt possem refrigerato jam solis ardore liberius ad omnia, quibus in me fuerant inueſti, respondere.



HIERONYMI OSORII

LVSITANI

EPISCOPI SILVENSIS

DE REGIS INSTITVTIONE

ET DISCIPLINA.

LIBER SECVNDVS,



ODEM igitur die post meridiem ,
 vt fuerat inter nos constitutum , in
 eundem locum venimus , atque ,
 postquam confedimus , ego sic sermonem , ad
 quem jam paratus veniebam , institui. Non
 possum satis statuere , an maiorem ex oratio-
 nis vestræ elegantia voluptatem acceperim ,
 an ex necessitate , quæ mihi imposita est , re-
 spondendi , molestiam. Elegancia enim & co-
 pia tanta fuit , quantam in hominibus nostris
 ines-

92 DE REG. INSTITVT. ET DISCIP.

inesse nunquam suspicari potuissem ; necessitas autem, quæ me premit, ea est, vt nisi vestræ expectationi satisfecero, sit mihi infantix dedecus subeundum ; in tali præfertim causa, in qua non sit mihi solum pro mea existimatione demicandum ; sed patrocinium etiam Philosophiæ suscipiendum, ne vlllo modo a Regis familiaritate repellatur, & a regni finibus exterminetur. Et quoniam non omnia, quæ dixistis, mihi refutanda puto, multa namque sane prudenter attulistis, quæ multa regiæ virtutis ornamenta continent ; iis tantum, quæ Regiæ amplitudini obstare videntur, repugnare contendam. Sed, vt id commodius fieri possit, principio altius repetito sermonem exordiar.

Primum igitur quærendum est, sit ne aliqua disciplina, quæ institui, & informari debeat is, ad quem omnis reipublicæ moderandæ potestas deferenda est ; an nulla omnino sit. Si nullam esse dixeritis, vehementer admirabor. Quid enim magis absurdum est, quam, cum ne faber quidem vllus esse possit, nisi prius multam operam det artifice, qui artificio illo præcellat, existimare, solum Regis officium sine vlla ratione atque disci-

disciplina constare ? Num Regis munus est ludus quidam , ad quem sunt Principes sine vlla doctrina perducendi ? An illud potius , quo nullum aut grauius , aut amplius excogitari potest ? Quid , quod ne in ludo quidem poterit aliquis concinne , & eleganter sine aliqua disciplinæ ratione versari ? Nec enim pila ludere , neque choros ducere , neque personam agere , neque ludicrum aliquod munus exercere quisquam venuste potest , nisi id multo ante didicerit , atque meditatus sit. Ita ne vero ? Ludos spectare non possumus , nisi fiant ab hominibus ludendi artificio peritissimis ; reipublicæ vero totius tuendæ curam homini totius artis ignaro & imperito committemus ? Et eum , qui sine musicæ disciplina psallere studet , vt hominem insanum explodendum & ejiciendum censemus ; eum autem , qui sine aliqua doctrina id sibi sumit , vt populos imperio contineat , & rempublicam ab omni calamitate tutam conseruet , tolerandum existimabimus ? Et cum ne Regi quidem in aula regia inter familiares atque domesticos diebus festis , vt sit , saltandi gratia e folio surgere liceat , nisi ad illud saltationis genus multis ante diebus fuerit eruditus ;
 im-

94 DE REC. INSTITVIT. ET DISCIPL.

imperium administrandum , & vniuersæ reiæ publicæ pondus sustinendum , illi sine vllò metu permittimus , qui non diu fuerit in hac tanta atque tam difficili arte versatus ? Quid tandem , quæso , periculi est , si Rex saltet parum decore ? Risum certe faciet. Recte sane , id ne accadat , præcauetur ; nihil est enim in Rege ferendum , ne in ludo quidem , quod non aptum atque decorum sit. At, si rempublicam parum apte atque decenter administrauerit , hostibus quidem risum mouebit , suis vero vniuersæque reipublicæ perniciem , & interitum cum multis lacrimis importabit. Quid igitur minus conuenit , quam in re ludicra , quam certe ignorare minimo cum periculo licet , cauere diligentissime , ne Rex extra numerum pedem moueat ; in re autem maxima & amplissima , in qua sine totius reipublicæ periculo peccare non licet , non maximam diligentiam adhibere , ne quid Rex contra præscriptionem rectæ rationis efficiat ? Cum enim omnis stultitia periculosa sit , tum Regis amentia non vni tantum homini , neque paucis , sed toto regno periculum extremi dedecoris , & euersionis intendit. Et quamvis nullum aliud periculum impen-

LIBER SECVNDVS. 95

leret , nisi illud , quod est in imperii con-
 ptu atque negligentia constitutum ; id
 um est , vt totam rempublicam euertat.
 la enim respublica , nulla multitudo , ne-
 : domus quidem vlla , sine imperio con-
 e potest. Vbi igitur imperium negligetur ,
 esse profecto est , vt omnes opes reipu-
 æ dilabantur. At sic est in more positum ,
 quemadmodum in morbo medicis peritis-
 ntissime paremus, imperiorum autem ius-
 ontemnimus ; sic in reipublicæ illius mo-
 atoris imperio, quem , quid nobis expo-
 t, acute perspicere iudicamus, libenter ob-
 speremus, Principis autem stulti præcepta
 ligamus. Nec enim quidquam minus fe-
 dum arbitramur, quam eorum, qui rerum
 iuntur , insaniam ; metu igitur interdum
 ti , non iudicio rationis impulsu impera-
 onficimus: nihil autem, quod metu atque
 ais expressum est , poterit esse diuturnum.
 m igitur id euenerit , vt neque Rex , quid
 imum factu sit , propter amentiam expli-
 e possit; neque subditi id, quod ille decer-
 , reipublicæ expedire putent ; consequens
 , vt imperium illius contemnatur , &
 nis respublica perturbetur ; nihil est igi-
 tur

tur omnibus rebus publicis magis infestum , quam Regis amentia. Numquam ne legistis apud Poetas , quantam inflammationem terris attulerit Phaethon Solis filius , cum a patre impetrauit , vt vice illius vno saltem die lucem terris diffunderet ? Non igitur solum , vt perhibent , omnes terras , & flumina , & fontes flammis exussit ; sed ipse tandem fulminis incendio conflagrauit. Non autem existimetis fuisse hanc fabulam ab hominibus summo ingenio & eruditione præditis temere confictam : hoc enim significare voluerunt , rerum omnium interitum fore , cum potestas regendi atque moderandi immoderatis hominibus , & hujus tam præclaræ artis ignarâ concessa fuerit. Qui enim se ipsum regere nescit , quomodo populum vniuersum reget ? Qui nullum modum in vita seruat , quo tandem modo multitudinem continebit ? Qui jus atque leges ignorat , quo jure rempublicam vniuersam deuinciet ? Qui denique tenebris oppletus est , quo pacto lucem ciuibus suis afferet ? Reliquum igitur est , vt cum in regiam sedem , tamquam in currum Solis ascenderit , vt rempublicam vniuersam regio lumine collustret , non solum tenebras mini-

me dispellat : sed etiam sibi & Reipublicæ tenebras offundat , & pestem & exitium machinetur. Et quamquam aliam esse causam putatis , cur in tam multis ætatibus tam pauci Reges extiterint , Regis nomine digni ; nisi quia difficillimum est, Regem sapientem inuenire? Cum id autem diuinitus alicui nationi concessum fuerit , vt Regem sapientem habeat ; & ipse Rex amplissimum ex moderatione sua virtutis , & sapientiæ suæ fructum percipiet , & populus vniuersus omnibus bonis , illius opera atque benignitate circumfluat. Secus autem cum Rex insipiens est , multa temere statuit ; multa negligenter atque dissolute gerit ; multa furenter administrat ; multis in locis vel rempublicam sine causa in extremum discrimen salutis inducit , vel immemor laudis & dignitatis , dum nimis otio consulit , cum interitu dignitatis & otium , & omnes opes amittit. Nec enim tenet vllam rationem vel pacis seruandæ , vel belli gerendi ; sed quocumque eum furor impellit , eo se confert , & quorsum ea , quæ molitur & efficit , euasura sunt , minime reformidat.

Sed multa fortasse verba in hac parte confirmanda feci. Nec enim negari potest , esse
 Tom. I. G di-

98 DE REG. INSTITVT. ET DISCIP.

disciplinam aliquam , qua futuri Reges instrui debeant , antequam ad rempublicam tractandam accedant. Restat igitur vt videamus, quænam tandem illa disciplina sit. Eane , quæ in Regum filiis educandis increbuit ? Si etiam probatis , aliam non requiramus. Vultis igitur inspiciamus a capite , quomodo Regum filii nutriantur , aut quibus disciplinis informetur , vt tandem ad summam amplitudinem regie majestatis aspirent ?

Tuo id quidem arbitrato , inquit T. ; nec enim tibi præfinimus , quo minus oratio tua libere vagetur.

Recte , inquam , facitis ; hæreb t enim oratio , si certis legibus fuerit astricta ; repetamus igitur animis , quomodo Principes educentur , vt ex ea educatione , diligenter notata & animaduersa , scientiam , si possumus , institutionis regie faciamus. Sed antequam in eam orationem ingrediamur , pauca quædam de hominum natura atque vita communi dicenda sunt.

Omnis homo in vita instituenda aut rationem sequitur , aut cupiditatem. Ratio est naturæ lex animis incisa , a turpitudine & exitio deterrens , honesta atque salutaria præscribens.

Cu-

Cupiditas est appetitus vehemens , ratione vacuus , ad flagitium atque perniciem furibunde sollicitans. Hæc autem cum sit multiplex , & varia , & sibi dissimilis , & infinita ; omnes tamen illius motus ad duo capita reuocari possunt , quorum vnum est ira , alterum autem libido. Ira quidem est acris animi vis , specie dedecoris & contumeliæ vehementius ad vindictam concitata. Libido vero est cupiditas immoderata corporeæ voluptatis , & earum rerum , quæ ad eam voluptatem conferuntur. In ira igitur non solum vlciscendi libido , verum etiam , quod est consequens , immoderata laudis appetitio continetur. Qui enim contumelia offenditur , necesse profecto est , vt cupiditate laudis teneatur. Libido autem continet in se fraudis , & auaritiæ principium , flagitiorumque omnium seminarium. Vtraque autem vis , tam ea quæ studio honoris & dignitatis animum sollicitat , quam quæ cupiditate voluptatis inflamat , rationi subiecta est secundum naturam ; & tamen contra naturam in animo sæpe dominatur. Rationi enim , quæ natura principatum tenet , hoc munus assignatum est ; vt iram atque libidinem , & omnes motus , qui ex il-

lis oriuntur , in potestate contineat. Contra vero cupiditates vehementius incitatæ se inferunt, & intrudunt, rationemque ad se omnibus modis pellicere contendunt , illique tandem persuadent , non posse eam officio suo fungi , beatæque vitæ statum adipisci , nisi illis fuerit obsecuta. Hinc colligi potest , quod fit adulationis initium , atque fundamentum. Dum enim hinc honoris ambitio animum stimulat, & inde voluptatis effrenata libido eundem inflamat , & vtraque pars in eo pugnat , vt rationi aduleatur , operamque suam ostentat , atque pollicetur se effecturam , vt animus affluat bonis omnibus , quæ necessaria sunt ad vitam in summa iucunditate traducendam ; fit tandem , vt ratio, dum ancillis nequissimis auscultat , de statu suo concidat , & illarum dominatu turpiter opprimatur. Sed de adulandi ratione & artificio postea differemus ; nunc vero institutum persequamur. Cum igitur ratio non refrenat cupiditatem , neque motus animi regit , sed cupiditatis immoderationi succumbit ; fit , vt omnes homines , in quibus cupiditas omni vinculo soluta dominatur , omni se flagitio contaminent ; ita tamen vt alii aliis vitiis magis

gis affines sint. Quidam enim , qui clariori indole præditi sunt , honoris & dignitatis ambitione vehementius efferuntur , & illius gratia scelera infinita plerumque suscipiunt. Quidam vero , qui magis ad quadrupedum naturam accedunt , voluptatis aut pecuniæ cupiditate furentius incitantur , & illius causa similiter fraudes , & insidias , & innumera-bilia flagitia moliuntur.

Ex his , quæ dicta sunt , concludi potest , triplex genus hominum in vita reperiri : alii namque homines , qui quidem sunt paucissimi , omnia officia vitæ ad rectam rationem dirigunt : alii deinde ambitione præcipientes ad inanis gloriæ studium rapiuntur : alii postremo in omni genere sordium impurissime voluntantur. Hæc cum ita sint , quæro a vobis , quem Regem habere velitis : eumne , qui totus sit in libidinis impurissimæ dominatu ? Qui die solem non aspiciat ? Qui noctes in nequitia consumat ? Qui opes & honores , virtuti & industriæ debitos , ad libidinum ministros deferat ? Qui , vt omnia hominibus improbissimis condonare possit , subditos spoli-et , domos exhauriat , prouincias nudas & inanes relinquat ? Qui denique Sardanapali

vice laudem & gloriam contemnat , omnemque beatæ vitæ rationem in luxuria immensa constituat ?

Deus , inquit Portugal , auertat.

Quemnam igitur ? Inquam. Illum qui infinita dominandi cupiditate flagrans insaniat ? Qui nullam foederis religionem , quam suæ ambitioni ob stare perspexerit , obseruandam putet ? Qui bella iniusta , & sibi atque suis plerumque perniciofa suscipiat ? Qui populos sibi subditos , partim intolerabilia tributa imperando , partim omnes immodico labore fatigando , conficiat ? Qui postremo popularis gloriæ causa , quoties illi in mentem venerit , rempublicam vniuersam in extremum discrimen salutis adducat ?

Ne illum quidem , inquit M.

Restat igitur , inquam , vt illum Regem optetis , qui non solum libidinem coerceat , & voluptates noxias aspernetur ; verum etiam studium gloriæ ratione temperet , & iram singulari moderatione cohibeat , neque animum suum vlllo motu de statu conuelli , aut mentem tenebris obscurari patiatur. Is enim solus est , qui non temeritatem & amentiam , sed optimam viuendi rationem sequetur , &

pa-

pacis atque belli tempora moderabitur , & rempublicam præclare constituet.

Si suffragiis , inquit M. , res agitur , dubium non est , quin hunc potissimum Regem creaturi simus.

Non igitur , inquam , eos , qui vel ira sine ratione commouentur , nec eos , qui libidini penitus addicuntur ; sed illos , qui omnia ratione moderantur , dignos existimatis , qui reipublicæ præsent.

Nos vero , inquit T.

Rursus , inquam , a vobis interrogo , in qua tandem re alia sapientiam sitam arbitramini ? Quod ut rectius statuatis , fingite nunc animis duos homines , quorum vnus omnibus artium maximarum disciplinis instructissimus sit , & in dicendo admirabilis : isque tamen nullum sani hominis officium sequatur ; sed rem suam familiarem dissipari sinat , omnibusque suis infestus sit , & manus etiam sibi afferat : alter vero , qui ne legere quidem sciat , & , si placet , sit etiam infantissimus ; & tamen rem suam bene gerat , familiæque suæ vigilanter prospiciat , neque quidquam in vita contra officium & rationem faciat : vter istorum vobis videtur esse sapientior ?

Ad.

Adhuc tu multorum causam agis , inquit T. Is certe , qui suum officium facit , quamuis nullas literas attigerit.

Esto sane , inquam , nec enim id nunc ago , vt ostendam in literis sapientiam consistere ; sed vt demonstrem omnem sapientiæ vim esse in optima ratione collocandam. Itaque omnes , qui literis student , & vitis cooptati sunt , non sapientes , sed insani sunt. Furiosus enim & insani hominis est , sibi nocere quamplurimum ; nemo autem sibi pejus nocet , quam is , qui potissimam sui partem lædit , & vulnerat. Sed omnes intemperantes & flagitiosi mentem (quæ est potissima hominis pars) maxime lædunt , grauissimumque animis suis vulnus inurunt : omnes igitur intemperantes sunt amentes & furiosi , quamvis sint omni doctrina perpoliti. Si igitur sine literis , sine doctrina , sine aliquo eiusmodi adiumento potestis efficere , vt Rex secundum optimam rationem vitam instituat , nihil moror literas ; satis enim sapiens erit , qui optime rationi , hoc est , legi naturæ paruierit. Nec enim id laboro , vt is ingenium ostendet , & argumenta vibret , & arcana naturæ patefaciat , & dicendi etiam rationem
sum-

summo studio consecratur ; sed vt prudens atque bene moratus sit , rationemque habeat nullis tenebris infuscatam ; sed puram , acrem , & vigentem , omnibusque virtutum opibus egregie cultam. Sic igitur se comparet , vt nunquam cedat libidini , nunquam amore flagitioso capiatur , nunquam odio , aut inuidia , aut aliqua ejusmodi perturbatione ita concitetur , vt a recta ratione discedat , & omnes curas & cogitationes in publicam salutem conferat ; & fatebor illum literis non indigere. In eo enim statu summi Philosophi sapientiam sitam esse decernunt , in quo voluntas cum mente consentit , nec villo pacto imperium & ductum rationis aspernatur : ad illudque tantum bonum parandum atque fruendum enititur , quod mens ipsa tenebris nullis impedita expetendum esse judicat. Efficite igitur , si potestis , ne vnquam Regis animus a recta ratione (quæ lex diuina putanda est) villo modo dissentiat ; & ita facile concedam illum sine literarum adminiculis , & sine villo adjumento doctrinæ , sapientiam consequi posse. Sed non ita facile negotium est , compressam tenere libidinem , voluptates aspernari , dolorem contemnere , auram

po-

popularem despicere ; vt non multa ad animi statum fulciendum præsidia requirenda sint. Tanta enim est cupiditatis violentia , tantisque dolis & machinis rationem oppugnat ; vt paucissimi sint , qui immanitati atque fraudibus illius obstant. Multis igitur opibus fulciendus est animus , ne ruat ; & ratio contra omnes cupiditatis impetus firmis præsidiis munienda ; & quo magis homines florent opibus , magisque legibus omnibus propter potentiam soluti sunt ; eo plura , atque firmiora subsidia adhibenda sunt. Alios enim homines primum continet in officio rei familiaris angustia ; deinde parentum diligentia , verborumque formido ; deinde, postquam sunt adulti , legum atque iudiciorum metus. Et tamen neque tam multis vinculis alligata cupiditas impediri potest , quo minus illis perfractis erumpat , & tetra facinora moliatur. Si igitur tantas vires habet cupiditas , vt neque tantis vinculis impedita contineri valeat ; quid existimatis futurum , cum nihil omnino illam constrinxerit ?

Sit igitur puer aliquis claro loco natus , in magnis opibus educatus , in summis deliciis enutritus , adeo carus atque perjucundus

pa-

parentibus , vt nullam ei molestiam exhiberi
 patiantur. Sileant minæ , remoueantur vir-
 gæ , pellantur formidines , nihil denique au-
 diat bellus ille , & affluens omni venustate
 puer , nisi festiuitates , atque blanditias. In
 quotidiano autem victu caueatur diligentissi-
 me , ne alatur illis cibis , quibus reliqui
 pueri , qui non sunt ita beati , nutriuntur ;
 sed dapes illi exquisitissimæ atque dulcissimæ
 comparentur ; vestium autem nitor , & omnis
 corporis cultus ita excellat , vt offerat illius
 animum , & superbum , & arrogantem effi-
 ciat. Sic autem sit institutus , vt neque cor-
 pus labore vlllo firmetur , nec animus disci-
 plina vlla colatur ; sed in rebus omnibus pa-
 ter illi indulgeat , mater blandiatur , familia-
 res adulentur , & omnes denique , qui eum
 jure aliquo necessitudinis attigerint , sint ad-
 jutores insanix , inserantque in illius animo
 falsas opiniones veritati contrarias. In puero ,
 qui ad hunc modum fuerit enutritus , fierine
 potest , vt vestigium aliquod bonæ indolis ap-
 pareat ? Credibile non est. Quid cum ad pu-
 bertatem peruenerit , multosque sibi æquales
 aggregauerit , & ad studium suum complures
 adulescentes adjunxerit ? Quid cum adultam il-
 lam

lam cupiditatem , quæ satiari nulla ratione
 potest , explere & satiare concupierit ? Quid
 cum omnes patris opes in eum vsum domi
 reconditas existimauerit , vt eas ipse per sum-
 mum flagitium effundat ? Nullum enim tan-
 tum malum cogitari potest , quod non ab im-
 moderata libidine illius oriatur ; bonorum
 enim consilia respuet ; monitoribus erit in-
 festus ; leges & patria instituta contemnet ;
 erit illi semper nomen virtutis inuisum , pa-
 trem denique extinctum cupiet , vt multo li-
 berius possit , postquam fuerit in patrimonii
 possessione constitutus , per omnia libidinum
 genera vagari. Quidquid enim cupiditatibus
 suis obstare perspiciet , acerbo odio prosequetur.
 Cernitis jam animo , quantis periculis vi-
 ta florens exposita sit , si non fuerit rectis di-
 sciplinis astricta ? Difficillimum enim est , ani-
 mum nobilitate tumentem , otio lasciuien-
 tem , iuuenta & temeritate præcipitem , adu-
 latorum sermonibus inflatum , & flagitiorum
 licentiam consequutum , ab insolentia ad
 modestiam reuocare , & a vitiorum colluui-
 one ad virtutis studium traducere. Quo au-
 tem opes maiores sunt , eo maius periculum
 animis comparatur ; & idcirco plura & fir-
 mi-

maiora præsidia contra libidinis immanitatem constituenda sunt.

Quid igitur est de Regum filiis existimandum? Nec enim genus vllum clarius est; nec opes vllæ maiores sunt; nec alibi maior adulterorum copia reperitur; nec vsquam infidiæ capitaliores intenduntur; nec alii hominum generi maior flagitiorum licentia & impunitas omnium ferme consensu tribuitur; nec ab aliquo alio cum maiore reipublicæ perniciæ peccatur. Multo igitur maioribus præsidiis fulciendi sunt, ne sibi, & suis pestem & exitium cupiditatis intemperantia moliantur. Quo enim locus, in quo versantur, est magis in altum propositus; eo erit eorum casus & ruina calamitosior, multoque plures erunt illis euerfis oppressi. Multo igitur diligentius instituendi sunt, & multo clarioribus disciplinis erudiendi, firmioribusque opibus fulciendi, ne de statu conuellantur. Opera etiam danda est, vt cum lacte nutricis, si fieri potest, regię virtutis disciplinam hauriant. In primis autem providendum est, vt corpus sanum atque bene valens sit, & animo simul, & valetudine integer, & robore firmus existat. Sanitatem, in corpore, vt jam ante dixi

cf-

110 DE REG. INSTITVT. ET DISCIP.

efficit victus moderatio , & exercitatio : animi vero sanitas & robur virtutis institutione , & honestatis disciplina continetur. Illud etiam est animaduertendum , quod quemadmodum temperantia in victu , & corporis exercitatio non solum sanitatem tuetur , atque vires auget ; sed etiam pulchritudini conseruandæ utilis est ; nec enim patitur corpus aut macie confici , aut crassitie deformari , aut desidia pallescere ; ita virtutis disciplina non solum sanitate atque robore confirmat animum ; verum etiam illum splendido cultu decoris atque dignitatis illustrat. Præterea , nemo prudens rerum æstimator dubitare potest , quin omnibus , qui viri magni futuri sunt , duæ virtutes sint a primis annis , quantum illa prima ætas ferre potest , summo studio comparandæ ; ita vt ludi etiam pueriles ad eas conferendi sint.

Quænam , inquires , illæ sunt ? Animi magnitudo , atque moderatio. Qui enim molli & imbecillo animo est , nullum vnquam in vita viro dignum opus efficiet ; qui rursus in omnibus rebus immoderate se gerit , nullam sanitatis partem in vita retinebit. Et harum quidem duarum virtutum ejusmodi ratio est , vt alterutra sine alterius ope imbecilla sit.

Ma-

Magnitudo enim animi sine modestia immunitas quædam est potius, quam virtus appellanda; rursus modestia, si non fuerit cum animi quodam robore & magnitudine confociata, ignauia potius & segnities, quam temperantia nominari debet. Deinde cum hostes sint acri animo repellendi, ciues vero humanissime complectendi, atque conseruandi; & omnes belli atque pacis artes eo conferantur, vt hostes metu se contineant, ciues vero inter se mutua beneuolentia deuincti sint; vtrumque necessarium est, vt ciues & acres & moderati sint. Acres quidem, vt in bello hostes virtute comprimant; moderati vero, vt in pace humanitatem retineant; & animi turgētis elationem insito pudore coerceant. Ad has autem duas virtutes acquirendas nihil est vtilius corporis exercitatione, & assidua optimarum artium commentatione. Exercitatio enim non solum reddit corpus firmum atque robustum; sed animum etiam impigrum & audacem, & ad studium bellicæ gloriæ concitatum: bonarum vero artium disciplinæ pudorem ingenerant, & ad omnia officia modestiæ & humanitatis erudiunt. Hoc autem impulit Solonem, vt cogeret legibus Athe-

112 DE REG. INSTITVT. ET DISCIP.

Athenienses , vt filios suos palæstra , & literis , & musica diligenter instituendos curarent. Vidit enim vir Græciæ sapientissimus , esse ciuibus suis & vires corporis & animi comparandas , & humanitatem atque moderationem conseruandam : aliter enim fieri non posse , vt libertatem , & reliquas opes diu tenerentur. Omnia siquidem bona vel ignauia , & mollitia deferuntur ; vel temeritate & audacia peruertuntur. Vt igitur ciues suos fortes efficeret , palæstram instituit : vt autem ad humanitatem instrueret , literis & musica mitigandos existimauit. Hoc autem Lycurgus Lacedæmone non admodum dissimili ratione consecutus est. Nam cum nusquam alibi maius studium in corporibus , & animis corroborandis extiterit : tum in nulla vnquam republica magis laus mirifici cuiusdam pudoris enituit. Mira sunt , quæ Xenophon de Spartanæ iuuentutis modestia & honestate commemorat. Sic enim ait adolescentes institutos fuisse , vt nullus inambulans oculos attolleret , aut faciem versaret , vt huc & illuc intueretur , aut aliquod signum inconstantiae præberet ; sed ea tantum quæ ante pedes erant posita modeste conspiceret , ne manus quidem

lem, quas inducta veste contegebant, aper-
 as ostendere licebat. Omnibus autem se-
 nibus loco cedebant, & eos quasi parentes
 verebantur. Nullum autem verbum petu-
 ans & obscœnum illis excidebat; nec in
 choreis, & cantibus aliquod lascivum mol-
 le carmen vsurpabant. Sic erant denique
 Lycurgi legibus instituti, vt insignem pu-
 lorem & verecundiam cum insigni virtute
 conjungerent. Quid hic iuventutis Romanæ
 pudorem & modestiam oratione commemo-
 rem? Ex qua quidem colligi potest, non ma-
 gis fuisse Romanos olim omnia vincendi cu-
 piditate incensos, quam legibus atque mo-
 ribus in studium modestiæ atque moderati-
 onis incitatos. Nec hi solum, sed omnes, qui
 sapienter respublicas condiderunt, ad has du-
 as virtutes, tamquam ad firmissima reipubli-
 cæ fundamenta, leges & instituta omnia con-
 crebant. Intelligebant enim nullam rempu-
 blicam saluam & ornatam esse posse sine ani-
 mi magnitudine, & sine pudoris & mode-
 stiæ concinnitate. Quod si hæ duæ virtutes
 ita necessariæ sunt omnibus ingenuis homi-
 nibus, vt sine illis nulla laus nobilitatis ex-
 are possit; multo certe magis Regibus ne-

cessariæ sunt , quo status eorum est altior & illustrior , & ad plures eorum calamitas (quæ tam ex animi imbecillitate & ignauia , quam ex temeritate & arrogantia redundat) necessario peruadit. Est igitur necesse , vt sic educentur Regum filii , vt fortissimi simul atque modestissimi disciplina fiant ; aliter enim omnia corruent , atque funditus interibunt.

Hæc cum ita sint , vt eo tandem longo intervallo reuertamur , vnde deflexit oratio ; consequens est , vt videamus , num ex ea disciplina , qua Regum filii aliquot in locis erudiuntur , possint hæc duæ virtutes efflorescere. Ad eam igitur animum referamus , & tentemus , an ex ea possimus aliquid præclarum dicere. Vos igitur hortor & admoneo , vt me de tantis rebus dicere instituentem attente atque benigne audiat. Idem enim mihi cenfeo faciendum , quod magni olim oratores facitabant , cum in media oratione occurrebat aliquid consideratione dignissimum. Atque haud scio , an sit mihi Poetarum more Musarum auxilium implorandum ; institutio enim tam excellens atque præclara non potest vlllo modo sine afflatu quodam illarum explicari.

Hic , postquam arrisere , sic institutum ser-

nem contexui. Vt igitur hic ordiamur, n in his duabus virtutibus, nempe fortitudinis atque modestia, totum dignitatis regiamamentum positum sit: multi ex iis, qui gum filios instituunt, primum quidem it enixe operam, vt illorum corpora teat a & imbecilla fiant, assiduisque morbis toxia, & animi desidia languescant: deinde o, vt inaniter efferantur, omnemque ublicæ mederandæ rationem temeritate mentia perturbent. Quam ingeniose vero ussequantur, est operæ pretium animaduert. Corpus enim tradunt mulieribus effeandum, animum vero adulatoribus corispendum. Primum igitur cauent, ne regiille puer solem aspiciat, neue aura paulo ementiore pulsetur, neue aliquo labore etur; sed parietum umbris occulatur, vt poris illius teneri & delicati mollitierniffime conseruent. In cibis autem non in solum omnis earum industria consumitur, dapes sint egregia quadam arte conditæ; um etiam vt nimia ciborum copia Prinrs jam in illa tenera ætate faginetur, & asi pullus anserinus auariorio inclusus assidue medendo pinguescat. Mane igitur instant

& vrgent , vt comedat , & singulis prope horis aliquid exquisitissimi cibi in os illius congerunt; & quasi id tantum muneris & operis habeant, vt Regem immodicis epulis fartum impediunt , ne se loco commouere possit. Ita conatum omnem in hoc vnum studium conferunt , vt quoties minus aliquanto cibi sumit , quam ipsæ volunt , id indignissime patiuntur. Adde nunc aromatum varietatem , odorum omnium suauitatem , vnguentorum fragrantiam , gemmarum splendorem , totius ornatus & cultus mollitiem , & reliqua naturæ lenocinia , quibus robusti etiam animi falsa illa dulcedine liquefacti facillime possint eneruari , & a mentis statu cupiditatis impetu detorqueri. Modis igitur omnibus non solum mulieres , sed omnes , quibus nutriendi Regis munus assignatum est , id efficiunt , vt corpus illius torpore & desidia frangatur , & morbis innumerabilibus expositum sit , & vita illius breui temporis spatio terminetur. Nec enim corporis firmitas , neque bona valetudo , neque vitæ longitudo potest in ciborum redundantia , & in mollissimo victu , & in omniū laborum fuga consistere. Neque solum ea mala ex ea educatione oriuntur;

sed

sed somnus , inertia , lentitudo , quæ quidem tu Tauora literarum studiis atque Philosophiæ tribui disputabas ; quod , quam falsum sit , postea magis apparebit. Hæc enim vitia non artes præclaræ , sed corrupti pessima disciplina mores efficiunt ; ad virtutis enim munus alacriter obeundum agili & expedito corpore opus est , non cibus onusto , non desidia languido , non deliciis emolito ; quibus vitiis non solum corpus impeditur , sed acies etiam mentis hebescit , omnesque nervi virtutis eliduntur. Videtis ne , quantam industriam lautæ mulieres , & lepidi quidam homines , non multum a muliebri victu & ratione distantes in eo ponant , vt Regem nobis efficiant umbratilem , & delicatum , & imbecillum , valetudine infirma præditum , & frequenter in morbos molestissimos incidentem ? Et cum nobis opus sit Rege sano , atque bene valente , qui possit facillime permissum sibi munus corporis & animi viribus sustinere ; illi in eo laborent , vt Regem non modo ægrum & imbecillum reddant , verum etiam timidum & ignauium , omnia regia munera fastidiose recusantem & belli pericula fugientem. Sic autem parasitis , &

scur-

scuris patet aditus ad illius adolescentiam qui est bonis & fortibus hominibus intclusus. Nec enim vllius orationem ad anadmittere potest, qui ita nutritus fuit, tantum illius, qui auocet a laboribus, & sus captet, & ad futes & inanes voluptes impellat. Regum igitur corpora ad hmodum curantur: nunc animorum cultum spiciamus. *Christe Sancte quæ monstra pspicio? Quæ portenta complector animi? Quæ pestis & immanitas in communi versatur?*

Hic T. ridens, age, inquit. Musæ, qinuocandas esse dicebas, aduentant; ita erexurgis, vt facile appareat, te illarum spitu vehementer inflari; non enim vsitato re loqueris, sed tragice, atque admirati quadam commotus inclamas.

Merito inquam: nec enim tygres, pantheræ, aut leones rabide concitati tum mihi terroris injicerent, quantum belluarum genus, quo nullum vnquam terris extitit immanius atque truculentum. Nunquam ne legistis apud Poetas belluam lam, quam chimæram appellant, ex lece & capra, & serpente conflata, flammæ

me

mentem, & omnia circumquaque incendio vastantem, ad quam interimendam opus fuit Bellerophonte armis diuinis armato? Cogitate vel chimæram, vel aliud quantumvis dirum & infectum monstrum, venenum exhalans, & omnes, in quos aspectum conjecerit, tabificæ huc conficiens, quod vel in terris aliquando visum, vel Poetarum ingeniis confictum fuerit, illa omnia monstra longe multumque superat hæc belluarum immanitas, quam animo cogitans perhorresco. Vt autem ad illarum similitudinem propius accedam, fingite animis Harpyam dapes aliis appositas ore foedantem, & in oculos hominum furenter inuolantem, & aduncis vnguibus omnia rapientem. Sit deinde tam pestifero veneno armata, vt non solum dente necem afferat; sed afflatu etiam multos interimat. Habeat præterea hanc vim, vt in quamcunque partem se tulerit, lucem solis impediat; segetes lætas inficiat; fruges & pabula corrumpat; & omnia, quæ vel tactu impuro, vel spiritu contaminato polluerit, immutet, & pro salutaribus noxia reddat. Sit præterea monstrum hoc non ratione vacuum; sed callidum, acutum, & malitiosum, ad fraudes & insidias

solertissime machinandas. Accedat etiam ad maiorem hominum perniciem, quod non solum virginis faciem habeat, quemadmodum Poetæ Harpyas habuisse fingunt; verum etiam orationis lenitatem, & totius corporis habitum, pudorem virgineum fallaci specie referentem. Neque vias tantum obsideat, quemadmodum Sphinx, quæ Thebas infectas habebat; sed intra muros versetur, ne sit aliquod propugnaculum interjectum, quod hanc tantam pestem a ciuibus auertere aliqua ratione possit. Si fuisset igitur aliquod ejusmodi prodigium, quod inter nos ita versaretur, vt multos partim occulto veneno tabescentes interimeret; partim impetu furente trucidaret; quibus precibus & sacrificiis Santissimum Christi numen placandum existimaretis ad tantum intestinum & domesticum malum extinguendum, atque delendum?

Sanctissimis, inquit T., & singulari quadam religione procuratis, Sed non dices, quorsum hæc abs te conficta monstra pertineant? Quæ malum sunt istæ belluæ? Quæ Harpyiæ? Quæ Sphinges?

Illi, inquam, quibus sæpenumero Regum filii erudiendi, aut, vt rectius dicam, inficiendi,

di, & contaminandi committuntur. Adulatores intellige, quo monstro nullum immanius excogitari potest. Nam primum tanta auaritia & rapacitate sunt, vt nihil videant, quod non rabide atque furenter appetant. Vt autem infinitam cupiditatem expleant, in Regum fortunas iauolant, vt, quidquid arripere potuerint, immensa gula deuorent, reliqua vero proculcent, & sordidata relinquunt. Illorum enim opera fit, vt Regis gaza non sit virtutis, sed libidinis instrumentum; & opes, quæ erant cum bonis viris & de re publica bene meritis communicandæ, ad homines impuros deferantur. Quantas vero tenebras rebus offundant, explicari non potest. Non enim lucem solis eripiunt, sed, quod est multo dirius atque funestius, quantum in illis est, lumen veritatis extinguunt; Regibusque persuadent, vt, veris bonis contemptis & abjectis, falsa & inania consecretur. Neque solum sunt singulis hominibus infesti, sed vniuersam rempublicam euertunt. Illorum enim opera fit, vt decus pudoris intereat; vt honestatis studium restinguatur; vt turpitudine victrix exultet; vt innocentia misere vexetur; vt iniquitas alacris & erecta

volitet, & quæ velit impune diripiat omnia; postremo sic evertunt, vt, quæ erant ad salutem reipublicæ constituta, ad perniciem reipublicæ conferantur. Et, vt hæc facilius efficiant, non solum adhibent ingenium multiplex & acutum; sed etiam orationis lenitatem, atque virginis (vt ita dicam) speciem & cultum, vt cum se ea bonitatis & verecundiæ simulatione Regibus insinuauerint, tum demum occultum virus euomant, ipsosque Reges inficiant. Quo satis digno supplicio vindicandum putaretis eorum scelus, qui in fontem, vnde omnis ciuitas aquam ad bibendum hauriret, venenum spargeret? At Rex est quasi quidam fons, vnde omnis vitæ disciplina haurienda est. Inde namque leges accipiendæ, iudicia postulanda, virtutis exempla petenda sunt; ab illo est auxilium contra perditos homines implorandum, & virtutis præmium flagitandum. In illo denique debet esse perfugium miseris, solatium afflictis, allevamentum oppressis, præsidium innocentibus contra improborum hominum fraudem & potentiam firmissime constitutum. Qui igitur illum ita corruerit, vt ab æquitatis & clementiæ studio ad injuriam & imanitatem

tem traducat, & pro salutari atque benefico Principe maleficum & importunum Tyrannum reddat, quibus tandem suppliciis dignus est? Summis profecto, atque sempiternis.

Sed, vt illorum insidiæ præcaueri possint, non erit inutile eorum naturam depingere: Non quidem omnium: sunt enim quidam minuti adulatores, quasi quidam Gnathones Terentiani, qui, quamuis in genere suo flagitiosi sint & infames, non tamen tantum ingenio valent, aut tantis opibus instructi sunt, vt plurimum nocere possint. De illis igitur tantum loquamur, qui capitales habendi sunt. Primum igitur constat eos esse immensi avaritia; nullis enim opibus eorum cupiditas satiari potest. Ambitio deinde sic eos exagitat, vt consistere non sinat. Deinde opus est, vt sint mire ingenio & acuminè præditi, summaque solertia & calliditate subnixi; aliter enim neque poterunt insidias tegere, neque mendacia concinnare, neque in varias facies verti, neque aliorum fraudes eludere. Postremo opus est, vt humilem atque demissum animum gerant, minimeque in principio de vlla decoris atque dignitatis præstantia cogitantem. Necesse namque est,

vt

vt in principio sese ad potentium pedes abjiciant, summaque sedulitate omnes, quos esse Regi caros intelligunt, affectentur. Hæc igitur duo scelera atque flagitia, nempe avaritiam & ambitionem, cum aliis duobus flagitiis, malitia videlicet & humilitate, succinxerint, nihil erit tam firmo præsidio valatum, quod a se non expugnatum iri confidant. Nec enim laborem vllum fugiunt, nec vllam indignitatem subire reformidant, nec vllis difficultatibus impediri possunt, quominus, quantum malitia valeant, & impudentia periclitentur. Quod si tam felices sunt, vt sine vlla circuitione ad Regem aditum habeant, continuo copias suas instruunt, & in insidiis collocant, vt, simul atque occasionem nacti fuerint, Regis imbecillitatem occupent, & de improviso in opes illius inuadant. Si vero eam facultatem consequi non facile possunt; tum occulte cuniculos agere instituunt, quibus tandem in arcem penetrent. Solertissime enim perspiciunt, qui sint Regi valde familiares, & maximum apud illum locum obtineant; ad eos igitur se confestim applicant, artificiique sui periculum faciunt. Illorum enim ingenium laudant. virtutem ef-

fe-

ferunt, vrbauitatem extollunt. Quam humiles autem esse meditentur, explicari non potest. Totum enim diem ad cubiculi fores assidunt, adeundi difficultatem patientissime tolerant, familiaribus atque domesticis assurgunt, seruos etiam blande atque benigne alloquuntur, eoque tandem se demittunt, vt nihil contemptius esse possit. Sic igitur non muneribus tantum, sed assentatione & officiorum omnium simulatione, quilibet eorum illi, quem patronum adoptauit, facile persuadet, se dignum esse, qui Regi notus sit, & in domesticis illius numeretur.

Sed occurrit illa cogitatio: Metuendum est ne hic tantum sedulitate atque vigilantia valeat, vt mihi molestus sit: quid igitur faciam? Denegabo hoc illi? Minime: est enim sane probus, & mihi valde amicus, & ideo periculum non est, ne mihi parum gratus sit. Præterea nec arrogans, nec ambitiosus est, sed modestus & humilis, & ideo fieri nequit, vt se nimis extollat, & meis rationibus aduersetur. Hic igitur, quem semper in mea potestate fore credo, potius meo beneficio Regi operam det, quam alius, qui summis virtutibus ornatus sit; quem tamen mihi minime

nime obnoxium fore confidam, stat sententia. Opera igitur illius, ad cuius se clientelam applicuit homo nefarius, ad Regem introducitur; atque in principio insignem modestiam vultu atque verbis ostendit, patronumque suum diligenter obseruat; & ita se illi submittit, vt existimes illum perpetuo in eadem fide permanfurum. Post vbi magis atque magis sese artibus suis in gratiam Regis insinuat, statumque suum valido præsidio sepit, & opes suas confirmat, tum, Deus Bone! quam teter incedit? Quam cito pristinae fortunæ memoriam deponit? Quanto fastidio homines multo se meliores despicit? Quanta perfidia illum ipsum, per quem fuit ad Principem intromissus, oppugnat? Hoc denique clare videri potest, vt in principio nihil est humiliter adulate, ita, postquam opes suas firmissime constitutas opinatur, nihil esse superbius & insolentius. Illud tamen est intelligendum, cum, qui sibi hoc sumit, vt Principem quæstus sui gratia in omnem fraudem impellat, quamuis sit veterator & callidus, nullas tamen vires habere posse, nisi alterius adulatoris potentissimi gratia & opibus innitatur.

Quis



Quis ille, inquires, est? Amor ille cuique ingenitus, quo se quisque amat, sibi indulget, & assentatur. Quotus enim quisque est, qui non sibi valde placeat? Qui non se temere multis anteponat? Qui non meritis suis ingentia præmia deberi arbitretur? In hoc igitur amore, quo se quisque amplectitur, est initium totius temeritatis & insolentiæ constitutum: qui cum sit in quouis homine valde magnus, tum in Regibus tantus, atque tam vehemens est, ut illis sæpenumero totam mentem atque sensus eripiat. Animaduertunt enim, quoties per urbem vehuntur, se maximo peditum & equitum numero constipari; plebem undique certatim conspiciere, ut illos venerabunda conspiciat; omnem populum religione quadam attonitum illorum faciem contueri. Quid referam, quanta cæremonia dapes illis apponantur? Quam solemni ritu pocula ministrantur? Quam sæpe, & quam elaborata concinitate ministri genua flectant? Denique, ne minutias omnes persequar, ea superstitione coluntur, ut videant sibi plane non humanos, sed diuinos honores institutos. Quæ quidem omnia non vitupero; sed, quantum periculum ex illis impendeat, ostenda. Si enim
opes

opes ingentes, si honores immodici animos efferunt, & amor, quo se quisque amplexatur, faces admouent, & homines insanire cogunt, quid, quæso, in Regum animis, si sapientes non fuerint, euenturum suspicamini, cum viderint se in tantis opibus & imperio non humano more coli; sed in cælitum numero collocari? Cum igitur plerumque sibi summe placeant, sibi assententur, sibi que ipsi adulatores maximi sint, facile ad suam familiaritatem aduentitios adulatores admittunt. Hoc igitur is, qui sibi ex adulandi artificio opes ingentes pollicetur, acute prospiciens, foedus cum adulatore illo primario, hoc est, cum Regis immensa cupiditate percutit, totumque se ad illius nutum fingit & accommodat. Vt canis igitur venaticus, quam sagacissime potest, odoratur, quibus rebus, Rex aut Princeps ille, cui seruit, maxime delectetur; id autem ubi penitus exploratum habet, naturam suam ad tempus deferit, totumque se immutat. In hoc autem maxime hujus artis præclarissime laus, & perfectio summa consistit. Qui enim tantum ingenio atque solertia valet, vt naturam suam facile verset, &, quam velit, personam induat, &, quidquid illi

Si libuerit, summa calliditate simulet, totumque se ad libidinem Principis, cujus gratiam aucupari conatur, effingat, ut illi similis appareat: hic omnia, quæ volet, de artificio suo facile consequetur. Si videt igitur legem venatoribus delectari, canes alit, quos ad siluas atque nemora lustranda comparat, telorum vim maximam domum commortari facit; in eoque neruos omnes intendit, ut egregius venator habeatur: si leuitatibus amatoriis deditum cernit, se amore perlitum esse profitetur, & querimoniis omnia complect.

Ne autem omnia recenseam; quocumque modo Regem affectum, aut studio captum, aut morbo oppressum, aut flagitio corruptum cernit; ut in eodem studio versetur, & iisdem vitiis sit affinis, vehementer elaborat; ita enim versipellis est, ut, in quamcumque faciem velit, se facile conuertat. Suum igitur iudicium deferit; ut Regis sui libidinem sequatur; neque quidquam loqui audet, quamuis patriæ totius salus agatur, quod auribus illius injucundum accidat; sed in omnibus rebus se illi ministrum impurissimæ cupiditatis exhibet. Porro autem, quamuis multi Ro-

contineat, quod certis tantum diebus sit in
 aperto, ac propatulo collocandum. Ad illam
 vero superstitionem, cum qua Reges adiri so-
 lent, cupiunt semper aliquid addi, quo Regis
 nomen diuinius esse videatur; vt, cum homi-
 nes Regem aspexerint, non se populi mode-
 ratorem, atque patriæ parentem, sed numen
 cælo delapsum intueri putent, ad cuius as-
 pectum commoueantur animo, & toto cor-
 pore contremiscant. Hac igitur superstitione
 plerique homines imbuti non laborant, vt
 Reges debito amore & pietate prosequantur;
 sed vt apte & concinne sese ad illorum pedes
 abjiciant, & illorum manus, quoties illis ver-
 bum solito benignius excidit, osculentur,
 & vt sibi sint propitii, tam suppliciter at-
 que demisse postulent, vt non cum Principi-
 bus, sed cum ipso Deo loqui videantur. Quæ
 quidem res eo prouexit multorum Regum
 amentiam, vt se deos existimarent. Quid
 enim aliud impulit Alexandrum, vt suæ vir-
 tutis & humanitatis oblitus Calisthenem, quia
 illum vt Deum venerari noluit, crudelissimo
 supplicio mactaret? Quid multos ex illius suc-
 cessoribus, vt deorum nomina captarent?
 Quid Caligulam, quid Domitianum, quid
 multos

nultos præterea Romanos imperatores , quid Tyrannos innumerabiles induxit , vt illis , quibus non religiosissime colebantur , crudelissimam necem afferrent ? Num obscurum est , hoc tam scelestum & immane facinus , quo homines Dei gloriam ad se transferebant , & reliquos homines , quasi nihil haberent cum illis commune , contemnebant , atque pro nihilo putabant , fuisse adulatorum opera constatum ? Hac autem ratione Reges non graues tantum , sed etiam deos effecerunt. Videtis quam ingeniose fuerit ab hominibus acutissimis excogitatum , vt , quamuis Principes sint sceleribus infinitis alligati , se tamen interdum maximarum virtutum ornamentis excultos arbitrentur ; & , quamuis leuissimi sint , se tamen constantes & graues existiment ?

Sed vt melius hujus disciplinæ vim & rationem intueri queamus , velim redigatis in memoriam quod ante diximus , nempe homines , qui sapientes non sunt , hoc est , qui non rectam rationem , sed cupiditatem indomitam sequuntur , flagitiis coopertos esse ; ita tamen vt alii aliis flagitiis magis addicti sint ; qui tamen in duo potissimum genera diui-

134 DE REG. INSTITVT. ET DISCIP.

diuiduntur. Aut enim sunt acres & animosi, & ad rixam conciti, & bellicæ laudis appetentes: aut molles & ignaui, & lasciui, & ad venerem magis, quam ad arma propensi. Reges autem, quamuis se deos existimari velint, homines tamen sunt, eisdemque sæpe numero peccatis impediti: in hoc tamen differunt a reliquis hominibus, quod eo sunt in vtramque partem vehementiores, quo plures opes habent, maioremque sunt vitiorum impunitatem adepti. Quid igitur faciendum est iis, qui gratiam Regis inire student? Explorandum & inspiciendum est homini minime hujus artis ignaro, in quam partem Rex magis natura atque voluntate propendeat, non quidem vt eam naturam regat, & moderetur, sed vt infliget potius, & inflammet, & furentius insanire compellat. Si Rex igitur fuerit vehemens, & acer in ferro, vbi id a summis artificibus fuerit exploratum, id suspicient, vt Regem, satis jam sponte sua ad arma concitatum, magis ferocem & infestum efficiant: laudant enim vires, animum extollunt, virtutem admirantur, vnumque esse prædicant, quem opinentur homines ad summorum Imperatorum gloriam peruenturum.

His

his sermonibus elatus & inflatus præcepta mentia fertur, & ab omni ratione & humanitate deducitur; nec aliud, quam arma & lassicum, somniat, & in eam cogitationem otus incumbit, ut pacem turbet, & bellum, uamuis nefarium & iniustum, moliatur. Ergo simul atque speciosa causa fœderis rumendi, bellicque gerendi nascitur, consiliarius accersit, sibi in animo esse dicit, aliquid præclarum specimen suæ virtutis exhibere, nec a maiorum gloria degenerare; commemorat deinde causas, quas potest obendere, ne bellum omnino contra jus inferri videatur; malleque se vitam in summum discrimen inferre confirmat, quam injuriam aliquam inultam & impunitam relinquere.

Hic dicat aliquis, non Regis officium esse causas belli quærere; sed pacem juris æquabilitate conseruare? Bella nonnisi necessario sumamenda esse; nec enim pacem ad bellum conferendam, immo bellum, cum necesse fuerit, suscipiendum, ut pax & otium cum dignitate pariatur; satis magnam gloriam consequi eos Reges, qui regnum suum cum iustitia atque dignitate tuentur, animoque patrio subditis suis, & regia benignitate pro-

prospiciunt. Bello sæpe turbari disciplinam, violari religionem, frangi vires, opes confumi, innocentiam vexari, improbitatem excitari, omniaque rapinis, cædibus, stupris perturbari, atque commisceri. Addat deinde martem belli communem, & ancipites præliorum euentus; & quam sæpe multi Principes audaces & impigri, opibusque summis instructissimi, ex eo bello, ex quo victoriam & decus sperabant, insignem cladem & summum dedecus acceperint. Postremo illud adjiciat, eas mouendi belli causas, quas commemorat, minime sibi iustas videri; nihil autem esse tanta cura Regibus providendum, quam ne quid contra juris diuini & humani præscripta moliantur. Si enim secus fecerint; fore, vt non solum a se homines alienent; sed etiam in grauem offensionem diuini numinis incurrant. Fieri autem non posse, vt bellum illud, quod & Deum & homines offendit, prosperos euentus consequatur. Hæc si dixerit aliquis in consilio; cui Rex acer, atque ferox, bellicæque gloriæ cupiditate flagrans præfuerit, quo animo putatis sententiam illius accipiendam?

Pessimo, inquit M. Nam & in Regis of-
fen-

ensionem incidet , & ab aliis consiliariis tamquam homo nullius animi contemnetur.

Quid igitur , inquam , fiet ? Cum fuerit animaduersum , vt quisque acerrime sententiam dixerit , ita maximam a Rege gratiam initurum ; omnes certatim elaborabunt , vt Regem sponte sua furem quasi spiculis coniectis exagitent. Satis enim quamuis causam belli gerendi iustam esse Regi gloriæ cupido disputabunt ; nec enim eam esse tam exacte ponderandam , quam fieri solet in iudiciis ; illic enim , inquit , legum subtilitate æquitatem elimari ; in Regum vero controuersis viribus & armis rem totam decerni. Itaque in Regum consiliis non tam habendam esse rationem juris & religionis , quam vtilitatis & gloriæ ; quæ quidem martis vi & impetu , non nimia officiorum omnium sanctitate comparatur. Si te igitur , inquit , juris nomen impedierit , ne bellum moueas , numquam aliquod virtutis egregiæ tibi nomen & gloriam comparabis. Vix enim poterit aliquod esse bellum , quod non juris & æquitatis ratio dirimat. Quamuis igitur omnia regni munera iuste atque vigilanter administres , inglorius tamen ad extremam ætatem

tem peruenies ; quare aut gloriæ studium omittas opus est, aut nomina juris & æquitatis aspernere. Alstringat hæc juris religio animos humiles , & abjectos , qui contumeliam pati possunt , ad quorum subsidium leges inuentæ sunt ; Regum namque jus non est in legibus & æquitate , sed in armis & imperatoria virtute constitutum. Hoc enim jure vsi sunt omnes summi Principes , qui multas nationes suo imperio subdiderunt , & ea ratione immortalitatem nominis assecuti sunt ; qui , si juris rationem nimis sanctam habuissent , numquam certe eas nationes , a quibus nunquam læsi fuerant , bello vastassent ; & ita inertia & desidia corrupti , vel aliis prædæ fuissent , vel certe in tenebris & obscuritate latuissent. Quod si belli ancipites euentus animo reformidas , considera viros illos excellentes , quorum nomen est immortalitati consecratum , nunquam eo metu contineri potuissent , quin omnia facinora non modo præclara , sed etiam valde periculosa fusciperent. Sed cum secum statuissent , aut cum gloria viuendum esse , aut cum gloria moriendum , otium cum dignitate ferre minime potuerunt ; & ita victorias innumerabiles adepti sunt. Raro enim

enim summa virtus , atque vitæ contemptio felici successu caret ; Fortes enim (vt est in prouerbio) fortuna iuuat. Cum igitur belli mouendi causam ad speciem satis honestam habeas , & summis opibus abundes , & maximis exercitibus constipatus sis , & exempla domestica tibi stimulos frequenter admo-ueat ; quid minus dignum ista tua virtutis indole fingi poterit , quam contemni ab hostibus , & aliquod dedecus & ignominiam juris obtentu atque foederis nomine tolerare ? Quare , Princeps clarissime , facinus jam aliquod dignum te , dignum virtute tua , dignum maioribus tuis aggredere ; metum & horrorem , quacumque armorum impetum tuleris , hostibus tuis incute ; omnia viribus tuis obstantia ferro prosterne. Experiantur omnes , cum quibus aperto Marte conflixeris , quantum viribus atque virtute valeas ; sic enim turpitudinem & ignominiam depelles , imperiumque tibi a maioribus tuis relictum magnis accessionibus amplificabis ; & ingentem gloriam , quam nulla vnquam obscurabit obliuio , consequeris. Hac oratione qui Regi iuueni , nimisque bellandi studio concitato fuerit adulatus , potestis ne mente per-

ci-

cipere quantam perniciem sit communibus rebus allaturus? Neceſſe enim continuo erit, vt ille non quidem vt ſuos incolumes ab omni calamitate tueatur, ſed vt immenſæ ambitioni, quæ illum ſtimulat, aliqua ratione ſatisfaciat, tantam ex ciuium bonis pecuniam cogat, quanta ſat ſit ad maximos exercitus alendos, & præſectorum avaritiam exſaturandam. Immania igitur tributa imperabit; tenues homines omni victu ſpoliabit; ciuitates & prouincias inanes reddet; militum licentiam ita ſoluet, vt nullo metu poſſint eorum effrenatæ libidines cohiberi; externis poſtremo auxiliis rempublicam conculcandam permittet. Non ſolum igitur iis, cum quibus bellum ſine aliqua graui cauſa gerit, erit infectus; ſed ſuis etiam, pro quorum ſalute ſe ad mortem offerre debuiffet, peſtem atque perniciem importabit. Iam vero, vt victoriæ obtineat, quam voluptatem, ſi non eſt totius religionis & humanitatis expers, ex tam horrendo ſpectaculo capiet, vt illius gratia ſine vlla neceſſitate bellum ſuſcipiat? Multa namque hominum innocentium millia trucidantur; ſupra per vim multis virginibus, & ingenuis mulieribus inferuntur;

for-

fortunæ diripiuntur ; sacra polluantur ; liberi homines in seruitutem abducuntur ; omnia ferro, flamma, vastitate consumuntur. Igitur qui mortem innocentibus afferunt , aut pudorem castis eripiunt , aut religionis sanctitatem violant , aut conjectis facibus ædes inflammant , aut cultum agrum vastant , sempiterno supplicio digni sunt : homines , qui causam infinitis cædibus, flagitiis, latrocinis, sacrilegiis , inflammationibus , atque populationibus attulerint , quo satis digno supplicio poterunt debitas pœnas , vt æuo sempiterno acerbissime cruciantur , exoluere ? Quid si iidem ciuibus suis atque patriæ vniuersæ ea omnia mala , quæ sumus oratione complexi , suis consiliis temerariis importauerint ? Fit enim sæpenumero , vt ii , qui se victores fore confidunt , vincantur ; & ea mala , quæ hostibus suis inferre cogitabant , ipsi merito atque jure subeant. Ipius tunc communis exitii & publicæ euersionis adulescentes causam omnem sustinebunt.

Cernitis jam animo quantas strages edat adulatorum immanitas , cum Reges impigros & audaces nacta est ? Quanto studio illos odio pacis incendant , & ad bellum temere gerendum

dum sollicitet ? Atque præter alia mala , quibus isti homines nefarii Reges ad inutilia & perniciofa bella concitando rempublicam perdunt & affligunt , eum multis erroribus turbulentis inficiunt , & a veræ religionis cultu ad falsæ & impuræ studium traducunt. Laxatis enim pudoris & verecundiæ vinculis , & morum sanctitate & castimonia profligata , facillimum est in populo , propter assidua mala furiose conturbato , pro vera religione falsam supponi atque substitui ; maxime vero cum ea , quæ inducitur , popularis extiterit , qualis ea est , quæ his calamitosis temporibus in illis præcipue partibus , in quibus ejusmodi bella versata sunt , nostris peccatis increbuit. Vnde concludi potest , adulatorem esse pestem reipublicæ , morum perniciem , patriæ turbinem atque procellam ; legum sanctiones , pacis ornamenta , religionis præsidia , omniaque pietatis studia peruerterentem.

Haëtenus ea quidem mala persecutus aliqua ex parte sum , quæ eorum hominum scelere patrantur , qui sese ad Reges Marti dicatos adjungunt. Nunc consequens est , vt videamus , quam vrbani & festiui sint Veneris satellites atque ministri , qui operam dant illis

Re-

Regibus , qui magis sunt in libidinem propclives , quam ad arma propensi. Referamus igitur animum ad illam industriam , quam elegantes & lautæ mulieres in eo consumunt , vt Principem nimis molem & delicatum , & exquisitissimis cibis egregie saginatum , multisque odoribus suauissime delibutum reddant ; hunc igitur sic enutritum vbi vafri homines & acuti excipiunt , illiusque naturam penitus explorant , spe ingentis prædæ erecti se accingunt , vt mollitiem illius nitidi Principis in suum compendium & quæstum conuertant. Ergo si quid naturalis pudoris in eo inerat , id totum verborum petulantia & lenocinio tollendum curant , seque illi diligentissimos intemperantiæ ministros fore profitentur ; partim igitur lasciuis sermonibus atque jocis petulantibus eorum cupiditatem inflammando , partim ad consensum libidinis multas mulieres alliciendo , sic Principis animum deprauant , vt nihil fingi possit intemperantius. Si enim , vt ante diximus , omnes homines ita sunt voluptatis appetentes , vt neque paupertas , neque disciplina , neque judiciorum metus eorum libidines coercere possit ; & quo maiores opes sunt , eo licentia

144 DE REG. INSTITVT. ET DISCIPL.

maior , & cupiditas immanior existit ; quid fiet de Regibus , quorum opes ingentes & deliciae summæ sunt , & cupiditates omni metu solutæ , cum ad ea domestica mala perditorum hominum impuri sermones accesserint ? Nec enim solum eos ad nequitiam stimulant ; sed demonstrare nituntur , nullam dedecoris maculam ex flagitiosæ libidinis impuritate Regibus adolescentibus aspergi ; intemperantiam enim iuuenum inquirunt , non esse vitio vertendam , sed in urbanitatis & elegantiae laude ponendam. Decere illam ætatem lepores , & vneres , & amorum blanditias , & sales atque jocos , ad libidinem acrius irritandam accommodatos. Regibus autem id magis conuenire , quo sunt ad omnes voluptates animo securo perfruendas magis instructi atque parati ; stultum est , inquiunt , cum possis jucundissime vivere , tristitiam vitæ consecrari. Regibus deinde fas est quodcumque illis libuerit. Eum enim statum affectui sunt , vt omnium subditorum opes atque labores sint ad eorum voluptates & commoda referendi ; illorumque libidines sint pro legibus reputandæ. Quod si Regibus voluptates respuendæ sunt , & blandimenta naturæ
reji-

rejicienda ; valeat regnum , imperii majestas
 intreat , si nihil est aliud quam curas & so-
 licitudines allatura. Quare, si sapis, fruire fe-
 licitate tua , neque adolescentiæ florem sine
 fructu summæ jucunditatis effluere sinas ; vo-
 lat enim ætas , & facultas perfruendæ volu-
 ptatis elabitur , frustra que tandem occasio-
 nem eximæ suavitatis amissam lamentabere.
 Fac igitur ut , quantum fieri possit , jucundif-
 sime viuas , intelligantque omnes mortales
 nihil esse in terris Rege beatius. Regni vero
 procurationem hominibus spectatis commit-
 te , ut illi , si quid opus fuerit , ad te interdum
 de republica referant ; & interim ipsi pro te
 laborem subeant , & tu solutus omni cura de-
 liciis atque voluptate circumfluas. Sententia
 placet ; corpus enim tenerum laborem fugit ,
 & animus deliciis enervatus negotii diffi-
 cultatem anxie reformidat ; nihil igitur li-
 bentius Princeps ille faciet , quam ut flagi-
 tiosas voluptates honestis laboribus antepo-
 nant ; regni que gubernacula illis amicis , quos
 libidinis confcios habet , aut aliis ejusmodi
 tractanda relinquat : noctem igitur in flagi-
 tiis , diem vero in fomno , & in ludo parum
 liberali consumit. Ne autem hominum que-

relas audiat, includit se domi, admodumque rara in publicum prodit; in quo quidem suorum familiarium sermonibus inductus, existimat se gravitati atque dignitati consulere. Si te, inquierit, ita vulgaueris, ut quivis homo de plebe, quoties velit, ad te adire possit, præter illam molestiam, quam tibi homines ignobiles exhibebunt, majestatem tuam imminues; paulatimque fiet, ut ob nimiam familiaritatem contemnaris. Commode igitur regia dignitas a te retineri poterit, si aditus ad te fuerit ita difficilis, ut paucis admodum pateat; reliqui vero ad nos postulatæ suæ deferant, ut de illis cognoscamus, vel eos ad te, si visum fuerit, referamus.

Dum igitur Rex ab illis ejusmodi oratione persuasus se ab officio suo remouet; illi intorsem ejus summo atque defidia ad suam utilitatem sano diligenter abutuntur. Quod ut rectius faciant, sedus inter se seriant, & societatem sceleris ineunt: Da mihi operam mutuam, tu me laudabis apud Regem, ego vicissim industriam & vigilantiam tuam verbis extollam. Tu dicito me esse dignum hoc honore, quem ambio: ego rursus te dignum esse prædicabo, in quem hoc munus, quod

tis, conferatur. Tu vrbauitatem meam
 ato; ego contra ingenii tui acumen ad-
 bor. Quid præterea? Demus operam ne
 alius in Regis familiaritatem veniat,
 opes, quibus imminemus, intercipiat;
 ndum enim est, ne si aliquis, qui nobis
 cellat ingenio, fuerit admissus, nos, vbi
 , excludat. Omnes igitur aditus præcla-
 us, Regem obsessum teneamus, omnique
 idio circumuallemus, ne quis ad illum
 s inuitis aspiret. Quod si aliquis inter
 : tantum gratia & opibus excellit, vt id
 ei non facile patiantur; fidem nefarie
 lunt, & de illius pernicie conjurant; quod
 ia ratione euertere illum nequeunt, cum
 num negotium aliquod se offert apud alios
 reipes gerendum, aut munus aliquod in
 sinquis terris administrandum; hominis
 mium laudant, industriam in cælum tol-
 :; nec alium reperiri posse confirmant,
 maiore cum prudentia & auctoritate no-
 lum illud conficiat. Legatur igitur, aut vt
 lius dicam, sociorum perfidia relegatur;
 vero præclari laudatores, vbi per speciem
 ioris socium in externas regiones aman-
 oriat, locum illius occupant, & vallo at-

que munimento sepiunt , firmoque præsidia
vinciunt ; ne , cum ille redierit , queat , vnde
fuit dejectus , vlllo modo restitui. Nec eo
contenti , absentem primo clanculum mor-
dent ; apertius deinde rebus illius obtreçant,
operamque dant , vt Rex quotidie magis ho-
minem despiciat. Si res illi bene procedit ,
minime mirum esse dicunt ; negotium esse
facile & expeditum , & ejusmodi , vt a quo-
uis transigi possit ; si vero aliquid secus acci-
dit , quam oportebat , omnia confestim in mi-
serum tela jaciuntur ; illumque aut ignauiz
& timiditatis infimulant , quod non acriter
institerit , neque se virum ostenderit ; aut au-
daciz & temeritatis accusant , quod eos , cum
quibus negotia magna tractabat , insolentia
orationis offenderit. Hæc in sermone quoti-
diano inter se conferunt ; hæc eadem cum
Rege familiarissime loquuntur ; donec id , quod
fuerat ab illis institutum , perficiant : eorum
igitur opera ita se Rex illi misero infestum
præbet , vt nunquam eum rursus in fami-
liaritatem recipiat. Et hac quidem fide ami-
citas inter se colunt , vt tantisper amico par-
cant , dum vel aliquid ab illo sperant , vel
opes illius ita munitas esse putant , vt non fa-
ci-

cile labefieri posse confidant. Vbi vero primum illius evertendi facultatem oblatam vident, eam minime prætermittunt. Sic autem fit, vt status reipublicæ paulatim commutetur; nomen enim tantum regni manet, re autem vera paucorum potestas instituitur; intolerabilis enim potentia ad paucissimos homines defertur. Dum is igitur, qui Regis nomen obtinet, in voluptatibus ætatem conterit; dum somno desidiaque torpet; dum ita suam personam in negotiis interponit, vt semper suis familiaribus obsequatur; illi interim moderatores reipublicæ ita se gerunt, vt omnia venalia proponant, & mercatum instituunt omnium curationum & munerum. Sic autem silent leges; tolluntur iudicia; libertas eripitur; auaritia dominatur; neque solum viduæ atque pupilli, & reliqui, qui propter imbecillitatem obnoxii sunt injuriæ, sed potentiores etiam vexantur, & multa incommoda patiuntur. Cum enim inciderint in offensionem eorum, qui tenent omnia, necesse est, vt omnium fortunarum periculum adeant; omnes igitur illis adulentur opus est, illis seruiant, illos muneribus atque donis afficiant, ad illorumque libidines

se

se totos accommodent ; reliquis autem , qui apud illos in gratia non sunt , ne lamentari quidem libere calamitatem suam , aut opem contra illorum potentiam implorare licet.

Neque solum ex omnium subditorum bonis præda agunt ; sed Regis etiam opes domum auertunt , illisque gazas impune diripiunt ; studia vero virtutis & honestatis abjiciuntur. Nec enim ibi frugalitas & continentia locum habere potest , ubi luxuria immensa principatum tenet ; nec animi magnitudo , ubi libertas oppressa est ; nec iustitia , ubi omnia venalia sunt ; neque prudentia , ubi cuncta temeritate & amentia perturbantur. Jam vero liberalitas , & beneficentia , & reliquæ ejusmodi virtutes , quomodo splendere possunt , ubi omnia oppressa sunt crudelitatis & auaritiæ dominatu ? Armonum vero usus penitus obsolescit ; insidentur enim milites ; homines fortes ejiciuntur ; duces & imperatores ab hominibus profligatis atque perditis honoribus & emolumentis spoliantur : sic igitur cum ad fœderatorum hominum libidinem res administrantur ; cum nihil gratis ab illis auferatur ; cum magistratus & præfecti non dignitate , sed pretio fiant ;

cum legum auctoritas concedat ; cum judicia nulla sint ; cum ubique minutæ tyrannides existant , maiorum tyrannorum gratia confirmatas ; quas reliqua spes erit populis tanta importunitate perdisis & afflicis ? Omnium pecunia in paucorum domibus includuntur ; opes Regis ipsius comminuuntur ; adulteria & homicidia impune suscipiuntur , vniuersa respublica furis & latrocinis infesta tumultuatur ; tantisque dissentionibus laborat , ut diu stare non possit. Et hæc quidem sunt artes , quibus illi in pace gubernant ; si pax appellari potest interitus legum , totius reipublice foeda confusio.

Nunc belli gerendi rationem videamus. Imminet repente bellum , & hostium exercitus ad nos oppugnandos summa celeritate conuenit. Euecentur , inquiunt , milites. Qui ? Inne , quibus sæpe illulstis ? Quorum virtutem contempsistis ? Quos omni contumelia dignos existimatis ? Conscribantur exercitus. Qui exercitus ? Scurtarum ne , atque lenorum , quos , fortibus viris exclusis , in fidem vestram recepistis ? An potius mercatorum atque redemptorum , quos avaritiæ ministros habuistis ? Arripiantur arma , tela subite

com-

comparentur. Quæ arma? Quæ tela commemoras? Ea ne, quæ studio atque vigilantia vestra situ atque rubigine consumpta sunt? Nec armorum vllum studium, nec arma video, neque viros denique, quibus arma gestari possint. Omnes enim, in quibus inerat aliqua virtutis militaris indoles, cum cernerent a vobis homines fortes irrideri, virtutemque ludibrio haberi, præmiaque virtuti debita flagitiosis & impuriis hominibus condonari, abjectis armis sese ad eas artes, quibus effeminantur animi, libenter & studiose contulerunt, ut vestris vestigiis insisterent. Sociorum, inquis, auxiliis a nobis periculum propulsabimus. Miserum, copiis tuis omnino diffidere, externisque hominibus, qui fidem venalem habent, vitam tuam atque libertatem tuendam credere. Sed esto, sit aliquod firmum præsidium ignavis hominibus in externo & conducto milite collocandum. Exprobre igitur pecuniam, ut homines, quos non reipublicæ caritas, neque insigne laudis studium, sed pecuniæ tantum cupiditas ad arma sollicitat, pecuniæ magnitudine feroces efficias. Vnde igitur tantam pecuniam erogabitis? Num ex Regis ærario, quod est par-

partim illius intemperantia , partim avaritia vestra penitus exhaustum ? Num ex populis immanitate vestra perditis , qui quemadmodum vitam tenuissime sustentent , rationem inire non possunt ? Nam illud certe non dicetis , vos , vt debitum Principi , qui vos tantis opibus auxit , officium persoluat , velle pestem hanc a republica vestris sumptibus arceret . Quæ enim vestra sapientia est ; credo vos malle communi patriæ incendio conflagrare , quam aliquid pecuniarum , quas summo studio coaceruauistis , impendere . Sed demus fieri posse , vt in tanto Principis somno & negligentia , in tanta ministrorum avaritia , in tanta populorum calamitate , sit tamen ærarium refertum : Quem fructum poteris in bello ex ingenti pecunia sine virtute percipere ? Diuitiæ namque , quas imbelles homines possident , non eorum propriæ , sed hostium potius existimandæ sunt ; victorum enim manubiæ sunt , non imbecillitatis oppressæ subsidia . Tantum enim abest , vt grandis pecunia sine virtutis auxilio opem ferat ullam , vt maius etiam ruinæ periculum molitur . Omnes enim illud bellum libentissime suscipiunt , ex quo minimo cum periculo

lo maxime sibi belli pecunia pollicentur.
 Quocirca maxime probe eorum sententiam,
 qui pecuniam belli aeris esse dicant. Bel-
 lum enim, non tam pecunia, quam virtute
 conficitur; & virtute pecunia comparatur,
 non virtus pecunia. Nec enim Darii gazæ
 Alexandri Magni virtutem oppressit; Ale-
 xandri porro virtus omni Darii gazæ potita
 est; ex quo sequitur nullum esse firmum præ-
 sedium, ubi virtus abest, in diuitiarum afflu-
 entia constitutum. Quid fiet igitur in bello
 de Rege ignavo & imbecillo, diuite tamen
 & opulento, cum ab hoste acri & strenuo
 fuerit oppugnatus? Profecto, nisi pacem ab
 hoste avaro & insolente multo auro redeme-
 rit, cum omni republica sibi commissa fua-
 ditus interibit. Quod quidem dedecus non
 dico Principibus, quorum omne studium est
 in verissima gloria consumendam; sed omni-
 bus ingenuis hominibus, qui dignitatem ca-
 ram habent, debet esse morte ipsa calamito-
 sius. Non est enim pax fortibus hominibus
 auro, sed virtute parienda. Quid illud? Quod
 in pace pecunia redempta nullum est fir-
 mum amicitiae foedus, sed perpetuae servitu-
 tis autoramentum; necesse enim erit singu-
 lis,

lis ferme annis eadem tributa pendi; aliter enim nunquam deorunt causæ, quibus victor bellum intermissum redintegret; ut illum, quem semel perculit, & abiecit, omnibus tandem bonis spoliet. Vbi igitur Rex fuerit mollis & languidus, & veneri deditus, & in republica gerenda dissolutus, & in potestate perditorum hominum constitutus; fieri non poterit, ut status reipublicæ conseruetur; nam nec ullæ opes esse possunt, ubi virtutis studium extinctum est. Et quamvis ingentes opes essent a Principe domi reconditæ, nullum esse posset in illis firmum ad pericula depellenda subsidium; imo, quo plures opes sunt injuriæ partæ, eo Princeps maiore suorum odio flagrat, & maiore aliorum invidiis premittitur, & acrius cupiditatem hostium incendit & irritat.

Hæc quidem mala & alia multa sunt, quæ adulatorum opera rebuspublicis inferuntur, cum Regem mollem atque desidem nacti fuerint. Videte igitur, quam sint semper omni reipublicæ tetri, & infesti, & perniciosi, siue in pace, siue in bello, siue sese ad Regem aacem & impigrum, siue ad desidem & ignauium applicuerint. Non enim ii
sunt

sunt , qui vnum modo & ratione refrenent ; alteri stimulos admoueant ; imo contra , qui animum vehementem & incensum acrius inflammant , & ardentibus furoris & amentię tædis exagitant ; animum vero mollem , & languidum , & flagitio corruptum , multo magis mollem & flagitiosum reddant , totiusque laudis & dignitatis immemorem . Vt autem in sedibus , cum neruū nimis intenduntur , aut nimis remittuntur , harmoniam dissolui necesse est ; ita cum Rex aut nimis ad vim , ad facinus , ad belli furorem concitatur , aut nimis animo relaxatur , & nimis molliter & delicate se gerit ; necesse profecto est , omnem concentum & symphoniam reipublicę conturbari . Illud enim *Nimis* , quod tu , Menesi , omnem vitę rationem euertere dicebas , adulatorum est proprium ; nimis enim laudant , nimis vituperant , nimis erigunt animos , nimis abjiciunt , nimis gestiunt , nimis affliguntur ; & ita cum ad Regem accedunt , in quamcumque partem eum inclinatum vident , nimis eum impellunt , & paullulum etiam labantem præcipitant .

Quid autem cum Rex non vnam tantum sectam sequitur ; sed in contrarias partes an-

ci-

cipiti studio & cura distrahitur? Fit enim interdum vt non solum acer, iracundus, elatus, ambitiosus, insolens, & infestus sit; sed etiam languidus, & eneruatus, & petulans, & flagitiosus, & libidini atque nequitiae nimis turpiter addictus. Vt igitur in eodem simili verfer, quo paullo ante vsus sum, quemadmodum in cithara, cum aliae chordae nimis intentae, aliae nimis laxae sunt, & omnes inter se maxime discrepent, absurdae quaedam & dissonae voces cum maxima aurium offensione funduntur; ita Rex in tanta vitae disparitate, morborumque repugnantium dissimilitudine a se ipso dissidens, secumque discordans, omnium hominum aures, oculos, animos grauiter offendit, vniuersamque rempublicam nimis confusa & absorta ratione perturbat. Nec enim eam tantum furore, & amentia, & inconsiderata temeritate conuellit; sed etiam dedecore afficit, flagitiorumque omnium impuritate corrumpit. In hac igitur tam perturbata vitae ratione, tantaque flagitiorum dissensione, atque pugna, operae pretium est animaduvertere, quam operam nauent isti boni viri Principibus, quam varie suam naturam versent, & ad

& ad variam atque dissimilem cupiditatem Regis accommodent. Tantum enim valent ingenio , vt nullus sit tam difficilis morbus, quem non adulando & assentando augeant; nullus sit animus tantis commotionibus agitatatus , quem non omni flagitio & aegritudine contaminent ; tam diligenter autem vnicuique Principis flagitio seruiunt , vt ad illud tantum incitandum natos esse dicas. Nunc enim furorera Principis augent, & illum im-
 mensa cupiditate dominationis inflammant ; nunc omnibus blanditiis & lenociniis ad vitæ mollietiam , atque flagitiosas voluptates alliciunt ; & ita denique varie illum torquent , & flectunt , vt nihil Regibus , qui se illis dediderunt, aut magis vehemens & acere, aut magis languidum & enervatum possit excogitari. Quod si , vt antè jam dictum est , duæ virtutes cum omnibus ingenuis hominibus , tum vel maxime Regibus necessariae sunt , nempe fortitudo , & animi moderatio ; omnisque Principis institutio eo in primis referenda est , vt sit illius natura ita temperata , vt cum animi vehementis impetu moderationis lenitatem coniungat ; & rursus lenitati atque mansuetudini , cum opus
 ita

ita fuerit, vim quamdam iræ paullo acrioris admisceat : quam poenam merentur ii, qui nullam in Principe instituendo moderationem adhibent ; sed illum aut elatum & iracundum sine vlla temperatione clementiæ, aut mollem & delicatum sine vilo studio virtutis efficiunt ? Iam vero cum vtrumque præstiterint, et Reges, in eorum disciplinis nutriti, non solum superbi, truculenti, & immanes fiant ; sed etiam desides, & ignavi, multisque flagitiis infames sint ; nullo satis digno supplicio tam scelestum & immanum facinus vindicari potest.

Non tamen in vilo modo sum, qui velim inductus odio laudes eorum obterere, qui Principum libidinibus obsequuntur ; semper enim tribui plurimum eloquentiæ, & eos, qui in illa principes extiterunt, admiratus sum. At nemo potest negare eos, quos multi Principes in deliciis habent, esse eloquentiæ laude præstantissimos ; tantum enim in dicendo valent, ut probent esse ingentem in summa imbecillitate potentiam, in miserrima seruitute principatum, in summa miseria florentissimæ atque beatissimæ vitæ rationem.

Quo tandem, inquit Taurora, modo ?

Pri-

Primum, inquam, statuant illum, qui omnia ad voluntatem suam administrat, & in omnibus rebus libidini suæ diligenter obsequitur, non modo liberum & potentem, sed summi Principis nomine dignissimum: si enim Princeps est, qui multum potentia præstat; & potentia in eo posita est, ut, quidquid libuerit, faciat; is certe Princeps potentissimus habendus est, qui perficit, ut omnia, quæ viderit, & concupierit, & cogitauerit, ad nutum illius præsto sint, & cupiditati illius obtemperent. Cum autem Principes nomine potentiae maxime gloriarentur, & ab amicis persuasi maximam potentiam in libidinis infinitæ licentiæ atque fructu constituent; sit tandem, ut nullum flagitium sibi dedecori fore putent, dummodo ex illo flagitio constet, eos tantum posse, quantum velint; quod si progredi longius coeperint, nullum erit tantum facinus, quod illis minime gloriandum atque præ se ferendum videatur. Ergo siue per vim labem castis inferant, siue bonis vitam eripiant, siue demum potentium fortunas avertant, siue quidquam aliud contra jura omnia designent, quo significari possit, illos

inigni potentia & robore præstare ; periculum est ne sibi summam laudem & gloriam tribuendam putent , & reliquos Principes , qui jure suo non ad eundem modum vtuntur , aut stultitiæ , aut timiditatis insimulent. Sic autem opera eorum , cum quibus conjunctissime viuunt , fit , vt cum imbecillitate & inopia laborent , se tamen potentia & opibus florentissimos arbitrentur.


Quam imbecillitatem , inquit Tauora , & quam inopiam narras ? Vt enim fateamur eos , qui omnia officia vitæ voluntate & libidine metiuntur , flagitiosos & infames esse ; non tamen ex eo sequi videtur , vt inopes & imbecilli sint.

Quid ? Inquam. Eum ne , qui nihil arbitratu suo decernit , qui ad alterius nutum viuit , qui nihil agere , nihil moliri audet , quod non sibi fuerit ab eo , cujus nutus omnes obseruat , imperatum , aliquid posse suspicaris ? Minime , inquit. Quid , inquam , deinde ? Is ne , qui totus est positus sub libidinis dominationi , aliquid arbitrio suo gerit ? Non certe. Libido namque est , quæ illi leges imponit , quæ facies admouet ; quæ verbera intentat ; quæ supplicium comminatur ; quæ sic illam

accipit, vt nullo cruciatu contenta esse possit. Qui igitur illi paret, non solum Princeps aut potens existimandus non est; sed ne liber quidem, imo mancipium vilissimum plagis infinitis obnoxium. Deinde, si potens ille est, qui quod vult facit; & qui libidini paret, non vult quod facit; nonne perspicuum est, eum nihil omnino posse? Volumus enim non tam id quod agimus, quam id cuius gratia actionem aliquam suscipimus. Veluti, cum pharmacum sumimus, non pharmacum, sed sanitatem volumus; ergo si, multis pharmacis exhaustis, morbum minime depulimus, minime, quod volumus, effecimus; sed quam tenues essent naturæ nostræ vires ostendimus: sic etiam Princeps, qui se flagitiose gerit, flagitium illud non vult, nisi propter emolumentum & fructum, quem ex flagitio se percepturum credit; ergo si id non fuerit adeptus quod optabat, sed quo maiore studio flagitia fuerit consecutus, eo se magis omnibus illis commodis, quæ sibi opinionis errore fingeat, priuatum senserit; nonne perspicuum est, eum nullam potentiam, nullas vires, nullas opes habuisse? Nec enim
illum

illum statum assequi potuit, quem ardentè expetivit: dominationem enim & infinitum imperium quærebat, & libertatem amisit; famam & gloriam aucupabatur, & sempiternam ignominiam subiuit; beatam vitam sitienter appetebat, & omnibus ærumnis atque miseriis circumuentus est. Nullum enim malum abesse potest ab eis, qui, cum multis opibus abundant, temeritate & amentia ducuntur; omnia namque ad pestem & perniciem conferunt, quæ sibi fuerant ad salutem attributa.

Ergo quo magis isti, qui Principibus operam nauant, eloquentia florent, eo magis sunt ab eorum familiaritate repellendi; eorum siquidem opera fit, ut multi Principes existiment nihil esse magis regium, quam voluntati propriæ satisfacere, & cupiditatibus obsequi, & in omnibus rebus administrandis non lege, more, instituto, & ratione, sed appetitu, levitate, libidine, & amentia gubernari; usque adeo, ut illorum opinione is regio nomine sit dignissimus, qui maxime dedecori, flagitio, atque turpitudini seruit, totumque se dat nefariæ voluptati constringendum.



HIERONYMI OSORII

LVSITANI

EPISCOPI SILVENSIS

DE REGIS INSTITVTIONE

ET DISCIPLINA.

LIBER TERTIVS.



LIA multa dici in hanc sententiam possent, sed hæc, quæ dicta sunt, satis superque sunt, ad hoc genus hominum ab omni Principum aditu & congressione reppellendum; summam tamen in hac cautione difficultatem fore prospicio.

Quam difficultatem, inquit M. Eam inquam, quæ tota est in amoris vi & magnitudine constituta. Nihil enim est, quod magis animos amore conciliet, quam amoris indicium; inhumanum enim est non amare eos, a quibus te non mediocriter amari perspicis.

Re-

Recte, inquit. At constat, inquam, hos homines, qui apud Regem in gratia sunt, amore mirum in modum cruciari; quod quidem multis signis intelligi potest. Nam primum ita sunt in illius vultu defixi, ut oculos auertere alio nequeant. Deinde, cum absunt, illius desiderium ferre non possunt. Deinde nullum sermonem cum aliqua voluptate ad aures admittunt, nisi qui de Regis laudibus habeatur. Noctes deinde insomnes illius causa traducunt; de illo perpetuo loquuntur; somniantes de illo cogitant; & illius speciem sibi in somnis intueri videntur. Tum vero illa quam expressa signa amoris sunt, quod totos se ad illius voluntatem & studium fingunt, & pro varietate affectionum, quibus illum commotum animaduertunt, variis commutantur, ut appareat illorum animos non proprio sensu atque natura commoueri, sed omnes rationes ex Regis animo suspensas habere. Si lætum esse vident, exultant; si tristem, abjiciuntur; si iratum, efferrantur animis; si cupiditate inflammatum, ut libidini illius tota mentē seruiant, immoderata cupiditate rapiuntur. Denique quocumque motu illum commoueri & agitari

tari perspiciunt , eodem etiam mirifice concitantur. Iam vero , quam sint de illius valetudine atque vita solliciti , quis explicare dicendo poterit ? Horrent enim , & exalbescent metu , & pauore concutiuntur , quoties Regem aliquo morbo oppressum , aut in aliquo periculo constitutum aspiciunt. Postremo , quod est maximum amoris signum , alii aliis inuident , & æmulationis & obtrectationis morbo grauissime laborant. Riuales igitur odio persequuntur , & quamuis se illos diligere simulent , tamen extinctos cupiunt. Possumus igitur , cum hæc eximii cuiusdam amoris signa videamus , inficiari , eos esse summo amore Principis , cui seruiunt , inflammatos ?

Minime , inquit T.

Si igitur , inquam , Regem non mediocriter amant , qua tandem ratione Regem impellemus , vt homines lepidos & vrbanos venustatibus affluentes , quibus se carissimum , & iucundissimum esse conspicit , ablegari patiatur ?

Si igitur , inquit , id efficere dicendo poteris , vt Princeps eos , a quibus se perditè amari videt , a se segregari sinat , magnam
elo-

eloquentiæ significationem dabis.

Id quidem, inquam, experiiri licebit; sed mihi velim credatis, peruersam loquendi consuetudinem maximam malorum omnium causam rebus humanis attulisse. Dum enim res turpes honestis nominibus appellamus, turpitudinem facillime honestatis specie capti fuscipimus. In vita igitur & officio delinquat opus est, qui in verbis & oratione delinquit; quod quidem manifeste in amoris nomine & ratione perspicitur. Quid enim est amore honestius? Quid illa cupiditate, cui multi nomen amoris imponunt, flagitiosius? Amor enim est honestatis studium, veræ pulchritudinis appetitio, decoris & laudis immensa cupiditas. Voluptatis autem appetitus in turpitudinem fertur, & dum se expleat, de pulchritudinis & honestatis interitu minime laborat. Amor igitur pulchritudinem admiratur, & honestatem & decus omnibus vitæ commodis anteponit; libido autem omnem eripit honestatem, & corporis etiam pulchritudinem dedecore & foeditate commaculat. Præterea amor illi, quem amat, omnia bona ardentissime cupit, & illius gratia quemuis laborem excipere, aut

aut periculum adire minime reformidat : at libido , dum sibi satisfaciat , quid afferat ei detrimenti , in quem furentem incitatur , minimi faciendum putat. Postremo amor id , quod amat , saluum & ornatum vult , & illi etiam æternitatem exoptat : at voluptatis cupiditas in ipsam pulchritudinem , quam habet caram , satis contumeliose & petulanter inuehitur ; illique sempiternum dedecus inurere , & interitum afferre contendit. Quomodo igitur fieri potest , vt , quod ego amo , euersum & extinctum velim ? Ergo cum amor pulchritudinem admiretur ; libido pulchritudinem deformet , & in decus honestatis irruat , & insultet , vt id totum eripiat ; consequens est , vt libido nefaria non amor , sed odium potius capitale , nominanda sit ; sed quia voluptas eximia amorem consequitur , factum est , vt multi voluptatis flagitiosæ cupiditatem satis imperite nomine amoris appellerent. Nam re vera flagitiosi amatores , non amatores , sed hostes potius immanes appellandi sunt. Nisi fortasse credimus Corydonem Virgilianum Alexim illum , quem perditæ se amare dicebat , amore vero fuisse persecutum ; ipse se ostendit , atque plane fa-

LIBER TERTIUS. 169

tetur , qualiter sit animatus in Alexim. Inquit enim.

*Torua læna lupum sequitur , lupus ipse
capellam :*

Florentem cytisum sequitur lasciuia capella.

*Te Corydon o Alexi. Trabit sua quemque
voluptas.*

At læna lupum sequitur , vt eum dilaniet ; lupus capellam \ vt eam deuoret ; capella cytisum , vt carpat , conficiat ; ergo Corydon insequabatur Alexim , vt eum perderet , & omni dedecore contaminaret. Amatores igitur ii , qui appellantur , cum amant id , quod habent carum , non vt ornent , & opibus augeant ; sed vt omni dignitate & opibus spolient insequuntur.

Vt igitur in propositum redeamus , fateor quidem hos homines , qui Regibus in deliciis sunt , esse Regum amatores maximos , & omnibus curis affligari , quibus amatores perpetuo cruciantur. Sic enim stupent , sic vigilant , sic insidias comparant , sic rivalibus inuident , sic ingemiscunt , & interdum etiam lamentantur , vt facile appareat , eos esse animo ægros , amore fauuo saucios, Quemadmodum igitur amatores
non

non aliud , quam suam tantum voluptatem sibi proponunt ; ita ii non dignitatem Regis amplificatam , sed suas opes cumulas & adauctas cernere cupiunt. Ergo vt is , qui virginem amat , non cupit virgini bonum aliquod ; sed eam potius parentibus orbatam , ab opibus & amicis inopem , omnium ope & patrocinio destitutam ; & , quod multo grauius est , omni prudentia , & grauitate , & pudore spoliata[m] videre cupit , vt eam facilius ad consensum libidinis & impuritatis alliciat ; ita isti boni viri sic Regem amant , vt illum omnibus virtutis , & honestatis , & sapientiæ opibus nudatum & spoliatum vehementer exoptent ; vt facilius eorum infinitis cupiditatibus obsequatur. Primum quidem igitur eum bonorum hominum ope nudant , & omnibus , qui prudentiæ , & modestiæ , & bonitatis laude præcellunt , aditum ad Regiam familiaritatem diligentissime præcludunt : sunt enim vehementer anxii , & de statu suo valde solliciti ; sapienter enim vident , nihil esse magis aduersarium falsæ virtutis opinioni , quam veram virtutem spectatam & cognitam ; nihilque magis officio simulato contrarium , quam rectum officium
verè

: & ex animo tam Regi, quam patriæ
 solutum. Omnes namque falsæ & inanes
 les evanescunt, vbi primum in splendo-
 re solidæ & expressæ virtutis incurrunt:
 gitur aliquis vir animo maximo, atque
 ulari virtute & sapientia præditus, qui
 um nomini obscuritatem asferre possit,
 legis familiaritatem veniat, quanto ar-
 io pugnant? Quantum laborem suscipi-
 ? Quantas fraudes & insidias machinan-
 ! Incidat sermo de viro aliquo singulari
 le probitatis ornato; bonus quidem (in-
 unt) ille vir est, subrusticus tamen, mi-
 eque dignus, qui in aula versetur; ho-
 cerpte innocens est, minimeque malus,
 negotii gerendi prorsus imperitus. Quid
 rem tuam committas, qui suam male
 t? Hominis religionem, & integritatem
 o, animi vero stuporem & tarditatem
 pero. Quod si aliquis id specimen virtu-
 tæ industriæ jam præbuerit, vt non li-
 villo modo probitatis ingenuæ laudem
 ine segnitæ atque tarditatis obterere;
 via aggrediuntur, & quantum in illis est,
 tis laudem temeritatis vituperatione de-
 niant. Summa Principis felicitate factum
 esse

[illegible]

THE UNITED STATES DEPARTMENT OF THE INTERIOR
BUREAU OF LAND MANAGEMENT
WASHINGTON, D. C. 20246

auxilio nudant, eumque noctes atque dies circumuallant, ne possit villo modo ad nomen suum bonos atque fortes viros adjungere. Cauent deinde, ne Princeps vlla sibi literarum præsidia & adjumenta requirat; literarum enim studiis (aiunt) corrumpi valetudinem, infringi vires, indolem Regiam a rebus fortiter gerendis auocari. Præterea minime decere Principem, tamquam aliquem de plebe hominem, qui velit ad honores obrepere, & commendatione aliqua eruditionis a multitudinis fece segregari, libris affigi, hominumque doctorum ineptiis oblectari. Num tibi, inquiunt, victus literis comparandus est? Num honores tibi propter eruditionem deferendi sunt? Tantum certe adest, vt Principi dignitatem vllam afferat eruditio, vt illi dedecori potius & ignominiz sit: si dignitas igitur tibi cara est, non solum literarum studia tibi contemnenda sunt; sed etiam eorum hominum, qui se totos literarum studiis dediderunt, sermo atque familiaritas vitanda est; neque vnquam arcescendi sunt, nisi raro admodum; nempe cum aliquod negotium inciderit, quod aliter expediri non possit. Tantisper igitur illorum
garru-

garrulitatem patere, dum res alio modo transigi nequit; ubi id transactum perspexeris, illos procul amanda, ne sermonibus molestissimis tuas aures obtundant. Sic autem ea loquuntur, & eas machinas adhibent, & eam opinionem in animo Regis inserunt; ut is tandem ad officium suum valde pertinere putet, omnes literas odio persequi, artesque maximas execrari. Nec hoc scelere contenti, aliud multo immanius moliantur; nec enim tantum Reges literarum & disciplinarum præsidio spoliare; sed etiam diuina ope orbare contendunt. Persuadent enim Regibus, non esse illis religionem summo studio colendam. Non, inquiunt, quod religio negligenda sit; esset enim id scelestum & immane facinus; sed quod in Regibus, cum immodica est, dignitatem nullam habeat. Minime enim decere Principem, instar cuiusdam vetulæ, multam operam in precibus, & in votis, & in procuranda religione consumere. Deinde, si religione, inquiunt, te nimis implicueris, officium tuum non facies; sed potius multis in locis objecta religione a studio dignitatis abduceris. Abjicit enim animum, qui valde religiosus est, & decoris
atque

atque dignitatis studium deponit ; nec enim injuriam vlciſci vult , ſed omnes contumelias patientiſſime tolerat , quod non eſt animi fortis & confidentis officium , ſed imbecilli potius , & eneruati , minimeque de regiæ dignitatis amplitudine cogitantis. Veniat igitur tibi in mentem , te non ſacrificulum , ſed Regem eſſe , eaque ſacrorum ſtudia , quæ dignitatem tuam imminuere poſſunt , omittite. Hæc autem ita diſſerunt , vt paulatim omne pietatis ſtudium reſtinguant ; modum enim , quem religioni adhibendum cenſent , exiguis adeo finibus circumscribunt , vt pro parte ſua paulatim omnem ex animis religionem tollant ; itaque perficiunt quantum poſſunt , vt Reges a Dei conjunctione diuellant.

En amoris vis incredibilis , qua iſti boni viri ſeſe ad ſummum ſtudium Regis adiungunt. En cur opibus augeri , & dignitate omni cumulari debeant. En cur merito , bonis omnibus excluſis , & Principe multis molibus atque machinis obſeſſo , ipſi ſoli in omni republica dominantur. Tanto enim amore Regem amplectuntur , vt illum hominum bonorum uſu & familiaritate prohibeant ; vt fruſtu ſapientiæ , qui monumentis do-

doctissimorum hominum continetur; omni-
no priuent; vt Dei postremo numen, opem,
& auxilium ab illo, quantum possunt, lon-
gissime repellant, vt sic tandem riuallium
omnium timore liberati summum fructum
ex amore, quo sunt acriter inflammati, se-
cure percipiant. Nec enim aliud est, quod
illos cogat, omni diuino & humano præsi-
dio nudare Principes, & eos summo scelere,
perfidia, & immanitate obsessos tenere, ne
possint vlllo modo salutari ope & auxilio li-
berari; nisi quod intelligunt, hæc omnia
fore impedimento, quo minus tyrannidem
suam diu tueri, & simplicitate Principis ab-
uti possint. Qui igitur ita Reges amant, vt
eos omni diuino & humano præsidio destitu-
tos videre cupiant; vt ipsi liberius omnibus
illorum opibus potiri queant, num Reges
amant? An potius opes, & honores, quibus
inhiant, & immanes pecunias, quas infinita
auuiditate liguriunt? Hæc si Rex sapienter
animaduernerit, illos certe non vt amicos
amplexabitur, sed vt proditores (ne quid
aliud dicam) a se longissime segregabit; ali-
ter enim cum suo magno malo sentiet, non
se, sed pecuniam infinitam, & potentiam
non

non ferendam, ad hominum perniciem comparatam ab illis amari. Mala enim, quæ in Principem bonorum ope destitutum, artium maximarum præsidio nudatum, a Dei ipsius præsentis auxilio derelictum, perditorum hominum scelere circumfessum repente inuadunt, quis poterit enumerando recensere?

Vt tamen aliqua summatim referamus, primum omnium malorum summa temeritas & amentia est. Quod vt rectius intelligi possit, statuendum est, non omnem inscitiam esse similiter execrandam; multum enim interest qualis stultitia sit, deinde in cuius animo insideat. Stultitia enim quædam mediocris est atque tolerabilis, quædam vero summa atque summo opere detestanda. Tolerabilis quidem eorum stultitia est, qui, cum sapientes minime sint, minime sibi sapientiam arrogant: intolerabilis & execranda est illorum inscitia, qui sibi eam sapientiam assumunt, cuius ignari sunt. Qui enim neque medicus est, neque se medicum esse profitetur, vt ægrotum non sanet, nemini tamen vitam medicamenti eripiet: at qui se medicum esse credit, cum medicinæ imperitus sit, neminem quidem morbo leuare, multos autem vita priuare

poterit. Præterea cum hæc summa dementia in animum illius inuaserit, cui munus illud, cujus se scientiam tenere confidit, assignatum non est, non multum sane rebus illius arrogantia nocebit. At cum oppresserit hominem, cui omnia, quæ cupit, munera deferuntur, omnia peruertet. Si enim homo nauigandi imperitus se optimum gubernatorem esse iactauerit, non tamen illi quisquam gubernacula tractanda permiserit, non eruet stultitia sua nauem. At si naus illi commissa fuerit, tum demum sibi atque vectoribus diram cladem inferet. Quo autem amplius illud munus est homini imperito commissum, eo erit amentia illius infestior. Cum vero nullum munus sit in terris regio munere maius & amplius, nihil certe poterit esse illius amentia & temeritate funestius; maxime cum sibi in summa rerum imperitia summam sapientiam arrogauerit. Nec enim paucos vectores, sed vniuersam rempublicam funditus perdet. Ex quo sequitur, nihil esse posse dirius Rege stulto & infano. Nec enim potentia fructus est in possessione, sed in recto illius usu collocandus: rectus autem omnium rerum usus prudentia moderatione

continetur; ubi igitur prudentia non extiterit, ibi necesse est, ut, qui opibus affluit, non partis opibus ad salutem & honestatem, sed ad perniciem atque dedecus utatur. Vt enim cum musicæ ignarus citharam pulsat, ridiculum se ostendit; & cum furiosus omni vinculo solutus ferrum stringit, quo violentior est, eo maiorem stragem edit: sic homo potens, cum propter stultitiam opibus suis uti nesciat, quo maiores opes habet, eo maiorem ignominiam subibit, funestioemque pestem sibi atque reipublicæ comparabit. Reliquum igitur est, ut quo Rex opulentior fuerit, imperiumque illius latius propagatum extiterit, si fuerit amentia vexatus, & (ut fit) sibi sapientiam attribuerit, eo tetrior sit, multoque grauiorem plagam communibus rebus imponat. Hujus autem tanti mali, quo nullum dirius atque funestius excogitari potest, adulatores architecti sunt. Principis enim ingenium laudant; sapientiam in cælum ferunt; consilium admirantur; si quid autem est ab illo festiue dictum, id risu & plausibus excipiunt; eoque rem deducunt, ut is, qui jam opibus & potentia inflatus insaniebat, omni iudicio spoliatur; & cum sit amentissimus, statuatur

tuat tamen , se nullius consilio indigere ; sed illis sapientiæ opibus affluere , quibus facillime possit orbem terrarum moderari. His igitur cogitationibus elatus exultat , & præceps amentia fertur , & omnia furenter administrat , vsque eo dum in rempublicam nefariam pestem & dirum exitium machinetur. Prudentiæ autem lumine amoto , quomodo poterunt in animis reliquæ virtutes habitare ? Num animi magnitudo poterit in eo locum habere , qui magna & excelsa contueri nequit ? Qui nihil altum & generosum cogitat ? Qui non solum flagitio & impuritati , sed flagitiorum ministris seruiendum existimat ? Quis enim non videt , tantam esse Principum quorundam humilitatem , vt contra eorum voluntatem , qui se in illorum familiaritatem lenociniis & assentationibus immerferunt , loqui non audeant ? Præterea si sunt acres atque vehementes , cum rationis imperium repudient ; tantum abest , vt fortes & magnanimi sint , vt ne homines quidem appellandi sint , sed immanes quædam belluæ libidinis impetu dimicantes. Fortitudo enim non est furor & amentia libidini seruiens ; sed animi excellentis altitudo pro justitiæ sanctitate

tate pugnans. Si vero molles & eneruati fuerint, opus est, ut humiles & abjecti sint; neque solum belli fremitus exhorreant; sed omnes etiam belli rumores, atque adeo umbras extimescant.

Quid de temperantia dicendum? Illi ne poterunt esse moderati, quorum est effrenata & immensa cupiditas? Qui neque metu, neque pudore, neque disciplina coerceri possunt? Metum enim summa potentia depulit; pudorem sermo impurus hominum perditorum sustulit; disciplinam autem temeritas & insolentia contempsit; quomodo igitur honestatem & constantiam ullam retinebunt, qui opes immensas non honestatis instrumenta, sed libidinis materiam putant, & tam multis cupiditatum fluctibus in diuersas partes agitantur? Qui singulis horis huc & illuc æstu temeritatis inconsideratissime rapiuntur? Qui vel superbia tument, & nimis insolenter efferuntur; vel se nimis dimittunt, & omnem memoriam decoris atque dignitatis abjiciunt? Iam vero iustitiæ munus, & officium ab illis administrari nullo modo potest, qui sunt oppressi cupiditatis impurissimæ domatu. Quomodo enim aliorum licentiam re-

seca-

182 DE REG. INSTITVT. ET DISCIP.

secabit, qui sibi ipsi flagitiorum omnium licentiam attribuit? Qua ratione suos in officio continebit, qui animi sui partes non continet? Quo pacto merita cujusque certis ponderibus examinabit, qui omnem rationem dignitatis ignorat? Quomodo denique reget alios, qui se ipsum regere non potest? Vt autem in pauca conferam, nemo iustitiam colere potest, qui non fuerit & sapiens, & fortis, & moderatus. Sapientia enim quod rectum, & verum, & simplex est, perscrutatur & inspicit: Fortitudo animum ad vires tyrannidis elidendas firmo præsidio confirmat. Temperantia cauet, ne status animi tumultu aliquo turbetur, &, quod est ratione moderandum, libidine peruertatur. Vbi igitur pro sapientia temeritas, pro fortitudine imbecillitas, pro temperantia libido republicam administrat; ibi ne vestigium quidem vllum iustitiæ & æquitatis extare potest. Cum igitur Rex & insipiens, & impuris ministris obnoxius, & indomitæ libidini deditus fuerit, ne simulacrum quidem vllum iustitiæ conseruabit: nam neque, quæ vis & ratio sit juris, intelligit; nec id, quod intelligit, facere audet, ne eos, quos in deliciis habet, &
quo-

quorum etiam opes metuit, offendat; neque, si audeat, id tamen, quod iustitia perscribit, sibi per infinitam cupiditatem, cui est additus, exequi licebit. Adde, quod non solum ut suæ ipsius cupiditati, quæ satiari & expleri nequit, sed ut suorum etiam libidinibus obsequatur, necesse plerumque est, ut non modo humana, sed etiam diuina jura violet. Cum enim opes suas absumperit, tum immodicis tributis rempublicam vexabit, & multos expoliabit, ut alienis facultatibus suos locupletet; & innocentibus eripiat, quod maleficis hominibus largiatur; atque postremo manus rebus sacris afferet, & templâ omnia atque fana compilabit. Hic erit ornatus animi, quo Rex impuris hominibus deditus excellet. O egregios felicissimi Regis amatores! Qui tam præclaris officiis eum Principem, cui se dicauerunt, tuendum & ornandum suscipiunt. Qui fieri igitur potest, ut Princeps hominibus tam gratis & piis, tam omnia ad dignitatem illius referentibus diu careat? Necesse profecto est, ut si sese ab illius conspectu remouerint, eorum desiderio contabescat; magna enim illorum merita in Principem, & satis illustria constant; illius

illius enim menti tenebras attulerunt; animum illius de omni statu deiecerunt; omnem illi dignitatem detraxerunt. Cernitis quanta temeritas in communi vita versetur? Homines prudentes & honesti despiciuntur; illique summis honoribus afficiuntur, qui Principes a studio virtutis & humanitatis auertunt; & tyrannidem alunt, & in respublicas immittunt. Id enim moliantur & efficiunt, vt Regem habeamus effrenata mente præditum, infinita libidine furem, hominibus perditis atque profligatis obnoxium, fortibus & moderatis infestum; & modo elatum & inflatum, modo humilem atque demissum, maleficum denique & iniustum, & in tantis flagitiis virtutis & honestatis nomen temere & insolenter vsurpantem.

Sed, inquiet fortasse aliquis, id non semper euenire; multos enim extitisse Principes, qui cum non admodum dissimili ratione educati fuissent, magnum tamen firmata jam ætate virtutis specimen dederunt. Fateor equidem, & id in miraculi loco ponendum existimo; diuino siquidem beneficio fit, vt non semper iidem euentus ex eisdem causis existant; interdum enim tam præclara indoles elucet

elucet diuinitus in quibusdam Principibus, ut hominum sceleri fortissime resistent, & sint illis impedimento, quominus possint omnia, quæ volunt, scelerate & impie machinari. Sed nos hic, non quod aliquando Dei singulari beneficio euenit, ne omnia funditus intereant, cogitemus; sed quid accidere necesse sit, nisi Deus nos præsentissima ope respiciat. Simul & illud animo reputemus, quam excellens illa virtus extitisset, si fuisset bonis disciplinis exculta, & bonorum hominum sermonibus ad summum decus excitata: quando etiam cum est omni literarum ope destituta, & hominibus nefariis impedita, lucet tamen, binignitatisque suæ aliquod lumen porrigit. Nam si Princeps fraudibus vndique circumuentus, opibus summis obsessus, nullis artibus adjutus, sceleris improbissimi conatibus impeditus, aliquam tamen virtutis regię significationem dat; quid effecisset, si cum bonarum artium cultu ad se ipsum bonos atque sapientes homines aggregasset? Diuinus certe ex illius virtute splendor eluxisset. Sed nos, ut paulo ante dixi, non de eo, quod raro contingit, & quod, cum accidit, in loco portenti atque prodigii numeran-

randum sit ; sed de malis , quæ prauam institutionem natura consequuntur , & de eo , quod plerumque accidit , disputamus.

Vt igitur omnia vitia perstringamus , quæ ex hac educatione oriuntur , primum quidem Princeps mollissimo cultu nutritus , & in summis deliciis educatus , mollis & delicatus sit necesse est , otio languidus , laboris impatiens , ad libidinem procliuis , & valetudine infirma præditus : deinde cum perditorum hominum impuri sermones accefferint , erit etiam arrogans , & elatus , & inhumanus , & sibi quodammodo diuinitatem tribuet ; & cum fuerit hominibus sceleratis , qui cum illo viuunt , obnoxius , reliquos ne homines quidem ducet ; præterea summo furore & amentia vexabitur. Sic autem fiet , vt Princeps , in quo summa quædam sapientia flagitatur , vt officium suum tueri possit , cum & natura , & opibus , & imperio , & cogitationibus inaniissimis , & sermonibus impurissimis inflari cœperit , omni iudicio spoliatur ; & ne quid sibi ad summam stultitiam desit , in maxima rerum ignoratione , & in miseranda mentis cæcitate , summam sibi sapientiam nimis insolenter assumat. Deinde inuidiæ
pœnis

poenis agitabitur ; nihil est enim magis cum arrogantia conjunctum , quam dolor ex aspectu alienæ virtutis inustus ; verissimæ enim dignitatis splendore dignitatem suam obscurari & extingui plane judicat. Inde igitur acerbissimum odium in omnes bonos erumpit ; inde etiam timor exoritur. Nec enim solum omnem excellentiam virtutis odit ; sed illam suspectam habet , & ab omni mentis altitudine sibi perniciem imminere censet. Ex invidia autem , & odio , & metu , & inani suspitione crudelitas eminet , & immanitas quædam humanæ societatis oblita , & ad hominum pestem atque perniciem acerrime concitata. Agrestis autem libido , omnibus pudoris atque juris vinculis emissa , & adulatorum lenociniis acrius incitata , illum miserrime vexat , & , quocumque fert impetum , vehementissime contorquet. His quidem peccatis exagitur , cum res illi secundæ sunt ; in rebus autem aduersis , maxime cum bellum aliquod repente mouetur , qua tandem spe erigi potest ille , qui neque ut corpus labore illo duraret , nec ut animum virtute firmaret , nec ut statum suum fortium hominum præsidio muniret , neque se divini numinis

minis auxilio tueretur, vnquam elaborauit? Illum igitur tunc animaduertere licebit sibi atque suis diffidentem; neque solum hostium vires, sed suorum insidias metuentem, & ancipiti formidine districtum, ad omnes rumores trepidantem; neque quomodo in omni rerum discrimine honestatem retineat; sed quomodo vitam pretio redimat, turpissime cogitantem. Adde nunc, si lubet, reliquas labe, quibus aspergi & inquinari necesse est illum Principem, qui cum hominibus improbissimis coniunctissime viuit; neque solum bonorum hominum consilia rejicit, verum etiam disciplinæ cælettis opem repudiât. Est enim plerumque sui profusus, alieni appetens, in iracundiâ implacabilis, in odio contumax, ferox, & infestus imbecillis, potentibus atque superbis obnoxius, leuis, inconstans, ineptus, amicorum ope destitutus, hominibus inuisus, & scelerum conscientia frequenter exanimatus.

Hic quidem est status eorum Regum, qui, repudiatis bonis hominibus, adulatoribus aures præbent: statum vero reipublicæ breuiter etiam, qualis tunc esse potest, inspicimus. Vt autem hic nihil aliud dicam, com-

communis omnium libertas eripitur, quod quidem minime mirandum est; fieri enim nequit, ut ibi species aliqua libertatis extet, ubi ne ii quidem, in quorum potestate sunt omnia, liberi sunt; nisi fortasse liberum existimatis illum, qui ad alterius arbitrium vivit; qui, quod sentit, loqui non audet; qui hominis inconstantissimi nutus omnes observat; qui ex Principis inaniissima cupiditate pendet; qui ad libidinem illius vultum fingit & accommodat. Adulatores igitur liberi non sunt, sed servi nequissimi. Princeps autem, qui illorum operis utitur, non solum servit dedecori, flagitio, turpitudini; sed ipsis etiam nequitiae ministris ita subiectus est, ut nihil facere audeat, quod illis injunctum possit accidere. Ita enim se paulatim abjicit, animumque demittit, ut illis etiam, quos jacentes erexit, & in gradu, quo erant indignissimi, collocavit, addictus sit, multaque, ne eos offendat, servilem in modum patiatur. Si igitur neque Princeps liber est, nec illius domestici liberi sunt, quo tandem modo populus, qui eorum dominatu premittitur, vestigium ullum libertatis in vita retinebit? An non perspicuum est omnem illorum

rum rempublicam eo conferri, vt omnem libertatem tollant? Quasi enim omnis illorum salus atque dignitas agatur, summa opē contendunt & enituntur, vt animos hominum frangant, & spiritus comprimant, ne quisquam audeat ad aliquod decus egregium illis inuitis aspirare. Omnibus igitur, in quorum animis est aliquid generosum & magnificum, vehementer infesti sunt, & illis pestem, si possunt, omni ratione comparant; ea etiam de causa molestissime ferunt, aliquem alium abundare pecuniis, quia verentur, ne opibus elatus aliquid sibi magnum proponat. Cum igitur rempublicam immodicis tributis vexant, non id solum moliantur, vt ipsi ex populi fortunis prædas agant; sed etiam ne sit quisquam, qui opulentus esse possit: tantum enim abest, vt hominum libertati prospiciant, vt ne vultum liberum, aut orationem cuiusquam ferre valeant. Oppressa vero libertate, & animi magnitudo, & ingenii vis omnis extinguitur. Nec enim animus tyrannide oppressus aliquid magnum & egregium moliri: neque ingenium assiduus plagis obtusum verum intueri potest. Restat igitur, vt omnes non solum ignaui & imbecil-

ſi ſint ; ſed etiam amentes & ſtolidi. Sublata igitur virtute , ingeniique lumine propemodum extincto , quis pro patriæ ſalute decertabit ? Quis enim pro republica , cujus particeps non eſt , & ex qua nec fructum ullum , neque laudem , nec honorem expectat , periculum adire volet ? Quis in tanta rerum caligine , & tam cæcis tenebris , quod ſibi in vita colendum officium ſit , mente & ratione perſpiciet ? Quis in tantis nequitix exemplis libidinem ſuam cohibebit , ne , cum primum poterit , indigna flagitia impure atque tæte ſuſcipiat ? Iam vero ſi in aliquo ciue fuerit aliquid roboris , id totum furorem & amentiam conferet , & eo conatum omnem comparabit , vt omnia juris vincula perrumpat. Summa autem hæc eſt , vt in huiusmodi regno nulla virtus emineat , & omnia vitiis impudentiſſime cumulentur ; nam cum omnes ſubditi Principum mores imitentur , tum multo facilius eſt ſcelus atque flagitium ſequi , quam virtutem atque decus effingere. Si igitur Princeps flagitioſus extiterit , erit proſecto neceſſe rempublicam vniuerſam flagitiis innumerabilibus inquinari. Quomodo autem illam etiam inopia grauiffima premi ,

&c

& Principum iniquitate vexari necesse sit; jam expositum est; vbi enim omnium pecuniæ ad paucos deferuntur, consequens est, vt vniuersa respublica extrema inopia confidetur. Accedet deinde inuidia, odium, acerba & grauis offensio, & indignatio, & eiusmodi perturbationes, quæ rempublicam tumultuari, mutuisque cædibus efferari compellunt. Adde nunc lubricam fidem; adde dolos, fraudes, insidias; adde furta & latrocinia, quæ egentes homines rerum suarum desperatione suscipiunt. Adde postremo nouarum rerum cupiditatem, ciuium inter ciues hostilem dissensionem, & sceleratissimam cum hoste de patria prodenda & euertenda pactiõnem; & reliqua mala, quæ stulti & immoderati Principis rectionem consequuntur. Nullum enim tantum scelus atque flagitium cogitari potest, quod non multitudo sapiente rectore orbata concipiat. Cum igitur respublica sapientiæ patrociniõ desituta, virtutis præsidio nudata, sceleratorum hominum libidini vexanda atque diripienda relinquitur; cum nullus ordo, nulla verecundia, nulla lex, nulla disciplina cupiditatem frenet; cum virus interelusa sit,

inno-

innocentia respirare non queat, nequitia vir-
tutis exultet; cum inopes potentibus inuide-
ant, potentes autem fortunam afflictam de-
spiciant, & in miserorum calamitatibus in-
sultent; & alii in alios odio acerbo & immani
concitentur; qui fieri potest, ut non vniuersa
Respublica vel per se seditionibus intestinis
dilacerata concidat, vel hostium viribus ex-
pugnetur, omniaque tandem extrema pa-
tiatur?

Quam breuissime potui statum illius rei-
publicæ complexus oratione sum, quæ per-
ditorum hominum licentia, & stulti Princi-
pis immoderatione continetur. Volo tamen
vobis aperire, quid modo mihi in mentem
venerit; quamquam me inscitiam meam fa-
teri pudet.

Quam, inquit T., inscitiam narras?

Eam, inquam, quæ magna ex parte con-
tinet causam euersionis omnium rerumpu-
blicarum, & quæ nos in hac disputatione
multa peccare compulit.

Quænam igitur ea est, inquit.

Grammaticæ, inquam, ignoratio est, ut
mihi quidem videtur, malorum omnium prin-
cipium.

Multum, inquit ille ridens, tibi Grammatici debent, quando statuis rempublicam sine illorum ope & auxilio stare non posse. Necessè igitur est, vt Grammaticæ ludos vbique aperiri faciamus, & omnes Cyprianos, & Diomedes, & Laurentios, quorum memoria est propemodum extincta, ab inferis excitemus, vt rempublicam nobis constituent.

Recte, inquam, si illi perfectos se Grammaticos in vita præbuerunt; aliter enim non est, cur illis molesti simus, & non potius sepultos esse patiamur.

Quænam tandem, inquit T., ista est Grammaticorum facultas, qua rempublicam fulcire possunt?

Non fateris, inquam, Grammaticam esse recte loquendi rationem? Qui peruerse igitur loquitur, contra Grammaticæ præscriptum facit.

Recte, inquit ille. Sed id ad rempublicam attinet?

Quia, inquam, vt jam ante dixi, loquendi imperitia, & orationis peruersitas non mediocrè malum existimandum est; ; magno enim malo sit, cum res turpes honestis hominibus occuluntur; accidit enim sæpe numero

mero; vt qui se turpitudine deformauit, nominis splendore deceptus; minime suum dedecus animaduertat; & ita in rebus turpissimis, quasi in præclaro facinore, gloriatur. Quare mea quidem sententia, qui optime rempublicam constituere velit, eam primum legem sanciet, ne quisquam flagitio nomen laudis imponat; ne videlicet praua loquendi consuetudine flagitium ornando flagitii impudentiam confirmet. Cum enim auarus sordes suas nomine frugalitatis exornat; prodigus autem temeritatem & immoderationem suam nomine liberalitatis occultat; & timidus se prudentem & cautum nominari studet; & audax fortem atque magnanimum; & reliqui ad eundem modum, ne singula flagitia recensendam, vitia sua splendore nominum illustrant; non facile possunt eam vitiorum deformitatem, quibus inquinati sunt, animaduertere. Quam quidem si acute perspexissent, illam a se fortasse summo studio repulissent. Nunc veto nominum splendor falsus & inanis eos in eam fraudem impellit, vt interdum præclare secum agi putent, cum in summa turpitudine & indignitate versentur. Hoc igitur loquendi peccatum etiam nos modo in

disputando commisimus, vt splendidis nominibus res flagitiosas ornaremus.

Quo tandem modo, inquit, T.?

Primum quidem, inquam, rempublicam appellauimus, quæ publica certe non est; publica quidem esset, si ad populi vniuersi commoda pertineret; cum vero populi ratio non habetur, sed omnia ad vnius tantum, atque paucorum potentiam & vtilitatem conferuntur, priuata potius appellanda est, quam publica. Deinde, si respublica est, vt Aristoteli placet, ordo, modus, & ratio multorum hominum: urbem vnã incolentium, profecto vbi nihil ordine, nihil modo, nihil jure & ratione fit, sed omnia perturbantur, atque temere commiscuntur, nulla reipublicæ ratio constare vllò modo potest. Ne ciuitatem quidem nominare licet eam, quæ posita est in hominum indomita cupiditate, & furentium potestate. Est enim ciuitas, liberorum hominum multitudo æquabili jure sociata. Vbi igitur nulla libertas est, nec jus ex æquo omnibus administratur, ibi certe ciuitas non est; sed seruorum infelix multitudo, paucorum libini penitus addicta. Deinde reipublicæ moderatores eos interdum

dum apellauimus, qui nullum modum suæ
 cupiditati præfiniunt, tantum abest, vt mo-
 dum reipublicæ vniuersæ statuere valeant.
 Postremo pudet me tam sæpe fuisse nomine
 Regis abusum. Rex enim ille tantum nomi-
 nandus est, qui rempublicam vniuersam re-
 git; regit autem ille rempublicam, qui eam
 ab errore in viam reuocat, & ad vitæ beatæ
 rationem sua virtute atque vigilantia per-
 ducit. Ergo ille, qui quantum potest elabo-
 rat, vt rempublicam saluam & incolumem
 præstet, & bonis omnibus affluentem; qui
 populi salutem facile suis voluptatibus &
 commodis anteponit; qui singulari mente,
 ratione, consilio, in studio totius populi mo-
 derandi atque tuendi vigilat, merito Regis
 nomen obtinet. Qui autem iustitiam negli-
 git, omnemque disciplinam virtutis & con-
 tinentiæ repudiat, & ad suam commodita-
 tem omnia consilia reuocat, vniuersamque
 ciuium multitudinem paucis hominibus ne-
 quissimis constrictam tradit vexandam at-
 que diripiendam, nullo modo Rex, sed Ty-
 rannus habendus est. Hoc enim discrimen po-
 nunt viri doctissimi inter Regem & Tyran-
 num. Quod Rex præcipue in populi salu-
 tem

tem respicit ; secundo vero loco, suam ipsius salutem & vtilitatem curat ; neque enim plerumque potest rempublicam tueri , nisi saluti suæ prospiciat. Tyrannus vero omnia consilia ad suam vtilitatem atque libidinem dirigit ; deinde vero, quia non potest ille bonis omnibus abundare , nisi in populo non omnino perditto dominetur , secundo loco populi totius incolumitati interdum prospicit. Si igitur Princeps ille , qui non præcipue in felicem reipublicæ statum modis omnibus intuetur , Tyrannus habendus est , quamuis sæpenumero populum acri animo tueatur ; quo nomine illum appellabimus , qui salutem reipublicæ præ sua libidine contemnit, illique amentia & temeritate sua interitum afferre nititur ? Sed consuetudine victi nominibus abuti compellimur ; quod etiam faciendum necessario nobis est , ne sine fructu in potentium offensionem incidamus.

Longius fortasse , quam instituta ratio postulabat , elatus sum in disciplina , qua Regum filii instrui plerumque solent , describenda ; sed partim odium , quo sum in hoc hominum genus incensus , qui Principes omni scelere contaminant , partim benignitas vestra

stra prouexit orationem meam. Vt igitur jam id , quorum gratia hæc a nobis allata sunt , ratione concludamus, reuocate in memoriam ea, quæ a nobis in principio dicta sunt. Demonstrauimus enim nullum munus egregium sine egregia disciplina administrari posse ; nullumque munus aut maius & amplius , aut grauius & difficilius , munere Regis esse ; neque in quo maiore cum periculo , rerumque omnium perniciæ & interitu peccari solet. Vnde sequitur ad Regis officium summam sapientiam atque summam virtutem requiri. Quam difficile autem sapientiæ atque virtutis studium sit in mollissimo vitæ cultu, in summis opibus atque deliciis, in multis naturæ lenociniis atque blandimentis , etiam quantum fuit necesse docuimus. Illud etiam, quod nostra oratione non indigebat , ostendimus , nullas opes , nullas facultates , nullas delicias esse cum iis vlla ex parte conferendas , in quibus Regum filii plerumque nutriuntur. Vnde sequitur , cum omnibus sapientia necessaria sit , tum vel maxime iis , qui Reges futuri sunt ; aliis namque, vt se regant atque moderentur; Regi, vt non se tantum, sed infinitam hominum mul-

multitudinem optima atque singulari ratione gubernet, sapientia paranda est: & alii quidem homines non ita multis difficultatibus impediti sunt, quo minus sese ad studium sapientiæ applicent; at Regibus omnes insidiæ comparantur; neque solum inſitis cupiditatibus, sed hominum sermonibus impurissimis a studio virtutis atque verissimæ dignitatis abducuntur. Et alii quidem, si sese multis erratis irretierint, sibi atque paucis nocebunt, & etiam iudiciorum seueritate coherberi, & ad officium reuocari possunt; at Regum flagitia interitum reipublicæ moliuntur, & sanari nullo iudiciorum metu possunt; legibus enim soluti sunt. Quo igitur opus illorum maius est, quo difficilius ad studium virtutis applicantur, quo illis insidiæ capitaliores intenduntur, quo grauius ruinæ periculum ex eorum peccatis communibus rebus imminet; eo maioribus opibus fulciendi & stabiliendi sunt, firmioribusque præfidiis muniendi, ne concidant, & cum dira calamitate reipublicæ totius intereant. Quod si non solum disciplina omni caruerint; sed etiam in perditorum hominum potestate relictæ, atque illorum sermonibus
ad

ad omnem rationem turpitudinis inflammata fuerint ; videte , quorsum illorum furor & amentia tandem euasura sit. Ad hæc autem mala omnia præcauenda Rex , qui tanti nominis dignitatem tueri atque sustinere cupit , ingenium habeat opus est , natura sagax , & acutum , maximarum artium studio & disciplina limatum , vsu & exercitatione perpolitum , & animo maximo sit , vt recta & vera clare cernere , insidias in ficta specie fedulitatis & officii latentes inspicere , & quid saluti reipublicæ conuenire perspexerit , fortiter administrare queat. Ad vtramque autem rationem , hoc est , tam ad ingenii cultum , quam ad animi magnitudinem mirum est , quantam vim habeant artium maximarum studia ; non solum enim ingenium acuunt , & aciem mentis illustant , sed etiam animos alacres & confidentes efficiunt : nec enim hæc studia homines desides & otiosos reddunt , vt quidam satis imperite suspicantur ; sed acres & vigilantes , & studio verissimæ laudis atque dignitatis incensos. Sed fallit homines imperitos , primum quidem hominum quorundam stupor & ignauia , qui se ad studium Philosophiæ contulerunt ; quorum

rum tam tardum & hebes ingenium est , & tam abjectus atque demissus animus , vt ne studiis quidem vllis ad res gerendas excitari , & studio laudis incendi possint ; præclara autem studia non omnibus ornamento esse possunt , sed iis tantum , qui præclaro ingenio & egregia virtutis indole præditi sunt. Vt enim preciosæ vestes gemmis & auro fulgentes , & excellenti opere perfecta monilia , cum ad cultum virginis alicujus pulcherrime conferuntur , eam luculenter exornant ; cum vero ad ornatum mulieris deformis accommodantur , nullo modo deformitatem illius occultant , sed multo infigorem reddunt : ita præclaræ disciplinæ clarum ingenium excolunt , & animum magnum virtutum omnium opibus & ornamentis afficiunt ; at , cum ad mentis impuræ & animi prauitæque pufili cultum & ornatum transferuntur , non ornant quidem animum ; sed insitam illius prauitatem atque deformitatem clarius ostendunt. Deinde illud errorem multis obijcit , quod disciplinarum genera minime distinguunt , & , quod vnius est proprium , aliis accomodant ; vt fuerit igitur aliquod genus disciplinæ , quod extorqueret sensus , & stu-

pi-

piditatem in animis efficeret, quod vitium a multis Stoicorum sectæ tribuitur; id tamen non in alias conuenit.

Libenter igitur in sententiam nostri M. discedo, Nec enim eam sapientiam probo, quæ omnes animi affectiones vtiliter a natura datas euellendas esse decernit; sed quæ illis vti docet, & in quem finem insitæ nobis sint, singulari ratione præscribit, qualis est Academicorum veterum atque Peripateticorum disciplina; nihil est enim nobis ingeneratum, quod non magnam vtilitatem afferre possit, modo sapienter intelligamus, qua ratione cupiditates omnes continendæ atque moderandæ, & in quem finem conferendæ sint. Hoc enim est inter sapientes & insipientes discrimen; insipientes enim neque modum seruant vllum, neque, quid in vita sequendum sit, ratione percipiunt; & ita fit, vt rebus ad salutem datis ad perniciem abutantur; sapientes vero animis modum adhibent, & cupiditatem ratione temperant; & ad quem finem omnia dirigenda sint, intelligunt; & ita fit, vt omnia illorum studia ad salutem & dignitatem referantur. Vtrique tamen vt sibi parent, quod optimum esse iudi-

dicant , excitari atque non mediocri studio commoueri solent ; in quo quidem sapientes eo vehementius sæpenumero commouentur , quo iudicium eorum est firmitus & constans , & ab omni erroris suspitione securus. Præterea in sapientis animo & summa vis amoris , & odii non mediocris offensio viget. Si enim pulchritudo corporis excitat amorem , & deformitas animos ab amore auertit ; multo certe magis pulchritudo dignitatis & honestatis a sapientibus animaduersa conciliabit amorem , & flagitii dedecus & turpitudine multo acerbius odium animis , qui illam intuentur , inuret. Cum autem sapientis sit decus & honestatem contemplari , & quantum sit flagitii dedecus acute perspicere ; necessario sequitur , vt amore dignitatis eximio capiatur , & flagitii graui offensione concitetur. Vbi vero magna vis amoris , aut odii grauis offensio viget , ibi neque somnus , neque lentitudo , nec inertia locum habere potest. Amor enim animum excitat & stimulat , & cupiditate ipsius pulchritudinis , quam admiramur , inflamat. Odium vero incendit , & armat eundem animum ad turpitudinem , quam de-

estatur acerrime, repellendam; qui igitur sapiens fuerit, non mollis & languidus, & neruatus, aut stupore oppressus erit; sed cer, & vehemens, & impiger, & acutus, ad omnia pericula dignitatis gratia subunda paratus. Erit deinde animo forti & onstante præditus; nihil enim tam dirum; calamitosum interuenire potest, quam urpitudo; pro dignitatis igitur studio fortissime dimicabit, & libentissime quoduis periculum adibit potius, quam honestatem suam aliqua labe maculari sustineat. Deinde cum sapienter intelligat, omnem dignitatis elegantiam animorum moderatione contineri, erit etiam in omni ratione modestus, & vita & moribus egregie constitutus. præterea cum nihil sit iustitia clarius & elegantius, nihil pulchrius & amabilius, nihil denique, quod magis omnibus laudibus honestatis excellat, & omne sapientis officium ad honestatem referatur; fieri certe non potest, ut, qui sapiens est, aliquam injuriam faciat alicui, aut quantum in illo meritis, ab alio fieri patiatur; sapienter enim intelligit, nullum dolorem & cruciatum esse illa ex parte cum injuriæ & iniquitatis fla-

gi-

gitio & turpitudine comparandum; vitam igitur amittet, & dolore intolerabili cruciabitur potius, quam fraudem vllam in vita suscipiat.

Necesse igitur est, vt, qui vere sapientiam colit, omnibus virtutibus egregie cultus & ornatus sit; ne illud quidem prætermittendum est, nihil esse in vita boni, si sapientię moderationem remouëris; nec enim genus, neque vires, neque pulchritudo, nec opes, nec imperium, nec aliquid aliud e iis, quæ vulgo bona eximia numerantur, salutem afferre possunt eis, qui illis temere & insipienter vtuntur; imo, vt multis ante disseruimus, quo maiores opes sunt, eo status illius, qui summis opibus abundat, calamitosior atque funestior est. Multo namque furientius insolescet; multoque maiore leuitate iactabitur; multoque minus considerate in pestem ruet. Vt igitur in fabulis Polyphemus oculis orbatus, quo robustior, & immenior, & violentior erat; eo, cum se sine vllò iudicio concitabat; sæpius ad rupes allisus, sæpius in loca præcipitia delatus concidebat, grauiioresque plagas accipiebat, quam accepisset, si imbecillior fuisset; ita, qui magnas
opes

opes habent , si sapientia vacui sunt , quod magis opibus & imperio florent , eo sese furentius incitant , & grauioribus ruinis opprimuntur. Vnde colligitur , vt sæpe jam dictum est, in Regibus nempe, quorum maxima potestas est , & summum imperium , summam sapientiam jure atque merito flagitari ; aliter enim & ipsi erunt omnium hominum miserrimi , & respublica illorum temeritati permissa foede peribit. Hæc cum ita sint , quis eorum amentiam ferre poterit , qui non modo nullam operam in eo ponendam existimant , vt Rex sapiens euadat ; sed contra omnia faciunt , quibus is furiosior & insolentior in dies sit , omnemque rempublicam & stultitia sua , & eorum , cum quibus viuit, improbitate peruertat? Hoc igitur sane constat , non mediocri sapientia opus esse ad regium munus feliciter obeundum ; quomodo autem sapientia parari ab illo facile possit , qui est nimis molliter educatus , & scurrarum comitatu impurissimo circumseptus , & adulatorum assentationibus atque lænociniis in pestiferam fraudem impulsus , non video : itaque cum alia multa præsidia , tum maximarum artium studia ad parandam sapien-

208 DE REG. INSTITVT. ET DISCIPL.

pietiam & statum illius fulciendum maximo quidem opere requirebam. Vos, si meam sententiam non probatis, aliam disciplinam videte; hanc enim, quæ pessimis moribus recepta est, & inueterauit, e qua, tamquam e fonte mortiferis venenis infecto, omnia mala multis in locis ad reipublicæ perniciem profluunt, acris animo repellendam censeo, ne Principis nostri præstantem naturam, & excellens ingenium dedecore & probro contaminet.

Recte, inquit Portucalensis, censes. Sed priusquam de regia disciplina diligentius inquiramus, abs te libenter audierim, num liberam rempublicam regno præferendam existimes. Multa enim a multis in contrarias partes afferuntur; quamuis autem semper in ea opinione fuerim, vt nullum reipublicæ statum regio præferendum existimarem. Cum tamen ea, quæ dicis, attendo, & flagitia, in quæ Principes ex ista praua institutione delabuntur, mente considero, rectissime cum illis actum esse puto, qui in libera ciuitate nati sunt; nam primum nimis Principis vnus potentia est communi libertati contraria; vbi autem libertas minime viget, ibi duæ
vir-

virtutes , vt tu paulo ante dicebas , vix locum habere possunt , nempe ingenii acumen , & animi magnitudo. Ingenium enim sub vnus dominatione positum molestissimis curis hebescit , & animus seruitutis oneribus oppressus excelsa contueri non potest ; in mentis igitur augustæ tenebris , & pusilli animi demissione , nullum studium honoris & dignitatis extare poterit ; cum vero omnes virtutes studio honoris excitentur , consequens est , vt , spe magni honoris incisa , studium virtutis & honestatis extinguatur. At in regno nemo facile ad honores summos euehitur. Deinde omnes libenter pro ea republica , cuius sunt aliqua ratione participes , omnem laborem perferunt , & pericula infinita subeunt ; at in regno , cum pauci admodum in illius gubernandi societatem vocentur , & reliqui omnes non solum ab illius procuratione , sed etiam fructu excludantur ; reliquum est , vt pauci etiam pro illius conseruatione pugnare velint. Nemo enim pro alienis opibus capitis certamen sibi ineundum putat. Præterea in republica libera omnibus ex æquo , qui fortes , & splendidi , & in aliquo genere virtutis excel-

lentes extiterint , sunt amplissima dignitatis præmia constituta ; in regno autem , quominus homines animo magno præditi magna sibi præmia polliceri queant , est impedimento primum quidem summa Regis ipsius amplitudo , quæ non facile patitur quemuis alium præstantia dignitatis excellere ; deinde nobilitatis insolentia ; deinde adulatorum impudentia , & reliquæ ejusmodi labe , quæ sunt veræ virtuti contrariæ & inimicæ ; sic autem fit , vt , spe magnæ dignitatis abjecta , debilitetur virtus , atque langueſcat industria. Accedit etiam illud , quod Rex , si ignauus est , totam rempublicam exemplo inertiae corrumpit , hominumque mores effeminat ; si fortis , & gloriæ cupidus , inuidet iis , qui virtute præcellunt ; & ita fit , vt subditorum animi vel torpescant ignauia , vel opprimantur inuidia , vsque adeo , vt nemo possit ad summum gradum laudis eniti. Præterea illa præmia , quæ in libera republica homines fortes & industrii consequuntur , sunt dignitatis plenissima ; nemo enim in illa suspicari potest , eum , qui aliquem gradum honoris adipiscitur , esse aut scurram , aut adulatorem , aut alicui vitio affi-

nem

hem eorum , propter quæ multi cum Regibus in gratia sunt. At cum ii , qui magnum locum apud Reges habent , sæpenumero malis artibus eum locum adipiscantur ; euenit , vt ii etiam , qui merito a Regibus donis & muneribus afficiuntur , in similis flagitii suspicionem veniant ; ita vt vix vlla magna potentia reperiatur in Regno , quæ non sit aliqua dedecoris labe contaminata. Illud etiam quantum est ? In republica enim , cum sit omnibus hominibus ex æquo aditus apertus ad summam dignitatem , omnes inter se de dignitate contendunt , honestissimumque virtutis certamen ineunt : ita vero fit , vt inueniantur multi consilio prudentes , & auctoritate graues , & moribus ornati , & in rebus gerendis industrii , & robore virtutis inuicti. At in regno , cum nobilitas ea dignitate , in qua versatur , contenta sit , & splendore generis insoleseat , non sane magnum studium in comparanda virtute sibi ponendum existimat. Homines autem ignobiles cum animaduertunt , esse sibi aditum ad nobilitatis honorem interclusum , studium virtutis atque dignitatis omittunt ; sic autem fit , vt cum nobiles arrogantia & insolentia

212 DE REG. INSTITVT. ET DISCIP.

virtutem despiciant , ignobiles desperatione fracti virtutis studia deponant ; nullumque inter homines virtutis certamen excitetur , honestatis lumen intereat , & sordes atque flagitia dominantur. Præterea cum nemo recte possit aliis imperare , qui non aliquando paruerit ; nec enim modum aliis statuere potest , cui nunquam fuit ullus modus adhibitus ; qua ratione fieri potest , vt is recte gubernet , qui nunquam obedire didicit ? At Rex ita plerumque institutus est , vt nemini pareat vnquam , & omnes ab ipsis incunabulis imperio coercere meditetur. Præterea in republica cum summa potestas sit penes leges , quæ neque gratiâ cuiusquam , neque muneribus inflectuntur , nec ira , aut inuidia , aut odio perturbantur , aut misericordia commouentur , plerumque euenit , vt recte jus administretur , & rei cuique dignitas sua tribuatur ; at in regno , cum leges etiam sint in vnius hominis libidine positæ , multa contra juris æquitatem fiant opus est , neque quid fas & ratio postulet , sed quid Regi gratum atque iucundum sit , ab iis , qui jus dicunt , pessima ratione ponderetur. Postremo cum in libera ciuitate leges maxime
 stu-

LIBER TERTIUS. 117

Indio conferuentur, legum autem munus
 it jus omnibus æquabile constituere; non
 acile potest esse tanta ciuis vnus potentia,
 et legum sanctiones contemnat, & juris
 incula, quibus omnes astricti sunt, perum-
 ere conetur. At in regno, cum non solum
 lex, sed multo etiam magis omnes Regis
 amiliares atque domestici legibus soluti vi-
 cantur, nihil est interdum, quod potentiam
 eorum & indomitam cupiditatem constrin-
 gat. Si igitur in libera ciuitate publica liber-
 tas integrior est, & ingenii cultus illustrior,
 et studium virtutis acrius, & spes honoris &
 dignitatis amplior, & caritas patriæ vehe-
 mentior, & auctoritas legum sanctior, ma-
 iorque in illa præsidia contra tyrannidem
 constituta sunt; nihil certe magis optandum
 videtur homini, qui dignitati studet, & bene
 beateque viuendi cupiditate flagrat, quam in
 libera republica ætatem degere. Hæc qui-
 tem, quæ in medium attuli, me interdum
 dubitare de hac quæstione cogunt; rem igitur
 mihi gratam, &, vt credo, Tauoræ atque
 Menesio feceris, si nobis sententiam tuam ex-
 dicueris; quamquam enim in libris, quos de
 Nobilitate adolescens edidisti, regnum omni-
 bus

bus rebus publicis antetuleris, fieri poterit, vt sententiam ista ætate & rebus diligentius exploratis fortasse mutaueris,

In longum, inquam, sermonem me vocas; non tamen ab ea materia, quam in manibus habemus, alienum, sed mihi ad alia properanti contrarium, Sed geram tibi morem, &, quam breuissime fieri poterit, ea, quæ requiris, expediam. Atque primum quidem hoc statuendum, cum omnia genera reipublicarum quamuis labi atque ruere videantur, sapientia tamen atque virtute adhibita facile emendari possint, & ad rectissimam in eo genere moderationem reuocari; nullo modo optandam esse homini probam ullam reipublicæ præsentis immutationem, nempe, quæ nunquam sine maxima morum perniciæ, hominumque strage fieri possit, sed in eo summo studio laborandum est, vt idem status, in quo versamur, omni vitio careat, firmissimoque præsidio muniatur. Vigigitur officium eorum, qui in libera ciuitate nati sunt, est pro statu illo reipublicæ quoduis capitis discrimen adire; ita & nobis, qui Regibus parere assueti sumus, hoc officium impositum est, vt non modo pro reipublica
sed

sed pro Regis ipsius salute atque dignitate
 itam ponamus. In idem namque scelus in-
 urrit, & qui in libera ciuitate omnem po-
 statem ad vnum ciuem deferre conatur, &
 si in regno maiestatem Regis oppugnat,
 sumque Regem de statu deicere conten-
 t; vterque enim concordiam dissoluit, &
 teritum patriæ machinatur. Deinde mul-
 tificilius est, quam homines suspican-
 r, illam reipublicæ rationem institui; in
 a sit ita exæquata libertas, vt nullus pos-
 libertati communi multis modis officere;
 si enim fuerint omnes, qui in eadem ci-
 tate viuunt, egregie moderati, diuturna-
 e disciplina ad legum custodiam admo-
 en diligenter instituti, & a primis annis in
 silibus institutis enutriti, neque libertas,
 que salus, nec vlla denique reipublicæ ra-
 conseruari poterit. Quod quidem re-
 mpublicarum intestinæ seditiones, & ex-
 is calamitosi certe declarant; omnes enim
 ndem Tyrannorum immani dominatu mi-
 rabiliter opprimuntur. Quod si concordia
 mpublicam maxime tuetur, nihil certe
 illius esse poterit, quam omnem reipublicæ
 testatem vni homini excellenti virtute
 præ-

prædito permitti; nihil enim poterit cogitari aptius & conuenientius ad conglutinandam concordiam. Vt enim, dum multi de principatu contendunt, & quilibet omnem reipublicæ potestatem ad se transferre conatur, tumultus oriuntur, & seditiones concitantur, & respublica miserandum in modum laceratur; ita, dum omnes vnius auctoritate & imperio continentur, multo facilius vniuersi vno vinculo foederis astringuntur. Quod si, vt Socrati placet, id spectare debent omnes, qui rempublicam modo & ratione temperant, vt eam, quam maxime fieri possit, vnam efficiant, hoc est, vna consensio- nis ratione atque nexu arctissime colligant; quid vtilius fingi potest ad animos omnium ciuium mutui amoris vinculo copulandos, quam vnius tantum summi Principis potestas atque moderatio? Nec enim illum inuidia oppugnat, qui multum inter omnes excellit; nec illi, qui sub Rege viuunt, bellum intestinum facile mouere possunt, cum Regis ipsius, quem ex æquo verentur, imperio atque potestate ab instituto facinore prohiberi queant. Quantum autem valeat ad ciuitatis concordiam firme constituendam

Regis

Regis imperium, in hoc maxime cermitur; quod omnes imperiosæ respublicæ hoc firmissimum concordæ vinculum retinuerunt, quod in auctoritate regia consistebat. Sic Athenis Princeps ille, a quo annus nomen accipiebat, cum reliquis Principibus, qui singulis annis creabantur, regiam quodammodo dignitatem obtinebat, e quibus vnus Rex appellabatur. Bæotarchæ vero Thebis singulis annis; Lacedæmone item perpetui Reges id similiter efficiebant, vt subditos auctoritate summa continerent, & vno & æquabili jure deuincirent; ne multorum Principum intestina contentione distracti atque dissipati corruerent. Quid Carthaginenses? Nunquid non duo singulis annis Sophætes (sic enim verbo, a Phænicia & Hebrææ lingua deducto, summum ciuitatis imperium nominabant) regiam dignitatem facile sustinebant? Quid Romani? Num obscurum est, Consules jus plane regium obtinuisse? Et ne singulas respublicas, quæ imperio floruerunt, oratione persequamur, hoc satis constat, nullam fuisse, in qua non vnus, aut pauci ita magnitudine dignitatis excellerent, vt non multum a Regum amplitudi-

tudine atque maiestate distarent. Illas autem, quæ regia auctoritate caruerunt, ad opes summas peruenire minime potuisse, sed intra breuissimum tempus intestina seditione conuulsas cum magna ciuium strage concidisse. Reputate cum animis vestris, quot respublicæ in Italia, postquam Romanum Imperium fuit ab influente barbaria conculcatum, institutæ sint, & quam paucæ statum suum tueri potuerint; & quam aliam causam certiore assignare possumus, quam pestiferas ciuium dissensiones, quas excitari necesse est, ubi nemo sic inter omnes excellit, ut omnes sine ulla recusatione imperium & auctoritatem illius sequantur? Quare nunquam satis laudare possum Venetorum ciuitatem, vnam omnium prudentissimam, quæ cum alia multa ad imperium propagandum & conseruandum admodum sapienter excogitauit; tum nihil eo consilio sapientius, quo sibi vnum summum Principem præpositum esse voluit, ob virtutem ad altissimum illum gradum dignitatis euectum, quem omnes intuerentur, & cuius auctoritate deuincti facilius commune publici foederis jus, & ciuilem societatem

tatem conseruarent. Is igitur , cum non Regis nomen , sed auctoritatem Regis obtineat, auctoritate illa summa , quam habet , inuidiam comprimit , & ambitionem refrenat , & Senatum concordia stabili atque firma congelutinat , & ita populum vniuersum facillime æquabili jure constringit. Vnde concluditur, nihil esse ad rempublicam diutissime conseruandam vtilius legitimo vnus imperio atque potestate. Nam neque quidquam est ad stabilimentum reipublicæ concordia salutaris ; neque quidquam ad concordiam firme constituendam aptius reperiri potest vnus Principis excellentis auctoritate & jurisdictione.

In quo vero dicis vnus imperium esse communi libertati contrarium, Tyranni scelus benignitati Regis attribuis. Cum enim Tyranni proprium sit non sua virtute , sed suorum imbecillitate statum suum stabilire , (intelligit enim superbiam , & immanitatem eunctis mortalibus , maxime autem illis , qui horum scelerum iniurias quotidie patiuntur, esse vehementer inuisam) & ideo cum amari non possit , & timeri veli , & omnes , quibus terrori esse cupit , vt fieri necesse est ,

no-

220 DE REG. INSTITVT. ET DISCIP.

noctes atque dies extimescat; consequens est, vt eorum opes, quantum possit, extenuet, & animos eorum impotenti dominatu premat, ne se quisquam erigat, & aliquam lucem libertatis ex diuturna caligine seruitutis aliquando respiciat. Regis autem officium non est libertatem eripere; sed pro suorum libertate tuenda atque conseruanda vigilare, & laborare, &, cum opus fuerit, vitæ etiam discri-
men adire. Non vi & injuria ciuium opes imminuere, sed arcere vim, & profligare injuriam, & ciuium opes juris æquitate defendere. Atque postremo non inuidere ingeniis, aut animos frangere; sed fauere ingeniis, &, propositis premiis, ciuium animos ad studium virtutis atque dignitatis extollere. Qua enim alia ratione rempublicam florentem reddet, statumque suum firmo præsidio conseruabit? Cum enim officium Regis in eo positum sit, vt rempublicam opibus locupletet, præsidiiis firmet, moribus ornet, dignitate illustret, atque, vt vno verbo dicam, beatam efficiat, quod sine ciuium libertate, & animorum magnitudine fieri nullo modo potest; quis non videt, omnem Regis curam & studium in publica libertate
tuen-

tuenda consumi? Aliter erit nomine Regis indignissimus.

Sed dicis neminem libenter arma sumere illius reipublicæ causa, cujus particeps non est. Verum id quidem est, sed Regis opes non illius propriæ, sed reipublicæ totius existimandæ sunt; omnes enim, qui Regis imperio continentur, in illius patrocínio latent, in illius præsidio acquiescunt, illius virtute muniuntur, injuriam a se, & dedecus, & ignominiam illius æquitate propulsant, & bona etiam reipublicæ pars illius beneficentia sustentatur. Cum igitur arma sumunt, sane prudenter intelligunt, se non pro alienis, sed pro suis opibus dimicare; illius enim opes existimandæ sunt, ad cujus salutem & conservationem singulari quodam studio conferuntur. Vnde colligitur nihil esse magis Reipublicæ proprium, quam optimi Regis opulentia. Præmia vero, quæ dicis, non alibi profecto neque maiora, neque ampliora, quam ubi Rex hoc nomine dignus omnia lege moderatur, proposita sunt omnibus, qui se excellentius in virtutis studio gerere student. Nec enim boni Principis est honores, munera, congiaria, & præmia

nia, denique omnia viris fortibus & sapientibus debita, siue ad rei familiaris argumentum, siue ad dignitatis amplificationem pertineant, ad homines ignauos & scurras & adultores sine vlla ratione transferre. Quod si aliquis tam sine mente est, vt ornet flagitia, & augeat opibus temeritatem & insaniam, virtutem vero & grauitatem negligat atque despiciat, eum certe Regem appellare fas non est: sed hominem amentem & furiosum, omnia reipublicæ præsidia intemperantia sua dissipantem. Nos vero non de temeritate & infania; sed Regis moderatione & sapientia disputamus. Id ita non fieri semper dicis, sed plerumque longe secus, quam oportebat. Quid ad rem? Id enim demonstramus, quod fieri in regno potest, & debet, & aliquando etiam fit. Quod si in regno male constituto regias opes dissipari, & hominibus indignissimis condonari videmus: intelligamus in republica male constituta non fieri minora flagitia, imo plerumque grauiora; in qua videlicet est verecundia minor, & licentia maior, quilibet facilius & quantum audet, tantum potest; & ita multo plures sæpenumero sunt, qui opes publicas domum auertant, & reipublicæ

vecti-

vectigalibus tamquam propriis ad obsequium
 impuræ libidinis abutantur; & tamquam alie-
 na aliorum nequitia & improbitate consu-
 mi, & exhauriri patiantur. Iniqua autem
 contentio est, cum bene moratam rempubli-
 cam cum flagitioso regno comparandam ex-
 istimas; nam quaecumque illud genus reipu-
 blicæ sit, si fuerit legibus fundatum, & mo-
 ribus recte constitutum, vincit & superat di-
 gnitate omnia summa imperia, quæ non
 fuerint rectis institutis, & legibus, & virtu-
 tum maximarum præsidio stabilita. Regnum
 vero in perditorum hominum potestate posi-
 tum, & libidine vnius Principis furenter ad-
 ministratum, non regnum, sed execranda
 tyrannis est. In regno enim nec adulatione,
 neque scurrili dicacitate, neque turpitudine
 & flagitio, neque fraude & mendacio opes &
 diuitiæ comparantur; sed omnia emolumenta
 & commoda, omniaque dignitatis ornamenta
 & honoris insignia ad homines prudentes, &
 fortes, & omnium virtutum opibus excul-
 tos recto iudicio deferuntur. Rex enim id
 summa cura & studio suscipit, vt merita vni-
 uscujusque ponderet, & pro dignitate virtu-
 tem remuneret. Homines igitur partim amo-
 re,

re, quo Regem amplectuntur, (mirum est enim quanta nominis regii caritas insit in illis, qui sub regia potestate sunt) partim spe donorum & inunerum, quæ omnibus, qui egregiam operam reipublicæ nauant, a Rege proponuntur, sese intrepide in summum vitæ discrimen injiciunt; nec vlllo periculo impediuntur, quominus pulchrum aliquod facinus obeant, & dignitatis grata labores immensos excipiant.

Dicis præterea Regem ignaum rempublicam exemplo nequitie corrumpere; fortem & strenuum fortibus hominibus inuidere. Si id ita euenerit, aliquid boni ex alterutra parte proueniet; nam neque Princeps ignauus hominibus fortibus inuidebit; neque fortis rempublicam corrumpi sinet. Præterea ignauiz nomen minime in Regem conuenit; si enim desidiosus & ignauus fuerit, minime Rex appellandus est; sed eorum, qui negligentia & somno illius abutuntur, vile mancipium. Si vero fortem & vigilantem se præbuerit, homines fortes & singulari industria præditos amabit, multisque honoribus & præmiis afficiet. Nihil est enim, quod magis conjungat amore animos, quam virtutis
fi-

similitudo. Nec enim invidia virtutis comes est, sed totius honestatis inimica. Sic igitur vel is, qui omnia tenet, ignauus, vel fortis est: si fuerit ignauus, Rex minime nominandus erit; si fortis, erit profecto ab omni inuidiæ suspitione prorsus alienus; maxime vero cum tanta sit illius amplitudo, ut nemini eorum, qui sub imperio illius sunt, inuidere possit. Rex enim suorum animos regit, & virtutes excitat, & officiorum magister est, & totius honestatis architectus, & omnium virtutes, & actiones, & præclara studia ad reipublicæ salutem confert; ita ut omnia aliorum facta atque præclara facinora ad gloriam illius maxima ex parte referantur. Ut igitur Imperator militum suorum virtuti non inuidet, imo in aliorum decore gloriatur; ita Rex, quamuis sub se optimos imperatores habeat, & præstantibus in republica gubernanda viris utatur, nulla tamen invidia commoueri potest, cum jure possit omnes eorum laudes ad suam gloriam reuocare. Nam sæpenumero omnes civium virtutes ex virtute illius oriuntur; & rectissimus virtutis usus, & ad reipublicæ salutem utilissimus, illius sapientii moderatione continetur. Nec enim is est,

qui virtutes oppugnet; sed qui eas excitet, animisque stimulos frequenter admoueat, quo sint alacriores ad communis salutis custodiam. Nec ingeniis officit; imo ea premiis exsuscitat, & otio constituto liberiora facit ad omnia, quæ in obscuritate naturæ latent, acute peruestiganda. Minime igitur verum est, sub Regibus duas maximas virtutes tolli, nempe cultum ingenii, & animi excellentis altitudinem; imo sub bono Rege cum maxima laude floreant, atque sine vilo reipublicæ periculo ad excellentem gradum honoris aspirabunt. In republica enim libera ii, qui excellenti ingenio & maximo animo sunt, cum res illis ex animi sententia procedunt, & ampla dignitate cumulantur, tyrannidem sæpe affectant, & rempublicam euertunt. At in Regno ita viget studium virtutis, vt non facile immoderatione peruertatur, & a bonis principiis excitata in perniciem patriæ totius erumpat. Regiæ namque potestatis atque dignitatis amplitudo temeritatem facile coercet, animique magnitudinem ita temperat, vt eam in fraudem impelli minime patiatur.

Neque tibi assentior in eo, quod ais, præmia

, quæ donantur a Regibus, non habere
 nitatem. Quid enim poterit esse ad ho-
 stem præclarius, quam a sapiente Prin-
 ce, qui nunquam flagitiosam voluptatem
 uti prætulit, muneribus atque donis au-
 gere? Donum enim illud virtutis testimo-
 nium continet, non labis ullius indicium.
 quo vero dicis, non esse in Regno ad-
 n omnibus apertum ad eximiam digni-
 tatem; pergis tu de temeritate & amentia stul-
 ti Principis, non de Regis optimi atque
 sapientis moderatione differere? Si enim
 tu vere hoc nomen usurpauerit, non igna-
 ra nobilitatem, non opes per injuriam par-
 as, non ullam denique falsi splendoris spe-
 m virtutis opibus anteponet; sed omnes,
 quibuscumque virtutis lumen eluxerit,
 cumque hominum genere illi procreati
 sunt, muneribus amplissimis honestabit. Sic
 enim existet illa præclara contentio, quam
 habebas, quæ omnes imperiosas respublicas
 parvis magnas effecit. Nobilitas enim, ne
 nitatem maiorum virtute partam amittat,
 ne a novis hominibus superetur, enixe
 contendet; contra autem homines ignobiles,
 ex tenebris emergant, & virtute sua splen-

dorem nobilitatis obscurant, omni ratione pugnabunt. Rex autem, quasi quidam ludorum præfectus æquissimus, de viribus & artificio, non de genere aut diuitiis iudicabit, & præmia pro virtutis ratione distribuet; sic autem eueniet, vt contemnatur ignauia, coercetur insolentia, odio flagret injuria, nullus honor habeatur auaritiæ, & extinctis flagitiis virtutes omnes efflorescant.

Ais tamen neminem posse aliis imperare, qui non ante paruerit. Rectissime dictum puto: in quo vero Regem nunquam parere didicisse ostendis, meo quidem iudicio falleris. Primum enim, si bene institutus est, astringitur parentum disciplina; deinde magistri sapientis eruditione; deinde honorum hominum monitis & consiliis; tum etiam pudore & verecundia coercetur; tum etiam cupiditate laudis incenditur: non vni igitur tantum rectori, sed multis obtemperat; seruit enim pietati, seruit modestiæ, seruit pudori, seruit honestati, priusquam ad imperium administrandum se conferat. Ne legibus quidem se solum existimabit: imo multo arctioribus legum vinculis, quam cæteros, se alligatum reputabit; vt non solum ipse suas
cupi-

cupiditates teneat; sed vt exemplo suo facilius suos in omni officio contineat. Hoc enim etiam non mediocre discrimen est inter Regem atque Tyrannum, quod Rex legibus se deinctum esse profitetur; Tyrannus vero in interitu legum omnem dignitatem suam collocandam existimat: infinitum enim imperium concupiscit, quod leges minime patiuntur. Regis vero imperium legitimum est, neque iura vlllo modo transgreditur; sed lege atque ratione definitur. In legitimo autem imperio non regnat improbitas, non violentia, non libidinis impotentia, non fracundiae furor, non praeceps ambitio; sed leges, & mores, & egregiae disciplinae, quibus reipublicae salus & dignitas continetur. Vt autem veniat respublica in potestatem vnus Principis intemperantis & perdit, potest illo defuncto (vt fit) per alium Principem iustum atque beneficum recreari. At respublica, quae multorum potentia continetur, vbi publici mores ad perniciem labuntur & ruunt, nullo modo sustineri potest, quin Princeps in exitium feratur.

Sed dices fortasse fieri non posse, vt vnus homo tantum ingenio & industria valeat, vt
omnia

omnia solus negotia & sapientia gubernet, & virtute sustineat, & æquitate moderetur. Quasi sit difficile Regibus multos homines regia virtute præditos in consilium adhibere, & in regni quodammodo administrandi societatem conuocare, & ex omnium sententia, quid optimum factu sit, statuere. Illud vero quantum est? Quod in republica libera nemo ferme est, quin in eo, quantum potest, omnes animi nervos intendant, ut rempublicam operaque præsidio confirmet. Alium enim rei familiaris cura distinet; alium cupiditas propriæ utilitatis publicæ utilitati aduersari compellit; non paucos autem stulta quædam opinio de aliorum vigilantia & industria curatione reipublicæ & studio communis salutis auertit. Dum enim quilibet suas tantum res agit, neque defuturos existimat, qui pro omnium salute velit sumptus facere, & labores perferre, & pericula subire; fit tandem, ut opes reipublicæ ab omnibus negligantur, aut saltem non eo studio, labore, & vigilantia defendantur, qua singuli opes suas tuentur. At Rex hoc vnum agit, & cogitat, huic curæ incumbit vni, eo omnia illius studia conferuntur, ut regnum tueatur, vniuersamque

tamque rempublicam tutam ab omni calamitate conseruet. Præterea cum nemo possit in eo munere recte versari, in quod non multum operæ & studii contulerit, publici commodi ratio postulat, ut vnus homo sit, qui nullum aliud munus in vita colat, nihil agat aliud, nullum studium, nullam curam ad se pertingere putet, quæ sit a communi utilitate sejuncta; in republica autem libera alii aliis curis impliciti sunt, & priuatis sæpenumero utilitatibus impediti a studio publicæ utilitatis abducuntur. At Regis animus, si bene æ natura informatus, & rectis disciplinis institutus est, in hoc tantum munere sese a priuatis annis exercuit; hanc vnâ artem didicit; hoc vnum sibi onus impositum esse considerat, ut quamuis omnes dormiant, & quiescant, ipse solus vigilet, & laboret, & cum vitæ etiam periculo pericula omnia patriæ, cuius curam suscepit, virtute propulset. Postremo in libera ciuitate non possunt esse semper omnes ita de reipublicæ salute consentientes, ut non sæpenumero alii alios impedian; & quamuis quidam sint prompti & alacres, aliorum timiditate & negligentia retardentur; & sic rei bene gerendæ occasio elabi-

elabitur, omnisque facultas constituendæ salutis amittitur. At Rex, cum supremam ipse habeat potestatem, illumque omnes alacri mente & studio sequantur, facillime potest intendere animum in omnes rerum opportunitates; sedulo urgere, & instare; per se multis in locis occurrere pecunia, fauore, gratia, spe laudis & gloriæ suorum animos incendere, nullamque occasionem aut hostis perterrendi, aut imperii sui ornandi & amplificandi prætermittere. Cum igitur nec aliibi sit concordia maior, neque ratio vitæ tranquillior, neque vberius virtutis præmium, neque, quod est consequens, acerbius flagitii supplicium, nec acrius reipublicæ tuendæ studium, quam in regno bene constituto; restat profecto, vt nullus reipublicæ status sit cum illo comparandus. Quocirca sapienter Homerus vnus Principis imperium multorum potentia longe anteponit, Nam vt vnus tantum sol lucet in mundo; ita consentaneum est, vt in vna republica vnus tantum Principis maxime sapientia atque virtus eluceat. Nihil est enim nec ad omnium utilitates conglutinandas efficacius, nec ad temporis diuturnitatem valentius, nec ad bonas ar-

tes

tes colendas utilius , nec ad animorum securitatem firmitus , neque denique ad imitandum illius supremi Regis Imperium accomodatius , Vnus est enim rector , vnus moderator & Princeps , qui rerum vniuersitati præsidet , qui cælum , & omnia , quæ cæli ambitu continentur , æterno imperio gubernat. Sit modo Rex ingenio acutus , virtute magnanimus , bonis artibus eruditus , studio verissimæ laudis incensus , cupiditate publicæ salutis & dignitatis inflammatus ; & , quod caput est , religione castus , & cognitione diuini juris instructus ; & sic fieri non potest , vt sit vlla respublica ea , quam ille moderatur , omnibus bonis affluentior. Quamuis enim in libera ciuitate in vno ciue , aut in paucis , hæ laudes omnes inueniantur , non possunt tamen tantum fructum afferre rebus communibus , quantum afferrunt , cum sunt in animum summi Principis in regno congestæ ; illius enim imperio continentur omnes , & illius imitandi cupiditate incenduntur , & facillime ad studium , quo illum teneri vident , applicantur ; ita vt omnes ex illius moderatione maximum in omni genere fructum percipiant. .

Probas tu quidem mihi ista , inquit M. ,
sed

sed velim ex te audire , quid præstantius aut
 vtilius esse iudices, Regem libero populi suf-
 fragio creari , an potius regnum ad filium
 maiorem natu hæreditate peruenire ? Illa
 namque Regis eligendi potestas, quæ viget in-
 terdum in Sarmatia , & viguit in inferiore
 Pannonia , multas commoditates videtur ha-
 bere. Primum enim summæ felicitatis esse
 videtur, talem Regem habere, qualem optare
 possumus : non enim semper filii parentum
 vestigiis insistant ; ex Principe enim clemen-
 te atque benigno , & artibus præclaris institu-
 to , nascitur sæpe filius aut natura maleficus ,
 aut consuetudine corruptus , aut institutione
 deprauatus ; at nunquam tam male cum ge-
 nere humano agi potest , vt non liceat reperi-
 re hominem natura , & moribus , & disci-
 plina præstantem , qui facile rempublicam
 moderatione sua conseruet , & ab omnibus
 malis , quæ illam oppugnant , eripiat. Si igitur
 liberum fuerit populus eligere , quem ve-
 lint , multo sæpius hominibus optimi atque for-
 tissimi virtute frui poterunt , quam nunc
 fruuntur ; tunc enim eorum salus in eorum
 iudicio posita esset ; nunc vero in casu atque
 fortuna sita esse videtur. **P** Præterea contra na-
 turam

turam est, vt mali bonis imperent, timidi fortibus, temerarii sapientibus; at cum Reges non fiunt, sed nascuntur, id sæpenumero accidere necesse est, vt homines virtute & sapientia præcellentes Principis insani & furiosi patiantur amentiam, & respublica illius temeritate & flagitio de statu suo conuelatur. Præterea contra jus est, vt populus iure suo priuetur: nec enim Rex appellari potest, qui inuitis imperat, sed Tyrannus potius; Rex enim liberorum hominum moderator est, non seruorum; liberi autem illi sunt, qui moderatorem sibi deligunt, non qui alicujus velint nolint imperium sequi compelluntur. Adde, quod is, qui propter virtutem eligitur, multo benignius & humanius populum tractare potest. Partim enim quod pristinae vitæ recordatio illum admonet eis benigne facere, cum quibus videt se fuisse æquabili jure conjunctum: partim, quod gratiam referendam existimat populo, per quem se videt in altissimo gradu locatum, vniuersi populi salutem sibi singulari studio atque benignitate conseruandam proponit; at is, qui nunquam humano more cultus fuit, neque inopiam, neque solitudinem, neque labores,

236 DE REG. INSTITVT. ET DISCIP.

labores , quibus reliqui homines affligantur , expertus est ; periculum est , ne se hominem esse obliuiscatur , & ea de causa nihil humanitatis reliquis hominibus impartendum putet. Nihil est enim quod magis inuitet homines ad misericordiam tribuendam , quam humanam miseriam experiri : vnde rectissime Dido apud Virgilium inquit :

Non ignara mali , miseris succurere disco.

Præterea si vere homines sapientes statuunt , neminem posse aliis imperare , qui non ante paruerit ; certe constat , multo magis ad imperandum aptum & habilem esse , qui Regi paruit , qui leges obseruauit , qui magistratibus obediuit , qui pudorem & officium coluit , qui semper cum virtute & industria imperata confecit eo , cui a puero omnes non solum obediendum , sed etiam tamquam Deo litandum existimarunt. Postremo illa praua institutio , qua Regum filios corrumpi dicis , hominum priuatorum filiis adhiberi non solet ; & ideo fieri necesse est , vt multo plures interdum inueniantur in illis omni virtute ornati , & sapientia laude præstantes , quam in Regum filiis. Persarum Reges olim magni nominabantur , quod prouincias innu-

me-

merabiles in ditione tenerent, & immanibus diuitiis affluerent; re tamen vera, vt ex te non semel audiui hæc ex Platonis testimonio referente, duo tantum ex illis hoc cognomen merito habuerunt; quorum vnus fuit Cyrus Cambisæ filius, qui Asiæ imperium in Perside constituit; alter autem Darius Histaspis filius; ratio autem, quam ais assignari ab eodem viro sapientissimo, ea est, quod, cum eorum neuter esset magni Regis filius, fuerint sub legibus & disciplina (in qua reliqui pueri, qui honesto loco nati sunt, olim nutriebantur) diligenter instituti; & ita vterque eorum potuit ad summam amplitudinem dignitatis euadere. At illorum filii, & illi deinceps, qui Persarum imperium tenuerunt, mulierum deliciis effeminati, & adulatorum assentationibus inflati, & ita flagitiorum sordibus infecti, quamuis magni vocarentur, fuerunt omnes ferme pusillo & angusto animo præditi, & ab omni studio regis maiestatis & amplitudinis abstracti. Tantam enim vim habet puerilis institutio atque moderatio, vt sine illa nemo ad vllum decus eniti possit. Cum igitur plerumque reliqui homines honestius educentur, & diligentius insti-

238 DE REG. INSTITVT. ET DISCIP.

instituantur, quis non videt futurum, vt plerumque apud illos maiora virtutis & moderationis studia vigeant? Adde, quod si spes regnandi fuisset omnibus, qui virtute excellerent, ex æquo proposita, multo acrius & diligentius omnes, in quibus esset maior animus & clarior indoles, ad summam virtutis & sapientiæ laudem aspirarent; & ita fuisset facilior futuri Regis electio. Quid enim facilius aut felicius cogitari potuisset, quam in magna bonorum copia eligere, qui omnibus virtutum maximarum opibus antecelleret? Cum autem naturæ ratio flagitet, vt, qui sapientior est, regat, & ducat illos, qui non eundem gradum sapientiæ affecuti sunt; contra naturam certe erit, vt sapientes sese ad imperium & ductum hominis insani atque plane furentis adjungant. Ergo cum accidere possit, vt aliquis Rex temerarius & insanus Regis optimi atque sapientis satum procreetur, & vix possit fieri, vt non eodem tempore, quo ille cum magna reipublicæ calamitate reipublicam capeffit, multi homines sint in republica virtutis & sapientiæ gloria præstantes; nihil profecto videtur vtilius optari posse, quam Regis electionem libero populi
suf-

suffragio permitti. Aliter enim in Caligulas, & Heliogabalos, & Neronas, & in ipsam denique immanitatem & truculentiam Tyrannidis incidemus. His quidem rationibus in eam sententiam adducor interdum, ut existimem nihil esse præstabilius, quam ex omni populo virum eligere ingenio sagacem, doctrina sapientem, animo fortem, virtute honestum, totoque pectore ad laudem incumbentem; & quod caput est, cupiditate communis salutis incensum, qui rempublicam moderatione sua tueatur, atque conservet, regiumque munus vigilanter administret. Quare nihil poterit esse nobis gratius, quam, quid de hac quæstione sentias, intelligere.

Faciam, inquam, sed non tam multis verbis, quam a te proposita quæstio postulat; est enim anceps, & in cujus explicatione multa in contrariam sententiam disputari facillime possunt; sed, ut tibi ad omnia respondeam, statuendum est, si volueris omnia mala, quæ utrobique nasci possunt, recensere, nullam esse rationem, quam non asperneris, nullam sententiam, quam non cum aliqua ratione rejicias. Quid igitur faciendum? Id, quod

quod sapientes homines præcipiunt ; nempe
 e duobus malis minus eligere. Videamus igitur
 quid magis moribus nostris , quid nostræ
 reipublicæ ; quod generi nostro atque naturæ
 conueniat , & quod minus malorum inuehat ,
 id potissimum sequamur. Hoc posito , videamus
 num multo maiora mala his , quæ recensuisti ,
 electio ista , quam prædicas , importare possit.
 Primum enim populus non est ita sapiens ,
 vt semper eum Principem sibi adoptet , qui
 publicam vtilitatem suis commodis anteferat ;
 caret enim plerumque consilio , caret grauitate ,
 & constantia ; sæpe igitur mentis errore &
 amentia , nonnunquam spe aut metu inductus ,
 non raro autem leuitatis specie delinitus , aut odio
 & inuidia concitatus a recto iudicio deducitur ,
 pro vera virtute falsam imaginem virtutis amplexatur.
 Accedit , quod vera virtus non se venditat ,
 neque se hominibus fraudulenter insinuat ,
 neque populi rumorem aucupatur ; sed se ipsa
 contenta popularem auram facillime contemnit ;
 at is , qui populum captare , & ab vninerfa
 multitudine gratiam inire studet , quamuis sit
 superbus , & insolens , & iniustus , præ se
 tamen fert illustrem modestiæ
 &

& moderationis; & æquitatis speciem; vt simulatione virtutis in hominum mentes irrepit, & de illorum stultitia omnia, quæ cupit, singulari artificio consequatur. Intelligit quidem populus principatum virtuti deberi; sed dum veram virtutem a falsa non internoscit, & vera virtus plerumque se ab illius aspectu remoueat, falsa autem se passim intrudat; facillime fit, vt populus pro vera falsam arripiat, quam summis opibus augeat, amplissimisque honoris insignibus exornet. Quid autem scelestius & perniciosius virtutis simulatione? Nihil profecto. Hoc igitur ista electio libera, quam dicis, efficiet, vt ii, quorum scelere nihil est immanius, neque reipublicæ perniciosius, reipublicam possint pro libidine sua perturbare, & omnibus bonis euertere. Euoluite, si lubet, omnem antiquitatis memoriam, & reperietis omnes ferme Tyrannos hanc sibi viam ad principatum muniuisse; virtutem enim ementiendo, & populum fallaci specie mansuetudinis & lenitatis ad se alliciendo, intolerandam potentiam in rebus publicis sibi parauerunt; qua quidem ad ipsius populi perniciem nimis intemperanter & crudeli-

ter abusi sunt. Qua enim alia ratione Cypsilus Corinthi, Pisistratus Athenis, Dionysius Syracusis, Phalaris Agrigenti, Alexander Phæris, Nicocles Sycione, & alii denique innumerabiles Græci Tyranni patrias suas oppresserunt? Quo alio artificio Cæfætes improviso Romanis libertatem eripuerunt? Qua via multi homines perditī atque profligati in Romanum imperium inuaserunt, vt in summo fastigio locati orbem terrarum perderent? Numquid obsecrum est, omnes ferme Tyrannos, qui olim summas sibi opes cum publicæ libertatis interitu comparauerunt, populari temeritate & amenia nixos, ad summum imperium atque potentiam peruenisse? Deinde quis non videt, quam pestiferæ dissensiones ex hoc fonte popularis licentiæ, & immodicæ libertatis emanent? Nullum enim est fecundius discordiæ seminarium, quam regni cupiditas; maxime vero cum regnum fuerit alicui opinionione virtutis amplissimæ delatum: tum enim homines amplissimæ dignitatis appetentes non solum pro summis opibus, sed pro summa dignitate dimicabunt, & mortem optent potius, quam aliorum imperium.

qui-

quibus ipsi nihil de virtute concedunt , aliquo modo tolerant. Inde igitur tumultus , inde cædes , insidiæ ; inde hostiles civium inter ciues diifensiones ; inde hominum strages ; inde postremo patriæ populatio , & inflammatio , & reipublicæ totius eversio & interitus existit.

Quam cæca autem sit dominandi cupiditas horrendi quorundam Principum exitus maxime declarant : filii namque parentibus necem afferebant ; parentes filios crudelissima morte multabant ; amici amicis insidias comparabant , neque vlla communio sanguinis , neque naturæ jus in animis insitum , neque foederum vlla sanctitas erat impedimento , quo minus vel ferro , vel veneno alii alios , cum quibus erant conjunctissimi , de medio tollerent , vt ipsi soli regnarent. Hoc non solum rerum antiquarum monimenta , sed exempla quotidiana demonstrent ; vbi regnandi contentio viget , ibi nulla naturæ necessitudine , aut religionis sanctitate vitam muniri posse ; neque solum iis , qui regnare concupierunt , sed omnibus rebus publicis , quæ illorum imperium subire compelluntur , seditionibus intestinis & mutuis

cædibus exitium importari. Quod si nihil est in omni republica maiore diligentia præcauendum, quam ne tumultus aliquis exciteretur, nihilque maiorem vim habeat ad discordiam concitandam, quam effrænata regnandi cupiditas; si quilibet ea libertate populo concessa statuisset se regnare posse, quantas turbas commoueret? Quantum bellorum incendium concitaret? Quanto furore & amentia vexaretur? In quo vero dicis, multos futuros virtutum omnium laude præcellentes, tantæ dignitatis præmio virtuti constituto; primum quidem in regno satia magna præmia sunt ad virtutis studium incitandum; deinde virtus, quamuis in initio præmium & emolumentum respiciat, vbi magis atque magis progreditur, non humana & caduca præmia, sed diuina & æterna considerat. Boni igitur & vere & ex animo virtutem colentes sine vlla spe regni, sed ipsius tantum virtutis illecebris inuitati ad virtutis amplitudinem aspirabunt; mali vero, qui virtutem simulant, ea spe dejecti, non tanto studio & artificio, neque cum tanta reipublicæ perniciæ virtutis imaginem atque formam gerent, quam si regnum sibi erroris opinione finxissent.

Sed

Sed ais populum jure suo priuari , cum inuitus imperium alicujus subire compellitur. Minime quidem inuitus. Quod enim morius receptum est , & temporis longissimi diurnitate confirmatum , id populus libentissime comprobatur ; maxime cum ne in hac regni legitima successione jure suo priuetur. Nec enim Rex habetur ille , qui regni hæreditatem adit , antequam juret se regnum jure atque patriis legibus administraturum ; & sic eandem populi totius consensu recipitur , qui etiam fidem suam sanctissimo jurejurando stringit , se illi dicto audientem fore. At , inquit , humanius atque clementius tractasset Princeps omnes ciues , si fuisset ab vniuersis electus ; nam & actæ vitæ ratio , & accepti beneficii memoria ad populum omni studio conseruandum facilius impulisset. Id quidem verum fuisset , si populus in mandandis honoribus nunquam errasset ; si vero constat illum plerumque bonis improbos , gratis ingratos anteferre , quis dubitat , quin longe sæpius contrarium eueniat ? Nam & qui ab humilitate & inopia ad summam amplitudinem repetente traducitur , effertur & insolenscit ; & qui maximis est beneficiis obligatus ,

tus, ne, quod debet, aliqua ratione dissoluat,
 beneficii memoriam abjicit, & illis ipsis,
 qui cum extulerunt, est vehementer infestus;
 superbia enim & insolentia facit, vt nihil
 ægrius ferat, quam existimari sibi alterius
 ope & gratia fuisse summum imperium ab
 vniuersis delatum. Nam quod de Cyro, &
 Dario dicis, rarum id exemplum fuit, quod
 quidem sæpius euenisset, si omnes, qui a pri-
 uata conditione ad summum imperium ef-
 feruntur, fuissent splendido ingenio & ani-
 mo maximo præditi, quales ii, quos com-
 memoras, extiterunt. Cum vero multo secus
 eueniat plerumque, & virtutis assimulatæ
 scelus veram virtutem in honoris popularis
 contentione superet; dubium non est, quin
 populi temeritas pro humanitate & clemen-
 tia summam immanitatem & crudelitatem
 capitibus suis imposuisset. An non Tyranni
 omnes, vt paulo ante diximus, clementiæ &
 humanitatis opinione commendati, a populo
 summis honoribus affecti sunt, quem deinde
 multis & grauissimis cladibus affixerunt?
 An non vt quisque maxima rerum omnium
 inopia conflictatus in principio fuit; ita
 postquam Principum gratia opes & hono-

res assequitur , maxime teter incedit ; ita vt omnes etiam , cum quibus antea coniunctissime viuebat , contemnat , atque despiciat ? Quid ii facerent , si ad regnum peruenirent , qui mediocribus etiam opibus elati , ita se tumidos inferunt , vt ferri & tolerari non possint ? Insanirent profecto , & furiarum stimulis agitati ciuium strages ederent ; honor enim repentinus , vbi naturam nactus est parum solida virtute firmatam , quo est maior & amplior , eo magis animum omni sanitate spoliat , & a mente consilioque deducit.

Quod vero ais , Regum filios neque labore villo firmari , neque disciplina vlla astringi velle ; & ita fieri , vt neque virtutis , neque modestiæ signum aliquod dare queant ; id quidem eueniet , si talis fuerit eorum educatio , qualem oratione depinximus ; si vero ea fuerit adhibita disciplina , quæ maxime futurum Regem deceat , nihil neque fortius & constantius , neque moderatius & clementius esse poterit. Nam multis se laboribus exercebit , & in venationibus frigora & æstus tolerabit , & famem etiam atque sitim ferre discet , & erit in omni vita moderatus , & memor imbecillitatis humanæ nunquam

248 DE REG. INSTITVT. ET DISCIP.

quam se hominem natum obliuiscetur ; & ita fiet , vt nunquam animus illius efferant istæ cæremoniæ , quibus illi litari dicis ; de illis enim multa detrahet , & in iis , quæ reliquæ necessario fuerint , habet enim venerationem iustam amplissimum Regis nomen , haudquaquam insolescet.

At inquis , fieri non posse , vt quisquam recte imperet, nisi prius aliorum imperio obtemperauerit. Recte sane : sed , vt jam dixi , Regum filii , si recte fuerint instituti , multis rectoribus obedient , antequam rempublicam attingant. Parentes enim debita pietate & veneratione prosequuntur , magistros atque pædagogos verebuntur , maiores etiam natu , in quibus summa grauitas fuerit , honore asficient ; & eorum consiliis & monitis obtemperabunt , & laudi atque pudori seruiant , & ingenti gloriæ cupiditate flagrabunt , quæ quidem illos in ætate prima vehementius inflammari percipio. Maximum enim regiæ indolis argumentum est , æcerrimum laudis & gloriæ studium. Cum igitur Regum filii tam multis rectoribus abundant , & tantis disciplinis instructi sint ; si modo sunt , quemadmodum oportet , ad regium munus & offici-


ficiū eruditi, satis parere & obedire discunt. Postremo, ut nullus artifex ad summam artificii sui perfectionem peruenire potest, nisi a pueritia sese illi arti, cui studere vult, tota mente applicuerit; ita Regis ars atque disciplina ab illis tantum rectissime percipi potest, qui a pueris nihil aliud egerunt, quam ut tandem aliquando optimi Reges euaderent. Præclare enim Quintilianus statuit, ut de eo oratore, quem format & fingit, omnes, qui illum necessitudine attingunt, maximam spem a prima ætate concipiant, & opinentur illum præstantissimum oratorem futurum; sic enim euenturum ait, ut omnis eorum institutio ad eum finem referatur, ut is, cuius curam gerunt, maximum in oratoribus nomen obtineat. Quod quidem eo diligentius in Regum institutione faciendum est, quo maius & amplius illorum munus est, & ad plures, si recte officio functi fuerint, illorum sapientia pertinet; & quo maior perniciēs, si in officio deliquerint, reipublicæ inferri potest. Non enim adeo facilis hæc disciplina est, ut non a futuri Regis infantia firmissima illius fundamenta jacienda sint. Ut igitur non is artifex nobis
fla-

flagitandus est , qui tunc , cum opera illius indigemus , discere incipit ; sed is , qui nihil aliud egit in vita , quam vt in illo genere artificii præcelleret ; ita nec optandum nobis Regem illum censeo , qui nunquam se Regem fore suspicatus est ; sed illum , qui a primis annis fuit omnibus regiis disciplinis cum amplissima spe summæ virtutis excultus. Si igitur neque semper populus in eligendo jus , & fas , & optimam rationem sequitur ; sed sæpenumero cupiditate , odio , & inuidia , & temeritate ducitur ; si concordæ ratio semper in primis habenda est , & hac ratione omnis discordiarum materia subtrahitur ; si omnia pericula , quæ ex hoc more (qui apud multos inueterauit) interdum rebus communibus inferuntur , depelli facile possunt institutione præclarissime constituta ; colligi certe potest , multo esse ad pacem securius , & ad virtutem aptius , regiam indolem , quæ in iis , qui sunt ex Regibus orti , plerumque extat & eminent disciplinis , excolere ; vt Princeps munus suum , & domesticis exemplis stimulatus , & studio laudis incensus , diligenter administret ; quam imperium illi committere , qui fortasse multa vitia fronte & supercilio tegit , neque tanto robore ani-

mi præditus est, ut tam altum dignitatis gradum ferre, atque sustinere queat. Vir enim callidus & malitiosus emendari disciplina non potest; at pueri (maxime autem illi, qui regia stirpe orti sunt) cum miti & clementi natura sint, facillime fingi possunt, & in quamcumque partem illum ætatis teneræ rectores impulerint, institutione atque disciplina conuerti. Quod si aliter apud alias nationes fit, illæ suum morem retineant, nos nostrorum summo studio conseruamus. Vtrumque enim fieri recte potest; receptæ autem consuetudinis immutatio, & inueterati moris inuersio, quemadmodum de reipublicæ statu dicebam, nunquam sine rerum & morum pernicië fieri potest. Apud nos vero nihil commodius esse puto hoc more, quo Reges nobis natura fiunt; nam si nemo est, qui pati possit quemuis alium sibi anteferri, & si de quibuscumque commodis & dignitatibus tanta sæpe contentio nobilitatis excitatur, ut vix Regis ipsius auctoritate, quæ apud nos grauissima & sanctissima semper fuit, possit tumultus comprimi, & sedari discordia; quid fieret, si quilibet aliis inuitis ad summum imperium se peruenire posse confideret.

sideret? Habes quid ipse de hac quæstione sentiam. Si possumus impetrare, vt Sebastianus noster ita nutriatur, & educetur, & illis disciplinis erudiatur, quibus illum erudiri conuenit; erit profecto omnis controuersia sublata. Cum enim natura præclarum & singulare ingenium habeat, sperandum est, si fuerit regiis disciplinis institutus, vt tantus Rex sit, vt melior eligi a populo non possit.

Hæc ubi dixi, tum Portucalensis inquit: Quam vellem Ioannes Dux Aueriensis huic nostro sermoni interesse potuisset; magnam sane ille voluptatem ex eo perciperet. At ego, inquam, facile illum abesse patior: si enim adfuisset, nos ingenio, quo valet plurimum, perterrere potuisset, & impedimento etiam fuisset, quo minus libere oratio nostra vagaretur. Nec enim erat & ætati, & auctoritati illius consentaneum, tam diu nostris sermonibus distineri; sed nos aliquid ex disputationibus nostris seligemus, cujus illum participem efficiamus, vt sine molestia eam, quam dicis, voluptatem percipiat. Hæc ubi dicta sunt, surreximus, & aliquot spatiis factis ex hortis discessimus; ita tamen vt prius inuitatio fieret inter nos, vt postridie illius diei maturius in eadem sedes conueniremus.



HIERONYMI OSORII

LVSITANI

EPISCOPI SILVENSIS

DE REGIS INSTITVTIONE

ET DISCIPLINA.

LIBER QVARTVS.

POSTRIDIE igitur rebus diuinis mane procuratis, in hortos ad solitas sedes deuenimus. Tunc Portucalensis inquit.

Hesternæ quidem disputatione nihil aliud actum est, quam ut vitiosam disciplinam, quæ multis rebus publicis interitum potest afferre, videremus. Ex ea igitur nullum omnino fructum capiemus, nisi tu, (me autem nominabat) quemadmodum flagitiosam disciplinam oratione sustulisti, honestam oratione constituas; facillimum enim est prauæ
atque

254 DE REG. INSTITVT. ET DISCIP.

atque vitiosa criminari, difficillimum autem, quid rectum & verum sit, & insignem vilitatem afferat, inuenire. A te vero, non quod est promptum atque propositum omnibus, & quod in omnium ore atque sermone versatur, postulamus; sed quod est arduum atque difficile, & a paucis præstari potest, exquirimus.

Quasi, inquam, ego non sim vnus e multis, magis ad ea vituperanda, quæ reprehensione digna videntur, idoneus, quam ad ea decernenda, quæ honesta & laudabilia sunt, accommodatus; morbi tantam vim, quo multi populi atque nationes laborant, percipio; quæ sit tantis malis adhibenda medicina (vt verum fatear) ignoro. Nec enim, si quis periculosi morbi medicinam quærit, continto medicus est; sed tantum admonet opus esse medico sapiente, qui malum illud tantum optima curatione depellat. Meum officium fuit, morbi gravitatem indicare; vobis, si res digna videtur, in qua laboretis, aliunde remedium comparate.

Nihil agis, inquit T.; non enim alium medicum videbimus, antequam, quid ipse ad regni salutem afferre possis, intelligamus;

mūs; noli igitur tergiuersari, aut te ista communi & vsitata ignorationis excusatione defendere. Quid, inquam; si id, quod vultis præstare non possum? Iniquum, inquit, esset a te postulare quicquam, quod sit supra ingenium & facultatem tuam; sed nos in præsentia eo, quod poteris, contenti erimus, dum nihil, quod ad rem facere possit, de industria prætermittas.

Hac quidem conditione, inquam, libenter, quid possim, experiar; quod vt commodius fiat, rursus nomen Regis explicemus. Est igitur, vt ante diximus, Rex excellens, & vnus, atque perpetuus populi vniuersi rector atque moderator. Hinc jam cerni facile potest, non solum quantus splendor & dignitas sit in regio munere; quanta sit etiam regii nominis implitudo: verum etiam quanta sit illius, vt pparet, tuendi atque sustinendi difficultas. Si enim non mediocris virtutis est, animum regere, cupiditati modum statuere, iracundiam cohibere, inconsideratos animorum motus ratione compescere; quantum tamen erit, non vnum tantum populum, sed multas ciuitates & nationes, plurimum inter se moribus, legibus, institutis atque natura

tura dissidentes , sapientia regere , disciplina moderari , jure diuincire , virtute defendere ? Quid enim aliud regere est , quam eos , quos in fidem recipis ; eo , quo tendunt , recta perducere ? Quid aliud est moderari , quam immoderationem ; quæ huic tanto muneri aduersatur , ratione comprimere ? Cum igitur omnes homines cupiditate vitæ florentis atque beatæ flagrent , Regisque officium sit illos regere , qui sub illius imperio sunt ; restat , vt omnes illius conatus eo comparandi sint , vt vniuersam rempublicam , quam patrocínio suo tuendam suscepit , præstet incolumem , & omnibus bonis , quibus vita beata perficitur , affluentem. Nunquam igitur in commodum suum , sed in populi salutem , & incolumitatem , & vtilitatem , respiciet. Vt enim medico ea ratione , qua medicus est , nihil est aliud propositum nisi ægroti salus ; ita nec reipublicæ Princeps aliud intueri debet , quam beatum reipublicæ statum ; vsque adeo , vt , quoties opus fuerit , opes suas contemnere , & vitam in quoduis discrimen injicere debeat , dummodo ea ratione rempublicam seruet ; non enim mercator est , vt pecuniæ coaceruandæ gratia labores

borea infinitos excipiat ; non luxuriosus nepos est , vt omnes opes , quas parare potest , eò recondat , vt in exquisitissimis cibis , & flagitiosis voluptatibus intemperanter absumat. Non denique Tyrannus est , vt suorum operis ad suam tantum dominationem atque voluptatem abutatur. Sed Rex tantum est , hoc est tutor , & patronus , atque adeo pater patriæ ; ita vt omnes illius curæ & cogitationes ad patriæ salutem dirigendæ sint ; multa enim illum cogunt , omnem utilitatem , & voluptatem reipublicæ causa contemnere. Primum quidem muneris amplitudo. Vt enim nullum est in vita amplius & magnificentius ; ita nullum est maiore cura , studio , vigilantia , sollicitudine procurandum. Deinde obligata fides , quam non potest sine infando scelere & flagitio violare ; fidem autem violat , quoties aliquid commodis publicis anteponit. Ea siquidem lege & conditione fuit in tam excelso gradu locatus ; vt sanguinem etiam suum , si res ita posceret , patriæ , quæ illum tantis honoribus auxit , non grauati largiretur. Postremo nominis ipsius sanctitas atque religio ; Regis enim nomen sanctum atque a Deo diuinum est ,

& ea de causa veneratione dignissimum. Res enim munus diuinum gerit in terris , illiusque summi atque sempiterni Regis (qui omnia, quæ super subterque sunt , imperio sempiterno moderatur) administer & vicarius est. Vnde colligitur neminem posse regnum sapienter administrare , nisi in illum mundi rectorem tota mente respexerit , & ad illius se imitationem contulerit. Vt igitur Deus nec in mundi designatione , nec in cæli conuersione , nec in rerum omnium , quas intuemur oculis , moderatione commodum suum respicit ; sed , immensitate benignitatis illectus & inuitatus , omnia , quæ molitur , quæ designat , quæ efficit , ad generis humani salutem confert ; ita necesse illi est , qui Regis dignitatem tueri cupit , vt nunquam in munere suo perfungendo commodum suum spectet ; sed ad publicam vtilitatem omnia studia vitæ dirigat.

Vnde concluditur , cum Regis nomine neque familiaris , neque domestici , nec amici , nec affinis , neque cognati , neque parentis denique nomen interdum coniungi posse. Si enim casus interueniat , in quo Regis officium deferendum sit , si ratio

de-

necessitudinis , aut propinquitatis habita fuerit; contemnendæ sunt omnes necessitudines, omnesque sanguinis conjunctiones aspernandas , naturæque sensus repudiandi ; aliter enim Regis nomen occiderit. Cogunt leges , & flagitat reipublicæ salus , vt contra domesticos , & propinquos , aut filios aliquid statuas , atque adeo alicui eorum necem inferas ; si familiaritatis aut naturæ illecebris emollitus de rectâ sententia depulsus es , jus humanum perfregisti , fidem & officium prodidisti , societatem humanam diremisti , nomen postremo diuinum impie atque nefarie violasti. Fuit enim apud te grauius amici atque propinqui, quam Regis, nomen , quod proxime ad dignitatem cœlestis numinis accedit. Quod si tantum valet apud te familiaritatis aut propinquitatis nomen , vt illius gratia Regis nomen despicias ; cole istam amicitiam , amplexare propinquos & affines , indulge liberis , fatereque non esse in te tantum mentis aut roboris , vt vel quid nomen Regis valeat intelligas , vel ipsius dignitatem tueri possis , & regni procurationem reliquo. Tolerabilius enim multo est spoliari fortunâ omnibus , quam tam insignem per-

fidia turpitudinem & infamiam subire. Quid? Ideo ne te populus in tam ampla dignitate locauit, & in Dei propemodum loco reposuit, vt salutem illius contra fidem datam proderes? Vt statum reipublicæ labefactares? Vt perniciem illis, qui te tanto honore prosequuntur, inferres? Perniciem enim infert reipublicæ, qui leges atque iudicia, quibus reipublicæ salus continetur, suorum gratia contemnit. Quæro deinde num opes istas ingentes, honores istos amplissimos, istam dignitatis excellentiam, homines isti, quorum gratia iura omnia conuellis, tibi detulerint? Non certe; populus enim est, qui a principio Reges creauit, qui te laboribus suis alit, qui tibi diuinos prope honores instituit, qui fidei tuæ salutem atque vitam credidit, qui tibi supplex est, qui te fide atque amore singulari complectitur. Quæ igitur causa est, cur illos euertas, a quibus omnia, quæ te magnum & excelsum reddiderunt, accepisti; vt illis indulgeas, qui tanta labe atque macula tuum nomen afficiunt? Iam illa nonnulla culpa tua est, quod eos in familiam tuam receperis, quibus existimatio tua cara non est; aut ita liberos insti-

tueris , vt esset tibi illorum gratia necesse
 leges patrias & instituta conuellere. Sed quia
 non semper ita felices sunt boni Principes ,
 vt non interdum in delectu hominum fallan-
 tur ; nec ita semper disciplina seuera esse po-
 test , vt effrenatam libidinem contineat ; il-
 lud certe officium illis necessario suscipien-
 dum est , vt nulla necessitudine impedian-
 tur , quo minus fraudem & flagitium & injuriam
 poenæ seueritate coerceant , vsque adeo vt no-
 liberis quidem suis parcant ; nihil enim ,
 quod iustitia vacet , debent sibi conjunctum
 arbitrari ; tamdiu igitur valeat apud illos
 vsus , & consuetudo , & communio sangui-
 nis , quamdiu leges atque jura permiserint.
 Vbi vero primum a suis jus , quod omnes
 tenet , contemni perspexerint , in illis po-
 tissimum exempla seueritatis statuunt ; vt
 planum fiat omnibus , nihil eis placere posse ,
 quod sit iustitiæ & æquitati contrarium : aliter
 autem & populum sibi commissum perdent ,
 & illis ipsis , quibus indulgent , plurimum
 nocebunt ; iniquitatis enim vulnus (quo nul-
 lum grauius esse potest) eorum animis in-
 flictum minime sanabunt ; & reliquos im-
 pupitate proposita ad facinus incitabunt , &
 ipsi

ipsi ignominia sempiterna maculabuntur , &
 ipsum Dominum , cuius vicem in terris ge-
 runt , grauiter offendent. Hoc autem in vni-
 uersum , quod jus diuinum , & humanum ,
 & vniuersa natura postulat , constantissime re-
 tinendum est , vt semper commune bonum
 priuatis commodis præferatur ; maxime vera
 cum publica fides interponitur. Vnde fit , vt
 iudex aut magistratus , qui vel commodi sui
 gratia , aut familiaribus atque domesticis suis
 morem gerat , publicam vtilitatem in aliquo
 negotio minime curat , & neglecta fide , quam
 dedit , & contempta execratione , qua se de-
 uinxit , jura transgreditur , non solum com-
 muni vtilitatis euersor , sed perfidiosus &
 Dei contemptor existimandus sit. Qui enim
 publicam personam gerit , nullam priuatam
 necessitudinem , quæ illum possit ab officio
 deducere , debet agnoscere ; aliter enim
 non solum erit in homines iniustus ; sed in
 ipsum Deum sceleratus. Quod si magistratum
 aliquis , cum aliquod aliud nomen in fun-
 ctione publici muneris agnoscit , præter illud ,
 quod illi publice obligata fides imposuit , im-
 pius & sceleratus est ; quid de Rege dicemus ,
 cum fuerit illi nomen aliquod nomine Regis
 anti-

antiquius? Nullum profecto scelus erit cum illius perfidia & scelere comparandum.

Sed quorsum hæc omnia a nobis afferuntur? Vt intelligatis plane quantum sit Regis nomen; nempe cuius magnitudine, claritate, & splendore, omnia nomina summæ namque necessitudinis obscorentur & euaneſcant; tantumque inter omnes, qui publicum aliquod munus gerunt, excellat, vt omnia ad illius amplitudinem referantur. Reliquum igitur est, vt hujus nominis ortum a cælo repetamus, quando e terris, vt videtur, oriri non potest. Diuinum siquidem est, non infecti gratia, non incendi cupiditate, non inflammari libidine, non labefactari amore, non denique vlla animi perturbatione a recta ratione & a mentis statu detorqueri. Diuinæ etiam benignitatis est, propriæ utilitatis obliuisci, & communi consulere. Diuinæ virtutis est, cupit obicere periculis, & rempublicam conseruare, infinitosque labores perpeti, & patriæ quieti atque tranquillitati prospicere. Vt autem vno verbo omnia complectar; non humanæ, sed diuinæ virtutis est, rempublicam vniuersam beatam efficere. Hoc enim Regi propositum est, hujus
tan-

264 DE REG. INSTITVT. ET DISCIP.

tanti atque tam præclari operis artifex est, & in eum finem omnia illius officia & studia conferuntur; vt respublica omnibus bonis, quæ vel ad corporis victum & cultum, vel ad animi statum & ornamentum pertinent, egregie cumulata sit. Hoc autem qui sine diuina quadam mente & ratione fieri posse credit, mentis expers habendus est. Primum igitur opus est, vt is, cui tantum atque tam præclarum munus incumbit, diuina sapientia præditus sit, sine qua nemo beatus esse potest; siue enim in sola virtute vita beata consistit, omnes virtutes complexu & gremio sapientiæ continentur; siue ad beatæ vitæ cumulum aliorum etiam honorum vsus requiritur, sapientia sola est, quæ rerum omnium rectum vsum & moderationem præscribit. Quod si cuilibet homini sapientia necessaria est, vt eodem, quo illum vis & impetus naturæ vocat, aspiret; quali tandem sapientia conuenit excoli & ornari Regem, cui hoc tantum munus assignatum est, vt non ipse solus ad beatam vitam perueniat, sed vt omnes, qui imperio illius continentur, beatæ vitæ compotes efficiat? Non mediocri quidem, sed singulari atque prope diuina.

Ne-

Neque hoc satis est ; parum enim iuuat re-
 ctum & verum intueri , nisi virtutis excel-
 lens & invictum robur insit in animo , vt
 id , quod mens honestum & vtile esse statuit ,
 diligenter & strenue peragatur ; si enim ho-
 mo acuto ingenio præditus , quidquid opti-
 mum factu sit , acute perspicit , id tamen
 implicatus metu exequi non audet ; tantum
 abest , vt ex ea sapientia fructum ferat , vt
 potius miseriam , in qua versabatur , am-
 plicet. Quid enim intelligentia calamitatis
 impendentis , quam non auertere audes ,
 acerbius ? Accedit ad maiorem miseræ cu-
 mulum , quod timor omnia multo graviora
 & acerbiora fingit , quam sensus experiundo
 percipit ; nihil enim est tam asperum , per-
 pessusque difficile , quod humana natura
 non perferat. Timor vero omnia intolera-
 bilia suspicatur ; sic enim sæpe fit , vt multo
 magis miseri sint , qui aduentans malum
 multo ante præsentientes extimescunt , quam
 qui illud idem patiuntur. Sensus enim præ-
 sentis acerbitatis aliquid interdum laxamen-
 ti habet. At timor animum assidue vexat &
 excruciat ; & vsus atque patientia malum in
 dies leuius efficit ; at timor quotidie omnia
 acer-

266 DE REG. INSTITUTE. ET DISCIP.

acerrime pauperum. Is igitur, qui beatus esse suadet, animo forti & inuictio sit necesse est; ut nullo metu impediatur, quo minus sit, quod velle & horribum fore perspicit, diligenter efficiat, & mente semper quieta atque tranquilla sit. Quod enim miserius & furentius, quam hanc virtute animi omnia dura & horribilia præsentire? Qui magno & forti animo non sunt, quo magis abundant ingentio, & acutius futura mala prospiciunt, eo citius & acerbius torquentur; omnes enim rumores extimescunt, & strepitus omnes exhorrent, & perpetuis curis afficiuntur, & tremunt, & pallent, & horribili pauore concutiantur. Quod si omnibus, qui ad beatam vitam enituntur, magnitudo animi comparanda est, multo certe magis Regibus, nempe, qui hoc susceperunt, ut animo maximo intestinam fraudem refecarent, & hostium ferociam inuicta virtute reprimerent, ut non ipsi solum quieto & securo animo sint, sed omnes, qui in præsidio illorum acquiescunt, sine vlla solitudine atque metu vitam degant. Nec enim pauca, nec mediocria pericula Regibus intenduntur; sed multa & graua, partim scelere intestino ciuium constata;

ta; partim ab externis hostibus injecta, quæ omnia sunt intrepide subeunda. Opus igitur est, ut sit animo maximo & inuicto præditus, & diuino quodam robore munitus; aliter enim nunquam animo consistet: tantum adest, ut a suorum animis metum, quo torquentur, abstergere aliquando possit.

Quantum vero decus honestatis; quantum specimen moderationis & ordinis; quantum dignitatis lumen eluceat opus est in eo, quem omnes intueri, quem imitari, ad cuius se exemplum effingere debent, est explicatu difficillimum. Quomodo enim aliorum libidines continebit, qui suas primum non continet? Poena, inquires, & supplicio coercebit eos, qui flagitium aliquod in se contra leges admiserint. Sed primum impudentis est, id in alio vindicare, quod ipse palam suscipis. Deinde nunquam solus metus reipublicæ statum firmo præsidio stabiliuit. Postremo officium vi atque minis expressum non potest esse diuturnum. Ut igitur sese quisquam ad aliquod tempus metu contineat, ubi primum spes celandi & occultandi oblata fuerit, inclusa atque vi compressa libido multo violentius erumpet, & omnia, quacum-

cumque tulerit impetum , immoderatione sua perturbabit. Princeps igitur , qui moribus ornare rempublicam statuerit , opus est , vt id non tam minis atque suppliciis a lege propositis , quam illustrissimis continentiz & moderationis exemplis efficiat. Quemadmodum enim corrupti Principum mores rempublicam inficiunt , & flagitioso exemplo contaminant ; ita Principum decus & integritas facile rempublicam a libidinis intemperantia (unde mala oriuntur) ad honestatis studium traducit. Videte igitur quantus splendor decoris & honestatis eluceat opus est in eo , qui non solum omnes animi sui partes contineri debet , ne dissideant inter se , turbulentisque motibus mentis elegantiam & decus euertant ; sed etiam id efficere , vt omnes , qui sub illius imperio sunt , illius dignitatem ament , & imitentur , & sint inter se sententia congruentes , & mutuo amore coniuncti ; quod sine diuina quadam Regis moderatione fieri nulla ratione potest. Non igitur intemperans , non iracundus , non leuis & inconstans , non libidinosus Regis officium tueri poterit villo modo ; sed continens , mansuetus , & moderatus , & grauis , tantisque

que honestatis ornamentis excultus, vt omnes admiratione sui commoueat ; & ad imitationem tanti decoris atque dignitatis alliciat.

Quid de iustitia dicendum ? In cuius studium omnes Regis curæ & cogitationes , omnes labores atque vigilæ , omnia denique studia consumenda sunt ; ea namque a principio Reges creauit , & ornavit , ad summamque amplitudinem decoris atque dignitatis euexit ; ea populorum vulnera sanat ; motus omnes comprimit ; pacem & otium cum dignitate constituit ; vires reipublicæ firmat ; opes & imperium auget ; Dei numen pie atque sancte veneratur. Nullum est enim sacrificium Deo acceptius , quam iustitiæ munus ; nulla gens , nulla ciuitas , nullus hominum cœtus , nulla postremo domus , sine iustitia potest salua consistere. Iustitia denique cælum terræ deuincit ; ima summis amore coniungit ; omnes mundi partes fœdere connectit : iustitiæ igitur vi & ratione fit , vt ex tam diuersis formis , vnica tamen lege atque vinculo colligatis , & inter se mirifice concinentibus , hic tantus & tam admirabilis mundi totius ornatus existat , ex quo tam multæ vtilitates oriuntur. Quid igitur esse
po-

poterit, vel ad fructum melius, vel ad decus & gloriam magnificentius, quam in terris rationem & ordinem, quo summus rerum omnium conditor & moderator cælum regit & temperat, imitari? Omnes igitur, qui cum iustitia vixerint, opus est, vt Deo egregie cari sint, opibusque diuinis augeantur; sunt enim Deo simillimi; contra vero, qui iustitiam violant, cum a Deo valde diffideant, necessarium est, vt sint illi odiosi & inuisi, & ab eo acerbissimis scelerum poenis agitati. Quod si omnibus, qui beati esse volunt, iustitia vince colenda est; multo certe magis Regi, cui hoc munus præcipue impositum est, vt non solum ipse iustus sit, sed vniuersam reipublicam iustitiæ ornamentis afficiat, & tamquam sol in mundo æquitatis splendorem longe lateque diffundat.

Quid hic fidem, mansuetudinem, liberalitatem, & reliquas iustitiæ comites oratione commemorem? Num fieri potest, vt Rex ille habendus sit, qui fidem frangit? Qui acerbus & nimis iracundus est? Qui avaritiæ studet, & pecuniam patriæ saluti, & ciuium omnium commodis anteponit? Nullo modo. Omnibus igitur his virtutibus

Rex

Rex excellat opus est, vt sit omnibus in illo egregium quoddam fidei atque probitatis exemplum ad imitandum propositum. Iis omnibus virtutibus accedat opus est acre studium, celeritas, & diligentia, sine qua nihil recte fieri, laudabiliter geri & administrari potest. Nec enim bonus colonus erit vnquam, qui non fuerit nauus & industrius, & rusticarum rerum studio vehementer incensus; sic etiam, qui pecuariam faciunt, nisi fuerint in ea diligentes & attentī, minimum certe fructum ex ea curatione percipient; opifices item, qui non de multa nocte vigilauerint, neque tota mente operi, cuius artificium tenent, incubuerint, quid possunt efficere, quod sit in eo genere aliquo pretio, & æstimatione dignum? Quid mercator ignauus; num magnum aliquod lucrum facere aliquando poterit? Quid miles, si piger & segnis extiterit, quam laudem fortis & strenui viri consequetur? Iam vero tota laus imperatoris in mira celeritate, vigilantia, & industria posita est; nisi enim vigilauerit, & laborauerit, & aciem mentis in omnes casus intenderit, & hostium consiliis occurrerit, & militaria etiam munera per se multis in locis ob-

erit;

erit ; nunquam sibi magnum decus & gloriam comparabit.

Quid dicam de studiis artium maximarum ? In quibus nemo vnquam progressus est sine singulari studio , diligentia , & alacritate. In diligentia igitur omnium artium , & disciplinarum , & officiorum laus & (vt ita dicam) vita consistit. Si enim diligentiam remoueris , jacebunt omnia , & quasi veteruo consopita in tenebris & caligine delitescent. Est enim otium , inertia , & lentitudo tacitum quoddam venenum , quo paulatim omnes virtutes infectæ languent , & laudes intereunt , & artes omnes præclaræ in obliuionem adducuntur. Sed illud est animaduertendum , cum diligentia in omnibus artibus , ad vtilitatem communem inuentis , tam necessaria sit , quo clariores illæ sunt , eo acriorem diligentiam requiri. Recte igitur Demosthenes asserbat se molestissime ferre , quoties opificum antelucana superabatur industria : illi namque victus quotidiani causa laborabant ; Demosthenes vero omnem laborem in sempiternæ gloriæ studio , & in reipublicæ salute consumebat. Cum ergo in multo maiore arte versaretur , & longe maiorem

rem fructum sibi proponeret, sapienter iudicabat, multo acrius esse sibi, quam fabris omnibus vigilandum. Si igitur constat omnium artium vim diligentia contineri, & quo ars præstantior est, eo acriore studio & diligentia colendam esse; nullamque in rebus humanis esse cum artis regię claritate & amplitudine conferendam; constat certe a nullo artifice tam acre studium, tantamque industriam atque diligentiam jure atque merito postulari. Sapienter Homerus:

Fas non est Regi tota sub nocte soporem

Carpere, cum tanta curarum mole prematur.

Præclare igitur Epaminondas. Cum enim Thebani diem festum agerent, vinoque soluti sine vlla cura jacerent, Epaminondas solus vigilabat, & armatus concursabat; quam rem agis, (inquit quidam illi familiaris) tu solus publicę voluptatis expers eris? Ita sane, inquit ille; meum namque officium est vigilare, ut ciues mei securi dormiant; & a vino abstinere, ut illi sine vlllo metu perpotare valeant. Præclara certe vox, & tanto Principe digna; intellexit enim vir ille summus, nihil esse magis Principis officio consentaneum, quam summam in munere suo

perfungendo alacritatē; & vigilantiam; nihilque magis omnem Principis dignitatē deformare pōsse, quāsi somnum atque desidiam. Quid enim foedius & flagitiosius, quāsi dum fabri, dum agricolæ, dum mercatores vigilant, solum Regem dormire? Quid enim? Num in maiore & clariore arte versantur? Num gradius & difficilius munus exequuntur? Num maiora illos pericula circumvallant? Num cum maiore hominum pernicie delinquant? Num postremo clarus & amplius sibi laboris sui præmiū proponunt? Non certē. Quid igitur indignius, quāsi eo tempore, quo homines humiles & obscuri, omni plerumque metu liberi, pecuniae tantum gratia somnum capere non possunt; Regem, cui tantum onus impositum est, & quem tam multa pericula circumstant; qui hoc in se recepit, ut rempublicam ab omni calamitate tutam & incolumem conservaret, & omnibus vobis copiosam & opulentam redderet; & cui sunt immortalia, si rempublicam bene gesserit, præmia constituta, ad multam etiam diem somnum producere? Itaque hoc positum sit, & quasi quoddam publicum decre-

lum in mente defixum remaneat ; cum pigritia omnibus turpis sit, tum Regi maximam labem turpitudinis afferre, & flagitii sempiternam maculam ; quæ nunquam deleri possit, inurere. Vt enim aliud nihil dicam, quid flagitiosius fingi potest, quam magis amari pecuniam ab avaro, quam a Rege regnum ? Amor enim operibus indicari solet ; cum igitur avarus, ut pecuniam infinitam conciliet, quietem pati nequeat ; cum dies atque noctes, ut cupiditatem nefariam expleat, elaboret ; cum multis etiam se periculis exponat ; quid esse potest indignius, quam Regem non regni tuendi cupiditate multo acrioribus stimulis iacitari ? Satis enim demonstrabit, si piger contulerit, se regni opes negligere, & patriæ minime debitam voluntatem persolvere.

Tria autem sunt, quæ Regis diligentiam excitare possunt, quibus si caruerit, erit Regis nomine prorsus indignus ; nempe fides, patriæ caritas, & religionis studium. Fides mentem omnem vitam continet. Si enim nemo sit in vita, cui vel pecuniam, vel salutem, vel dignitatem credamus atque committamus ; si nemo, cui arcana nostræ mentis aperiamus ; si semper nobis insidias fieri suspi-

cabimur ; vitam odiosam & infestam agemus , & assiduis curis atque molestiis afflictabimur. Cum igitur multa scelera passim ab improbis hominibus suscipiantur , nulum tamen est perfidia magis tetrum , infestum , acerbioresque supplicio vindicandum ; communionem enim tollit e vita , officiorumque vicissitudinem & animorum securitatem ; quibus sublati nihil relinquitur , quamobrem quis velit vivere ; mori enim multo satius est , quam in metu perpetuo , & in assidua curarum acerbitate versari. Nihil igitur est iis , qui dignitatem & officium tueri volunt , & infamiam sceleris extimescunt , maiore studio , cura , & sollicitudine colendum , quam fides. Quo autem res illa , quæ creditur , præstantior est , eo diligentius est fides præstanda ; nihil autem maius est , quam salus hominum ; quam ciuitatum status , quam nationum tutela atque patrocinium ; a nemine igitur fides maiore studio & sollicitudine colenda est , quam a Regibus ; nempe quibus innumerabilium hominum salus credita atque commissa sit. Cum igitur Rex animo cogitauerit , quantum negotium sibi delatum sit , quantam prouinciam susceperit , quantam

tum onus sustineat , quomodo totius reipublicæ status vigilantia illius innitatur , dormire certe non poterit ; si enim qui pecuniam debet , & non omnem pudorem amisit , cum soluendo præstituta dies appropinquat , sollicitus est , quomodo fidem suam liberet ; ne , si ad diem non soluerit , quidquam de existimatione deperdat ; quid Regi faciendum existimamus , qui tantis debitis obstrictus est , ne , si id , quod debet , minime dissoluerit , infamiam sempiternam subeat ? Debet enim patriæ curam , sollicitudinem , vigilantiam ; debet singulare & eximium communis salutis studium ; debet firmissimum vitæ præsidium , munitissimumque ad pericula repellenda propugnaculum. Si igitur fidem sibi sancte colendam existimauerit , & perfidiæ ignominiam pertimuerit ; ea cura fatis illius diligentiam incitabit ad omnia munera pro patriæ salute alacriter exequenda.

Quid de caritate dicam ? Amor enim acuit ingenium , stimulos admouet , alacritatem incitat , rebus indormire non patitur ; at boni ciuis , & sapientis hominis est , caritatem patriæ priuatis necessitudinibus anteferre. Patriæ enim institutis & legibus in lucem

cem editi, & humanitatis disciplinis excul-
ti, & ad omnem rationem officii eruditi su-
mus; illa nobis parentes, illa cognatos, illa
amicos donauit; illius beneficio non modo
vitam, sed humanitatem retinemus; illa de-
nique omnes rationes sanctissimæ necessitu-
dinis ambitu suo complectitur; illa inco-
lumi permanente, nostra bona omnia facil-
lime tuemur; illa euerfa, concidimus & omni-
bus bonis euertimur: merito igitur ab omni-
bus bonis sanctissima quædam mater habet-
ur, pro qua vitam ponendam censent. Quod
si quilibet homo priuatus maiorem carita-
tem debet patriæ, quam propinquis, quam
liberis, quam parentibus; ita vt vitam pro
illius salute profundere in summa quadam
atque sempiterna gloria ponatur; quid Re-
gibus faciendum est, cum sint ab illa fam-
mis honoribus ornati & amplificati, & in
cælestium numero quodammodo repositi?
Quamuis autem omnia studia in illam cou-
ferant, nunquam tamen quidquam de cari-
tatis studio remittent; quia intelligent nun-
quam se illi parem gratiam relatu-
ros. Præ-
terea, quemadmodum artifices excellentes
operibus suis delectantur; ita Rex in omni
ge-

genere virtutis excellens , quo magis rempu-
 blicam conseruauerit , adiuuerit , auxerit ,
 eo ardentius illam amabit ; fieri igitur non
 poterit , vt non excubet , vigilet , laboret , pe-
 ricula subeat , omnesque pro illa contentio-
 nes impigre suscipiat , & mortem etiam (si
 fuerit opus) libenter oppetat. Iam vero re-
 ligio illum tantum munus negligenter obire
 minime sustinebit. Intelligit enim is , qui pu-
 te & caste religionem colit , nihil esse Deo
 acceptius , quam pro omnium salute labores
 ingentes excipere , atque , cum id communis
 utilitatis ratio flagitauerit , propriam vitam
 patriæ largiri. Cernitis ne jam animo quan-
 tum , & quam excelsum hoc munus sit ?
 quam sanctum , & quam augustum Regis no-
 men ? Quam diuinis virtutibus exaggera-
 tum ? Nec enim cum mediocri virtute res
 tanta suscipi potest. Diuina siquidem sapien-
 tia , admirabili quadam mentis altitudine ,
 excellenti modestiæ concinnitate , cælesti justi-
 tiæ splendore , summa fide , summa caritate ,
 incredibili vigilantia , studio , & industria
 opus est ad tantum , tam præclarum , tamque
 diuinum munus obeundum. Diuinum , mi-
 hi credite , munus est , idcirco non humana-
 vir-

virtute , nec humanis opibus , sed diuina virtute atque diuinis opibus efficiendum. Est igitur Rex , si officio suo fuerit cum laude perfunctus, quasi quidam Deus in terris , singulari cultu & veneratione dignissimus. Appellat Homerus Reges pastores populorum ; eosque Iouis fatu procreatos esse dicit. Vtrumque præclare. Nec enim armentorum, aut pecudum pastores tauri aut arietes sunt, sed homines ; quantum igitur homines brutis animantibus , quorum curam gerunt , dignitate præstant ; tantum consentaneum est , vt Reges ipsis hominibus , quos regendos atque pascendos suscipiunt , antecellant ; qui autem tantum inter reliquos homines excellunt , diuini profecto habendi sunt ; non igitur immerito Homerus Regum genus ad Deum reuocabat. Vnde sequitur nihil esse magis regium , quam studium religionis , & sanctitatis ; Regis enim virtus a Deo emanauit , & idcirco ad illius cultum & gloriam est ardenti studio præcipue referenda. Sed de religione alio in loco differemus, nunc vero quod instat persequamur.

Cum igitur Regibus omnes istæ virtutes , quas recensui , ita necessariæ sint , vt sine

ne

ne illis non possint vllō modo officio suo satisfacere ; sequitur , vt omnis eorum institutio sit ad eas parandas accommodanda. Quod quidem plerumque non fit , immo contra multi dant operam , vt ne mediocris quidem virtus in illis emineat ; vmbatilis enim & delicata vita non virtutem , sed ignauiam ingenerat ; & cum regius luxus , & opes immodicæ , & amor insitus in natura , tantis lenociniis atque blandimentis excitatus , multis errorem pestiferum obijciat , & indolem virtutis obruat , & extinguat ; ita vt contra hanc temeritatem & insaniam sint animi Principum præclara quadam institutione fulciendi , & firmissima rationis præsidia comparanda ; longe tamen secus fieri solet. Accedit enim impulsus hominum perditorum (comitatus , vt diximus) qui per summum scelus teneri Principis imbecillitatem occupat , omniaque præsidio humano atque diuino nudat , illumque multo magis temerarium , & insanum , & arrogantem , & infestum efficit , quam ipse sponte sua fieri potuisset : non solum igitur non errore vllō liberatur ; sed in fraudem multo magis pestiferam eorum insidiis impelitur.

Nunc

Nunc igitur, inquit T., videre cupio, quod tandem remedium his malis adhibeas,

Non quidem, inquam, aliquod nimis reconditum & exquisitum; sed id quod cuius in mentem venire possit.

Eo, inquit T., maiorem a nobis gratiam inibis, si remedium non salutare solum, sed facile & expeditum attuleris.

Quam salutare id, inquam, sit, postea apparebit; quam facile vero, statim iudicabit. Quæro enim a vobis, si ægrotus, qui se se medico parum sapienti sanandum tradiderit, morbo minime se levare senserit, imo illis ipsis remediis, quæ medicus imperitus adhibet, morbi vim augeri perceperit, quid faciendum censeatis alteri medico, qui illi primo succeferit? Ego quidem arbitror curationem esse illi prorsus immutandam, contrariisque remediis damnum, quod prima illa remedia fecerant, resarciendum. Vobis si aliud videtur, aliam magis exquisitam rationem considerate.

Non ita sumus, inquit T., in medicina versati, ut aliam viam commodiorem excogitare possimus; sed, quorsum hæc pertineant, intelligere cupio.

Iam

Iam, inquam, intelliges. Tenetis ne memoria quam multa diximus de molli & effeminato Principum cultu? De mulierum deliciis atque blandimentis, quibus illos enervant? De adulatorum malitia & improbitate, qua Principes obsessos tenent, ne possit unquam ad illos probitatis atque virtutis lumen intrare.

Tenemus, inquit, omnia: quid deinde? Hanc quidem, inquam, instituendi Principis rationem minime probandam existimatis; sed tamquam tetram, & odiosam, & peltilentem rejiciendam censetis. Nos vero: inquit ille, Reliquum igitur, inquam, est, ut contraria remedia huic tanto malo comparemus; ut sic tandem experiamur, an morbus hic depelli hac tam facili ratione possit.

Experire igitur, inquit T., ut sic tandem quid magis rectum & salutare sit judicemus.

Non longius, inquam, faciam, hoc tamen imprimis animadvertendum est, in omnibus artibus tradendis esse diligenter naturam illius, quem erudire volumus, explorandam; ut enim quisque in genere aliquo disciplinæ ad summam laudem perveniat tria necessaria sunt; natura primum, deinde
ars,

ars , postremo studium , & usus assiduus. Plurimum enim refert , quali quisque ingenio præditus sit. Ingenium vero nisi certa quadam via & ratione dirigatur , quo maius extiterit , eo confidentius ruet , maioremque significationem temeritatis & inscitiae dabit. Ratio vero , & ars atque disciplina sine studio atque moderatione est prorsus inutilis: hoc tamen intelligi oportet , vix inueniri tam hebes & tardum ingenium ; quod non arte institui , & vsu atque meditatione acui & ex-poliri aliqua ratione possit ; qui tamen ingenio maximo est , multo facilius discit , & multo citius ad perfectionem artis peruenit , & multo maiorem , & uberiores fructum de arte , in qua sibi elaborandum putat , studio & meditatione consequitur.

Vt igitur de ingenio atque natura Principis , qualis optanda sit , in principio differamus ; volo equidem , vt sit ingenio vehemens , & acer , & curiosus , & memoria firma præditus ; qui multa quærat , multa peruestiget , multa scire desideret , & omnia , quæ audierit , in animo infixæ contineat. Sit deinde præter modum laudis appetens. Non enim in puero virtutis perfectionem , sed virtutis ma-
te-

nam quærimus. Quo autem animus naturalius ardentius laudem expetit, eo temperatio-
 e, quam recta ratio sancit, adhibita maiores
 honestatis fructus percipiet. Modus autem,
 qui seruari in gloriæ studio debet, est animum
 vehementem multis in locis refrenare, & extin-
 guere languentem. Facilius autem est ani-
 mo vehementi & impigro modum constitui,
 quam ex animi tarditate celeritatem incitari;
 malo igitur Principem, qui freno, quam qui
 stimulis indigeat. Sit deinde verecundus. In
 hac enim natura maxime viget honestatis &
 laudis appetitus, & infamiæ metus, & turpi-
 tudinis acris offensio. Volo etiam illum in-
 terdum ira paulo vehementius commoueri;
 magnum enim languoris & lentitudinis ar-
 gumentum est, non acriter interdum irasci;
 vix autem fieri potest, ut, qui animo lento
 est, acer in scelere vindicando sit, aut im-
 pigre & animose bellum comparet. Sit dein-
 de lenis atque flexibilis, & ad morum di-
 sciplinam docilis, & ab omni suspitione per-
 uicaciæ & obstinationis alienus; nulla enim
 bona spes de illo Principe concipi potest, qui
 animium sui juris est, & in opinione, quam
 semel recipit, animo ita obfirmato perseue-
 rat,

rat, vt ab ea nulla ratione deduci possit. Possremo optandum etiam est, vt sit natura clemens atque benignus, & magis ad lenitatem & mansuetudinem, quam ad iracundiam & acerbitem propensus; clementia enim, & mansuetudo, & liberalitas, & reliquæ virtutes, quæ ex natura clemente oriuntur, Regem maxime decent, & amorem suorum conciliant, ipsumque Principem Deo similitimum faciunt. In primis autem danda opera est, vt Regem habeamus ex egregia animi magnitudine, & singulari modestiæ laude temperatum; aliter enim nec illum hostes metuent, neque ciues amabunt; magnitudo enim animi sine moderatione furor inhumani est, & odium acerbum concitat; moderatio vero sine animi magnitudine negligentia quædam est, & dissolutio, & ideo non sine ratione contemnitur. Vt igitur neque Rex odio haberi a suis possit, nec a perditis hominibus merito contemni, vtrumque necesse est; vt modestus atque temperatus sine vlla suspitione timiditatis, & fortis atque magnanimus sine vlla temeritatis infamia sit; harum autem duarum virtutum indoles atque materia in laudis appetitu, & in ignomi-

miniz metu posita est. Appetitus enim laudis animum maiorem & altiore facit ; metus autem ignominiz pudorem & verecundiam confirmat. Hinc autem omnis causa rectissimæ voluptatis , atque iustissimi doloris exoritur. Qui enim id assequitur , quod vehementer optabat , in voluptate sit necesse est ; & qui incidit in id , quod metuebat , dolore etiam necessario cruciatur ; sic igitur fit , ut , qui natura magnanimus atque verecundus est , laudis incredibili voluptate capiat , & ignominia atque dedecore mirum in modum crucietur ; voluptatis autem cupiditas sic est in nostris animis insita , ut euelli nequeat ; sic etiam doloris metus in nobis insidet , ut deimi non possit ; hoc tamen ratione & disciplina fieri potest , ut futilis & inanis voluptas alterius voluptatis compensatione respiciatur ; & dolor etiam corporis maioris doloris metu constanti animo toleretur ; id igitur perficiendum est iis , qui Principis instituendi curam suscipiunt , ut nullam voluptatem corporis laudis & gloriæ illecebris anteponant ; nullum dolorem corporis magis , quam ignominiam & dedecus extimescant. Sic enim fiet , ut omnis illorum cura & studium

dium in honestate paranda atque fruenda consumatur ; & illius colendæ atque retinendæ gratia mortem etiam , & omnem corporis cruciatum pro nihilo habendum putent.

Sed antequam de institutione animorum plura dicam , aliquid etiam est de corporum constitutione dicendum. Nec enim tutum est virtutem corpori ægro & imbecillo committi ; multæ namque atque præclaræ virtutis functiones corporis ministerio sustinentur. Persæ quidem olim aliquid cæleste atque diuinum in Regibus inesse statuebant ; & ideo enixe operam dabant , ne quid in eorum forma & specie deforme & indecorum appareret ; siquid igitur in Regum filiis erat prauum atque distortum , dabatur ea cura certis mulieribus , quæ , dum corpora erant tenera , & emendari poterant , ea quodam modo fingerent , & ad rectitudinem sensim atque leniter reuocarent ; indignum enim censebant , Regis nomen , apud illos sanctissimum , aliqua corporis insigni prauitate deformari. Æthiopes olim , qui supra Ægyptum habitabant , eum Regem eligebant , qui omnibus proceritate corporis anteiret. Ius enim esse statuebant , vt is tantum omnes dignitate

tate vinceret , quem natura specie & magnitudine præcellentem finxisset ; cum autem animi magnitudinem intueri non possent , ad corporis magnitudinem oculos referebant. Ne Spartani quidem ab hac Æthiopum opinione nimis abhorrebant ; cum enim Archidamus illorum Rex vxorem pusillam duxisset , eum grandi pecunia mulctarunt , quod illam mulierem sibi matrimonio copulasset , quam sperare poterat , filios statura pusillos esse parituram ; indignum enim Spartano imperio judicabant , eum Regem habere , qui non corporis etiam magnitudine & dignitate nomen regium tueretur. Quamuis autem parum referat ad Regis officium , quantum Rex vel corporis specie , vel magnitudine præstet ; in hoc tamen laudandi erant , qui in Rege pulchritudinem vel proceritatem requirebant , quod judicabant in Rege nihil deforme & indecorum , aut paruum & angustum esse tolerandum. Si igitur illos id in Rege offendeat , sine quo Rex officium suum facile administrare potest ; quanto vobis diligentius animaduertendum est , ne aliquid sit in Regis corpore , quod illum a munere suo fungendo remoueat. Quamuis enim

Rex sit statura pusillus , qualem Homerus Tydæum fuisse memorat ; aut parum specie venustus , qualem multi Herculem fuisse fingunt ; non ideo minus hominum expectationi respondebit. At si fuerit imbecillus , & infirma valetudine præditus , nullo modo regni pondus sustinere poterit. Præterea corpus pusillum nullius industria crescere , neque facies deformis fingi denuo potest ; at bona valetudo , & corporis etiam robur est plerumque in manu nostra positum ; possumus enim facillime ab immodicis cibis abstinere , & corporis vires labore & exercitatione confirmare. Si placet igitur a lautissimis mulieribus , & ab hominibus vrbanissimis summa ope contendamus , ne Regem nobis mollissimo cultu debilitent ; non enim ignoratis , quantum momenti sit in omni rerum initio atque fundamento ponendum ; qualia namque sunt rerum principia , tales plerumque exitus consequuntur. Videamus igitur an impetrare possimus ab illis , ne nobis Regem cibis inferciant , ne fragrantissimis odoribus & vnguentis emolliant , ne immodicis deliciis & blandimentis effeminent ; & eum sole colorari , & labore etiam paulatim

im durari sinant. Non sum adeo inhumatus, v^t velim Principes nasturcio illo vesci, quod erat olim (vt apud Xenophontem) Perarum filiis obsonium; non tam exquisitam unctionem roboris atque sanitatis habeamus; nemus aliquid moribus, indulgeamus aliquid tempori, muliebri imbecillitati aliquid tiam condonemus; ea tamen lege, ne tantum operæ & studii in Rege saginando consumant; non enim pullum anserinum, sed si publicæ custodem nutriunt. Ciborum autem redundantia cruditatem efficit, vires deilitat, aciem mentis obtundit, languorem nimis affert, desidiam, ignauiam, stuporem, tarditatem ingenerat; atque postremo itam breui temporis spatio consumit; si igitur nobis opus est custode atque defensore uno atque valente, & ad mala præcauenda agaci, & ad pericula propulsanda magnanimo; quid minus conuenit, quam eam adhiberi educationem, quæ morbos innumerabiles corpori, & tarditatem animo inferat, & quod longe miserius est, Principem insigni nominia deformet. Nihil est enim foedius: flagitiosius Principe ructante, oscitante, auscante, somno desidiaque languente. Cen-

sed etiam ad voluptatem necessaria est ; nulla enim voluptas extare potest , nisi labor antecedit ; nec enim cibus erit iucundus , nisi fames antegressa sit ; neque ex potu voluptas vlla capitur , antequam antecedit sitis ; extincta enim fame atque siti , comedendi etiam atque bibendi voluptas extinguitur. Quia vero quam potest afferre voluptatem , nisi prius corpus vel saltu , vel cursu , vel palestra , vel ambulatione , vel quouis alio labore exerceatur ? Et , ne omnia persequar , omne genus voluptatis desiderio præcedente conficitur. Darium illum , quem Alexander Magnus bis acie superauit , cum ex fuga defessus aquam lutulentam & cadaueribus inquinatam biberet , dixisse ferunt , se nunquam in vita bibisse iucundius ; numquam enim bibendo sitim depulerat , quam videlicet numquam expectarat. Vnde colligitur omnes , qui in summa rerum affluentia vixerint , si fuerint intemperantes , nullius voluptatis participes esse posse. Præterea cum res humanæ non semper eodem statu maneant , eueniet fortasse aliquando , vt Rex cogatur labores ingentes excipere ; qui certe erunt intolerabiles ei , qui ita fuit a primis incunabulis institutus ,
vt

vt nullum laborem sentiret , nullam injucunditatem perciperet , nulla , ne minima quidem , molestia afficeretur ; omnes enim labores consuetudine leues , & faciles , & jucundi fiunt ; at otiosis & delicatis asperi sunt , & perpeſſu difficiles , nec vſlo modo tolerandi ; ſi Rex igitur vmbraſilis & delicatus fuerit , non ſolum nullam voluptatem percipiet ; ſed intolerabili etiam dolore interdum cruciabitur. Poſtremo intelligendum eſt , beatam vitam non in ceſſatione , nec in otio iſto , quod homines quidam omni ſtudio perſequuntur , ſed in honeſtis laboribus eſſe collocandam ; eſt enim humana natura quietis impatiens vſque adeo , vt ſi nobis omnia ad vitam ſuauiſſime degendam ſuppetant , ita tamen vt non liceat nobis aliquid agere ; id mortis inſtar eſſe putemus , quod quidem in pueris facillime apparet ; motus enim ſemper liberos requirunt , & huc & illuc curſitant , & ludis laborioſis oblectantur , a quibus auocati querelis & plorabitis oſtendunt , ſe non tantam ex ceſſatione , quantam ex labore voluptatem percipere. Vultis igitur experiri num his argumentis mulieres elegantes , & homines etiam lautos in veſtram ſententiam tradu-

ducatis, illisque persuadeatis, ne Regem nobis multis deliciis emolliant; sed ad omnem laborem iucunde perferendum instituant?

Quibus, inquit T.

Illis, inquam, quæ vel ad sanitatem & vires, vel ad speciem & pulchritudinem, vel ad perfruendam voluptatem pertinent. Illa enim, quæ de cura, vigilantia, sollicitudine (quam Reges debent in communi salute tuenda suscipere) dicta sunt, ad illorum animos minime permanabunt: ostendite igitur illis istam rationem, quam excogitant Regis enutriendi, esse illorum rationibus valde contrariam; illa namque valetudinem Regis affligi, speciem deformari, voluptatem corrumpi, materiamque multis minime ferendis doloribus inconsideratissime præberi,

Hæc quidem de corporis exercitatione dicenda prius arbitratus sum; nunc ad animi cultum redeamus. Hic quanta sit adhibenda cura & deligentia, quanta vigilantia, quantis precibus Dei numen, & quanta religione placandum, nemo consequi dicendo poterit: ut enim agricolæ in teneris plantis omnem diligentiam consumunt, postquam vero arbores exurgunt, & grandiores fiunt,
mul-

multum de studio colendi remittunt, quia vident illas jam se ipsas facile trunci robore & firmitate tueri; ita qui hominum culturam suscipit, quamdiu teneri animi sunt, & faciles ad opiniones, quas in illorum mentibus inferere velis, accipiendas; omni tunc studio, & diligentia in illis colendis, & rectissimis opinionibus imbuendis, intentus esse debet; postquam vero virtus adulta fuerit, verissimæque laudis suauitatem gustauerit, tanta cultura non indiget; ipsa namque honestas per se suis illecebris inuitata crescit, & fructum reipublicæ salutarem profert. Et in reliquis quidem pueris instituendis non ita multum refert, qualis illorum cultus atque disciplina sit, & illorum cupiditates multo facilius tenentur; non enim tam multæ insidiæ contra illos comparantur, & eorum libido non ita facile potest ad perniciem reipublice totius erumpere; at in Regis virtute omnis reipublicæ florens status atque beatitudo consistit, & multo difficilior est illius animum regere, cum opibus summis effertur, & adulatorum insidiis oppressus sæpe numero sit; & illius libido, cum plerumque immanis & infinita sit, rempublicam perturbet,

bet , atque labefactet. Nec enim Reges , cum delinquant , mediocriter delinquant : quo enim potentia maior , & licentia solutior est , eo cupiditas illorum violentius feruit , & maiorem bonorum omnium stragem efficit ; si igitur , vt ante diximus , ad populum regendum atque moderandum summa sapientia , singularis continentia , admirabilis virtus , & summa laus æquitatis & iustitiæ cum industria summa requiritur ; nec enim mediocri virtute , neque mediocri diligentia tantum munus obiri atque sustineri potest ; quid euenturum suspicamur , cum summa temeritas , & iniustitia , cum summa decoris totius negligentia & obliuione in animum Regis inuaserint ? Neceffe profecto est , omnia tunc permisceri , atque perturbari , & indignissima clade consumi. Nihil est igitur in tanta re negligenter , nihil dissolute gerendum ; nullum enim mediocre erratum in primis regis disciplinæ rudimentis committi potest ; multa enim in principio leuia atque ludicra putantur , quæ tandem magnum malorum omnium pondus cum multis lacrimis important. Nec enim cogitandum est , quam parum reipublicæ nocere possit Regis pueri

negligenter educati flagitium ; sed quantam pestem sit illa Regis libido , postquam adoleuerit , allatura ; quo igitur munus est amplius , & insidiæ plures , & periculum grauius ; eo diligentius instituendus , fingendus , & informandus , & ab omni turpitudinis contagione custodiendus est. In primis igitur ex omni republica homo grauis , & sapiens , & omni virtute ornatus eligendus est , qui illius affectiones regat atque moderetur. Is autem in eo industriam suam consumat , vt in Rege puero , quantum fieri potest , indoles virtutis & moderationis emineat. Sæpe enim jam diximus omnem , qui vir magnus futurus est , his duabus virtutibus , nempe animi magnitudine , & modestiæ laude , in primis ornandum esse. Cum autem omnis immoderata cupiditas tribus modis frenanda sit , nempe timore , lege , atque disciplina ; & puerorum ætas tenera non possit legibus alligari ; disciplina vero robustiorem etiam animum , & ingenium cupiditate maximarum artium incensum desideret ; reliquum est , vt pueri solum metu contineri debeant. Metus autem et duplex est , vnus dedecoris & ignominie , alter doloris & acerbitatis ; vterque autem me-

metus est , cum opus ita fuerit , obijciendus ; opera tamen danda est , quantum fieri potest , vt Regum filii non tam virgarum , quam ignominiz metu coerceantur. Doloris enim metus , cum extra modum procedit , frangit atque debilitat animi vim , & a studio dignitatis abstrahit ; metus autem ignominiz continet indolis excellentis indicium.

A principio igitur sic Principes institui cupio , vt raro virgarum formidine , sepiissime autem infamiz timore a flagitio reuocentur ; cum vero simus omnes natura ad voluptatem propensi , maxime autem pueri , omnis eorum disciplina , quantum illius ratio patitur , est voluptate condienda ; ea autem ratione *παιδια* a Græcis appellatur , a Latinis item ludus , illa puerilis institutio , quia per ludum quodammodo traditur & inculcatur , vt facilius in eorum animis imprimi & & insculpi possit. Quod quidem eo diligentius in Principum institutione faciendum est , quo eorum fastidium est magis delicatum ; ita vt maiore quodam artificio sint in officio continendi ; vt igitur doctores (inquit ille Poeta summus) crustula blandi dant pueris , elementa velint vt discere prima ;
ita

ita Regum filii dulcedine laudis alliciendi sunt , vt velint facilius ad officium paulatim institui. Ad hunc etiam modum sunt ignominiae timore a flagitio deterrendi ; is tamen modus seruandus est , ne vel nimia laude inaniter efferantur , vel nimia vituperatione frangantur , & spem dignitatis abjiciant. Nec enim arrogans & insolenter elatus , nec abjectus atque demissus animus poterit vllomodo in regia dignitate versari ; omnis igitur institutio ad regiam dignitatem & amplitudinem conferatur. Quemadmodum igitur (vt ante diximus) pueris , qui opifices futuri sunt , vtile est illis ludis oblectari , quibus ad artem illam percipiendam magis prompti & expediti sint ; sic etiam , qui Rex futurus est , in pueritia ludendo discat æquitatem , discat liberalitatem , discat modestiam , discat virtutem , & aliquod honestum certamen inecat , ex quo laudem aliquam sibi vindicare conetur. Caueatur autem diligentissime ne fabulas quidem audiat , quæ ab hoc instituto nimis abhorreant ; sed omnes ita composita sint , vt ex illis etiam intelligat injuriam & iniquitatem esse rem tetram , odiosam , & detestabilem , sempiternoque supplicio vindici-

dicandam. Petulans & obscænum verbum ex ore illius non exeat; imo, cum alios obscæne loqui perspexerit, id indigne patiatur. Ad quod quidem multum refert, quales sint nutricis mores. Vellem equidem in omnibus naturæ instituta seruari, quæ non minus Reginis, quam reliquis mulieribus binas mammæ attribuit, quibus filios, quos partu ediderunt, sui lactis vbertate sustentarent; sed quando tantum deliciæ atque perditæ mores potuerunt, vt non Reginæ solum, sed omnes ferme honestæ mulieres illud dulcissimum matris nomen potius mallent cum aliis mulieribus communicare, quam laborem aliquem in nutriendo suscipere; id saltem cauetum est, vt non ea nutrix sit, quæ verbum petulans & obscænum efferre minimè vereatur. Id enim, quod primum puer infans arripit, perpetuo in illius animo infixum permanet. Quod si praua consuetudine infectus obscæne loqui didicerit, multa etiam cum obscenitate & impudentia geret. Loquendi enim consuetudinem mores & instituta vitæ sequuntur; leue namque & tolerabile flagitium illud videtur, quod in ore frequenter habemus.

Et

Et quamuis nullum aliud incommodum ex hac sermonis obscœnitate proueniret , quam pudoris interitus ; id tantum malum est , quantum verbis explicari non potest. Ammisso enim pudore , totum etiam studium dignitatis & honestatis extinguitur ; ad pullorem autem conseruandum illud est etiam utilissimum ; vt non solum parentes summa pietate colat , & eorum offensionem valde vereatur , neque solum magistrum & pædagogum metuat ; verum etiam senes auctoritate & prudentia graues in honore habeat ; & , ne in illorum offensionem incidat , se multis in locis a concessis etiam jocis absteineat. Præclare enim illud , quod est apud Xenophontem. Itaque enim Cyrum Magnum , cum mors instaret , loquentem cum filiis inducit , vt cum eos multis verbis ad omnem virtutem erudiret , tum præcipue illis studium pudoris & modestiæ commendaret. Ait enim : Patriis quidem institutis & moribus sic institutus sum , vt semper natu maioribus , non fratribus solum , sed omnibus ciuibus cederem via , sede , atque sermone. Similiter autem , o filii , sic vos a primis annis institui , vt ii , qui vobis antiquiores essent , vos etiam ho-

honore præcederent ; iisque tantum vos præpositos esse putaretis , qui vobis iuniores essent. Non igitur nouum aliquid & inusitatum vobis præscribo , sed antiquum morem , & publice receptum , atque legitimum. Hæc quidem Cyrus ille (qui virtute sua a paruis initiis ad tantam amplitudinem peruenit , vt imperium suum extremis Asiæ terminis definiret ; & cui Sanctæ Literæ diuinæ virtutis testimonium dant ; & cuius nomen ab Isaia multis ante seculis , quam nasceretur , egregie celebratum fuit) moriens filiis suis dixit , atque testificatus est. Nec enim regiæ dignitatis interitum fore putauit , si senes se coram filiis suis non abjicerent ; imo in ea sententia fuit , vt censeret fieri non posse , vt filii sui regio nomine digni aliquando essent , si in prima ætate non senibus grauitate præditis assurgerent. Intelligebat enim vir sapientissimus , maximum regiæ virtutis fundamentum pudore & verecundia puerili contineri. Pueris autem vtile esse regi , non regere ; vereri alios , non metum incutere ; assurgere senibus , non senum assentionibus inflari. Hoc igitur præceptum siue Cyrus liberis suis dedit , siue Xenophon ad effigiem institutionis

nis regię atque legitimę datum fuisse finxit, ego diuinum puto ; quod tamen quantum a nostris moribus abhorreat , vos ipsi considerate. Theodosius Magnus Arsenium (virum eo tempore eruditionis & eloquentię nomine florentissimum) Roma accersiuit , vt filios suos Arcadium, & Honorium, Imperii successores , omnibus optimis artibus atque disciplinis erudiret. Constantinopolim igitur profectus Arsenius prouinciam suscipit , & Principes docere incipit. Cum autem Theodosius quadam die vellet oculis cernere, qualiter filii sui erudirentur , ad illos ingressus est eo tempore , quo Arsenius suum munus obibat. Offendit autem filios in soliiis sedentes, stantem autem Arsenium ; id videns Theodosius ira grauissime commotus est , filiisque pręcepit , vt surgerent , magistro autem , vt federet , imperauit ; deinde filiis ne vnquam coram magistro sederent , magistro autem , vt , quoties ei videretur, eos verberibus cęderet , nec vnquam in eorum erratis vlla ratione conniueret. Hęc quidem vir ille fortissimus , & omni virtute ornatissimus , qui orbem terrarum imperio continebat , filiis atque filiorum doctori pręcipit, in

quo quidem si illi permanfissent , patris certe vestiigiis insistere potuissent , neque tantum naufragium Imperii factum fuisset. Sed cum pater bellis implicitus necessario abesset , & illi in potestate mulierum , & hominum lautorum relinquerentur , euenit , vt magistrum a se minis expellerent , & deliciis effeminarentur ; ita vt nemo eorum posset ad laudem parentis optimi Principis aspirare. Nos tamen eo , vnde defleximus , redeamus.

Cum igitur in Principis institutione magna verecundiæ ratio habenda sit ; ad eam verecundiam confirmandam valde interesse cenfeo , onstipari Regem hominibus prudentia & auctoritate grauibus , quos tamquam parentes vereatur , & magistri offensionem metuere ; ne , si llium contemnere cœperit , frustra in illo instituendo omnis labor impendantur. Volo præterea scurris aditum intercludi. Intempestiuus enim jocos verecundiam tollunt , & conuiciis multos homines honestos exagitant ; quorum vtrumque est nimis a regijs moribus & institutis alienum. Est enim boni Principis vrbanitatem a scurrili loquacitate discernere ; & ita delectari facetiis , vt
sem-

semper impudentiam atque petulantiam excreetur ; ita laxare animum festiue dictis , ut conuicia plectat , & maledicendi licentiam ulciscatur. Maledictum igitur ipse neque conjiciet vnquam in aliquem , nec ab alio conjici patietur. Præterea mendacium odio maximo persequatur opus est is , qui est ad magnam nominis regii laudem peruenturus. Est enim Veritas bonum stabile atque sempiternum Deo gratissimum , ad amorem hominum alliciendum aptissimum , ad præsidia comparanda firmissimum. Omnes enim se illi libentissime tradunt , quem sperant summum vitæ discrimen potius aditurum , quam aut datam fidem violet , aut mendacio quempiam circumueniat. Mendacium præterea est animi parui & angusti flagitium , omnia quantumuis leuia pericula metuentis. Omnes quidem natura veritatis appetentes sumus , eamque summa diligentia peruestigandam arbitramur , eoque studio ducti pro veris verisimilia interdum libenter arripimus. Magnum profecto signum est nihil esse magis aptum humanæ naturæ , quam veritatem , quod illius etiam fallaci specie delectemur. Quam turpe autem mendacium , quam in-

308 DE REG. INSTITVT. ET DISCIP.

dignum hominis præstantia sit , ex eo liquet , quod ii etiam , qui sæpe mentiuntur , maximum laborem atque sollicitudinem in mendacio concinnando atque cælando suscipiunt , manifestoque deprehensi vehementer erubescunt. Nunquam certe eos mendacii pudeat , nisi vi naturæ victi judicarent , foedum atque flagitiosum esse mentiri. Si igitur omnes natura veritatem exquirimus , & mendacium turpitudini semper affine judicamus ; quid est , quod tam multos homines mentiri cogat ? Nihil aliud profecto nisi metus. Omnes enim , qui mentiuntur , aut poenam , aut incommodum , aut offensionem , aut aliquid aliud ejusmodi pertimescunt ; & ea de causa mendacii sibi perfugia comparant. Cum vero metus hominum sit animi fracti & abjecti atque turpiter seruientis ægritudo , in animos liberos & excelsos cadere non potest ; sed in seruos furaces atque fugitiuos , minas & verba metuentes. Rex autem hoc nomine dignus esse non poterit , nisi fuerit animo magno & excelsa , omnia horribilia dignitatis gratia contemnente ; & ita colligitur illum nulla conditione adduci debere , vt mentiatur. Præterea mendacii totius ori-

o est in animi tenebris & amentia constituta. Animus enim lumine mentis orbatus, ignorantiaeque tenebris & caligine demersus, bi ipse mentitur, se ipsum fallit, & in capitale fraudem impellit. Cum autem nihil sit amentia detestabilius; sequitur omnem mendacium esse detestabile. Quod enim a pestifero fonte profluit, pestiferum sit necessarium est.

Sed, inquiunt multi, ut M. noster asserat, reipublicae rationes interdum postulare, Rex inuerecunde mentiatur. Quo nihil flatiosius dici potest. Primum enim nulla utilitas est cum turpitudine conjuncta; nec enim ea est utilitas appellanda, quae multo magis nocet, quam iuuat. Qui autem utilitatis gratia mentitur, nulla utilitate potest id, quod damni facit, refarcire. Dignitatem enim, qua nihil in rebus humanis praestantius est, amisit; ut vel pecuniam augetet, vel imperii fines dolo atque fraude propagaret: sic igitur fit, ut, quod lucratus est, non cum eo, quod amisit, vlla ex parte commutandum. Ut enim qui, ut stannum coaceruet, aurum atque gemmas effundit, non est re familiari diligens existimandus; ita qui

qui, vt aliquod lucrum faciat, dignitatem abjicit, non vtilitati seruire, sed omnes vtilitates euertere putandus est. Qui autem mentitur, dignitatem suam abjicit; auari enim, atque perfidi, & iniusti samam colligit; nullo igitur modo mendacium vtilitatem constituit; sed magnum potius detrimentum sibi atque rebus suis importat. Quid illud? Quod etiam ea, quorum cupiditate is, qui nimis vtilitatem respicit, discessit a dignitate, frequenter amittit. Præclare Aristoteles ait, falsum bonum in principio, verum malum esse, temporis progressu conuinci. Quam falsum autem bonum sit id, quod mendacio comparatur, ipsius mendacii nomen aperte declarat. Præterea nihil stabile potest esse, quod non est hominum fidelitate munitum, Qui autem fidem sanctæ non colit, non potest aliorum fide muniri; nemo enim illi credit; sic autem fit, vt omnes vtilitates mendacio partæ facillime dissipentur. Vt enim mercator, qui specie præsentis vtilitatis illectus aliquem fraudat, illud, quod fraudulentè auertit, animo securo non possidet, & omnes sibi vias pecuniæ maioris intercludit; nemo enim cum illo commercium ha-

be-

bere vult , quem semel fidem violasse constat ; ita Princeps , qui , vt aliquam ad suas opes accessionem faciat , mendacii turpitudinem subire non metuit , nec illud , quod fraude parauit , firmo præsidio retinere poterit ; & omnem sibi in posterum spem amplioris vtilitatis incidit.

Sed , inquis , multos mentiendi artificio fuisse nomen sapientiæ consecutos. Verum id quidem est. Sed , quam falsa esset illa opinio , rerum exitus comprobauit ; illæ namque opes , quæ erant nixæ mendacio , vastatæ sunt ; illæque solum stabiles atque firmæ permanere , quæ veritate fuerant stabilitæ , quamdiu veritas ipsa inuiolata permansit. At Lyfandri dictum de vulpis pelle , quam Hercules , vt dicebat , pelli leonis affuerat , vt argutum atque festiuum ridetur. Verum , Sed intra breue tempus illam dicti festiuitatem & risum multæ ciuitatis illius , cuius Lyfander Princeps erat , lacrimæ consecutæ sunt. Postquam enim Lacedæmonii , priscae virtutis atque simplicitatis obliti , illam astuti ducis calliditatem secuti , multis iniuriis socios alienauerunt , a sociis relictæ , Epaminondæque virtute fracti ita conciderunt.

runt , vt nunquam post Leutricam pugnam
 pristinas opes & Imperium recuperarint.
 Idem de reliquis omnibus , qui dolis & frau-
 dibus ad summas opes peruenere , judican-
 dum est. Mala enim parta (vt est in veteri
 prouerbio) male dilabuntur. Quem enim fru-
 ctum (vt de reliquis sileamus) Principes illi ,
 qui nostris temporibus mendaciis & fraudi-
 bus vsi sunt , sibi aut rebus publicis attule-
 runt ? Sibi quidem perfidiæ & calliditatis
 infamiam , hominum odium & offensionem ,
 rebus autem publicis inopiam , egestatem ,
 vanitatis exemplum , & flagitiorum omnium
 ex diuturna militum impunitate licentiam ;
 ex quo sequitur rationem imperii tuendi , &
 augendi totam esse in veritatis studio consti-
 tutam ; omnes enim facile deserunt eos
 Principes , quorum fidem suspectam habent ,
 & ad eorum nomen , quos fideles esse vident ,
 se libenter adjungunt. Postremo omnis bea-
 tæ vitæ ratio vna veritate continetur. Cum
 enim omnes homines beatæ vitæ cupiditate
 teneantur , & ea in bonorum verorum copia
 constituta sit ; sequitur vt , qui beati esse vo-
 lunt , verissima bona summo studio conse-
 ctari debeant ; falsum enim bonum , vt di-
 cum

Quum est, verum malum esse constat. Omnes
 igitur, qui ex mendacio & inanitate pendent,
 miseri sunt existimandi; ex falsa enim volu-
 ptate verus dolor existit; ex honore falso
 verum dedecus exoritur; ex vtilitate falsa
 vera perniciēs erumpit. Vana igitur & inanis
 species illudit hominibus amentissimis, eos-
 que ita omni sensu spoliāt, ut, abjecta digni-
 tate vmbra fallacissimæ vtilitatis sequan-
 tur; qui si splendorem, & magnificentiam,
 & vtilitatem, & stabilitatem verissimæ di-
 gnitatis oculis aspexissent, nunquam tam
 amentes fuissent, ut vllis opibus & imperiis
 illecti honestatem contemnerent; nempe
 præ cuius studio vita etiam contemnenda sit.
 Merito igitur plerumque & honestate, quam
 despexerunt, & vtilitate, quam secuti sunt,
 spoliantur; & dignas amentię poenas luunt.

Ut igitur ad Regem nostrum redeamus,
 cum nemo possit Regis nomen atque perso-
 nam tueri, nisi sit & virtute magnanimus,
 & honestate splendidus, & fide firmus, &
 sapientia moderatus, & opibus veris opulen-
 tus; mendacium vero flagitium sit animi pu-
 illi, & turpis, & malitiosi, & amentis,
 omnibusque veris bonis euerſi; constat certe
 ni-

nihil esse magis Regis officio & dignitate contrarium. Sic igitur assuescat opus est a teneris annis Princeps execrari mendacium, vt appareat illum fore semper vanis hominibus, & perfidis, & fraudulentis infestum. Quod si fecerit, adulatorum opes, quæ mendacio fulciuntur, labefactabit; & Deum, qui veritatis tutor & parens est, sibi conjunget. Obsidione igitur perditorum hominum liberatus, diuinoque præsidio munitus cum summa felicitate vitam deget, & regnum feliciter administrabit. Maxima igitur institutionis regię pars in eo posita esse debet, vt intelligat a primis annis Rex, totius calamitatis & pestis initium esse in mendacio & vanitate constitutum. In primis autem est Regis animus religione imbuendus, & ad cœli conspectum frequenter excitandus; vt, si fieri possit, cum lacte nutricis disciplinam plenitudo hauriat. Nec enim impudens, neque pusillo animo præditus, nec iracundus, nec inhumanus, neque mendax, nec vlli denique flagitio affinis esse potest is, qui religionem vnice colit. Omnium enim virtutum fons, & origo, & incrementum, & perfectio, denique & absolutio vna religione

con-

continetur. Illius igitur fundamentum est a primo statim ætatis initio ponendum, vt facilius omne genus virtutis extrui & exaggerari possit; præcipue autem Regibus, quo munus illorum altius & difficilius est, & magis ad dignitatem diuini muneris accedit; ita vt, quemadmodum ostendimus, sine diuina virtute obire non queat. Quo igitur magis Rex ætate progressus fuerit, eo magis intelligat se diuino beneficio susceptum fuisse, vt in terris vice illius sempiterni rectoris imperium gereret; cum igitur diuinum munus administret, diuinis opibus atque præfidiis indigere. Neminem vnquam Principem magnum, bellorumque omnium victorem sine diuino auxilio fuisse; Deum namque solum esse, qui mentem dat; qui animum confirmat; qui opes elargitur; qui fraudes intestinas comprimit, qui hostium impetum retundit; qui victoriam omnibus, qui pietatem & iustitiam colunt, & rempublicam virtute & vigilantia tuentur, cum magna nominis gloria concedit.

Multum autem iuuabit ad religionis studium commendandam eorum Principum, a quibus Rex originem ducit, res gestas, & illu-

illustres victorias exponere ; quas intelligat , non tam hominum viribus , quam armis diuinis partas fuisse. Votis autem , & precibus cum magno studio pietatis adhibitis , opem numinis impetrasse. Discat tamen interim iniquitatem , & intemperantiam , & ignauiam atque desidiam , & reliquas animorum labes esse Deo vehementer inuisas ; ea autem ratione fieri , vt neque improborum , nec incontinentium , neque timidorum , neque inertium preces exaudiat. Omnibus igitur Principibus , qui cum illo summo atque sempiterno Principe amicitiam firmare velint , vtrumque necessarium est ; vt integra vita sint , & laude fortitudinis excellant. Aliiter enim sine vllo fructu in religione procuranda laborabunt. Quamuis igitur ædes sacras ædificent , & dona ingentia templis offerant , & Deum precibus assidue venerentur ; si tamen scelus , quo sunt infecti , non detestati fuerint , & non omnem virtutem & industriam ad reipublicæ defensionem contulerint , Dei numen placare non poterunt. Pravam enim opinionem de numine diuino concipiunt ii , qui cum in iniquitate perseuerant ; illud tamen donis infecti , & a seue-

si.

ritate ad lenitatem traduci posse confidunt. Qui enim hoc credit, Dei iudicium pecunia corrumpi posse credit; quo nullum grauius in Deum scelus excogitari potest. Rursus autem qui a Deo postulat, vt sibi dormienti, omnemque laborem fugienti, opes, & dignitatem, & omnia ornamenta conferat, iniquitatem Deo attribuit. Poscit enim vt præmia industriæ atque virtuti debita ad ignauiam & desidiam tranferat. Vt igitur agricola, qui neque terram arat & subigit, neque semen tempore spargit, neque denique diligentiam adhibet in agri cultura, frustra frugum copiam & vbertatem a Deo petit; ita Princeps, qui non summo studio in rempublicam incumbit, neque, cum armis res gerenda est, diligentissime bellum comparat, sine vlllo fructu opem a Deo postulabit. Deum enim grauiter offendit, qui putat illum ignauix & timiditati fore propitium. Tantum enim abest, vt socordiam & ignauiam caram habeat, vt sit etiam omnibus timidis, & negligentibus, & in republica gerenda dissolutis vehementer insensus. Caput igitur religionis est vitæ castimonia cum fortis & inuicti animi virtute conjuncta.

Ad-

318. DE REG. INSTITVT. ET DISCIP.

Admonendi præterea sunt Principes , vt , cum res secundæ sunt , tunc diligentius dent operam religioni atque pietati. Vt enim qui opem hominum , nisi in rebus perditis requirunt , & non se fidelibus amicitiiis multo ante communiunt , sæpenumero ab illis , quos ferro sibi amicos parare contendunt , excluduntur : ita qui secundis in rebus religionem negligunt , frustra sæpenumero in aduersis opem diuinam implorabunt. Is enim , quem metus tantum religiosum facit , ficto plerumque animo ad placationem numinis accedit ; & cum primum tempestas , quæ illum terreat , sedatur , religionis memoriam deponit , & ad pristina flagitia redit. Hac autem ratione fit , vt non semper Deum exoret. Ne id igitur Regibus accadat , frequenter admonendi a pueritia sunt , vt tunc , vel maxime cum res ad voluntatem fluunt , Deum sancte venerentur ; intelligantque nihil esse Dei amicitia , nec ad nominis amplitudinem clarius , nec ad opes firmandas vtilius. Discant autem a rectoribus suis multa quidem esse dona atque munera , quibus Dei gratia conciliari possit ; sed nullum esse iustitia , & humanitate præstantius. Principem enim

enim , qui nunquam jus & fas vlllo modo violauerit , omniaque studia vitæ ad populi salutem contulerit , amicitiam profecto cum summo illo Domino & optimo Parente fœdere sempiterno confirmaturum. Audiant etiam Deum semper præsentem esse , & per omnia commeare , & ea etiam , quæ sunt densissimis occultata tenebris , intueri. Valet enim hoc multum & ad pudorem , ad vitæ puritatem , & animi constantiam ; si enim , cum nos oculis hominum notari posse suspicamur , cupiditates omnes continemus ; certe multo diligentius , cum cogitauerimus nos Dei aspectum effugere non posse , nos ipsos ab omni flagitio & turpitudine reuocabimus. Religionis igitur studium continet verissimam iustitiæ , virtutis , humanitatis , pudoris , honestatis , & constantiæ disciplinam. Et idcirco nihil est Principibus tanto studio , cura , & assiduitate tradendum , & inculcandum.

Perficiendum est etiam vt paulatim intelligant , quantum religio a superstitione interfit , atque differat. Superstitio enim est inanis metus numinis cum animi quadam imbellicitate conjunctus : religio vero cultus

tus Dei sanctissimus , illius majestati debitus , animum simul & pio quodam timore deuinciens , & inuicto robore confirmans. Qui vero nimiam religionem vituperant , non intelligunt se, quod est superstitionis proprium , religioni tribuere ; vera namque religio non est anilibus curis implicita ; non inani formidine conturbata ; non dissidentia quadam fracta & impedita , quo minus opem diuinam sibi in tempore adfuturam confidat. Quod enim rectum & honestum est acutius videt , & fortius suscipit , & constanter exequitur , & feliciter absoluit ; nihil enim sine diuino consilio , & ope , & gratia molitur & efficit. Cum vero ad ætatem peruenit , quæ jam est habilis ad pueriles salutem disciplinas capiendas , summo studio & diligentia magister quærendus est , qui nec indoctus , nec infans , neque, quod caput est, immoderatus sit. Magistrorum enim vitia discipulos quasi quadam lue , & pestifera contagione contaminant. Quantus vir fuerit Philippus , Alexandri Magni pater , omnes norunt , qui Græcam historiam legerunt. Virtutes autem , quibus ornatus extitit , eo tempore , quo obses traditus Thebanis fuit, a viro

viro summo Pythagorico, cui simul cum Epaminonda operam dedit, & ex æmulatione Epaminondæ didicit; pater enim Epaminondæ, cum esset Thebis summa auctoritate præditus, illum communi suffragio totius ciuitatis asseruabat. Quamuis igitur Philip-
 pus multis laudibus abundaret, nescio an quidquam fuerit in illo maiore laude dignum studio illo, quod in Alexandro instituendo & erudiendo posuit. Cum enim Alexander ortus esset, ad Aristotelem scripsit, se non tantas diis gratias agere, quod filium ex uxore Olympia suscepisset, quam quod eo tempore suscepisset, quo posset ab illo clarissimis disciplinis institui. Nec solum id scripsit, sed re etiam præstitit. Ex Aristotelis igitur disciplina tantus vir euasit Alexander, ut orbem terrarum imperio suo subjugaret; aut, ut rectius dicam, innumerabiles orbis terrarum nationes a morum feritate ad humanitatis cultum imperii sui mansuetudine & lenitate traduceret. Optimorum namque Principum victoriæ ipsis etiam victis salutem afferunt. Res enim illorum perditas recreant, & mores atque disciplinas conferunt, & tyrannides vbique delent, & inno-

Tom. I. X cen-

centiæ patrociniū suscipiunt. Quod cum Alexander præstitisset, eueniebat, vt carior interdum victis, quam ciuibus suis esset. Victi enim illius clementiam amabant, ciues autem virtuti illius inuidebant. Quod nunquam euenire potuisset, nisi doctissimus vir Aristoteles Alexandri naturam acrem atque vehementem, & studio omnia vincendi mirabiliter inflammata, multarum rerum cognitione, & disciplinarum humanitate moderatus fuisset. Sæpe enim iam diximus animi vim & acrimoniam sine modestiæ temperamento furorem esse, non virtutem nominandam. Si igitur Alexander Aristoteli operam non dedisset, tantas victorias obtinere minime potuisset; nec optimus Imperator & Rex, sed fulgur, & fulmen, & Græciæ pestis appellandus esset. Quod quidem, vbi primum a doctoris institutis & placitis desciiuit, facile declarauit; ea namque furoris & amentię signa dedit, vt, si in eo perseverasset, omnia intemperantia sua pervertisset. Quamdiu vero doctoris instituta persecutus est, non plura virtutis, quam humanitatis, vbiicumque vestigium impressit, monimenta constituit.

Vcl.

Vellem igitur vt aliquem Aristotolem , si fieri posset , eligeretis , qui Sebastianum optimis artibus atque disciplinis instrueret ; & ad omnia officia optimi principis & moderato-
is erudiret. Quia vero difficillimum est magistrum Aristoteli parem inuenire , id saltem curate , vt magister , quemadmodum ante dicti , & doctus , & disertus , & moribus recte constitutus sit. In omnibus autem pueris instituendis , non solum doctorum imperitia , sed etiam arrogantia summo opere detestanda est ; multi enim sunt , qui in Grammaticæ rudimentis ingenia puerorum ineptissimis Grammaticorum subtilitatibus obtundunt ; & ambitione quadam inflati , dum se ipsos ostentant , fastidio pueris sunt , & illorum otium in literas accendunt. Fit igitur sæpe-
numero , vt priusquam pueri aliqua literarum suauitate allici queant , tantum in illas diu & tam immane concipiant , vt nullatione possint ad illarum studium impelli. Principis igitur magistro maxime curandum est , vt illum , quoad fieri poterit , inutili labore leuet. Deinde vt necessarium laborem & laudis dulcedine , & non inutili sermonis urbanitate iucundum efficiat. Deinde cauendum

dum est , ne illi multos auctores interprete-
 tur ; sed paucissimos , eosque selectissimos , e
 quibus non solum emendate loqui & scribere
 discat ; sed etiam multa percipiat ad re-
 gium munus obeundum vtilia. Habeat igitur
 rationem ætatis , habeat vtilitatis , & tem-
 poris , ne aut pluribus præceptis illum one-
 ret , quam ætas illa ferre possit ; aut aliquem
 auctorem explicandum suscipiat , qui Regi
 nullum fructum ferat ; aut multum tempus
 in Grammatica consumat , quod aliis etiam
 artibus tribuendum est. Si quæritis autem
 quos illi auctores enarrandos censeam ; ex
 historicis vel Cæsarem , vel Salustium , vel
 Liuium deligendos existimo. Sunt enim in
 rerum gestarum explicatione prudentes , &
 Romani sermonis elegantiam & puritatem
 cum sententiarum grauitate coniungunt ; &
 quilibet in suo genere summam eloquen-
 tiæ laudem consecutus est. Iam vero Cicero
 noster non solum eloquentissimus , sed etiam
 optimus Princeps extitit ; ita vt non solum
 summus dicendi , sed summus etiam repu-
 bliæ moderandæ magister habendus sit. Vo-
 lo etiam vt Virgilii summum ingenium , &
 orationis magnificentiam admirari discat ;

&

& Horatii etiam sententiis & vrbauitate delectetur.

Quid agis, inquit T., poetas etiam vis Regibus notos & familiares esse? An non dicebas, non debere Principem vlla ratione eos, qui mentiuntur, in familiaritatem recipere? Cur igitur nunc poetas admitti vis, cum summos mentiendi artifices esse constet?

Immerito, inquam, hominibus eruditissimis atque summo ingenio præditis male dicis. Non enim mendaces habendi sunt; qui solidam & expressam veritatem fabulis apte compositis imitari conantur. Vt enim pictores, cum animantium imagines delineant, & illustrent, mendaces habendi non sunt; nec enim id faciunt, vt illa, quæ extant, & eminent in tabulis, vera animantia esse credamus, sed vt, quam apte vera animantia referant, cogitatione iudicemus; ita cum poætæ aliquid versibus & oratione depingunt, cum non id agant, vt nobis id, quod scribunt, verum esse persuadeant; sed vt veritatis ipsius imaginem oculis pene subiciant, minime vanitatis insimulandi sunt; id enim, quod receperunt, optima fide præstiterunt; id autem

tem receperunt , vt hominum mores , bel-
lorum tempestates , instituta ciuilia , virtu-
tis amplitudinem , sceleris deformitatem ver-
bis luculenter exprimerent ; & quo magis
id , quod animis infigere volebant , firmitus &
constantius adhæresceret , portenta etiam fin-
xerunt ; vt non solum amplissimo & dulcis-
simo , sed etiam admirando genere oratio-
nis vterentur ; ea namque maxime animis
imprimuntur , quæ simul cum iucunditate
admiracionem incutiant , Non est autem men-
dacium vel imitatione , vel in imitationis
amplificatione , sed in fraude , & in malitia
constitutum. Is igitur tantum , qui fingit ora-
tione aliquid , vt lædat , & errorem pernicio-
sum imperitis objiciat , mendax existiman-
dus est ; non is , qui faciem atque vultum rei
alicujus exprimit , & vt magis , & cum ma-
iore vtilitate intuentes oblectet , id , quod
vult , grandioribus verbis , & illustrioribus or-
namentis exaggerat. Non sunt igitur omnes
poetæ a Regis aditu repellendi ; sed illi tan-
tum , qui facile possunt Regis animum re-
rum turpissimarum imitatione deprauare.
Sunt enim quidam petulantes , obscœni ,
molles , effeminati , lasciuus & impuris care-
mi-

minibus animos a pudore & industria ad libidinem & ignauiam turpiter auocantes ; qui quidem quo dulciores sunt , eo pelius nocent , & tamquam Syrenes quædam omnibus , qui aures illis præbent , perniciem & interitum moliuntur. In rebus enim turpibus ille capitalior est , qui maius ingenium adhibet , quod in poetis valde perspicitur. Ut enim durum , & incultum , & ineptum carmen auribus & animis aspernamur ; ita concinnum & elegans libenter legimus , & ediscimus. Facillime igitur lasciu carminis venenum in animos influit , & elegantiae suauitate conditum prius interitum dignitati affert , quam aliquod remedium adhiberi possit. Quod si recte Philosophi statuerunt , omnes picturas , quæ possunt incitare & inflammare libidinem , esse a iuventutis aspectu remouendas ; quid est de carminibus lasciuis & obscœnis statuendum ? Est enim poema viua quædam pictura , multo magis animos , in quamcumque partem se contulerit , impellens , quam omnes excellentium pictorum tabulæ ; omnes igitur poetæ , qui non honestatem , sed turpitudinem mollibus & lasciuis carminibus exprimunt , non ab aula

tantum regia , sed a totius patriæ finibus exterminandi , & ejiciendi sunt. Principibus autem illi tantum sunt enarrandi , quorum omne studium in regia virtute & honestate describenda consumitur. Nec enim satis laudari potest id , quod Philippo filium ejus Alexandrum quidam dixisse commemorant ; cum pater de illo quæreret , cur nullum alium poetam nisi Homerum in manus sumeret ; quia , inquit , solus Homerus mihi poeta regius esse videtur , solus enim regiam disciplinam tradit. Qua quidem sententiâ haud facile dixerim , magis ne Homerum laudauerit , an firmissimam spem suæ virtutis , atque futuræ claritatis ostenderit. Iam enim in ætate puerili sapienter admodum judicabat , omnem otii jucunditatem disciplinæque liberalis oblectamentum esse ad regiam virtutem & gloriam conferendum. Sed , ut ad Regem nostrum reuertamur , necesse est , si nobis per M. licet , qui palæstræ nimis infensus est , ut legem etiam Solonis offeruimus.

Quam legem ? inquit T.

Eam , inquam , quæ cum literarum studio palæstram atque musicam conjungebat.

Omnem

Omnem enim (vt jam ante dictum est) liberalem eruditionem ad duas illas virtutes , nempe animi magnitudinem , & moderationem referebat. Quamuis autem magnitudo animi spe proposita magni nominis excite- tur , & clarorum hominum exemplis augeatur ; mirum tamen est , quantam alacritatem ad res acriter & animose gerendas sanitas atque robur corporis adjungat. Vt enim corpus infirmum animi vires frangit atque debilitat ; ita robustum corpus animum acriorem reddit , multoque magis in omni labore & periculo confidentem. Est igitur corpus Regis cursu , saltu , palæstra , armorum exercitatione atque venatione firmandum ; sunt illi nemorum lustra peragrandæ ; silvarum exitus difficiles explorandi , frigus , æstus , sitis , inedia , lassitudo , multaque alia incommoda ejusmodi perfe:enda ; quæ quidem venandi studium paulatim facilia reddit. Hæc autem omnia quantam vim habeant ad bellicos vsus atque militarem disciplinam vix explicari potest. Qui enim venandi studio tenentur , de multa nocte vigilant , insidias moliuntur , salus omnes obsident , alas scienter instruunt , cursu feras in-

se-

sequuntur , easque telo confodiunt ; multaque alia facere coguntur , quæ non multum a bellicis laboribus & disciplinis abhorrent. Sed cauendum , quod sapienter M. dicebat , ne dum nimis venationibus oblectatur , plus nimio duretur ; & ex nimia siluarum consuetudine nimis agrestis & immanis euadat. Est igitur , vt ad illam alteram laudem , quæ modestia continetur , simul erudiri possit , a siluis auocandus , & humanitatis artibus excolendus. Vt enim ex acuto & graui sono , mediis interuallis aptissima ratione coniunctis , dulcis concentus elicitur ; ita ex animi robore & firmitate , & clementis naturæ lenitate , suavis quædam animorum symphonia , atque modi inter se mirifice concincentes oriuntur. Non igitur incommode poetæ finxerunt ex Marte atque Venere Harmoniam fuisse procreatam. Mars enim acris animi vim atque robur ; Venus autem animi clementiam , & suauitatem designat. Omnis autem virtutis elegantia , & naturæ concinnitas est in harum duarum virtutum modulatione constituta ; vt quasi quibusdam musicæ mediis , pro rata portione distinctis , Martis acutus sonus cum Veneris graui (vt ita di-

dicam) sono, & humanitatis suauitate consentiat. Aliter enim animi status non poterit vlllo modo gratus esse Musis. Aut enim erit nimis acer & infestus, aut nimis lenis & dissolutus. Quod ne Regibus accadat, est illius vis & acris industria musicæ etiam suauitate temperanda.

Quid? inquit M., musicam etiam Regibus perdiscendam censes?

Ego vero inquam, Musicæ namque odium est barbaræ immanitatis argumentum. Nisi forte probatis illam Ateæ Scytharum Regis feritatem, qui, cum Ismeniam aulæ dum ad epulas canere iussu omnes, qui aderant, cum voluptate audirent, & magnis laudibus ornarent, testatus est, sibi multo iucundiores esse hinnitum equi omnibus Ismenię cantibus. In quo quidem declarauit, sibi nihilo plus humanitatis esse, quam in quauis immani quadrupede. Qui enim a musica alienus est, humanitatis expers habendus est. Non igitur immerito omnes summi viri, qui respublicas condiderunt, ingenuam iuuentutem illa in primis institui voluerunt; ut illius dulcedine molliti atque mitigati facilius ad omnem laudem moderationis & hu-

332 DE REG. INSTITVT. ET DISCIP.

humanitatis aspirarent. Lycurgi enim atque Solonis legibus erant omnes adolēscētes muficis eruditi. Quod etiam in aliis Græciæ ciuitatibus non mediocri studio fiebat. Ægyptios prætereo, & Hebræos, & alias nationes, apud quas hæc disciplina in summa laude floruit. Plato autem in republica, quam finxit, ea iuuentutem ad humanitatem excoli præcepit, atque ad omnem rationem virtutis & honestatis paulatim institui. Aristoteles præterea, & alii quamplurimi philosophi, multa de hujus disciplinæ studio sanxerunt, quasi de illo, quod valde pertineret ad animorum cultum, & liberalem nobilitatis institutionem. Nam primum quidem Musica continet honestam voluptatem, quæ quidem cum valde necessaria sit cunctis ciuibus, (quod enim caret alterna requie, vt inquit Ouidius, durable non est) tum in primis Regibus, quorum assidui labores sunt aliqua suauitate atque iucunditate leniendi. Deinde animum paulatim sedat & mitigat, & vim regiam moderatur, & ab immanitate ad humanitatem reuocat; qua quidem nihil aptius ad amorem conciliandum cogitari potest. Postremo, quod multo maius est, in can-

ti-

bus discere possumus , quanta vis sit in le-
bus ; quanta in ordine vitæ commoditas ;
quanta denique in animi moderatione sua-
tas.

Quo tandem modo ? inquit T.

Non vides , inquam , vocem sine modo
confusam esse dissonam & absurdam , audi-
dique sensum vulnerare ?

Video , inquit. Sed quid id ad legis &
ordinis rationem facit ?

Multum sane , inquam ; ex eo enim in-
telligimus , non esse suauitatem positam in
vocibus ; sed in lege , numero , atque modo ,
si vocem modulatur. Ex quo facilius ap-
paret , tum demum animum suauitate com-
pleri posse , cum omnes suas partes habue-
rit modo , & ordine , atque lege deuinctas ,
inter se aptissime congruentes. Imo tanto
maior erit animi concentus , quanto nobi-
liores sunt partes illæ , quæ musicæ numeris
subiunguntur. Si igitur tantum præstat vis ani-
mi in vocibus corporis , quantum explicari non
potest ; ne explicari quidem poterit , quan-
tum hæc animorum harmonia illam , quæ
est in vocibus , suauitate superet ; maxime ve-
rum vocis concentus repente fluat , ani-
mo-

334 DE REG. INSTITVT. ET DISCIP.

morum vero harmonia constans & fixa permaneat. Non igitur solum Regi colenda musica est, vt animum a labore recreet, aut naturæ vehementiam leniat atque temporet; sed etiam vt ex musicæ legibus intelligat, florentem atque beatum statum in juris & ordinis moderatione consistere. Duo tamen vitia in cantibus Regi vitanda sunt; primum quidem ne, dum vocis harmoniam studiose persequitur, harmoniam animi temere dissoluat. Nec enim tantam gratiam a musis inibit leuiorem harmoniam componendo; quantam, offensionem illis afferet multo præstantiorem & jucundio rem harmoniam dissipando.

Non intelligo, quæ dicis, inquit M.

Iam intelliges, inquam. Diximus omne verbum petulans & obscœnum esse præstantia Regis indignissimum. Ea autem de causa poetis lasciuus, & mollibus, & eneruatis aditum ad Regem omnino præclusimus; quo enim sententia poetarum numeris astricta concinnior, & elegantior, & dulcior est; eo sunt lasciuï poetæ nocentiores iis, qui sine carminis vllius venustate impuris sermonibus vtuntur. Quid si vocis etiam suavis

nis concentus accesserit ? Tanta certe vis
 erit mali , vt sustineri non possit. Oratio enim
 contorta numeris , & musicæ viribus emissa ,
 quasi vibratum telum in animo vehemen-
 tius adhærescit. Sic vero fit , vt cum sermo
 impurus noceat ; molle atque lasciuum car-
 men animi statum labefactet ; cantio flagi-
 tiosa animum perturbet , omnesque virtutis
 neruos incidat. Nihil est enim ad animum
 commouendum & flectendum cantu atque
 numeris efficacius. Sapienter igitur Plato ,
 cum videret mores immutari cum cantibus ,
 leueras musicæ leges sanxit ; atque prohi-
 buit , ne quis , quo vellet , genere cantionis
 vteretur ; id igitur tantum genus musicæ pro-
 bat vir ille sapientissimus , quo vel Dei nu-
 men celebratur , vel virtus diuinis laudibus
 ornatur , vel clarorum hominum fortia facta
 referuntur. Memoriz traditum est , cum Ale-
 xander se Ilium contulisset , vt fortissimo-
 rum hominum , qui Troiam expugnarunt ,
 monimenta cerneret , & quasi impressa vesti-
 gia notaret , fuisse illi oblatam citharam Pa-
 ridis , quæ ab incolis summa religione ser-
 uabatur. Hoc ille donum rejiciens , Achilles,
 inquit , citharam inuenire cupio ; Paridis
 ci-

cithara non indigeo. Præclara certe vox, Alexandrique virtute dignissima, qua significauit nihil languidum, & molle, & effeminatum, ne in cantu quidem & fidibus Regem decere. Quare hominis flagitiosi & adulteri citharam, qua ille Veneris impure dona atque munera canebat, aspernatus est; Achillis vero citharam, qua is, ut est apud Homerum, illustria fortium hominum facta celebrabat, se dignam existimauit. Ad hunc autem modum vellem, ut Reges omnem musicam lasciuam & flagitiosam non solum non admitterent; sed etiam ab omnibus patriæ finibus ablegarent. Ut igitur sermo impurus, ita lasciuum carmen, & molles etiam in cantu flexiones, & falsæ vocalæ Regibus detestandæ sunt; illudque solum genus musicæ illis colendum est, quod optimis verbis, & præclaris sententiis, & certa atque seuera cantus lege & ratione conficitur. Aliter enim, si mollibus & lasciuis cantibus aures præbuerint, animi ordinem & convenientiam peruertent, atque moderationis harmoniam dissoluent. Sic igitur dulcedine musæ fallacis irretiti veram animi musicam euertent, & exemplo nequitiae totam reipublicam in magnum

gnum discrimen injicient, Vt enim lentum venenum suauibus cibis admixtum prius vitam eripit, quam mortifera illius vis sentiri atque reprimi possit; ita turpes & effeminati cantus prius rempublicam vniuersam pestifera tabe inficiunt, quam malum, quod afferunt, ratione præcaueri queat. Hoc igitur vitium est Regi in musica maxime fugiendum.

Alterum vitium est, nimia opera in musicæ studio consumpta, quod etiam vitare lebet. Nec enim est illi tantum operæ in illa ponendum, quantum illis, qui nihil aliud igit. In vniuersum autem omnes artes, reuspublicis vtilis & necessariæ, sunt in Principum tutela & patrocinio constitutæ: ita tamen vt quædam nullo modo sint ab illis tractandæ; quædam vero mediocriter attingendæ; aliæ postremo summo studio colendæ. Quæ enim in fabili artificio versantur, indignæ sunt Principis amplitudine & dignitate. Quæ autem honestum aliquod oblectamentum, & cognitionem nobilitate dignam continent, dignæ quidem sunt Regibus; non ita tamen, vt in illas tamquam in munus & officium sibi præcipue delatum

7

338 DE REG. INSTITVT. ET DISCIP.

omne studium & industriam , & omnes curæ & cogitationes conferendas existiment. Aliæ postremo sunt, in quibus omne Regis studium consumi debet ; nempe quæ ad rempublicam tuendam & conseruandam , omnibusque bonis egregie cumulandam diriguntur. Musica vero neque fabrilis , neque fordida est ; sed in primis honesta atque liberalis disciplina , non tamen ita splendida , vt in illius cognitione patriæ salus atque dignitas collocanda sit. Est igitur ex illis artibus & disciplinis , in quibus mediocre studium Regis erit jure laudandum ; nimium vero in summa vituperatione ponendum. Auertit enim animum a rebus gerendis , & efficit multo molliorem , quam salutaris seueritatis ratio postulat ; & tempus, quod erat reipublicæ tribuendum , in voluptate illa immoderata consumit. Merito igitur cantor ille laudari solet, qui, cum Rex Philippus cum illo de solertissima modorum ratione disputaret , Nunquam dii, inquit, o Rex, tibi tantum mali faciant , vt tu me canendi atque psallendi artificio vincas. Acute enim Regis ineptam ambitionem ad laudem , quæ Regis propria non erat , aspirantem fregit.

Ne-

Neque Regi tantum musica modice conda est, sed omni etiam nobilitati. Intra modum enim reprimit animi impotentiam, ad moderationem mirabiliter instituit; cum pro extra modum procedit, emollit paulatim animos, & nobilitatem a studio sui muneris abducit. Hoc enim nobilibus impossibile munus est, ut rempublicam armis atque virtute tueantur, & artibus omnibus, quæ ad igni custodiam necessariæ sunt, instructissimi sint; quod efficere certe non poterunt, si nimiam operam in canendi artificio, atque musicæ subtilitate posuerint. Hoc impulit Aristotelem, ut præciperet ciues institui eo genere musicæ, quod nec nimium studium, nec operam flagitaret. Tam seuera autem fuit olim apud Lacedæmonios musicæ disciplina, ut Timotheum Milesium, summum citharæum, quem ad erudiendam iuuentutem ascierant, eo solum nomine in exilium pellerent, quod vnam chordam septem chordis, uibus illi utebantur, addidisset; indignum enim statuebant, cum musicam omnem ad animorum modestiam conferri vellent, id musicæ genus institui, quo ciuium animi paulatim ad mollitiem laberentur. Idem secutus

342 DE REG. INSTITVT. ET DISCIP.

tur ; illam certe , quæ animorum concinnitate perficitur , multo plures vtilitates allaturam. Omnis igitur opera , & studium , omnis cura & industria eo conferenda est , vt Rex moderationis atque temperantiæ laudibus excellat. Ad hanc autem modestiæ laudem facilius comparandam , vix quidquam vtilius esse potest bonarum artium disciplinis ; acuunt enim ingenium , mentemque ad veritatis notitiam instruunt , & ad honestatis considerationem egregie viam muniunt. Continent enim ordinis , & modi , & convenientiæ rationem , totiusque dignitatis , quæ tota posita est in certa numerorum dimensione , decus & elegantiam. Qui igitur sine illarum præsidio modum & ordinem in vita conseruat , opinione tantum cæca ducitur ; & ita facillime potest perditorum hominum machinis in fraudem impelli. Id enim tantum in animo fixum permanet , quod est perceptum , & cognitum , & constitutum , & firma atque stabili ratione confirmatum. Ergo quemadmodum is , qui sine recta morum constitutione sapientiæ institutis vivere conatur , importuna vi libidinis ab eo conatu repellitur ; ita qui sine certa ratione

moribus honestis imbutus est, facile potest
 a recto cursu dimoueri. Vtrumque igitur
 opus est ad vitæ constantiam; nempe recta
 morum constitutio, & artium bonarum co-
 gnitio; alterutrum enim sine alterius ope
 imbecillum est. Homo enim incontinens,
 qui ad bonas artes ingenium applicat, intel-
 ligit quidem, artibus illis adjutus, nihil esse
 dignitate præstantius; illud tamen iudicium,
 vi libidinis victus, diu seruare nequit; qui
 vero sine certo iudicio continens est, facile
 poterit fallaci quadam specie voluptatis, aut
 utilitatis objecta, a studio honestatis abduci.
 Vtroque igitur modo fit, ut animus sit va-
 rius, & inconstans, sibi que dissimilis, nec
 vnquam in vlla certa officii ratione consistat.
 Pugnat enim sæpenumero voluptatis aut
 utilitatis species cum honestate; tunc igitur
 animus illius, qui vel honestatem sine
 disciplina colit, vel sine studio honestatis se-
 se ad præclaras disciplinas adjungit, quasi
 in biuio constitutus hæret, & dubitat, & se
 interdum reuocat, & hac ratione sæpe a re-
 cto sensu deducitur. Quod certe non fecis-
 set, si simul & bonis moribus ornatus, &
 optimis disciplinis excultus fuisset; intelle-
 xit-

xisset enim tunc nullam partem veræ & li-
quidæ voluptatis , aut vtilitatis attingere pos-
se id , quod est ab honestate sejunctum. Quæ
enim voluptas purior & constantior esse po-
test ea , quam ex honestate homines bene
morati , & eruditi percipiunt ? Cumulatur
præterea gaudio animus illius , qui fuerat
ante moribus & vita recte constitutus , cum
disciplinis eruditus intelligit , id quod antea
consuetudine faciebat , esse id , quod est pul-
chrum , & honestum , & naturali lege atque
diuina sancitum. Si vero vtilitatem quæri-
mus , omnis profecto ratio vtilitatis est in
veritatis cognitione (vt jam diximus) col-
locanda. At istæ disciplinæ caliginem pau-
latim dispellunt , tenebrasque discutiunt ;
aciemque mentis illustrent , vt facile possit
vera atque simplicia bona contueri ; falsa au-
tem & insidiosa modis omnibus aspernari.
Cum igitur artes præclaræ tantum valeant
ad honestatis constantiam , Regemque con-
ueniat summis honestatis opibus exornari , &
dignitatem singulari constantia retinere ; pos-
sumus ne quidquam elegantius , si per ho-
mines quosdam licuerit , excogitare , quam
vt is artibus istis imbuatur , quibus facilius
ad

ad summum tandem regiæ virtutis gradum perueniat ?

Nihil , inquit T. ; si tantam vim habent artes istæ ad honestatem retinendam , quantum tu illis attribuis .

Id quidem , inquam , cerni jam poterit . Primum quidem igitur censeo , vt Rex Arithmeticam discat .

Quid , inquit ille , tu pro Rege nobis mercatorem institues ?

Mercatorem , inquam , minime , sed Principem in republica tuenda & administranda vigilantem . Nec enim Regis officio dignus est , qui numerare nescit . Quomodo enim sine exacta numerandi ratione exercitum in bello recensabit ? Quo ordine castra locabit ? Aut qua ratione pro numero militum aciem instruet , si numerandi fuerit imperitus ? Deinde quomodo præmia pro virtutis ratione distribuet ? Æquitas enim in præmiis atque muneribus rata portione & numero continetur ; ita vt sine Arithmetica iuris constantia conseruari non possit . Iam vero in pace quam rationem vectigalium habebit is , qui numerandi artem prorsus ignorat ? Vt enim paterfamilias domum suam tue-

346 DE REG. INSTITVT. ET DISCIP.

tueri atque sustentare nequibit , nisi in re familiarum diligens & attentus fuerit ; ita neque Rex poterit vlllo modo rempublicam saluam & incolumem conseruare , nisi vectigalium rationem penitus exploratam habuerit ; aliter enim neque bellum mouere , nec vrbes munire , neque dignitatem tueri , nec hostes repellere , neque pericula propulsare poterit. Vt enim aliquod clarum facinus moliri velit , copiarum tamen illum in medio apparatu deficient ; & ita cum magna & imbecillitatis , & temeritatis infamia superabitur. Sunt igitur illi , ne quidquam temere moliatur , omnes pecuniarum & sumptuum rationes exactissime putandæ ; quod si non fecerit , omnia officia conturbabit. Multa enim donabit indignis ; multa denegabit iis , qui sunt præclare de republica meriti ; multa cum magno reipublicæ detrimento largietur ; quod non est mediocre flagitium existimandum. Nec enim par est , nec vlllo modo ferendum , vt quod est in reipublicæ custodiam impendendum , in potentium hominum priuatos vsus , & magnificentiam odiosam & inuisam conferatur ; nec vlla ratio patitur , vt vectigal , rebus feriis atque necessariis destinatum ,

re-

bus ludicris seruiat ; & , quod est populi
uictibus ereptum , ad paucorum tyrannidem
referatur ; neque sit publicæ salutis , sed im-
perantissimæ cupiditatis instrumentum.
Ite autem tam indigna flagitia committan-
tur , oportet Regem esse in vectigalium ra-
tione , & in tuendo ærario vigilantem ; quod
idem faciet , si intellexerit illam pecuniam
non esse suam , sed publicam ; sibi tamen
reditam , atque commissam ad populi ipsius ,
cui eam erogauit , custodiam. Secus autem
eccessu erit , omnes regni opes ministrorum
uauaritia & improbitate auerti , comminui ,
dissipari ; multa perditis hominibus condo-
ari ; multa per luxuriam & dedecus effun-
di ; intolerabiliaque tandem tributa populis
imperari , & miseros homines infinitis in-
commodis affligi.

Tres autem virtutes in Rege , qui nu-
merare nescit , locum habere non possunt ;
prima quidem est Prudentia , altera Iustitia ,
tertiam Liberalitas. Quod enim ad Pruden-
tiam attinet , quid amentius esse potest ,
quam præsentem pecuniam sine vlla neces-
sitate consumere , & , cum necessitas urget ,
absentem frustra requirere ? Quid magis te-
me-

348 DE REG. INSTITVT. ET DISCIP.

merarium esse , quam inopia gazæ furenter
 absumptæ totum regnum in summum dis-
 crimen salutis injicere ? Iustitia de inde in-
 tereat opus est. Rex enim , qui Arithmeticam
 ignorat , non tenet vlllo modo rationem , qua
 pro virtutis magnitudine præmia diuidat ; &
 vniuscuique meritum ea , qua debet , mune-
 ris æquabilitate compenset. Iam vero Libe-
 ralitas nulla potest esse , vbi neque dantis fa-
 cultas expenditur , nec accipientis dignitas
 æstimatur ; qui enim dat , quod non potest ,
 stultus & amens est , non liberalis existiman-
 dus ; qui vero munus aliquod elargitur in-
 digno , flagitium hominis impuri temera-
 ria largitione confirmat. Non erit igitur tunc
 vlla ratione liberalis æstimandus ; sed amens
 & flagitiosus jure atque merito reputandus ;
 nam si liberalitas virtus est , ea certe teme-
 ritati & flagitio affinis esse non potest. Is
 igitur tantum liberalis est , qui & facultates
 suas respicit , & pretium rei illius , quam do-
 nat , expendit ; eam tamen summa voluntate
 virtutum meritis elargitur , & frugalitati et-
 iam studet , vt bene de republica meritos
 queat debitis muneribus afficere. Neque hoc
 solum præstat Arithmetica , vt Rex & pru-
 den-

dentia, & iustitia, & liberalitatis officio perfungatur; sed ad maiora etiam paulatim viam aperit.

Esse ne potest, inquit T., aliquid virtute amplius?

Est quidem, inquam, status diuinus. Diximus autem (si meministis) hominum pastorem, non hominem tantum esse debere sensibus humanis præditum, sed etiam diuinis instructum, ad rerum cælestium considerationem; inde enim necesse est, ut similitudinem ducat, ad quam totam reipublicæ formam (quoad fieri potest) effingat. Ad hanc autem similitudinem diuinitatis arripiendam necesse plerumque est, animum a sensibus auocari, & a consuetudine corporis abduci; ut possit ordinem & pulchritudinem earum rerum, quæ nullam in omni æternitate mutationem subeunt, intueri. Ad hoc autem mirum est, quantum valeat Arithmetica. Abstrahit enim paulatim mentem ab ipsis rebus; quæ sub numerum cadunt; ut ipsos per se numeros sine ullo respectu ad res corporeas exacte consideret. Intelligit deinde facilius omnem decoris & dignitatis elegantiam, omnem mundi ornatum,

omnem

350 DE REG. INSTITVT. ET DISCIP.

omnem iustitiæ atque virtutis splendorem
numerorum lege atque ratione contineri.

Quo tandem modo ? Inquit Tauora.

An non vides , inquam , omne , quod numeris astringitur , esse aptum , & venustum , & omnium ad se oculos & voluntates allicere ? Quod vero est numerorum lege solutum esse foedum , & flagitiosum , & ideo omnes illud & oculis , & animis aspernari ? Quid est enim pulchritudo , nisi partium apta compositio , numerorum ratione deuincta ? Quid est venustas in motu ? Quid in voce dulcis concentus & harmonia , nisi numerorum pro rata portione distinctio ? Quid sanitas in corpore , nisi humorum certa numerorum lege , atque dimensione consensus ? Quid est denique (ne plura singulatim persequar) animorum concordia , virtutis elegantia , mundique totius ornatus , nisi numerorum modus , quo non solum cohererent & permanent vniuersa ; verum etiam ita concinna sunt , vt nihil in suo genere possit elegantius excogitari ? Hæc qui diligenter animaduernerit , modum in vita conseruabit ; & ita rempublicam reget , vt nihil in ea patiatur existere , quod non sit ad nume-

rum

renouatum, atque certa moderatione
tum.

Multi fuimus in Arithmetica laudandi,
eliqua breuius perstringemus. Geometria
quitur, quæ eamdem propemodum vim
; & ad vsum vitæ, ad vniuersæ natu-
ognitionem, & ad juris constantiam;
enim sine illius ope agri recte diuidi,
a locari, vrbes ædificari, arces muniri,
ia constitui possunt. Si metiendi ratio-
sustuleris; & iustitiam, & ciuium con-
am, multasque vtilitates e vita tolles.
de, quod de Arithmetica diximus, illa
tim animum a cogitatione earum re-
, quas metimur, abducit, vt ipsam me-
i rationem, & modum, quo res singulæ
inantur, inspiciat. Assuefacit enim men-
res cælestes atque diuinas intueri, &
is illud, quo omnia inter se connexa
, & quo cælum terris per media cum
mis aptissima ratione dimensis copula-
admirari itaque sentit cujuslibet rei
suram & rationem, modo atque ordine
inatam, & cum reliquis naturis mirifi-
ngruentem, esse, quæ omnes mundi par-
onsensione diuincit, & amore conglu-
ti-

tinat; ita vt, ea sublata, necesse sit mundum ipsum funditus interire. Vnde percipitur omnem reipublicæ concordiam & stabilitatem juris ordine, & æquabilitate contineri.

Quid hic dicam de illa disciplina, quæ astra contemplatur? An patiemur Regem nostrum tam præclaram artem ignorare? Magno certe illum afficiemus incommodo, si tanto fructu nostra culpa caruerit. Nec enim mediocris illa vtilitas habenda est, quam animus capit, cum cælum suspicit, magnitudine immensum, splendore clarissimum, ordinata varietate pulcherrimum, constantia & stabilitate firmissimum. Itaque illius contemplatione fit animus altior, & moderatior, & in omni vitæ ratione constantior. Qui enim rerum cælestium amplitudinem & immensitatem cogitatione peragrat, terrestrium regionum angustias admirari non potest; & qui definitos siderum cursus, & ordinatas conuersiones ad numerum cadentes, quo cælestia moueantur, mente cernit; facile sibi atque vitæ suæ modum constituit; & qui cæli firmam stabilemque naturam in omni temporum varietate considerat, nulla rerum varietate, aut vilo motu de mentis statu de-

deturbatur ; assidua namque rei alicujus excellentis animaduersio imitandi studium incendit ; ita vero fit , vt qui cælestia animis spectat , cælestis etiam virtutis splendore coluceat. Accedit etiam admirabilis naturæ diuinæ cognitio , quam ex cæli contemplatione percipimus. Illud enim nobis , quanta Dei potentia sit , quam singulari ornatu omnia distinxerit , quanta benignitate generi humano prospexerit , aperte demonstrat. Nostris enim vtilitatibus omnia , quæ in cælo perfecit , seruire videmus. Ex cælestium igitur rerum studio pietas extitit ; inde benignitas exorta est ; inde reliquæ virtutes extiterunt ; cæli namque splendor , & ornatus , & vtilitas virtutis diuinæ imitandæ studium incitauit , & homines amore immortalitatis incendit. Adde nunc eximiam illam voluptatem , quam percipit animus supera atque cælestia contuendo ; flagramus enim omnes scientiæ cupiditate , & ea , quæ latent obscuritate inuoluta naturæ , peruestigare nitimur ; & ea de causa , cum aliquid antea nobis ignotum cernimus , ingenti gaudio cumulamur ; maxime vero cum ea , quæ euoluta perspicimus , magnitudine claritatis antecellunt.

354 DE REG. INSTITVT. ET DISCIP.

Non solum igitur cæli consideratio facit animos excelsos , & moderatos , & constantes , & pios , atque benignos ; verum etiam homines summo ingenio præditos voluptate quadam eximia permulcet. Vnde perspicitur , hanc etiam disciplinam esse maxime cum Regis amplitudine & dignitate congruentem.

Illud tamen animaduertendum est , illud modum in his disciplinis Regi adhibendum esse , vt ex singulis ea tantum carpat atque delibet , quæ magis necessaria sunt ; vt illis tamquam gradibus ad omnem rationem regię disciplinæ , & diuinæ cuiusdam virtutis ascendat. Nolo , vt in singulis insistat , vt illi faciunt , quibus nihil aliud est in vita propositum ; nolo rursus ea negligenter attingat ; negligentia namque est tarditatis , aut diffidentię , atque timiditatis argumentum. Qui enim non videt , quam honesta hæc studia sint , hebes & stupidus ; qui vero illa pulchra & eximia putat , eorum tamen cognitionem se assequi posse diffidit , ignauus & animo pusillo præditus existimandus est ; quorum vtrum minus Regem deceat , haud facile dixerim. Vt igitur minime probomul-

multum tempus a futuro Principe in harum artium studio consumi; ita negligentiam in tam honesta disciplina vitupero. Nihil est enim ab eo, qui vir magnus esse, & haberi velit, segniter & pigre gerendum. Sed hic occurrit mihi illud argumentum, quo uti posse dicebas eos, qui minime patiuntur Principes artibus ingenuis atque literis infici. Si non multum temporis (inquiunt) in earum studio contriuerint, aut eas minime percipient, aut ea, quæ perceperint, e memoria confestim elabentur. Quod non est ita: imo, si non omnia ex singulis disciplinis, sed necessaria tantum, & ad vsum magis accommodata didicerint, omnes facillime cum fructu & iucunditate percurrent, & quæ ex singulis hauserint, multo facilius memoria continebunt. Diligentiam igitur, & acrem attentionem in istis artibus a Principe flagito; diuturnum vero in singulis studium valde alienum Principis officio puto. Sapienter enim admonent viri doctissimi, omnes, qui ad tractandam rempublicam accessuri sunt, ut orbem istarum disciplinarum ita conficiant, ut intelligant non esse præter modum in singulis immorandum. Per-

inde igitur , atque illi , qui , vt multos hominum mores & instituta cognoscant , peregrinantur , tantum temporis in qualibet vrbe consumunt , quantum sat esse putant ad prudentiam ex multarum nationum facili notitia comparandam ; similiter Principi tantum est e qualibet istarum artium fumentum , quantum sat sit ad egregiæ virtutis vsum , & ad regiæ sapientiæ disciplinam. Si enim omnes earum minutias , & subtilitates persequi voluerint , exitum nullum inuenient ; si vero illarum modum vtilitate terminauerint , non mediocrem vtilitatem ex illis capient. Reliqui , quibus est maius otium , dent , si velint , operam , vt earum perfectionem consequantur ; quod facit hic noster Franciscus Portugalsis. In mathematicis enim (vt de reliquis artibus sileam) tantum progressus est , vt ad laudem Petri Nonii (cui parem & æqualem in artibus istis non nouimus) adspiret. Sed nos non de illis , qui abundant otio , & qui non alio grauiore onere premuntur ; sed de Regis disciplina & officio disputamus. Regi igitur futuro has disciplinas tradendas , & hac ratione tradendas existimo. Velim deinde , in ea se arte exercat ,

at, quæ rem definiendo explicat, & in
rtes exacte distribuit, & argumentum ra-
ne concludit, & consequentia, & repu-
nantia videt, ambiguaque distinguit, & in
nni sermone quid verum, quid falsum,
id verisimile, quid absurdum, minimeque
obabile sit, animaduertit.

Quam rem agis, inquit T. ridens; Re-
m etiam in Dialectica exerceri vis?

Ego vero, inquam, si id mihi per vos
uerit.

Per me, inquit, minime licet. Nec enim
corum est, ut is, qui Principis personam
duit, importunam loquacitatem Sophista-
m imitetur, & clamet intempestiue, & au-
s hominum obtundat, & veritati impuden-
ssime repugnet; ut ii faciunt, qui isti stu-
o dediti sunt. Quo quidem fit, ut ego il-
m interdum non artem liberalem, homine-
æ ingenuo dignam; sed impudentiæ atque
audis disciplinam putem. Iam vero quid
inus nostris moribus conuenit? Aut quid
se poterit regiæ virtutis candori, atque
mplicitati magis aduersarium? Quomodo
igitur nobilitas vniuersa feret? Aut quali
nimo id viri militares, natura & voluntate

literis infensi patientur? Quare vide, ne, si fuerit aliquo rumore disseminatum, te hujus sententiæ auctorem esse, vt leuissime tecum agatur, risum plerisque moueas, & omnium sibilis ejiciare.

Equidem, inquam, id metuens Dialecticæ nomen reticebam, vimque illius tantum indicabam; & tamen neque sic offensionem, quam vitare cupiebam, quivi effugere. Quod si te, hominem literis & vrbanitate limatum, & bonis disciplinis deditum, hæc sententia offendit; quid ii facient, qui literas omnes oderunt?

Quid facient? inquit ille. Profecto vereor nisi ab ea destiteris, ne te, tamquam publicæ salutis euerforem, exterminandum curent; vel saltem vt rusticanum hominem, & vitæ communis ignarum, ludis atque jocis exagitent.

Quid, inquam, non mihi afferetis opem? Ne illud saltem ab hominibus istis impetrebis, ne me indicta causa condemnent?

Vereor, inquit, vt difficile sit. Vellem tamen scire, quibus argumentis adductus censeres dialecticam artem dignam esse, in qua Principes elaborent.

Num

Num obliti estis, inquam, id, quod est ter nos firme constitutum; omnem beatæ itæ rationem in veritate consistere?

Minime, inquit.

Cum igitur, inquam, plane constet, beatam vitam veris bonis contineri, & hujus vite beatæ Rex effector & architectus sit; omnem artem & disciplinam, quæ falsam speciem veritatis a veritate secernit, vtilem Reibus esse confirmo. At Dialecticæ hoc munus est, ut omnem sermonis fallaciam atque raudem aperiat, & sophistarum insidias exloret, & veritatem demonstraret, eamque alidis argumentis sepiat. Neque si multorum, qui hanc artem se tenere profitentur, imprudentes & inepti sunt, eaque ad corroborandam imprudentiam sane diligenter abutuntur, id continuo artis vitium est; sed eorum, qui contra ipsius artis disciplinam faciunt. Artis enim hujus munus est, lucem rebus obscuris afferre, confusa modo, & ordine collocare, mendacium & vanitatem reprimere, veritatem argumentis firmissimis stabilire, rectamque rationem & sententiam valido præsidio confirmare. Ergo cum Regis sit, odio acerbo mendacium persequi, & veri-

ritatem summo studio & contentione tueri ; quid magis illius muneri & officio consentaneum esse potest illa disciplina , quæ oblit fraudibus , & mendaciis , & veritatem diligenter inquirit ? Nec enim solum in studiis artium maximarum occurrere solent multa , quæ sunt impedimento , quo minus veritas explorari & perspicui queat ; verum tam in familiari sermone , quam in consilio maximis de rebus inito sæpe rationes afferuntur , specie quidem probabiles , re autem vera fallacissimæ , quibus Reges impulsæ fraudes capitales in republica gerenda concipiunt ; quas vitare potuissent , si Dialecticæ armis atque præsidiiis circumtecti fuissent. Præterea Dialectica est eloquentiæ fundamentum ; recte enim dicendi finis est fidem facere ; fides autem vi argumentorum , & copia exemplorum fit ; Dialectica vero docet vnde argumenta sumenda sint , qua ratione concludenda , quo etiam artificio exempla tractanda ; vsque adeo vt sine Dialecticæ præsidio omnis plerumque oratio inepta , jejuna , elumbis , & enervata sit. At Regem minime decet infantem esse ; sed eloquentia non vulgari præditum.

Ita

Ita ne censes , inquit T. , Rhetoricam artem esse Regibus instituendis accommodatam ?

Ego vero , inquam , & id multis de causis. Primum quidem quod nihil ineptum & stolidum , nihil nisi purum , & elegans , & ornatum in Regibus tolerandum arbitror. Vt enim nihil est in communi vita Regum amplitudine magnificentius ; ita conuenit , vt nihil sit illorum cultu decentius , & elegantius , maxime vero in rebus illis , quæ vi & vtilitate præstant. Quid autem esse potest oratione sententiis grauius , & verbis splendidis ornata & instructa vehementius ? Quid ad alliciendas voluntates , & animos impellendos vtilius ? Quid ad rempublicam multis in locis constituendam efficacius ? Est enim eloquentia dicendi prudentia. Rex autem & prudentissimus sit necesse est , & omnem prudentiam ad reipublicæ vsum conferat. Prudentiæ vero vsus est in verbis , & in operibus constitutus. Vtrumque igitur regium est , & prudenter dicere , & officio prudenter incumbere. In vtroque autem studio & bene dicendi , & recte agendi olim omnis regia disciplina consistebat ; vt auctor est Ho-

merus , apud quem Phoenix ait ; sibi Achillem a patre Peleo traditum fuisse , vt illum & verborum oratorem , & rerum actorem efficeret. Quod quidem fuit ab illis priscis hominibus satis sapienter excogitatum. Multa enim sunt , quæ Rex sapienter , & fortiter , & vigilanter administrare per se debet ; multo tamen plura , quæ aliis facienda præscribit ; quod quidem non est semper imperio & nutu , sed accurata sæpe oratione faciendum. Non enim seruis imperat , sed liberis ; liberi autem non tam minis atque metu cogendi , quam explicatione communis utilitatis incitandi sunt. Vt enim (quemadmodum ait Plato) non eodem modo , quo medici liberis medentur , seruos curant ; liberis enim affidunt , & morbi vi penitus explorata curationem instituunt , cuius rationem ægrotis explanant , seruis autem stantes verbo tantum imperant , quid illis faciendum ita sit ; non simili ratione leges omnibus imponendæ sunt , cum liberis enim populis dantur , ratio communis utilitatis exponenda est ; cum vero aliquid iis , qui tyrannide oppressi sunt , imperatur , id non est ita necessarium ; sed id tantum inculcandum , quod est a Iuvenale
de

de mulierum tyrannide eleganter scriptum.

Sic volo, sic jubeo, sit pro ratione voluntas.

Cum vero ea communis salutis explicatio sine eloquentia fieri commode non possit; concluditur Eloquentiam Regis munus esse; valdeque ad illius amplitudinem & officium pertinere. Est enim illi opus, ut animos suorum ad se alliciat, & amorem excitet, fidemque faciat, ea, quæ sancit atque decernit, ad reipublicæ salutem conducere; neque sibi quidquam esse studio communis utilitatis antiquius. Nec enim in bello tantum milites Regis oratione cohortandi sunt; sed ciues etiam multo sæpius in pace studio juris incendendi, & firmo vinculo concordiæ, & ciuilis societatis alligandi. Vtrumque enim regium est, & hostis impetum virtute reprimere, & statum reipublicæ æquitate tueri; quæ cum sine multorum auxilio facere non queat, necesse profecto est, animos eorum, qui illi sunt operam nauaturi, vi & amplitudine orationis incendi & incitari; multo enim alacrius homines id exequuntur, quod voluntate suscipiunt, quam id, quod imperio & metu coacti faciunt. Cum autem magna vis sit in oratione ad impellendas voluntates,

tum

tum vero cum ab homine virtutibus ornato , & eo, qui multum auctoritate valet , habetur, mirum est quantas vires habeat ad animos varie flectendos. Quid igitur fiet , cum Rex hoc nomine dignus suis , quibus est propter virtutem carissimus , & propter auctoritatem grauissimus, oratione sapiente stimulos admo-uerit ? Quantam illis alacritatem afferet ? Quo ardore illorum mentes inflammabit ? Quantum & quam honestum inter illos certamen instituet ? Quilibet enim tunc summa contentione laborabit , ne ab aliis sedulitate atque diligentia superetur. Verissime quidem dictum est , non dicentis orationem , sed probitatem fidem facere. Nemo enim sanus improbo credendum existimat. Illum tamen est etiam verissimum , probitatem eloquentiæ præsidio nudatam inermem esse. Homines enim infantes, quamuis optime sentiant, non possunt tamen propter hæsitantiam linguæ multa reipublicæ vulnera sanare , multaque pericula propulsare , quæ , si fuissent orationis armis instructi , facillime depulissent. Vt igitur in bello turpe est , armorum inopia vinci ; ita in pace turpissimum , infantia justitiæ & æquitatis causam deserere.

Quod

Quod si hæc orationis inopia dedecus affert omnibus, a quibus aliquid opis reipublicæ flagitari solet; quid fiet, cum is, cujus auctoritate summa totius reipublicæ salus innitur, fuerit infantissimus? Præterea cum multo magis regium sit (vt ante dictum est) alacritatem voluntariis addere, quam inuitos cogere, illudque eloquentia fiat, hoc minis atque supplicio; quis non videt, multo clariora munera esse Regi vi orationis, quam jure imperii, sæpenumero sustinenda? Postremo (vt etiam ante diximus) quo pacto ferendum est, vt Reges, quorum vita nihil clarius & illustrius esse debet, hoc tam egregio cultu & ornatu careant? Quid enim minus decet, quam nimiam operam in corporis vestitu & ornatu consumi; summamque diligentiam adhiberi, vt regius cultus mirifice inter omnes excellat; quam ornate vero, aut inculte Rex loquatur, id pro nihilo putare? An aliquis purpuræ nitor, aut auri splendor, aut gemmarum pulchritudo est cum splendore eloquentiæ conferenda? Aut aliquid mirabilius esse potest, quam ea re, qua homines brutis animantibus præstant, vnum hominem reliquis hominibus anteire?

366 DE REG. INSTITVT. ET DISCIP.

Ferendum ne igitur est , vt Rex hoc tam admirabili ornatu & cultu nudatus incedat ? Non profecto. Omnibus enim rebus splendeat opus est ille, qui est splendorem iis , qui illius ditione & imperio continentur , allaturus ; itaque primum necesse est , vt animus illius sit cultus disciplinis , & ornatus virtutibus. Deinde vt ex illustri animi cultu illustris etiam efflorescat oratio. Postremo vt omnes illius actiones eodem nitore splendant ; vt sic demum animi decus cum orationis elegantia , & actiones præclaræ cum orationis claritate consentiant.

Non solum igitur in Regibus eloquentia ad vsum reipublicæ desideranda est ; sed ad regium decus , & elegantiam , eximæque dignitatis amplitudinem. Illud tamen est animaduertendum , tam in Dialectica , quam in Rhetorica Principibus tradenda , summam doctoris prudentiam requiri ; sunt enim in Dialectica quædam nimis spinosæ subtilitates omittendæ , verborum quorundam insolentia fugienda , negligenda denique omnia , quæ magis ad ineptas Sophistarum concertationes , quam ad rectum differendi vsum valent ; illaque tantum inculcanda ,
quæ

quæ argumentorum copiam suppeditant , & rationis iudicium confirmant. Nec enim licet Principibus tantum otii , quantum reliquis hominibus in hac disciplina consumere. Similiter de Rhetorica statuendum est , non esse Principes multis præceptis nullum vsum habentibus obruendos. Quamuis enim nunc in foro atque iudiciis eloquentia dominaretur , vt olim ; non tamen esset Regis officium , lites intendere , crimina objecta diluere , iudicibus oratione blandiri , humiliter supplicare , lacrimis seueritatem ad misericordiam inflectere. Nec illud quidem orationis genus Regibus aptum est , quod olim in laudandis primariis hominibus illi , quos Græci Sophistas appellabant , ingenii ostentandi gratia sequebantur ; tam elaborata numerorum concinnitate perpolitum , & tam crebris verborum & sententiarum luminibus illustratum , vt omne illorum studium eo conferri videretur , vt auditores sine vlllo fructu nimia voluptate perfunderent. Nec enim Regis amplitudini conuenit lites persequi , aut aliquid suppliciter atque demisse rogare , aut adulari & assentari , aut in orationis flosculis pueriliter colligendis exerceri. Illud igitur tantum
clo-

368 DE REG. INSTITVT. ET DISCIP.

eloquentiæ genus auctoritatis & dignitatis plenissimum illi relinquitur, quod est in consultando, & deliberando, & in sententia sapienter explicanda, & in ciuium animis a flagitio deterrendis, & ad officium incitandis constitutum. Itaque nihil subdolum, nihil veteratorium, nihil astutum & fallax, nihil nimis depictum & elaboratum, nihil multis verborum lenociniis instructum in oratione Regis emineat. Hæc enim omnia sunt simplicitatis inimica, regiæ bonitati contraria, & magis ad hominum voluntates alienandas, quam ad alliciendas apposita. Genus igitur tantum dicendi colat, rectum, purum, elegans, enucleatum, verbis grande, sententiis graue, oratione pressum, non redundans & effluens, nec inuerecundis verborum festiuitatibus expolitum. Hoc jacentes excitet, afflictos recreet, languentes stimulet, vigilantes inflammet, bonis præmia constituat, improbis periculum denunciet, & omnes denique, quantum poterit, efficiat legibus obsequentes. Materia enim, quam Regem præcipue tractare dicendo conuenit, est ea, quæ iustitiæ studio continetur; quæ nulla maior, & amplior, Regisque officio digni-

gnior esse potest. Finis enim, quem intueri, & in quem studia vitæ conferre debet, in eo consistit, ut omnes ciues justos efficiat; hoc autem vel iudiciorum metu, vel honestatis amore fit; metus autem iudiciorum, est remedium necessarium illud quidem, minus tamen firmum & stabile, multisque fraudibus & dolis obnoxium. Amor autem honestatis prudentia orationis incenditur; quæ quidem oratio tanto maiores vires habet, quanto status illius, qui loquitur, excelsior est, omniumque virtutum opibus opulentior. Nihil igitur esse poterit ad præsidium & ornamentum reipublicæ splendida oratione optimi Regis accommodatius.

Sed venit in mentem mihi interdum admirari, cum in eloquentia tanta regiae dignitatis ornamenta atque præsidia sint; cor illius studium in plerisque Principibus ita refrixerit, ut paucissimi illam attingant. Quod quidem olim non ita fiebat. Ut enim Homeri Reges omittamus, & de illis etiam fiteamur, qui propius a Troiani belli temporibus abfuerunt; certe constat Philippum Macedoniæ regem eloquentiæ operam dedisse, quod exemplum strenue etiam secutus

370 DE REG. INSTITVT. ET DISCIP.

est illius filius Alexander. Multi deinde illius
successores dicendi laude floruerunt ; & , ne
omnes antiquos Reges oratione commemo-
rem , omnes ferme sic instituti sunt , vt non
infirmitas status sui præsidium in dicendi fa-
cultate constitutum arbitrarentur. Iam vero
in liberis populis ea semper floruit , atque do-
minata est , vsque adeo , vt nemo principem
locum in illis obtinere posset , nisi eloquen-
tia princeps esset. Vt enim hic præteream
Athenas , Spartam , Thebas , Carthaginem ;
& alias imperiosas nationes , quæ huic di-
cendi prudentiæ plurimum semper honoris
atque dignitatis detulerunt ; in ea profecto
ciuitate , quæ orbis terrarum finibus impe-
rium terminauit , innumerabiles ciues sum-
mam auctoritatem & potentiam dicendo con-
secuti sunt. Tantum enim Romæ , postquam
imperium latissime propagatum est , elo-
quentia valuit ; vt nemo confideret , quam-
uis & nobilitate , & rebus fortiter gestis ex-
celleret , facilem sibi aditum ad summam
potentiam datum iri , nisi dicendi laudem
cum militari virtute conjungeret. Inde illi
Claudii , Lælii , Scipiones , & Galbæ , Ca-
tones , multique alii in dicendo principes ex-

nitere ; donec gradibus quibusdam ad illud
 perfectum & absolutum eloquentiæ specimen
 peruentum est , ad quod nemo deinceps ad
 spirauit. Sed nos hic non de Ciceronis elo-
 quentia , sed de mediocri differimus , quam
 in Rege desideramus. Iam vero postquam
 respublica in vnius potestatem peruenit ,
 num fuit in Principibus eloquentiæ studium
 neglectum ? Non certe. Vt enim de Iulii
 Cæsaris elegantiâ , & vrbaniatate nihil dicam ;
 Octavianum certe constat fuisse dicendi lau-
 de præstantem ; ne Tiberius quidem , quama-
 uis multis vitis coopertus fuerit , hac dicen-
 di laude caruit. Nec solum Principes huma-
 niores hanc vnam artem summo studio co-
 luerunt ; sed etiam , quod est magis admiran-
 dum , immanes tyranni , qui non persuaden-
 do , sed cogendo omnia sibi conficienda pu-
 tabant , multum operæ & studii in dicendi
 peritiâ contulere. Nec enim Caligula , ne-
 que Nero , neque Domitianus , nec aliæ pe-
 res hominum , quas dirum reipublicæ fa-
 tum in imperiô collocauerat , sese ab hoc
 studio remouerunt. Quod etiam de Græcijs
 tyrannis affirmari potest. Quod si Tyranni ,
 quorum imperium erat vi atque metu , non

æquitate & humanitate fundatum, existimabant tamen esse sibi necessariam eloquentiam; quid Regibus faciendum est, qui non vt seruile jugum subditis imponant, sed vt pro eorum libertate pugnent, sunt in tam alto honoris & imperii gradu locati?

Quid igitur, inquit T., causæ censes, cur, si ars ista tam utilis atque præclara est, (vt dicis) qua multi perditii homines abusi sunt, apud bonos Reges obsoleuerit? Vt enim cupio linguam hominibus sceleratis abscindi; ita erat optandum, vt boni dicendi gloria præstarent, maxime vero Reges, quorum oratio, vt probare contendis, innumerales utilitates populis afferre potuisset.

Primum quidem, inquam, vitæ molli-
tiam, & luxum, atque desidiam in causa fuisse puto. Eloquentiæ enim laus non sine labore & studio paratur. Deinde suspicor eorum animos, qui otium nimis in principio fuerunt amplexi, diffidentia totum hoc studium abiecisse; otii namque, & languoris, comes extrema desperatio est. Accesserunt adulatores, qui a populi totius rationibus Principes abstraxerunt, in eamque opinionem eos adduxerunt, vt arbitrentur,
id,

id, ad quod imperio cogere possunt, non esse oratione flagitandum. Postremo diuturna temporis consuetudo tantas vires apud imperitos habet, ut, quod est in summa laude ponendum, vitio detur; &, quod vitio verendum, grauitatis & amplitudinis laudi tribuatur. Sic autem factum est, ut Regis infantia summa quædam auctoritas existimetur. Qui autem in hac sententia sunt, non mihi videntur Regem, sed Regis imaginem habere velle. Quid enim inter infantem Principem & mutam imaginem intersit non video. Sed multi in hujus disciplinæ vtilitate explicanda fuimus; quare, ne diutius aures vestras eloquentiæ minime necessariis laudibus obtundam, ad reliqua veniamus.

Hoc tamen in vniuersum dicam de omnibus artibus, quas sumus oratione persecuti: multæ quidem ex illis vtilitates oriuntur; sed ego in duas potissimum respicio. Quarum vna est ingenii acumen; altera modestiæ concinnitas. Vtrumque autem armat animum contra perditorum hominum fraudes & insidias; qui enim ingenio valet, facilius verum videt, & mendacium acriori animi contentione repellit; qui vero moderationis laude
flo-

floret, non facile perturbari, atque de constantia depelli potest. Quomodo autem artes istæ acuant ingenium, satis perspectum & cognitum est; quomodo vero ad humanitatem erudiant, non est exploratu difficillimum. Quidquid enim numerum, modum, atque rationem in omnium rerum peruestigatione considerat; quidquid naturæ constantiam & pulchritudinem summo studio contemplatur; quidquid verum a falso diligenti examine secernit; quidquid se ad hominum mores civilemque societatem accommodat; necesse profecto est, ut animi partes numero definiat, moderarione componat, amore conglutinet, & ad humanitatem instituat. Non igitur is, qui artibus istis deditus est, facile in fraudem induci, aut temere insolenter efferri poterit. Multi tamen illas insectantur. Scio: sed ego hoc potissimum argumento illas salutem atque dignitatem Regibus allaturas confirmare possum; quod tanto odio & contentione ab hominibus profligatis atque perditis oppugnentur. Ut enim, quod laudandum censent, est reipublicæ vniuersæ pestiferum; ita rationi consentaneum est, ut intelligamus, id, quod

ab

ab illis vituperatur , esse reipublicæ saluberrimum. Redigite , quæso , in memoriam quod in principio dixi , mihi eam Principis institutionem maxime probari , quæ fuerit maxime adulatorum institutioni contraria. Quam quidem certe rationem in nostra disputatione secuti sumus ; illi enim vitam umbratilem & delicatam Regibus dignam esse perhibent ; nos solem , & pulverem , & laborum patientiam Regem decere censemus. Illi ad effrenatam libidinem Reges instituunt ; nos ad summum studium honestatis & laudis excitamus. Illi ad superbiam & odium hominum Principes instruunt ; nos illos ad omnem rationem temperantiæ & humanitatis excolimus. Illi postremo Principes sensibus & iudicio spoliare conantur ; nos vero illorum mentem acuere & illustrare contendimus. Ea autem de causa fit , ut quemadmodum illi omnes bonas artes Regibus indignas esse confirmant ; ita nos liberalem eruditionem dignissimam esse Regis amplitudine iudicemus. Sed , ut illis spem omnem decipiendi Regis incidamus , cauendum est , ne illud adulationis initium , quo impuri homines innituntur , nimis excitari &

exur-

exurgere patiamur. Iam enim, si meminissis, a nobis dictum est, non tam facile fieri posse, vt in hominum potentum sensus adulatores irreperent, nisi prius societatem cum adulate illo primario, qui intra pectus vniuscujusque latet, inirent.

Hoc quidem, inquit T., recte memoria teneamus.

Nec illud quidem, inquam, vos obliuiscimini, arbitror, adulatorem illum summum, qui in suam familiaritatem adulatores aduentitios admittit, esse amorem illum, quo se quisque nimis insane complectitur, qui tanto vehementior esse potest in Regibus, quanto status illorum est amplior, & opulentior, magisque ad diuinitatem quamdam inter homines accedit.

Recte, inquit; sed, quorsum hæc modo repetantur, exspecto?

Periculum igitur, inquam, est, ne se tantum ament, vt omnem imbecillitatis humanæ memoriam deponant; &, quemadmodum Poetæ fingunt Narcissum ex sui ipsius amore contabuisse, sic ipsi amore sui pereant. Nam cum omnis amor errorem imperitis objiciat; tum is, quo sibi quisque blanditur, atque le-

necinatur, animum omni sanitate spoliat. Eo
 igitur magis Principum animos excæcabit,
 quo se illi amant acrius atque vehementius.
 Quare prius hoc intestinum malum sanan-
 dum est, quam externa, & aduentitia repel-
 lamus; hoc autem multis rationibus fieri po-
 terit. Est igitur statim a primis annis opera
 danda, ut Principum arrogantia minuatur;
 itaque dum pueri sunt, videamus, an possi-
 mus impetrare ab illis, qui Principi, in nu-
 tricis adhuc gremio constituto, quasi cæle-
 sti numini hostiis propemodum litant, ut
 aliquid de tam immodica superstitione de-
 trahant. Deinde in ætatis progressu velim
 delicias paulatim imminui, & seueriorem
 disciplinam adhiberi; tum etiam illorum
 cultum ita temperari, ne vel nimio vestium
 nitore inaniter efferantur; vel sordido & ob-
 soleto animum demittant. Illud etiam ad-
 monendi sunt omnes, qui Principes institui-
 unt, ne minimi faciant ea, quæ, postquam
 sunt adulta, & usu vitæ confirmata, sensim
 ad perniciem publicæ salutis illabuntur. Quid
 autem est, quod maiorem aditum ad omne
 malum patefaciat, quam crebra legum atque
 morum commutatio? Quam reipublicæ va-
 rie-

378 DE REG. INSTITVT. ET DISCIP.

rietas & inconstantia ? Quam frequentes rerum sine magna aliqua vtilitate nouitates ? Vt enim arbor crebrius agitata , & a loco in locum mota , altas radices agere nequit ; ita respublica stirpe firmari non poterit , si fuerit sæpe legum mutatione & varietate conuulsa. Accedit , quod , cum leges sæpe mutantur , facillime contemnuntur ; legibus autem contemptis , vitæ perturbatio sequitur , & foeda morum confusio , reipublicæque totius exitium. Quod ne eueniat , statim a primis annis Rex admonendus est , vt patriæ mores amet , & patriæ leges , & instituta , & patriæ etiam cultum atque vestitum ; hoc enim primum est regiæ grauitatis & constantiæ. Deinde continet amoris in patriam argumentum ; deinde sumptibus immodicis modum statuit ; omnes enim non in moribus tantum atque vita , sed etiam in vestitu Reges suos imitari cupiunt. Si Rex igitur vestitum sæpe mutauerit , omnes idem certatim facient ; & ita opes , quæ erant in vitæ præsidium conferendæ , in leuitate consumunt. Quis autem non videt ex profusis sumptibus egestatem , ex egestate desperationem , ex desperatione facinora capitalia , qui-

quibus respublica in extremum discrimen inducitur, exoriri? Quid illud deinde, quantum mali est? Diuites enim culti paulo elegantius insolescunt; pauperes autem vel animos abjiciunt, vel, ut possint similiter vestiri, furantur & latrocinantur; aut, ne illam indignitatem subeant, patriæ interdum insidias moliantur. Postremo hæc animorum mutabilitas, qua potentes homines, Principum vestigiis ingressi, diebus prope singulis externis cultibus ornari gestiunt, facit, ut moribus etiam externis oblini gaudeant. Inde igitur paulatim legum, & reipublicæ immutatio nascitur; quod cum sit, nemini dubium esse potest, quin patriæ fatalis exitus appropinquet. In omnibus autem rebus, qui maximum malum vitare cupit, opus est, ut malum exoriens extinguat; postquam enim fuerit vetustate corroboratum, frustra illud depellere conabitur. Cum igitur hæc vestium crebra mutatio tantum in se malorum seminarium contineat; caueant omnes; qui Regum filios moribus informant, ne illi vestium externarum varietate glorientur. Multa quidem remedia animi turgentis attulimus; sed nullum eorum, meo quidem iudicio, adeo effi-

380 DE REG. INSTITVT. ET DISCIP.

efficax est , vt omnem tumorem sanare possit. Alia igitur remedia vehementiora nobis videnda sunt ; sed valde timeo , ne mihi male procedat hæc medicina.

Quomodo , inquit T.

Quia , inquam , hæc leuiora , quæ perstrinximus , vix homines vrbani atque laut ferre possunt ; quo igitur modo grauiora tolerabunt ?

Quid ? inquit ille : offensionis alicujus metu aliquid , quod ad commodum publicum pertineat , silentio præteribis ?

Nullò , inquam , modo ; verumtamen ad hanc sententiam a moribus nostris abhorrentem explicandam cum timore ingredior. Vereor præterea ne fastidio vobis sim , si tam sæpe eandem iterabo sententiam. Sed fieri aliter non potest. Dictum est non semel , fieri non posse , vt aliquis imperare sciat , nisi obedire multo ante didicerit. Nec enim bonus gubernator nauis extitit , qui non prius multis annis nauatæ fuerit ; nec imperator egregius esse quisquam potuit , qui non prius diu sub aliquo bono imperatore militauerit ; nec architectus quidem , nisi multis annis operam alicui architecto præstanti de-

dederit; & , ne singula recenseam , nemo cum laude alicui artificio præesse vlllo modo poterit , nisi prius diligentissime artis illius magistro paruerit. Quid igitur de Rege dicendum ? Non ne videtis , quam difficile sit alios regere illum , qui nullius vnquam imperium passus est ? Quo igitur Regis munus est amplius , & difficilius ; eo diligentius obtemperare debet , & alacrius imperata conficere , vt imperandi scientiam facilius consequatur. Hoc enim obediendi studium , & regendi scientiam efficit , & animo moderatur ; quorum vtrumque tam necessarium est , vt aliter regnum feliciter administrari nequeat. Nec enim Rex imperitus , nec immoderatus ferri vlllo modo potest. Est igitur necesse , vt non modo parentes sancte colat ; sed etiam magistris obediat , pædagogum timeat , senes vereatur , monitoribus auscultet , & omnibus denique , qui illum bonis moribus informare possunt , morem gerat , obsequatur , obtemperet. Seruiat deinde (vt jam diximus) pudori , seruiat laudi , seruiat honestati. Cum vero ætate procefferit , intelligat etiam , se multo magis esse legibus , quam omnes , qui illius imperio contineantur , alligatum. Omnes
enim

382 DE REG. INSTITVT. ET DISCIP.

enim cum intuentur, & mores quisque suos illius exemplo & imitatione conformant. Si viderint igitur leges ab illo contemni, illas etiam percurrere conabuntur; si vero eas sancte ab illo conseruari perspexerint, nemo illarum religionem violare audebit. Præterea Regis officium est omnia, quæ rempublicam conseruant, summo studio, cura, vigilantia, sedulitate tueri. Nihil est autem quod magis rempublicam conseruet, quam leges. Est enim lex mens omni perturbatione vacua, a mente diuina hausta atque delibata; honesta atque salutaria præscribens, prohibensque contraria. Rex igitur est legum custos, & vindex, publicique juris administer. Ergo, cum leges transgreditur, officium suum prodit, rempublicam fidei illius commissam labefactat, Dei in se numen acriter incendit. Deinde quid proderit ciuibus, legis metum injicere, si eosdem ciues exemplo nequitiz ad contemptionem publici juris induxerit? Nec enim metus diu in officio homines continere potest, maxime vero cum ea opinio accepta fuerit, non esse dignitatis legibus parere; at ubi leges a populi rectore negliguntur, omnes, qui aliquid in republica
opi-

opibus & gratia valent, opinantur ignominiosum esse legibus adstringi. Itaque ubi viderint violandi juris facultatem oblatam, eam minime præteribunt. Rex igitur, qui leges contempserit, vniuersam rempublicam exemplo sceleris & injuriæ dissipabit.

Præterea quæ maior dementia potest esse, quam id dedecus existimare, quod decus & dignitatem constituit? Sunt enim leges diuinæ benignitatis munera, sapientiæ decreta, humanæ societatis foedera sacrosancta. Illæ iniquitatis violentiam coercent; insidiis & fraudibus obsistunt; honestatis disciplinam continent; turpitudini & flagitio repugnant; discordiarum materiam amputant; belli subsidia comparant; pacis & otii dignitatem constituunt; totumque reipublicæ statum firmo præsidio corroborant, multisque opibus & ornamentis afficiunt. Qui igitur se legibus addicit, seruit sapientiæ, seruit honestati, seruit immortalitati, seruit officio & religioni, illustribusque in rempublicam meritis viam in cælum præclare munuit. Quid igitur, seruire flagitio & impuritati, hoc dignitatem habebit? Et Principes, qui suis æffrenatis cupiditatibus fuerint obsecuti,

ti, dignissimi habebuntur, quibus reliqui homines vitam atque salutem suam permittant? Parere autem legibus, hoc est, honestatis & officii sanctissimi disciplinæ, id Regem dignitate spoliabit? Græci quidem olim statum reipublicæ *κόσμον*, id est ornatum, appellabant. In quo quidem Homerum sequuti sunt, qui Reges *κοσμητῆρας* nominabat, quasi ornamentorum, quibus populi excoluntur, effectores. *κλέμα* autem nomine Græci mundum etiam significant, propter naturæ pulchritudinem & concinnitatem. Eodem igitur nomine, quo naturæ vniuersæ ornatum & conuenientiam nominabant, statuerunt hominum cœtum jure deuinctum appellari posse. Nec enim dubium est, quin status reipublicæ legibus fundatus, moribus ornatus, in quo ciues omnes, inter se publico fœdere colligati, de publica salute vna mente & voce consentiunt, ordine, conuenientia, & pulchritudine, mundi ornatum & constantiam imitetur. Neque male Lacedæmonii, qui rectores populorum *ἁρμοστὰς* appellabant, quasi harmoniæ & publici concentus architectos, & concordiæ, mutuæque ciuium inter ciues conjunctionis auctores. At hunc
orna-

ornatum reipublicæ, hanc pulchritudinem & elegantiam, hunc admirabilem animorum concentum & harmoniam leges efficiunt. Principes igitur, qui leges contemnunt, rempublicam omni ornamento nudant, & de statu conuellunt, & omni crudelitate dilacerant.

Non igitur inconsiderate quidam homines doctissimi hoc discrimen inter Regem atque Tyrannum esse decreuerunt: quod Tyranni imperium legibus solutum & infinitum sit; Regis vero imperium legibus & æquitate definitum. Itaque præclare Theodosius, ut ostenderet, quam longe a Tyranni immanissimis moribus abesset, se legibus alligatum esse professus est. Præterea quæro, quis vnum hominem ad tantam dignitatem extulit, ut reliqui omnes illum venerabundius suspicerent, colerent, obseruarent? Illius imperium sine vlla recusatione sequerentur? Quis illius statum omnium ciuium studio, caritate, atque fidelitate muniuit? Quis autem, ut de reliquis sileamus, effecit, ut omnes nos Regem puerum, qui decem annos natus est, certatim amemus, obseruemus, veneremur, atque adeo pro illius salute & dignitate

mori cupiamus ? Leges profecto. Cum leges dico , non leges tantum scripto , quod volunt , sancientes , sed etiam publice receptos mores , qui eandem omnino vim habent , intelligo. Princeps igitur , qui legibus interitum affert , impius atque parricida est. Leges enim , quæ cum in lucem ediderunt , aluerunt , & auxerunt , quantum in se est , de medio tollendas curat. Deinde furiosus & amens est ; status enim sui præsidia conuellit , potentiaque suæ nervos elidit , cum leges , quibus illius salus , & dignitas , & imperium nititur , euertit. Possunt illæ quidem ferri , si nondum latæ sunt ; aut emendari , si ita tempus & ratio flagitat ; aut æqua interpretatione molliri , si duriores visæ fuerint ; negligi vero , aut violari , aut contemni , sine summa Principis ignominia , sine dignitatis totius interitu , sine reipublicæ peste atque pernicie non possunt. Sed occurrunt alia adulatorum turba , prudentiæ nomine commendata , qui , vt se in gratiam Regum insinuent , illis persuadent , eos esse supra leges. Cambyfes , Cyri filius , cum vellet sororem , quam perditæ amabat , sibi matrimonio conjungere , de Magis quæsiuit , vtrum

id

id legibus liceret. Negant illi, matrimonium illud apud Persas esse communi jure concessum ; esse tamen apud illos legem , quæ decerneret , Regibus licere quidquid liberet ; ea igitur lege matrimonii illius licentiam Regi permitti , quæ erat aliis omnino præcisa. Anaxarchus , cum Alexander ob Clyti necem , quem occiderat , in summo luctu versaretur , his verbis Regem a moerore auocauit : Num ignoras , o Rex , Themim atque Iustitiam assidere Ioui , vt , quidquid illi cordi fuerit , confestim sanciant ? Quod quidem ille sic interpretabatur , vt omne , quod Regibus facere collibuisse , jus & fas esset , quamuis id nefarium & iniustum multis esse videretur. Thrasymachus Calcedonius Principum vtilitate , & libidine , jus omne definiebat ; iustitiam enim in eo sitam esse dicebat , vt subditi Principum iussis obtemperarent , Principes autem omnia ad vtilitatem suam reuocarent ; & ita fieri , vt nihil aliud esset jus , quam eorum , qui plurimum in republica possunt , vtilitas. Vnde concludebat , Iustitiam esse bonum alienum , & malum proprium : mihi enim , si iustitiam collerem , iustitiam nocere , illisque tantum prodesse , quorum vtilitati seruiebam.

Sed quorsum hæc in medium attulimus? Vt planius intelligatur, nunquam in regnis, & ciuitatibus homines sceleratos defuisse, nec ullo vnquam tempore defuturos, qui Principes erroribus turbulentis inficiant. Quibus quidem illi annumerandi sunt, qui, cum se jureconsultos existimari velint, Regibus persuadent, illos omnino solutos esse legibus.

At inquires, Cæsarem Octauium olim Senatus decreto fuisse legibus solutum.

Quid mirum? Armis enim, & potentia Cæsaris afflicta respublica nihil aliud poterat libere decernere, nisi se libertatem amisisse: cum igitur Cæsarem legibus soluebat, illum plane Tyrannum nominabat. Fuit quidem ille natura clemens, atque benignus; qui tamen Tyrannum fuisse negauerit, mentis expers existimandus erit. Si enim Tyrannus est, qui imperat inuitis, qui non populi vtilitatem pæcipue, sed propriam dominationem & emolumentum respicit; quomodo Tyranni nomine carebit is, qui oppressit armis rempublicam? Qui omnia consilia ad amplificationem suæ potentix reuocauit? Cujus imperium non fuit vlllo juris termi-

mino circumscriptum? Nos autem hoc in loco non de Tyranno, sed de Rege differimus. Regis autem officium esse disputamus; leges sanctas habere, earum mentem intueri, illarum sanctionibus obligari. Si enim Lex est recta ratio, deterrens a flagitiis, & ad studium honestatis impellens; Regisque officium sit, omnes flagitiorum labe a republica summa contentione repellere, & studia laudis & dignitatis excitare; quid magis illius muneri consentaneum esse potest, quam se legibus adstrictum profiteri? Sic enim magis exemplo, quam imperio rempublicam facillime gubernabit. Inquit tamen adulator: Imminuis tu quidem Principis maiestatem. Imo tu auges amentiam. Parui & angusti animi est, vereri leges. Imo profligati atque perdit; eas despiciere. Non est regium habere voluntatem alligatam. Imo nihil magis regium est, quam vinculis arcere libidinem. Miserum est, non facere omnia, quæ velis. Miserius certe multo est, velle facere, quod non licet; id tamen longe miserrimum, posse facere, quod ita velis. Ut enim amens & furiosus, quo se confidentius ferro succinxerit, eo facilius in se pestem machinabitur;

ita

ita Tyrannus quo maiores opes habuerit , eo grauiorem sibi calamitatem importabit ; hoc autem statuendum est , fieri nulla ratione posse , vt non seruiamus. Aut enim legitimum rationis imperium sequimur ; aut importunæ tyrannidi libidinis obtemperamus : si rationem sequimur , laudis & dignitatis serui effici-mur ; si vero libidinem , dedecoris atque turpitudinis dominatu premimur. Plurimum vero inter vtramque seruitutem interest. Seruitus enim , qua honestati paremus , non est proprie seruitus , sed libertas appellanda. Si enim libertas est facultas viuendi , vt velis , certe cum natura mentis nostræ sit honestatis appetens , & a turpitudine vehementer abhorreat , sequitur , vt , cum seruit honestati , id faciat , quod vult ; cum vero seruit libidini , id in vita moliatur , quod eam importuna vis cupiditatis facere compellit. Ego igitur , cum Regem legibus adstringo , illius libertatem atque dignitatem tueor ; tu vero , cum eum legibus soluis , eum efficis assentatione tua libidinis effrenatæ mancipium. Præclare Demaratus , cum apud Xerxem exularet , eum admonebat , vt Lacedæmoniorum , qui Thermopylas insidebant , congressum formidaret :

non

non enim , inquit , omnino liberi sunt , legibus enim seruiunt ; ita vt pro illarum sanctitate minime dubitent vitam profundero. Quod autem Demaratus prædixit , euentu comprobatum fuit. Omnes enim pro libertate Græciæ , vt eos leges facere admonebant , fortissime dimicantes occubuerunt. Vnde colligitur leges non modo in pace rempublicam florentem , omnibusque bonis affluentem reddere ; verum etiam in bello fortem , strenuam , & inuictam. Tollunt enim discordias , animosque militum foedere firmo consociant , ignauiam plectunt , virtutem remunerant , signa sequi , ordines seruare cogunt. Vnde factum est , vt omnes reipublicæ , quæ fuerunt olim legibus optime constitutæ , imperium latissime propagarent , & tamdiu in eo permanerent , quamdiu leges apud eas plus rebus omnibus valuerunt. At , postquam leges hominum potentium libidine conuulsæ sunt , ne vestigium quidem pristinae dignitatis , & imperii in aliqua illarum remansit. Cum igitur reipublicæ salus , dignitas , ornamentum ; cum Regis ipsius officium , maiestas , & amplitudo ; cum pax , libertas , omniumque bonorum affluentia ;

cum

cum regni securitas , imperium , & propugnaculum , in legibus constitutum sit ; possumus ne quidquam facere conuenientius , non solum ad tollendam inflatæ mentis elationem , verum etiam ad ipsius Regis statum valido atque firmo præsidio muniendum , quam inculcare illius animo , vt neque se , neque quemquam alium plus in republica valere patiatur , quam leges ? Hoc igitur remedium , quod in jure consistit , non opinor , negabitis esse commodum atque salutare. Sed aliud adhuc restat , ad arrogantiam sedandam (vt arbitror) efficacius.

Quid ? inquit T. ; aliquid ne potest esse iis remediis , quæ attulisti , ad arrogantix morbum sanandum vehementius ?

Potest quidem , inquam , meo judicio.

Quod illud tandem , inquit , est ?

Pulchritudinis , inquam , veræ cognitio : vos igitur admoneo , vt me nunc multo attentius audiatis ; de pulchritudinis enim elegantia , & venustate , de decoris excellentia , de amoris vi atque ratione , de morbis , qui amorem sæpenumero consecuntur , edisseram.

Hic M. ridens inquit. Quod ad pulchritudinem & amorem attinet , auditores ha-

bes

bes minime ab ista materia , quam tractandam suscipis , alienos ; nimis enim diu nos amor , atque vehementer afflixit. Nunc autem partim , quia suspicor eam disputationem nobis non mediocri voluptate fore ; partim vero , quia scire aueo , quid amor , aut pulchritudo valeat ad arrogantiam minuendam , multo libentius tibi operam dabo.

Id quidem , inquam , ostendam , si potero. Dixi , si meministis , omnem tumorem animi , omnem insolentiam atque fastidium ab illo amore nasci , quo se quisque plus omnibus rebus amat.

Id quidem , inquit T. , memoria tenemur.

Id etiam , inquam , velim recordemini , positum esse amoris insani vi mentem excæcari : id secuti quidam sunt , ut amorem cæcum fingerent. Cum vero hic amor , quo nos ipsi amamus , omnium vehementissimus plerumque sit ; consequens est , ut nos omnino , nisi fuerimus in nostri custodia vigilantes , mentis oculis orbet , animisque nostris maximas tenebras offundat. Qui quidem tanto plerumque maior est in Principibus , quam in reliquis hominibus ; quanto plura illis
sup-

suppetunt amoris hujus lenocinia. Sic autem euenit interdum , vt is , quem sapientissimum esse oportet , summa amentia perturbetur. Possumus ne igitur quidquam elegantius facere , quam amorī oculos restituere ? Nec enim ferendum est , vt venustatis & elegantiae , & totius pulchritudinis ardens studium execranda cæcitate laboret ; ita , vt pro pulchris sæpenumero deformia furenter amplexetur. Quod ne eueniat , vtilissimum arbitror demonstrare , quæ sit vera pulchritudo. Amor enim , nisi specie pulchritudinis objecta , excitari non potest. Est enim Amor (vt jam dictum est) pulchritudinis , & honestatis appetitus , cum ardenti cupiditate illius fruendæ conjunctus. Vt igitur omne , quod est turpe , ineptum , & indecorum , offendit oculos , alienat animos , & ab amore auertit ; ita , quidquid est venustum , & elegans , oculis gratum & iucundum est , & animos ad se amandum inuitat & allicit. Qui igitur se nimis amat , se valde pulchrum opinatur ; aliter enim se amare non posset. Nunquamne vidistis deformem & insulsam mulierem , amore sui ipsius insanire ? Hoc certe fieri non posset , nisi se pulcherrimam
ju-

judicaret : hac autem stultitia fit , vt jucunde interdum viuat ; ita tamen , vt risum multis moueat. Ad hunc modum statuite hominem , qui sibi valde placet , hæc secum cogitare. Ne ego bellus sum ! & mihi pulchre est ! lepore enim & venustate circumfluo. Hujus autem morbi remedium quod salutaris excogitari potest , quam veram pulchritudinem oculis intueri ? Fiet enim , vt qui se sine ratione atque sine rivali (vt aiunt) amabat , multum de illo amore aut potius insania remittat. Quod si Regi hoc persuaderi (vt confido) potest , totum negotium confectum existimabo. Vultisne igitur illi pulchritudinis rationem tradamus , ne vnquam sine ratione vel se , vel quidquam aliud amet ?

Imo , inquit T. , percipimus.

Meditabor , inquam , igitur , an illum possim in meam sententiam hac ratione traducere ; sic igitur existimate , me cum illo loqui. Sæpenumero , Princeps Maxime , & Potentissime , venit in mentem mihi admirari , quid sit illud , quod impulerit hominum multitudinem ad tantum honorem vni homini deferendum ; vt illum omnes ament , illi obtemperent , illi seruiant , ex illius vultu pendeant ,
illum

quiritur ; ibi facilius deprehenditur ignauia , vbi virtus eximia flagitatur ; ibi dedecus animos grauius offendit , vbi maius exemplum decoris & honestatis expetitur. Idcirco factum est , vt , quamuis immanes Tyranni ingentes opes habuerint , nullum ex imperio decus assequerentur ; sed omnes sceleris infamia conflagrarent.

Præterea aliud est ipsa dignitas , aliud id quod dignitate comparatur. Ineptissimum igitur est , cum inquirimus , quid illud sit , quod Reges imperio dignos efficiat ; ipsi imperio causam totius dignitatis ascribere. Præterea id , quod Regem honestum & admirandum facit , non est extra Regem ; sed in ipso Rege collocandum. Aliter enim non Regi honorem , sed opibus illius haberemus. Quo igitur indignus est tua maiestate , te non propter te , sed propter opes tuas obseruari ; eo pluris facere debes obsequium hominis , qui tam sedulo peruestigat illud , quod nomen tuum luculenter exornat , vt omnes honores posthac non opibus tuis , sed tibi ipsi deferantur. Summa autem hæc est , cum de Regis pulchritudine differimus , vt non pulchrum imperium , neque pulchrum aurum , neque pulchras vestes ,
neque

que pulchra monilia ; sed pulchrum Regem exquiramus. Illa igitur pulchritudo tua, quæ tantum tibi amoris & gratiæ conciliat , ubi sita est ? Num in corporis istius specie ? Factior equidem , neque tibi formam regiæ dignitati congruentem , neque oris decus & elegantiam deesse ; sed illud cogitare debes , si tantum esset corporis formæ tribuendum , cum multæ virgines sint , & non pauci forsitan adolescentes , qui te corporis venustate superent ; sequi necessario , ut vniuersa ciuium multitudo te relicto eos , qui te pulchriores essent , admiratione quadam attonita sectaretur. Præterea quiuis morbus (quod omen Deus auertat) facile istum candorem inficere , & speciem deformare potest. Ut autem nihil aliud interueniat , ætas certe ingrauescens faciem istam rugis exarabit , omnemque florem venustatis extinguet: quod si propter formam corporis amandus esses , cum formæ interitu tuorum in te amor , & studium tui nominis interiret. Nos igitur in te non virginis speciem & venustatem ; sed Regis excellentem dignitatem intueri cupimus , eamque minime regiam formam arbitramur , quam morbi vis contaminet , ætas

do-

396 DE REG. INSTITVT. ET DISCIP.

ſſum denique in Dei loco venerentur. Quod quidem non temere, neque ſine cauſa fieri videtur; id enim, quod in omni loco ab omnibus tanta conſenſione fit, nec ad fortunæ temeritatem, nec ad hominum ſtatuta; ſed ad naturæ legem videtur eſſe referendum. Quæ autem gens eſt, aut tanta humanitate culta, aut tam immanis & barbara, apud quam Regis nomen non ſanctiſſimum habeatur? In quanto autem amore Reges ſint omnibus, vel ex hoc intelligi poteſt, quod quoties pedem extra limen efferunt, pueri curſitant, viri feſtinant, ſenes, quantum poſſunt, accelerant; virgines etiam, & honeſtæ mulieres pudore teneri non poſſunt, quo minus exeat, vt illius aſpectu fruantur. Quacumque autem vehitur, omnes illi omnia bona precari, manus in cælum tendere, & fauſtis acclamationibus ſtudium ſuum apertiſſime profiteri. Hoc igitur cum non raro, ſed plerumque non ab vna gente, ſed ab omnibus fieri videamus, tanti amoris cauſa eſt nobis diligentius exploranda. Non enim aliquid humanum, ſed diuinum videtur eſſe id, quod tam ardens ſtudium multitudinis incendit, & ſe vera, cum imperandi munus diuinum ſit,
con-

modo intelligatur , corporis speciem & pulchritudinem multum inter omnes res pulchras , quæ oculis cernimus , excellere. Inde factum est , vt nemo vnquam amore vestis pulchræ vitam in discrimen intulerit ; & multi pulchri corporis amore mortem sibi consciuerint. Non enim , vt est apud Plautum , vestem amatores mulieris amant , sed vestis fartum. Quod si tantas vires habet amor insigni specie corporis excitatus , vt multos stupore mentis opprimat , & ad insaniam redigat ; quantam tandem admirationem commouebit animi pulchritudo , mentis oculis vsurpata ? An non est consequens , vt , quemadmodum nihil esse potest in omni natura mente & ratione præstantius , ita nullum decus sit animi decore magnificentius ? Accedit , quod nemo ex amore hujus pulchritudinis insanit ; sed potius miros sapientiæ fructus excipit.

Vt autem melius possimus , quanta sit animi dignitas intueri , commodum erit illius partes oratione perstringere. Prima igitur pars est mens & ratio , cum mente diuina & muneris similitudine , & cælesti (vt ita dicam) agnatione conjuncta. Huic dein-

de pars illa subiecta est , in qua irarum ardor existit , contumeliam & indignitatem acri contentione repellens. Tertia pars est voluptatis appetitio , ea , quæ videntur suauia atque iucunda , vehementer arripiens. His autem singulis partibus aliæ subjiuntur , quas , ne longior sim , quam instituta ratio postulat , omitto. Cum vero hæ partes omnes numero , & modo continentur , & ratione conjunguntur , & mentis lumine collustrantur , tantum ex illis ornatus exoritur , vt diuinam pulchritudinem & dignitatem referant. Nec enim flagitiosa voluptas animo dedecus inurit; nec inanis dignitatis species mentem de statu conuellit ; nec ullus tumultus excitatur , qui rationem perturbet. Honoris enim studium rationis imperium sequitur ; voluptatis autem libido honestatis moderatione comprimitur ; mens autem , & ratio clarissimum lumen præfert , atque pro jure suo moderatur ; obtinet enim natura in animo principatum , partes languentes incitat , impotentius elatas coerct , & singulas sedibus propriis continet , & , quousque illis progrediendum sit , lege præscribit. Itaque dissipata conjungit , dissoluta conglutinat , omniaque lege & ordine

ne moderatur , & magnitudine diuini cuiusdam splendoris & claritatis illuminat. Sic autem fit , vt nihil impedire possit rationem , quo minus vitæ finem videat ; & , quo sint omnia studia referenda , cognoscat ; & , quid sit verum , & rectum , & simplex , sapienter exploret ; & statui totius animi consilio salutare prospiciat. Illa vero pars , in qua summa decoris appetitio & turpitudinis acris offensio viget , nunquam temere ruet , illudque tantum certamen inibit , quod rationis imperio fuerit institutum. Nec illa quidem pars , quæ voluptates exquirat , immoderate iactabitur ; nec ita se projiciet , vt animo dedecus inurat , & pro voluptate grauem dolorem efficiat. Ergo cum voluptas cum honoris appetitu consenserit ; honoris autem & laudis studium a rationis imperio minime desciuerit ; extabit & eminebit illa summa dignitas & pulchritudo , admirandaque honestatis elegantia , qua nihil possit aptius , & conuenientius , & illustrius excogitari. Hinc autem colligitur illos tantum esse pulchros , qui sunt sapientes , & fortes , & moderati. Quid enim esse potest amentia & temeritate deformius ? Quid vel præcipiti ambitione turbulentius , vel timi-

ditate & ignauia turpius? Quid libidinis immanitate flagitiosius? Hæc enim mala animi totius statum euertunt; decus insigni flagitiorum omnium labe maculant; omnemque pulchritudinis elegantiam foede atque flagitiose contaminant. Accedit ille angor & cruciatus, quibus assidue torquentur illi, qui animum flagitiis deformatum gerunt. Vt enim animi pulchritudo est cum aliis omnibus, tum illi ipsi, in quo inest, amabilis atque iucunda; sic deformitas & turpitudine non aliis tantum, sed etiam illis ipsis, qui ea deprauati sunt, est odiosa, & inuisa, grauissimisque in omni vita suppliciis obnoxia. Ex quo sequitur, omnes deformes esse miseros, & calamitosos; pulchros autem, florentes atque felices, omnique stabili, & firma voluntate, & singulari gaudio cumulosos.

Cum igitur nemo diu amari possit, nisi pulcher sit; pulcher autem nemo sit, nisi qui & sapiens & magnanimus, & in omni vita moderatus est; efficitur, si vere te omnes tui amant, ut his laudibus omnibus cum omnium admiratione circumfluas. Præterea cum pulchritudo nihil sit aliud, quam illarum partium, quas memoraui, lumen, consensus,

&

& conspiratio ; iustitia vero sit animorum concordia, partium conuenientia, stabile fœdus, atque firma conuentio, & prudens, & fortis, & apta moderatio ; concluditur, omnem clarissimæ formæ dignitatem splendore iustitiæ contineri. Primum igitur videamus, an sis jam sapientiam affecutus ; labi enim, errare, decipi, cum omnibus flagitiosum & turpe sit, tum illis, qui reliquos homines prudentia & moderatione sua tuendos suscipiunt, longe turpissimum. Quod si nondum sapientiam es adeptus, nec aliis quidem laudibus ornari poteris. Nec enim fortis est is, qui non intelligit non esse contra animi dignitatem, sed pro dignitate dimicandum, & omnem viam verissimæ dignitatis ignorat. Neque moderatus is, qui modum & rationem, qua est coercenda libido, omnesque partes animi in officio continendæ, non tenet. Iustitiæ vero laus, cum in illarum partium conuenientia & moderatione consistat, qua tandem ratione extare poterit in illo, cujus animus fuerit partium dissentione perturbatus, & immoderatione cupiditatis euersus ? Ergo vbi sapientiæ studium non viget, ibi nullus splendor honestatis eminebit. Sin au-

tem

tem jam tibi sapientiam parasti , qua non te solum , sed vniuersam rempublicam feliciter regas , quæro rursus vnde illam accepisti ?

Benignitate tua singulari fretus , o Princeps Humanissime, hæc omnia scrutor, omnibusque vestigiis indago, confidoque futurum, ut, cum intellexeris, quod animo hæc adeo curiose vestigem, mea sedulitas minime tibi molesta sit; non mediocrem enim opinor fructum ex ea percipies. Hoc igitur scire sane velim, num tu ipse sine vlllo magistro sapientiam affecutus sis, an illius magistrum habueris. Si per te nixus ad sapientiam peruenisti, vehementer admirabor. Si enim ne alea quidem ludere quisquam potest, nisi sibi magistrum ludendi peritum adhibeat, quo tandem modo quisquam sapientiam, rem vnam omnium clarissimam atque difficilimam, sine doctrina percipiet? Si vero sapientiæ regię magistrōs habuisti; rursus quæro, an illi fuerint ostentatione tantum & leuitate, an virissimo studio, & vitæ grauitate, & constantia sapientiæ disciplinam professi. Deinde quomodo id constare tibi potuerit. Vt autem plane constiterit, cupio scire, quanta illis attentione aures præbueris; postremo quantum

tum temporis in artem tam utilem & necessariam contuleris. Nec enim res tam præclara a quouis magistro tradi, aut quauis animaduersione percipi, aut breuissimo tempore perdisci potest. Ergo cum, ut alia omnia tibi fuerint ad sapientiam comparandam valde opportuna, tamen & ætate puerili impeditus, & temporis angustis admodum spatiis exclusus, sapientiam assequi nequueris; reliquum est, ut minime tibi sapientiam arrogare debeas. Quod si nondum sapiens es. (pace tua dixerim) ne pulcher quidem habendus es. Quod igitur est, quod in te tam vehementer amemus? Ingenium mirabile, indolem ad virtutem plane regiam, spem denique ipsam, quam de futura tua pulchritudine & dignitate concipimus. Nec enim dubitamus, quin, si istius præstantis naturæ vim excitaueris, & te diligenter ad disciplinam honestatis applicueris, & homines ad tuam familiaritatem in omni genere virtutis excellentes asciueris, sis ad illum sapientiæ gradum peruenturus, in quo diuinæ in te formæ splendor eluceat. Tibi igitur tunc dulcis, & amabilis, atque iucundus esse poteris, hominumque admirationem commouebis,

his, tuorumque voluntates ad te amandum vehementer allicies : nec enim tunc te libidinis impuritas inquinabit, neque mortis metus a pulcherrimis factis auocabit, nec vlla dementia te opprimet ; & cum firme constitueris aut honeste viuendum, aut honestatis retinendæ gratia moriendum, nullum periculum, quod ad augendam & amplificandam dignitatem pertineat, effugies. Nulla igitur tunc labe commaculari poterit tam excellentis decoris amplitudo. Et cum omnes turpitudinum notas summa contentione vitaueris, tum vel maxime illud insigne dedecus a te longissime propulsabis, quod superbia & arrogantia continetur. Nihil est enim inani mentis elatione, & leuitate furiosius, atque detestabilius. Si igitur hæc tam diraplestis in animum tuum inuaserit, & tibi falsa specie grauitatis illuferit, omnes opes honestatis tibi detrahet, odiumque in te omnium hominum acerrime concitabit. Vt enim voluntates humanitate & modestia conciliantur ; ita fastidio & insolentia offenduntur.

Præterea si, perditorum hominum sermonibus inductus, existimaueris nihil jam tibi ad summam gloriam deesse ; languescet
in-

industria tua , studiumque virtutis omnino restinguetur , nec ad eam laudis amplitudinem , ad quam te naturæ præstantia vocat , aspirabis ; sed , fallaci honestatis imagine delusus , sempiternum dedecus & ignominiam subibis. Quo enim indoles animi tui clarior est , eo turpius erit ignaviæ detestandæ flagitium. Nullam igitur opem afferunt tibi quidam homines perditissimi , qui ita omnia tibi tribuunt , quasi jam pridem sis dignitatem istam , de qua differimus , affecutus : imo tibi pessime nocent ; excellenti enim mentis istius altitudini impedimento sunt , quo minus dedecus immortale sibi comparet. Quomodo enim summa contentione pugnabis , vt ad amplitudinem dignitatis summæ peruenias , si te jam eam plane consecutum esse suspicatus fueris ? At sine ardenti studio , sine summa industria , sine acri totius animi contentione , nemo vnquam poterit specie & claritate regis dignitatis excellere. Quare tam sceleratam hominum nationem , qui tibi dedecus æternum imprimere volunt , a te repelle , tuæque naturæ bonitatem consule ; & , quantum opibus excellis , tantum te submitte , omniumque te commoditatibus , qui imperio tuo

tuo continentur , accommoda. Nec enim in
frummis opibus inaniter extolli , sed in ma-
xima potentia animum moderari , maximam
dignitatem conciliat ; neque plurimum sibi
quemquam tribuere , sed ad altissimum di-
gnitatis gradum eniti , excellentem gloriam
parit.

Quatuor autem vitiis illos contaminari
necesse est , qui insolenter efferuntur ; amen-
tia nempe , & humilitate , & inhumanitate ,
& impietate. Quid enim amentius , quam mi-
nime videre , quam fluxa & caduca sint omnia ,
quæ versantur in vita ; quam breui res hu-
manæ commutentur , & quam graues &
inopinati casus opes valde florentes euertant ?
Quid humilior & abiecius , quam humi
defixam mentem habere , nec cælestia atque
sempiterna , sed terrestria tantum & mortalia
contueri , opibusque fluxis & interituris ex-
tolli ? Quid inhumanius , quam homines reli-
quos contemnere , nec vlllo sensu communis
doloris ad misericordiam commoueri , sed
vltro etiam in alienis calamitatibus insulta-
re ? Quid scelestius , quam ita quemquam in
opibus suis gloriari , quasi eas non a Deo
accepisset ; sed ipse viribus & industria sua

omnes

omnes illas sibi parauisset ? Itaque homo superbus , & insolens in odium hominum irruit , & odium grauissimum in se cælestis numinis accendit. Non igitur poterit vllō modo vlla veræ pulchritudinis species esse cum superbia conjuncta. Is igitur tantum, qui est sine ostentatione sapiens , sine temeritate fortis , sine desidia moderatus , sine auaritiæ suspitione frugalis , sine leuitate magnificus , ita grauis vt non insolescat , ita modestus , vt non contemnatur ; qui omnes opes suas in communem vtilitatem conferendas arbitrat , neque se sibi , sed patriæ natum existimat ; & pulcher , & honestus , & clarus , & illustris est , & gratus , & amabilis atque iucundus , summoque imperio & gloria immortalī dignissimus. Hæc autem tam diuina forma facilius haberi , quam simulari , potest. Vt enim mulieres falsi candoris , atque ruboris medicamentis infectæ , acres etiam interdum amatores , immunditia mentiti coloris , offendunt , & , cum primum illius fucus color eluitur , id vitium , quod illæ emendare conabantur , magis apparet ; ita , qui sapientiam & virtutem simulant , ipsius picturæ fallacis odio homines a se abalienant ; & , cum
bre-

& in modestiæ laude & ornamento consistit; quid aliud in omni vita faciendum est iis, qui amari, qui diligi, qui in omnium ore versari, qui gloria immortalī frui cupiunt, nisi, ut rebus aliis neglectis, malis suasoribus repudiatis, & bonis & sapientibus ad suum nomen adjunctis, arrogantiam & fastidium execrentur, totoque pectore in studium sapientiæ, virtutis, & moderationis incumbant? Ergo si laude circumfluere, si omnium prædicatione celebrari, si ardentē ab omnibus amari pulchrum existimasti, si vnquam ad cupiditatem immortalitatis exarcisti; sapientiam inflammato studio consecrare, virtutis inuictum robur assumere, toto animo elegantiam moderationis amplectere, easque laudes omnes ad reipublicæ tibi commissæ fructum accommoda; & sic demum eam formam indues, quam omnes ament, admirentur, atque suspiciant, immortalique laude celebrent. Habes summum ingenium: habes naturam ad res maximas strenue gerendas aptam, & habilem: habes animum gloriæ studio ardentissime concitatum: habes opes summas: fac igitur, ut, cum tantis & naturæ, & fortunæ opibus abundes, tibi ipsi

414 DE REG. INSTITVT. ET DISCIP.

ne defis; & , cum aliquod pulchrum facinus obieris , aliquod præclarior & excellentius esse cogita , ad quod sit tibi omnibus viribus enitendum. Parui namque animi est mediocri laude esse contentum , & non maiora semper , & altiora moliri. Eueniet igitur , vt , si identidem ad tuas pristinas laudes aliquid addendum curaueris , in animo tuo nouus quotidie ornatus oriatur , & dignitatis tuæ species clarioribus in dies opibus illustretur. Quamuis autem ad excellentem dignitatem acri quodam studio , & summa contentione peruenias , illud tamen reputare debes , nihil esse tam excelsum atque magnificum , quo non sit illud , ad cuius exemplum effectum & informatum fuit , multo altius & magnificentius. Vt enim in reliquis rebus est quædam naturæ perfectio , cuius participatione & similitudine res singulæ cohærent , & in natura consistunt ; ita in pulchritudinis ratione est quædam species sempiterna , cuius similitudinem omnia , quæ honestate excellent , effecta sunt. Hæc est illa pulchritudo , quæ nulla labe maculari , nullo vitio contaminari , nulla ægritudine corrumpi , nulla vetustate deleri potest ; cum summa atque sempiterna sit ,

fit , sibi que similis in omni æternitate permaneat , totiusque honestatis in se fontem & principium contineat , & omnibus rebus splendidis , & honestis claritatis & honestatis causam afferat. Hanc igitur intueri , hanc amare , hanc imitari convenit omnes , qui magni viri futuri sunt , & hominum immortalis memoris consecrandi. Non solum igitur opus est , ut maiorum tuorum exempla tibi imitanda proponas ; sed multo etiam magis in diuina pulchritudine mentem tuam defigas , ut illius similitudine conformari , & opibus excitari possis ad summam decoris & laudis excellentiam. Sic autem te presentes intuebuntur , absentes tui desiderio flagrant , de te omnes loquentur , laudes tuas in cælum ferent , nomen tuum nulla vnquam inobscurabit obliuio.

Hæc me Regi dixisse putate. Vestrum autem est admonere , quæ sint huic orationi detrahenda , vel adjicienda ; ut , si fuerit aliquando necesse illa uti , non prorsus ineptus existimer ; quamquam ineptiarum suspitionem vitare non potui , cum in scita causa tam longa oratione usus fuerim. Sed soli sumus , & otio nunc abundamus , & , si quid in-

416 DE REG. INSTITVT. ET DISCIP.

ineptum nobis exciderit , secretum tenebimus.

Oratio quidem , inquit M. , bene longa fuit , sed ea iucunditate confpersa , vt confidam fore , vt facile in animum Regis influat.

Id quidem , inquam , si fiet , non tam orationis iucunditate , quam Regis ipsius benignitate fiet. Sed velim intelligatis , quid actum sit. Tribus enim rebus (si meministis) diximus virtutem tradendam esse ; institutione , legibus , & disciplina. Primum enim est animus moribus honestis imbuendus ; deinde legibus instituendus ; postremo ratione atque disciplina confirmandus. De morum constitutione non pauca diximus , de legum etiam sanctionibus multa disputauimus , non mediocrem vero sapientiæ disciplinam in honestatis ratione positam arbitramur , de qua a nobis oratio habita est. Quod si hæc omnia ad Regis eruditionem conferantur , fieri certe poterit , vt nihil illo clarius existat. Cum enim ratio. & disciplina non pugnat cum legibus , & leges cum institutione puerili consentiunt , non potest animus tumultuari , & in contrarias partes distrahi ; & ita fiet , vt omni
per-

perturbatione vacuus , quid optimum factu sit , in vita perspiciat. Quamuis igitur nihil aliud dicerem , hæc mihi satis esse viderentur. Sed hominum impudentium insidiæ , quas extimesco , faciunt , vt plura mihi dicenda putem. Quare , nisi vobis aliud videtur , reliquum est , vt statum Regis moribus , & legibus , & ratione optime constituti validis etiam præfidiis muniamus.

Vt libet , inquit M. ; totum enim hunc diem tibi dicatum existima , vt institutam disputationem absoluas.

Hic Portugalensis , mea , inquit , sententia sermo in pomeridianum tempus differendus est , vt commodius ad finem perducì possit ; nunc enim commodum videtur , vt solis ardorem vitemus , & valetudini consulamus. Tu vero , me autem nominabat , apud nos hodie manebis.

Nescio , inquam , an id mihi per hospites liceat. Et præterea erat mihi sermo de rebus magnis cum Michaelè Valentino (homine religionis opinione præstante) statim post prandium habendus.

Non poteris , inquit , vllò modo tergiversari. Nam , quod ad culpam attinet , ego


418 DE REG. INSTITVT. ET DISCIP.

pœnam , si qua tibi fuerit imposta , sustinebo , & sermo iste , quem dicis , poterit in aliud tempus commodè reservari.

Non repugnabo, inquam, voluntati tuæ, maxime vero ob eam causam , ut longioris temporis opportunitate possimus intra hunc diem totam de Regis institutione disputationem concludere. Hæc ubi dicta fuere , in villam deducti ab illo sumus.

Finis I. Tomi.











—

